

元氏長慶集


一

LIBRARY
OF THE
UNIVERSITY OF ILLINOIS




v. 720

CHINA



元氏長慶集
六十卷集外
文章一卷

四部叢刊集部



元氏長慶集
六十卷集外
文章一卷

四部叢刊集部

上海涵芬樓借江南
圖書館威明嘉靖壬
子董氏刊本景印原
書版匡高營造尺六
寸五分寬四寸九分

元氏長慶集序

建安劉麟應禮

新唐書藝文志載其當時君臣所撰著文集篇目甚多太宗集四十卷至武后垂拱集一百卷今皆弗傳其餘名公鉅人之文所傳蓋十一二爾如梁苑文類會昌一品鳳池藁草笠澤叢書經緯穴餘遺榮霧居見於集錄所稱道者毋慮數百家今之所見者僅十數家而已是以是知唐人之文亡逸者多矣嗚呼樵夫牧叟詭異怪誕之說鬼神幻惑不根之言時時萃爲一書以詒好事者觀覽至於士君子道德仁義之文經國濟時之論乃或沉沒無聞豈不惜哉元微之有盛名於元和長慶間觀其所論奏莫不切當時務詔誥歌詞自成一家非大手筆曷臻是哉其文雖盛傳一時厥後浸亦不顯唯嗜書者時時傳錄不亦甚可惜乎僕之先子尤愛其文嘗手自

抄寫曉夕玩味稱歎不已蓋惜其文之工而傳之不久且遠
也廼者因閱手澤悲不自勝謹募工刊行庶幾元氏之文因
先子復傳於世斯文舊亡其序第冠以新唐書微之本傳則
微之之於文其所造之淺深可槩見矣宣和甲辰仲夏晦日
序

元氏長慶集目錄

第一卷

古詩

思歸樂

春鳩

春蟬

兔絲

古社

松樹

芳樹

桐花

雉媒

箭鏃

賽神

大觜鳥

分水嶺

四皓廟

第二卷

古詩

青雲驛

陽城驛



苦雨

種竹

和樂天贈樊著作

和樂天感鶴

諭寶

說劍

書異

和樂天折劍頭

第三卷

古詩

松鶴

競渡

寺院新竹

訓別致用

竹部

賽神

競舟

茅舍

後湖

八駿圖

畫松

遣興

野節鞭

第四卷

古詩

旱災自咎

蟲豸 并序

巴蛇

貉蜂

蜘蛛

蟻子

蝻子

浮塵子

蝻

楚歌

襄陽道

賦得魚登龍門

貞元曆

塞馬

鹿角鎮

感事

翰林東閣小松

第五卷

古詩

江表傳

清都夜境

春晚寄楊十二

永壽寺看牡丹

春餘遣興

憶雲之

別李三

秋夕遠懷

東西道

分流水

西還

含風夕

秋堂夕

酬樂天

楊子華畫

西州院

臺中鞠獄憶舊事

韋氏館泛舟

劉氏館集隱客

寄隱客

投吳端公崔院長

第六卷

古詩

寄吳士矩

宿層峯館寄樂天

酬樂天書懷

酬樂天登樂遊園

酬樂天早夏

酬樂天勸醉

和樂天初授戶曹

和樂天贈吳舟

和樂天秋題曲江

和樂天月夜作

和樂天秋題牡丹

春月

月臨花

紅芍藥

送王十一南行

三歎

遣晝

冬夜懷李侍御

西齋小松

周先生

第七卷

古詩

遣春

表夏

解秋

遣病

玉泉道中

寒

續遣病

感夢

和李相公慈竹

第八卷

古詩

酬李相公

酬獨孤二十六送歸通州

酬劉猛見送

酬樂天江州見寄

郵竹

落月

高荷

和裴校書鷺鷥

夜池

酬楊司業見寄

代杭民作一朝使君去

長慶曆

順宗挽歌詞

憲宗挽歌詞

恭王大妃挽詞

哭呂衡州

僧如展

遠安寺水亭

寒食日示姪

別孫村老人

劉家花

褒城驛

和樂天夢亡友

酬樂天見憶

與樂天葬杓直

第九卷

傷悼詩

夜閑

感小株夜合

醉醒

追昔遊

空屋題

初寒夜寄盧子蒙

謝子蒙見諭

諭子蒙

遣悲懷

旅眠

除夜

感夢

合衣寢

竹簟

聽彈烏夜啼

夢井

江陵三夢

張舊蚊幃

獨夜

六年春遣懷

荅友封

夢成之

哭小女降真

哭女樊

又哭女樊

哭子

感逝

妻滿月相唁

第十卷

律詩

代曲江老人

開元觀酬吳侍御

春期白二十二不至

黃明府詩

并序

酬白學士

第十一卷

律詩

紀懷贈李戶曹

荅胡靈之五十韻

酬許康佐

送人之嶺南

酬段丞

酬竇校書

泛江翫月

病聞幕中徵樂

酬友封話舊

送王協律遊杭越

送馬侍御迴

第十二卷

律詩

酬盧秘書

戲贈韓舍人

和權相公行次臨闕

酬樂天東南百韻

和樂天送客

獻榮陽公

第十三卷

律詩

酬樂天江樓夜吟

酬樂天待漏入閣

酬樂天游西湖

江邊

春

月

神麴酒

感石榴

度門寺

大雲寺

和友封題開善寺

第十四卷

律詩

牡丹

象人

松石

春雪映早梅

玉卮無當

數萸

九月盡

雨後花

早歸

晚秋

送林復夢赴辟

憶楊十二

夜合

新竹

秋相望

春病

山竹杖

悟禪

東臺去

戴光弓

劉頗詩

夜飲

褒城驛

閑

欲曙

寄胡靈之

夜雨

酬李六醉後

歸田

緣路

誚盧戡

遣春

歲日

臨湘樓

晚宴湘亭

酒醒

第十五卷

律詩

獨遊

洞庭湖

雪天

贈熊士登

別熊判官

水上寄樂天

夏陽亭

日高睡

輞川

天壇歸

雨後

晴日

直臺

行宮

醉行

指巡胡

飲新酒

香毬

景申秋

遣行

生春

嘉陵水

漫天嶺

百牢關

酬王全素

寄獻榮陽公

酬樂天寄蘄簞

酬李浙西

酬周從事

代杭民荅樂天

第十六卷

律詩

杏園

菊花

寄哥舒少府

幽棲

清都春霽

華嶽寺

天壇上境

尋西明寺僧

春遊

晚春

先醉

獨醉

宿醉

懼醉

羨醉

憶醉

病醉

擬醉

勸醉

任醉

同醉

狂醉

伴僧行

古寺

定僧

觀心處

智度師

牡丹

憶楊十二

送復夢

送劉太白

奉誠園

華嶽寺望山

野狐泉柳林

酬胡三問牡丹

酬樂天秋興

第十七卷

律詩

雪後宿同軌店

贈韋氏兄弟

永貞二年赦

大隱洞

餞李十二

題李十一居壁

靖安窮居

贈樂天

駱口驛

清明日

亞枝紅

梁州夢

南秦雪

江樓月

慙問囚

江上行

漢江笛

郵亭月

嘉陵驛

百牢關

江花落

嘉陵江

西縣驛

望喜驛

好時節

夜深行

望驛臺

贈咸陽少府

贈呂校書

封書

李著作花園

燈影

江陵途中寄樂天

渡漢江

哀病驄

送崔侍御

酬樂天翫月

酬樂天寄通中散

第十八卷

律詩

陪諸公游通德湖

送友封

放言

酬劉二十八贈石枕

和嚴司空重陽日

送王十一游剡中

重送友封

送致用

靜勝寺

書樂天紙

酬孝甫

和樂天招蔚章

折花贈行

寄劉頴

過王十一館

送孫勝

游三寺

遠望

尋李校書

襄陽樓

游碧澗寺

和竇容州

盧頭陀

醉別

第十九卷

律詩

宴望岳樓

岳陽樓

寄庾敬休

花栽

宿石機

遭風

贈崔元儒

嚴澗宅

送杜元穎

病馬寄李尚書

李中丞

盧評事

張校書

韋兵曹

贈童子郎

桐花詩

西歸絕句

留呈夢得

小碎

和樂天高相宅

仇家酒

贈雲寂

澧西別樂天

寄曇上人

題智師蘭若

蒼溪縣

贈吳渠州

夢李紳

律詩

新政縣

南昌灘

見樂天詩

夜坐

聞樂天授江州司馬

歲月贈拒非

送盧戡

雨聲

離筵作

嘉陵水

閬州開元寺

寄樂天書

得樂天書

又寄樂天

酬知退

通州

酬樂天書後

相憶淚

喜李十一到

與李十一夜飲

贈李十一

寒食日

三兄遺白角中

別李十一

酬樂天醉別

酬樂天雨後

和樂天過秘閣

贈楊秘書

王家亭子

酬樂天見夢

琵琶

春詞

第二十一卷

律詩

酬樂天春見寄

酬樂天武關南

酬樂天舟泊夜

酬樂天見寄

酬樂天得稭所寄

和樂天尋郭道士

酬樂天寄生衣

酬樂天得予詩

酬樂天見賀

酬樂天歎窮愁

酬樂天三月三日

酬樂天歎損傷

瘴塞

紅荊

黃草峽聽琴

書劍

內狀詩

別毅郎

自責

送公度

喜五兄至

杏花

詠春風

贈別楊巨源

寄樂天

聽妻彈別鶴操

和王侍郎放勝後

第二十二卷

律詩

酬樂天喜鄰郡

再酬

贈樂天

重贈

西陵晚眺

以州宅誇樂天

重誇州宅景色

酬樂天

寄樂天

戲贈樂天

重酬樂天

再酬復言

整比舊詩寄樂天

酬樂天餘思

寄樂天

酬樂天雪中

和樂天早春

郡齋感懷

代郡齋神荅樂天

酬樂天寄別

和樂天東樓

餘杭周從事

寄浙西李大夫

初除浙東

爲樂天勘詩

長慶曆尾

第二十三卷

樂府

樂府古題序

夢上天

冬白紵

將進酒

採珠行

董逃行

憶遠曲

夫遠征

織婦詞

田家詞

俠客行

君莫非

田野狐兔行

當來日大難行

人道短

苦樂相倚曲

出門行

捉捕歌

古築城曲

估客樂

第二十四卷

樂府

連昌宮詞

望雲騅馬歌

上陽白髮人

華原磬

五絃彈

西涼伎

法曲

馴犀

立部伎

驃國樂

胡旋女

蠻子朝

縛戎人

陰山道

第二十五卷

樂府

有鳥

有酒

華之巫

廟之神

第二十六卷

樂府

村花晚

紫躑躅

山枇杷

樹上烏

琵琶歌

小胡笳

去杭州

南家桃

志堅師

荅子蒙

辛夷花

廳前栢

夜別筵

三泉驛

河滿子

丁溪館

望海亭

第二十七卷

賦

樂爲御

善歌如貫珠

鎮圭

觀兵部馬射

郊天日五色祥雲

第二十八卷

策

才識兼茂明於體用

第二十九卷

書

論教本書

與史館韓侍郎書

第三十卷

書

敘詩寄樂天書

誨姪等書

第三十一卷

書

代諭淮西書

上門下裴相公書

第三十二卷

表奏

敘奏

獻事表

第三十三卷

表

論追制表

論諫職表

論討賊表

論西戎表

同州刺史謝表

賀誅李亦表

第三十四卷

表

賀聖體平復御紫宸殿受朝賀表

代李中丞謝官表

爲嚴司空謝招討使表

賀誅吳元濟表

爲蕭相讓官表

爲蕭相謝追贈祖父祖妣亡父表

狀

遷廟議狀

錢貨議狀

兩省供奉官諫狀

駕幸溫湯狀

第三十五卷

狀

辨日旁瑞氣狀

謝准朱書撰田弘正碑文狀

謝賜告身衣服并馬狀

謝賜設狀

論御札狀

進田弘正碑文狀

進詩狀

進西北邊圖經狀

進西北邊圖狀

進雙雞等狀

第三十六卷

狀

進馬狀

為蕭相謝告身狀

為令狐相公謝賜金石凌紅雪狀

爲蕭相國謝太夫人國號告身狀

爲令狐相國謝回一子官與弟狀

賀降誕日德音狀

中書省議賦稅及鑄錢狀

中書省議舉縣令狀

第三十七卷

狀

彈奏劔南東川節度使狀

彈奏山南西道兩稅外草狀

第三十八卷

狀

論浙西觀察使封杖決殺縣令狀

論轉牒事狀

爲河南府百姓訴車狀

同州奏均田狀

第三十九卷

狀

論當州朝邑等三縣代納夏陽韓城兩縣率錢狀
浙東論罷進海味狀

第四十卷

制誥

制誥序

冊文武孝德皇帝赦文

處分幽州德音

戒勵風俗德音

第四十一卷

制誥

招討鎮州制

批宰臣請上尊號第二表

批宰臣請上尊號第三表

批宰臣請上尊號第四表

批劉悟謝上表

批王播謝官表

幽州平告太廟祝文

秋分日祭百神文

第四十二卷

制誥

授王播中書侍郎平章事兼鹽鐵使制

加裴度幽鎮兩道招撫使制

加裴度鎮州四面招討使制

授劉總守司徒兼侍中制

許劉總出家制

加烏重胤檢校司徒制

第四十三卷

制誥

授李愿檢校司空宣武軍節度使制

授劉悟檢校司空幽州節度使制

授劉悟昭義軍節度使制

加陳楚檢校左僕射制 授馬摠檢校刑部尚書制

授田布魏博節度使制

第四十四卷

制誥

授楊元卿涇原節度使制

授牛元翼深冀等州節度使制

授牛元翼成德軍節度使制

授韓臯吏部尚書制 授趙宗儒太常卿制

授韓臯尚書左僕射制

授李絳檢校右僕射兼兵部尚書制

第四十五卷

制誥

授王播刑部尚書諸道鹽鐵轉運等使制

授杜元穎戶部侍郎依前翰林學士

沈傳師授中書舍人 崔稜授尚書戶部侍郎

裴向授左散騎常侍 崔郾授諫議大夫

白居易授主客郎中知制誥

李拭授宗正卿 裴武授司農卿

第四十六卷

制誥

盧士玫權知京兆尹 劉士涇授太僕卿

裴堪授工部尚書致仕 于季友授右羽林將軍

邵同授太府少卿充入蕃使

元宗簡授京兆少尹 劉師老授右司郎中

楊嗣復授兵部郎中 鄭涵授尚書考功郎中

高允恭授戶部郎中判度支案

高允恭授侍御史知雜事

栢着授兵部員外郎

第四十七卷

制誥

高鉞授起居郎

班肅授尚書司封員外郎

獨孤朗授尚書都官員外郎

范季睦授尚書倉部員外郎

楊汝士授右補闕

唐慶授萬年縣令

裴注授侍御史

李珣授監察御史

王永太常博士

李從易宗正寺丞

盧均等三人授通事舍人

顏峴右贊善大夫

荆浦左清道率府率

王惠超左清道率府率

第四十八卷

制誥

崔弘禮鄭州刺史

元佑洋州刺史

袁重光雅州刺史

齊曠饒州刺史

元冀杭州刺史

韓察明州刺史

韋行立處州刺史

王進岌冀州刺史

論倚忻州刺史

王元琬銀州刺史

陳諫循州刺史

萬憬皓端州刺史

趙真長戶部郎中兼侍御史

王忻河南府永寧縣令

吉畋京兆府渭南縣令

駱恪壽州長史

裴溫兼監察御史裏行充清海軍節度叅謀

韓克從太子通事舍人 崔方實試太子詹事

李歸仙鎮州右司馬 齊煦華州定縣令

韋珩京兆府美原縣令

裴訓檢校尚書庫部郎中充河南節度判官

蔡少卿兼監察御史

李立則檢校虞部員外郎知鹽鐵東都留後

常亮元權知橋陵臺令 杜載監察御史

崔兢都官員外郎兼侍御史

第四十九卷

制誥

范傳式河南府壽安縣令

王昊兼侍御史

高端婺州長史

李昆滑州司馬

劉頌河中府河西縣令

王迪貶永州司馬

王悅昭武校尉行左千牛備身

崔適翊麾校尉守左千牛備身

姚文壽右監門衛將軍知內侍省

徐智爰右監門衛將軍 邵常政內侍省內謁者監

宋常春內僕局令

青州道渤海授金吾將軍等放還蕃

青州道渤海等授諸衛將軍放還蕃

令狐楚等加階

蕭俛等加勳

蕭俛等加封爵

李逢吉等加階

李光顏加階

王仲舒等加階

郭釗等轉勳

武儒衡等加階

崔元略等加階

胡証授定遠將軍

諸使收淄青敘錄將士等授官爵勲

劍南西川節度使下將士敘勲

鄭氏封才人

七女封公主

王承宗母吳氏封齊國太夫人

第五十卷

制誥

李愬妻韋氏封魏國夫人

贈田弘正父庭珪等

贈烏重胤父承玘等

韓愈父仲卿贈吏部侍郎

韋審規父漸贈官

田弘正母鄭氏追贈

孔戣母韋氏追封

李逢吉母王氏追封

李遜母崔氏追封博陵郡太君

王潛母齊國大長公主追封

王播母李氏追封

鄭餘慶贈太保

王承宗贈侍中

裴行立贈左散騎常侍

陳憲忠贈衡州刺史

贈衛弘本等

贈于頔謚

追封宋若華

入朝奚大首領梅落悟孤等二十五人授官階

入朝契丹首領達于只枕等二十九人果毅別將

劉惠通授謁者監

第五十一卷

序

白氏長慶集序

記

永福寺石壁法華經記
翰林承旨學士記

第五十二卷

元集

碑

沂國公魏博德政碑

唐故開府儀同三司南陽郡王張公碑文

第五十三卷

碑

唐故越州刺史兼御史中丞河東薛公神道碑

墓誌

故中書令贈太尉沂國公墓誌銘

唐故京兆府鰲屋縣尉元君墓誌銘

第五十四卷

墓誌

有唐贈太子少保崔公墓誌銘

唐故中大夫贈工部尚書李公墓誌銘

第五十五卷

墓誌

唐故福建等州觀察處置等使贈左散騎常侍裴公墓誌銘

行狀

故金紫光祿大夫檢校司徒贈太保鄭國公嚴公行狀

第五十六卷

墓誌

唐故萬州刺史劉君墓誌銘

唐故工部員外郎杜子美墓係銘

第五十七卷

墓誌

唐故朝議郎侍御史河陰留後元君墓誌銘

唐故建州浦城縣尉元君墓誌銘

第五十八卷

墓誌

夏陽縣令陸翰妻河南元氏墓誌銘

唐左千牛韋珮母段氏墓誌銘

葬安氏誌

第五十九卷

告贈文

告贈皇考右散騎常侍皇妣滎陽郡太君鄭氏文

告贈皇祖尚書兵部員外郎祖妣晉昌縣太君唐氏

文

告祀曾祖岐州叅軍府君文

告畚三陽神文

告畚竹山神文

報三陽神文

祈雨九龍神文

報雨九龍神文

第六十卷

祭文

祭淮瀆文

祭翰林白學士太夫人文

祭禮部庾侍郎太夫人文

祭亡妻韋氏文

祭亡友文

元氏長慶集目錄

元氏長慶集卷第一

古詩

思歸樂

春鳩

春蟬

兔絲

古社

松樹

芳樹

桐花

雉媒

箭鏃

賽神

大觜鳥

分水嶺

四皓廟

思歸樂

我作思歸樂盡作思歸鳴爾是此山鳥安得失鄉名應緣此
寄迹自古離人征陰愁感和氣俾爾從此生我雖失鄉去我
不失鄉情慘舒在方寸寵辱將何驚浮生居大塊尋丈可寄

身身安即形樂豈獨樂咸京命者道之本死者天之平安問
遠與近何言殤與彭君看趙工部八十支體輕交州二十載
始對長安城長安不須史復作交州行交州又累歲移鎮值
江陵歸朝新天子濟濟爲上卿肌膚無瘡色飲食康且寧人
生如晝夜死者如寶星喪車四門出何關炎瘴繁況我三十
餘年來未半程江陵道途近楚俗雲水清遐想玉泉寺久欲
登斯亭此去盡綿歷豈無心賞并紅殄日充腹碧澗朝析醒
釀酒待賓客寄書安弟兄閑窮四聲韻悶閱九部經身外無
所求眼前隨所營此意久已定誰能苟求榮所以官甚小朝
野已勢傾傾心豈不易巧詐神之刑萬物有本性況復人至
靈金埋無土色玉墜無瓦聲劒折有寸利鏡破有片明我可
我可刃爲兵我心終不死金石貫以誠此誠患不立
雖困道亦亨微哉滿山鳥叫噪何足聽

春鳩

春鳩與百舌音響詎同年如何一時語俱得春風憐猶知造物意當春不生蟬免教爭叫噪沸渭桃花前

春蟬

我自東歸日默苦春鳩聲作詩憐化工不遣春蟬生及來商山道山深氣不平春秋兩相似虫豸百種鳴風松不成韻蜩蟬沸如羹豈無朝陽鳳羞與微物爭安得天上雨奔渾河海傾蕩滌反時氣然後好晴明

兔絲

人生莫依倚依倚事不成君看兔絲蔓依倚榛與荆荆榛易蒙密百鳥撩亂鳴下有狐兔穴奔走亦縱橫稚童破將去柔蔓與之并翳薈生可耻束縛死無名桂樹月中出珊瑚石上生俊鶻度海食應龍升天行靈物本特達不復相纏縈纏縈

竟何者荆棘與飛莖

古社

古社基趾在人散社不神唯有空心樹妖狐藏魅人狐惑意
顛倒臊腥不復聞丘墳變城郭花草仍荆棘良田千萬頃占
作天荒田主人議芟斫怪見不敢前那言空山燒夜隨風長
奔壯聲鼓輦震高焰旗幟翻逡巡荆棘盡狐兔無子孫狐死
魅人醒煙消壇壝存繞壇舊田地給授有等倫農收村
社樹新團圓社公千萬歲永保村中民

松樹

華山高憧憧上有高高松株株遙各各葉葉相重重槐樹夾
道植枝葉俱冥蒙既無貞直幹復有骨挂蟲何不種松樹種
之搖清風秦時已曾種顛顛種不供可憐孤松意不與槐樹
同閑在高山頂樛盤虬與龍屈爲大厦棟庇蔭侯與公不肯

作行伍俱在塵土中

芳樹

芳樹已寥落孤英尤可嘉可憐團圓葉蓋覆深深花遊蜂競
鑽刺鬪雀亦紛拏天生細碎物不愛好光華非無殲殄法念
爾有生涯春雷一聲發驚燕亦驚蛇清池養神蔡已復長蝦
蟆雨露貴平施吾其春草芽

桐花

朧月上山館紫桐垂好陰可憐暗澹色無人知此心舜沒蒼
梧野鳳歸丹穴岑遺落在人世光華那復深年年怨春意不
競桃杏林唯占清明後牡丹還復侵況此空館閉云誰恣幽
尋徒煩鳥噪集不語山嶽岑滿院青苔地一樹蓮花簪自開
還自落暗芳終暗沉爾生不得所我願栽爲琴安置君王側
調和元首音安問宮徵角先辨雅鄭淫宮絃春以君君若春

日臨商絃廉以臣臣作旱天霖人安角聲暢人困鬪不任羽
以類萬物祆物神不歆微以節百事奉事罔不欽五者苟不
亂天命乃可忱君若問孝理彈作梁山吟君若事宗廟拊以
和球琳君若不好諫願獻觸箴君若不罷獵請聽荒于禽
君若侈臺殿雍門可霑襟君若傲賢雋鹿鳴有食芩君聞祈
招什車馬勿駸駸君若欲敗度中有式如金君聞薰風操志
氣在悵悵中有阜財語勿受來獻賕北里當絕聽禍莫大於
婦南風苟不競無往遺之擒姦聲不入耳巧言寧孔壬梟音
亦云革安得沴與稔天子旣穆穆群材亦森森劒士還農野
絲人歸織紉丹鳳巢阿閣文魚游碧潯和氣浹寰海易若漑
蹄涔改張乃可鼓此語無古今非琴獨能爾事有諭因針感
爾桐花意閑怨杳難禁待我持斤斧置君爲大琛

雙雉在野時可憐同嗜欲毛衣前後成一種文章足一雉獨
先飛衝開芳草綠網羅幽草中暗被潛羈束剪刀摧六翮絲
線縫雙目啖養能幾時依然已馴熟都無舊性靈返與他心
腹置在芳草中翻令誘同族前時相失者思君意彌篤朝朝
舊處飛往往巢邊哭今朝樹上啼哀音斷還續遠見爾文章
知君草中伏和鳴忽相召鼓翅遙相矚畏我未肯來又啄翳
前栗斂翮遠投君飛馳勢奔感骨挂在君前向君聲促促信
君決無疑不道君相覆自恨飛太高踈羅偶然觸看看架上
鷹擬食無罪肉君意定何如依舊彫籠宿

箭鏃

箭鏃本求利淬礪良甚難礪將何所用礪以射凶殘不礪射
不入不射人不安爲盜即當射寧問私與官夜射官中盜中
之血闌干帶箭君前訴君王悄不歡頃曾爲盜者百箭中心

橫競將兒女淚滴瀝助辛酸君王責良師此禍誰爲端帥言
發矧罪不使刃稍利君王不忍殺逐之如迸丸仍令後來箭
盡可頭團團發矧去雖遠礪鋌心不闌會射蛟螭盡舟行無
惡瀾

賽神

村落事妖神林木大如村事來三十載巫覡傳子孫村中四
時祭殺盡雞與豚主人不堪命積燎曾欲燔旋風天地轉急
雨江河翻採薪持斧者弃斧縱橫奔山深多掩映僅免鯨鯢
吞主人集鄰里各各持酒鐏廟中再三拜願得禾稼存去年
大巫死小覡又妖言邑中神明宰有意効西門焚除計未決
伺者迭乘軒廟深荆棘厚但見狐兔鐏巫言小神變可驗牛
馬蕃邑吏齊進說幸勿禍鄉原踰年計不定縣聽良亦煩涉
夏祭時至因令修四垣憂虞神憤恨玉帛意彌敦我來神廟

下簫鼓正喧喧因言遣妖術滅絕由本根主人中罷舞許我
重疊論蜉蝣生濕處鴟鴞集黃昏主人邪心起氣焰日夜繁
狐狸得蹊徑潛穴主人園腥臊襲左右然後託丘樊歲深樹
成就曲直可輪轅幽妖盡依倚萬惟之所屯主人一心好四
面無籬藩命樵執斤斧惟木寧遽斃主人且傾聽再爲諭清
渾阿膠在末派罔象游上源靈藥逡巡盡黑波朝夕噴神龍
猷流濁先伐鼉與龜鼉鼉在龍穴妖氣常鬱溫主人惡淫祀
先去邪與昏昏邪中人意蠱禍蝕精魂德勝妖不作勢強威
亦尊計窮然後賽後賽復何恩

大觜鳥

陽鳥有二類觜白者名慈求食哺慈母因此名之飲啄頗
廉儉音響亦柔雌百巢同一樹栖宿不復疑得食先返哺一
身長苦羸緣知五常性翻被衆禽欺其一觜大者攫搏性貪

癡有力強如鵲有爪利如錐音聲甚呖啗潛通妖恠詞受日
餘光庇終天無死期翺翔富人屋栖息屋前枝巫言此鳥至
財產日豐宜主人一心惑誘引不知疲轉見鳥來集自言家
轉孽白鶴門外養花鷹架上維專聽鳥喜怒信受若神龜舉
家同此意彈射不復施往往清池側却令鷓鴣隨群鳥飽梁
肉毛羽色澤滋遠近恣所往貪殘無不爲巢禽攫雛卯廢馬
啄瘡痕滲瀝脂膏盡鳳皇那得知主人一朝病爭向屋簷窺
吻鷺呼群鵬翩翩集恠鴟主人偏養者嘯聚最奔馳夜半仍
驚噪鵂鷂逐老狸主人病心怯燈火夜深移左右雖無語奄
然皆淚垂平明天出日陰魅走參差鳥來屋簷上又惑主人
兒兒即富家業翫好方愛奇占募能言鳥置者許高貲隴樹
巢鸚鵡言語好光儀美人傾心獻彫籠身自持求者臨軒坐
置在白玉墀先問鳥中苦便言鳥若斯衆鳥齊搏鏢翠羽幾

離披遠擲千餘里美人情亦衰舉家懲此患事烏踰昔時向
言池上鷺啄肉寢其皮夜漏天終曉陰雲風定吹况爾烏何
者數極不知危會結彌天網盡取一無遺常令阿閣上宛宛
宿長離

分水嶺

崔嵬分水嶺高下與雲平上有分流水東西隨勢傾朝同一
源出暮隔千里情風雨各自異波瀾相背驚勢高競奔注勢
曲已迴縈偶值當途石蹙縮又縱橫有時遭孔穴變作鳴咽
聲褊淺無所用奔波奚所營團團井中水不復東西征上應
美人意中涵孤月明旋風四面起井深波不生堅冰一時合
井深凍不成終年汲引絕不耗復不盈五月金石鑠既寒亦
既清易時不易性改邑不改名定如拱北極瑩若燒玉英君
門客如水日夜隨勢行君看守心者井水爲君盟

四皓廟

巢由昔避世堯舜不得臣伊呂雖急病湯武乃可君四賢胡
爲者千載名氛氲顯晦有遺跡前後疑不倫秦政虐天下黷
武窮生民諸侯戰必死壯士眉亦頰張良韓孺子推碎屬車
輪遂令英雄意日夜思報秦先生相將去不復嬰世塵雲卷
在孤岫龍潛爲小鱗秦皇轉無道諫者鼎鑊親茅焦脫衣諫
先生無一言趙高殺二世先生如不聞劉項取天下先生游
白雲海內八年戰先生全一身漢業日已定先生名亦振不
得爲濟世宜哉爲隱淪如何一朝起屈作儲貳賓安存孝惠
帝摧頽戚夫人捨大以謀細虬盤而螭伸惠帝競不嗣呂氏
禍有因雖懷安劉志未若周與陳皆落子房術先生道何屯
出處貴明白故吾今有云

元氏長慶集卷第二

古詩

青雲驛

陽城驛

苦雨

種竹

和樂天贈樊著作

和樂天感鶴

諭寶二首

說劍

書異

和樂天折劍頭

青雲驛

岿崑青雲嶺下有千仞谿徘徊不可上人倦馬亦嘶願登青
雲路若望丹霞梯謂言青雲驛繡戶芙蓉閨謂言青雲騎玉
勒黃金蹄謂言青雲具瑚璉并象犀謂言青雲吏的的顏如
珪懷此青雲望安能復久棲路途信不易風雨正淒淒已恠
杜鵑鳥先來山下啼歸家塵霧黯忽遇蓬篙妻延我開草戶

鑿竇宛如圭遂巡來叙別頭白顏色薰饋食頻叫噪假器仍
乞醯嚮時延我者共拾藿與梨乘我牂犵馬蒙茸大如羝悔
爲青雲意此意良噬臍昔游蜀關下有驛名青泥聞名意慘
愴若墜牢與狴雲泥異所稱人物一以齊復聞閭閻上下視
日月低銀城藥珠殿玉版金字題大帝直南北群仙侍東西
龍虎儼隊伍雷霆轟鼓輦元君理庭內左右桃花蹊丹霞爛
成綺素雲輕若綈天池光瀟瀟瑤草綠萋萋衆真千萬輩柔
顏盡如萸手持鳳尾扇頭戴翠羽笄雲韶互鏗戛霞服相提
攜雙雙發皓齒各各揚輕袿天祚樂未極溟波浩無隄穢賤
靈所惡安肯問黔黎桑田變成海寓縣烹爲壘虛皇不願見
雲霧重重翳大帝安可夢閭闔何由躋靈物可見者願以諭
端倪蟲蛇吐雲氣妖氛變虹蜺獲麟書諸冊秦龍醢爲鷃鳳
皇占梧桐叢雜百鳥栖野鶴啄腥蟲貪饗不如雞山鹿藏窟

穴虎豹吞其麋靈物比靈境冠履寧甚睽道勝即爲樂何慚
居稗稊金張好車馬於陵親灌畦在梁或在火不變玉與鶉
上天勿行行潛穴勿悽悽吟此青雲諭達觀終不迷

陽城驛

商有陽城驛名同陽道州陽公沒已久感我淚交流昔公孝
父母行與曾閔儔旣孤善兄弟兄弟和且柔一夕不相見若
懷三歲憂遂誓不婚娶沒齒同衾稠妹夫死他縣遺骨無人
收公令季弟往公與仲弟留相別竟不得三人同遠遊共負
他鄉骨歸來藏故丘棲遲居夏邑邑人無苟媮里中競長短
來問劣與優官刑一朝耻公短終身羞公亦不遺布人自不
盜牛問公何聽爾忠信先自修發言當道理不顧黨與讐聲
香漸翕習冠蓋若雲浮少者從公學老者從公遊往來相告
報縣尹與公侯名落公卿口湧如數萬舟天子得聞之書下

再三求書中願一見天異呈天虬何以持爲聘束帛藉琳球
何以持爲御駟馬駕安輶公云自挺操事殷不事周我實唐
士庶食唐之田疇我聞天子憶安敢專自由來爲諫大夫朝
夕侍冕旒希夷惇薄俗密勿獻良籌神醫不言術人瘼曾暗
瘳月請諫官俸諸弟相對謀皆曰親戚外酒散目前愁公云
不有爾安得此嘉猷施餘盡沽酒客來相獻酬日旰不謀食
春深仍弊裘人心良戚戚我樂獨油油貞元歲云暮朝有曲
如鈎風波勢奔蹙日月光綢繆齒牙屬爲猾禾黍暗生蠹豈
無司言者肉食吞其喉豈無司搏者利柄扼如鞲鼻復勢氣
塞不得辯薰猶公雖未顯諫惴惴如患瘤飛章八九上皆若
珠暗投炎炎日將熾積燎無人抽公乃帥其屬決諫同報仇
延英殿門外叩閤仍叩頭且曰事不止臣諫誓不休上知不
可遏命以美語酬降官司成署俾之爲贅疣姦心不快活擊

刺礪戈矛終爲道州去天道竟悠悠遂令不言者反以言爲
訖喉舌坐成木鷹鷂化爲鳩避權如避虎冠豸如冠猴平生
附我者詩人稱好逑私來一執手恐若墜諸溝送我不出戶
決我不迴眸唯有太學生各具糧與糒咸言公去矣我亦去
荒陬公與諸生別步步駐行騶有生不可訣行行過閩甌爲
師得如此得爲賢者不道州聞公來鼓舞歌且謳昔公居夏
邑狎人如狎鷗况自爲刺史豈復援鼓桴滋章一時罷教化
天下適炎瘴不得老英華忽已秋有鳥哭楊震無兒悲鄧攸
唯餘門弟子列樹松與楸今來過此驛若弔羅洲祠曹諱
羊祜此驛何不侔我願避公諱名爲避賢郵此名有深意蔽
賢天所尤吾聞玄元教日月冥九幽幽陰蔽賢者永爲幽陰
囚

苦雨

江瘴氣候惡庭空田地蕪煩昏一日內陰暗三四殊巢燕汚
牀席蒼蠅點肌膚不足生詬怒但苦寡懽娛夜來稍清晏放
體階前呼未飽風月思已爲蚊蚋圖我受簪組身我生天地
爐炎蒸安敢勸蟲豸何時無凌晨坐堂廡努力泥中趨官家
事不了尤悔亦可虞門外竹橋折馬驚不敢踰迴頭命僅御
向我色踟躕自顧方落安能相詰誅隱忍心憤恨翻爲聲
煦愉逡巡崔嵬日杲曜東南隅已復雲蔽翳不使及泥塗良
農盡蒲葦厚地積潢污三光不得照萬物何由蘇安得飛廉
車磔裂雲將軀又提精陽劒蛟螭支節屠陰沴皆電掃幽妖
亦雷驅煌煌啓閭闔軋軋掉乾樞東西生日月晝夜如轉珠
百川朝巨海六龍踏亨衢此意倍寥廓時來本須臾今也泥
鴻洞龜鼃真得途

種竹 并序

昔樂天贈予詩云無波古井水有節秋竹竿予秋來種竹廳下因而有懷聊書十韻

昔公憐有直比之秋竹竿秋來苦相憶種竹廳前看失地顏色改傷根枝葉殘清風猶淅淅高節空團團鳴蟬聒暮景跳蛙集幽欄塵土復晝夜梢雲良獨難丹丘信云遠安得臨仙壇瘴江冬草綠何人驚歲寒可憐亭亭幹一一青琅玕孤鳳竟不至坐傷時節闌

和樂天贈樊著作

君爲著作詩志激詞且溫璨然光揚者皆以義烈聞千慮竟一失冰玉不斷痕謬予頑不肖列在數子間因君譏史氏我亦能具陳義黃恥云遠載籍無遺文煌煌二帝道鋪設在典墳堯心唯舜會因著爲話言臯夔益稷禹粗得無間然緬然千載後後聖曰孔宜迥知皇王意綴書爲百篇是時游夏輩

不敢措舌端信哉作遺訓職在聖與賢如何至近古史氏爲
閑官但令識字者竊弄刀筆權由心書曲直不使當世觀貽
之千萬代疑言相並傳人人異所見各各私所偏以是曰褒
貶不如都無焉況乃丈夫志用捨貴當年願予有微尚願以
出處論出非利吾已其出貴道全全道豈虛設道全當及人
全則富與壽虧則飢與寒遂我一身逸不如萬物安解懸不
澤手拯溺無折旋神哉伊尹心可以冠古先其次有獨善善
已不善民天地爲一物死生爲一源合雜分萬變忽若風中
塵抗哉巢由志堯舜不可遷捨此二者外安用名爲賓持謝
著書郎愚不願有云

和樂天感鶴

我有所愛鶴毛羽霜雪妍秋望一滴露聲洞林外天自隨衛
侯去遂入大夫軒雲貌久已隔玉音無復傳吟君感鶴操不

覺心惕然無乃予所愛誤爲微物遷因茲諭直質未免柔細
牽君看孤松樹左右蘿葛纏旣可習爲飽亦可薰爲釜期君
常善救勿令終弃捐

諭寶

沉玉在弱泥泥弱玉易沉扶桑寒日薄不照萬丈心安得潛
淵虬拔壑超鄧林泥封泰山陟水散旱天霖洗此泥下玉照
曜臺殿深刻爲傳國寶神器人不侵

冰置白玉壺始見清皎潔珠穿殷紅縷始見明洞澈鑊鄧無
人淬兩刃幽壤鐵秦鏡無人拭一片埋霧月驥蹕環堵中骨
附筋入節虬蟠尺澤內魚衆哇同穴舩艫無巨海浮浮矜漢
涌棟梁無廣厦顛倒卧霜雪大鵬無長空舉翮受羈綆豫樟
無厚地危抵眞碗艱圭璧無卞和甘與頑石列舜禹無陶堯
名隨腐草滅神功伏神物神物神乃別人神不世出所以神

功絕神物豈徒然用之乃施設禹功九州理舜德天下悅璧
國充傳璽圭用祈太折木尋豫樟幹九萬大鵬歇棟梁庇生
民餘艤濟來哲虬騰旱天雨驥騁流電犁鏡懸姦膽露劍拂
妖蛇裂珠生照乘光冰瑩環坐熱此物比在泥斯言爲誰發
于今盡凡耳不爲君陳說

說劍

吾友有寶劍密之如密友我實膠漆交中堂共盃酒酒酣肝
膽露恨不眼前剖高唱荆卿歌亂擊相如缶更擊復更唱更
舞亦更壽白虹坐上飛青蛇匣中吼我聞音響異疑是十將
鬪爲君再拜言神物可見不君言我所重我自爲君取迎篋
已焚香近鞘先澤手徐抽寸寸刃漸屈彎彎肘殺殺霜在鋒
團團月臨紐逡巡潜虬躍鬱律驚左右霆電滿室光蛟龍逐
奮走何人爲鑄之干將別來久鑄時近山破藏在松桂朽幽

質獄中埋神人水心守本是泥稽淬果非雷煥有我欲評劒
功願君良聽受劒可剗犀兕劒可切瓊玖劒決天外雲劒衝
日中斗劒隙妖虵腹劒拂佞臣首太古初斷鼇武王親擊紂
燕丹卷地圖陳平綰花綬曾被桂樹枝寒光射林藪曾經鑄
農器利用剪稂莠神物終變化復爲龍牝牡晉末武庫燒脫
然排戶牖爲欲掃群胡散作彌天帚自茲失所徃豪英共爲
詬音苟今復誰人鑄挺然千載後旣非古風壺無乃近鴟九自
我與君遊平生益自負況擎寶劒出重以雄心扣此劒何太
奇此心何太厚勸君慎所寶所用無或苟潛將辟魑魅勿但
驚妾婦留斬泓下蛟莫試街中狗古今困泥滓我亦全塵垢
俗耳驚大言逢人少開口

書異

孟冬初寒月渚澤蒲尚青飄蕭北風起皓雪紛滿庭行過冬

元集二
至後凍閉萬物零奔渾馳暴雨驟鼓轟雷霆傳云不終日通
宵曾莫停瘴雲愁拂地急雷疑注瓶洶湧潢潦濁噴薄鯨鯢
腥跳趨井哇喜突元水恠形飛蚋奔不死脩虵蟄再醒應龍
非時出無乃歲不寧吾聞陰陽戶啓閉各有局後時無肅殺
廢職乃玄冥座配五天帝薦用百品珍權爲祝融奪神其焉
得靈春秋雷電異則必書諸經仲冬雷雨苦願省蒙赦刑

和樂天折劍頭

聞君得折劍一片雄心起詎憶鐵蛟龍潛在延津水風雲劍
一合呼吸期萬里雷震山嶽碎電斬鯨鯢死莫但寶劍頭頭
頭非此比

元氏長慶集卷第二

元氏長慶集卷第三

古詩

松鶴

競渡

寺院新竹

訓別致用

竹部

賽神

競舟

茅舍

後湖

八駿圖

畫松

遣興
十首

野節鞭

松鶴

渚宮本坳下佛廟有臺閣臺下三四松低昂勢前却是時晴
景麗松梢殘雪薄日色相玲瓏纖雲映羅幕逡巡九霄外似
振風中鐸漸見尺帛光孤飛唳空鶴徘徊耀霜雪顧慕下寥

廊踏動樛盤枝龍蛇互跳躍俯瞰九江水旁瞻萬里壑無心
盼鳥鳶有字悲城郭清角已沉絕虞韶亦冥冥騫翮勿重留
幸及鈞天作

競渡

吾觀競舟子因測大競源天地昔將競蓬勃晝夜昏龍蛇相
嗔薄海岱俱崩奔群動皆攪撓化作流渾渾數極鬪心息大
和蒸混元一氣忽爲二矗然畫乾坤日月復照曜春秋遞寒
溫八荒坦以曠萬物羅以繁聖人中間立理世了不煩延綿
復幾歲逮及義與軒炎皇熾如炭蚩尤扇其燔有熊競心起
驅獸出林樊一戰波委焰再戰火燎原戰訖天下定號之爲
軒轅自是豈無競瑣細不復言其次有龍競競渡龍之門龍
門浚如瀉漂射不可援赤鱗化時至唐突鰭鬣掀乘風瞥然
去萬里黃河翻接瞬電烜出微吟霹靂喧傍瞻曠宇宙俯瞰

論

卑崑崙庶類咸在下九霄行易捫條辭蛙黽允遽排天帝閭
迴悲曝鰓者未免鯨鯢吞帝命澤諸夏不弃蟲與昆隨時布
膏露稱物施厚恩草木霑我潤豚魚望我蕃嚮來同競輩豈
料由我存壯哉龍競渡一競身獨尊捨此皆蟻鬪競舟何足

寺院新竹

寶地琉璃坼紫苞琅玕踴亭亭巧於削一一大如拱冰碧林
外寒峯巒眼前聳槎枒矛戟合屹屹龍蛇動煙泛翠光流歲
餘霜彩重風朝竿籟過雨夜鬼神恐佳色有鮮妍修莖無擁
腫節高迷玉鏤籜綴疑花捧詎必太山根本自仙壇種誰令
植幽壤復此依閑冗居然霄漢姿坐受藩籬壅噪集勸鳴烏
炎昏繁蟻蠓未遭伶倫聽非安子猷寵威鳳來有時虛心豈
無奉

訓別致用

風行自委順雲合非有期神哉心相見無朕安得離我有懇
憤志三十無人知修身不言命謀道不擇時達則濟億兆窮
亦濟毫釐濟人無大小誓不空濟私研機未淳熟與世忽參
差意氣一爲累猜仍良已隨昨來竄荆蠻分與平生隙那言
返爲遇獲見心所奇一見肺肝盡坦然無滯疑感念交契定
淚流如斷縻此交定生死非爲論盛衰此契宗會極非謂同
路岐君今虎在匣我亦鷹就羈馴養保性命安能奮殊姿玉
色深不變井水撓不移相看各年少未敢深自悲

竹部

石首縣界

竹部竹山近歲伐竹山竹伐竹歲亦深深林隔深谷朝朝冰
雪行夜夜豺狼宿科首霜斷蓬枯形燒去聲餘木一束十餘莖
千錢百餘束得錢盈千百得粟盈斗斛歸來不買食父子分

半菽持此欲何爲官家歲輸促我來荆門掾寓食公堂肉豈
唯遍妻孥亦以及僮僕分爾有限資飽我無端腹媿爾不復
言爾生何太感

賽神

楚俗不事事巫風事妖神事妖結妖社不問踈與親年年十
月暮珠稻欲垂新家家不斂穫賽妖無富貧殺牛貰官酒椎
鼓集頑民喧闐里間隘兇酗日夜頻歲暮雪霜至稻珠隨隴
湮吏來官稅迫求質倍稱緡貧者日消鑠富亦無倉囤不謂
事神苦自言誠不真岳陽賢刺史念此爲俗屯未可一朝去
俾之爲等倫粗許存習俗不得呼黨人但許一日澤不得月
與旬吾聞國僑理三年名乃振巫風燎原久未必憐徙薪我
來歌此事非獨歌政仁此事四鄰有亦欲聞四鄰

競舟

楚俗不愛力費力爲競舟買舟俟一競競歛貧者賁年年四
五月蠶實麥小秋積水堰堤壞拔秧蒲稗稠此時集丁壯習
競南畝頭朝飲村社酒暮椎鄰舍牛祭舩如祭祖習競如習
讎連延數十日作業不復憂君侯饌良吉會客陳膳羞畫鷁
四來合大競長江流建標明取捨勝負死生求一時謹呼罷
三月農事休岳陽賢刺史念此爲俗疣習俗難盡去聊用去
其尤百舩不留一一競不滯留自爲里中戲我亦不寓遊吾
聞管仲教沐樹懲墮遊節此淫競俗得爲良政不我來歌此
事非獨歌此州此事數州有亦欲聞數州

茅舍

楚俗不理居居人盡茅舍茅苦竹梁棟茅踈竹仍罅邊緣隄
岸斜詰屈簷楹亞籬落不蔽肩街衢不容駕南風五月盛時
雨不來下竹蠹茅亦乾迎風自焚地防虞集鄰里巡警勞晝

夜遺燼一星然連延禍相嫁號呼憐穀帛奔走伐桑柘舊架已新焚新茅又初架前日洪州牧韋大念此常嗟訝牧民未及久郡邑紛如化峻邸儼相望飛薨遠相跨旗亭紅粉泥佛廟青鴛瓦韋斯事纔未終斯人久云謝有客自洪來洪民至今藉惜其心太亟作役無容暇臺觀亦已多工徒稍寬咤我欲他郡長三時務耕稼農收次邑居先室後臺榭啓閉既及期公私亦相借度材無強略庀役有定價不使及僭差粗得禦寒夏火至殊陳鄭人安極嵩華誰能繼此名名流襲蘭麝五袴有前聞斯言我非詐

後湖

荆有泥淥水在荆之邑郭郭前水在後謂之爲後湖環湖十餘里歲積潢與汚臭腐魚鼈死不植菰與蒲鄭公理三載嚴經其理用煦愉歲稔民四至隘廛亦隘衢公乃署其地爲民

先矢謨人人儻自爲我亦不庀徒下俚得聞之各各相俞俞
提攜翁及孫捧戴婦與姑壯者負礫石老亦捫茅芻斤磨片
片雪椎隱連連珠朝飧布庭落夜宿完戶樞鄰里近相告親
戚遠相呼驚者自爲驚酤者自爲酤雞犬豐中市人民岐下
都百年廢滯所一旦奧浩區我實司水土得爲官事無人言
賤事貴貴直不貴諛此實公所小安用歌袴襦荅云潭及廣
以至鄂與吳萬里盡澤國居人皆墊濡富者不容蓋貧者不
庇軀得不歌此事以我爲楷模

八駿圖詩

并序

良馬無世無之然而終不得與八駿並名何也吾聞八駿日
行三萬里夫車行三萬里而無毀輪壞轅之患蓋神車者行
三萬里而無喪精禔魄之患亦神之人也無是三神而得是
八馬乃破車掣御蹟人之乘也世焉用之今夫畫古者畫馬

而不畫車馭不畫所以乘馬者是不知夫古者也予因作詩以辨之

穆滿志空闊將行九州野神馭四來歸天與八駿馬龍種無凡性龍行無暫捨朝辭扶桑底暮宿崑崙下鼻息吼春雷蹄聲裂寒瓦尾掉滄波黑汗染白雲赭華輶本脩密翠蓋尚妍冶御者腕不移乘者寐不假車無輪扁斲轡無王良把雖有萬駿來誰是敢騎者

畫松

張璪畫古松往往得神骨翠帚掃春風枯龍戛寒月流傳畫師輩奇態盡埋沒纖枝無蕭灑頑幹空突兀乃悟埃塵心難狀煙霄質我去淅陽山深山看真物

遣興十首

始見梨花房坐對梨花白行看梨葉青已復梨葉赤嚴霜九

月半危帶幾時客況有高原秋風四來迫

莫厭夏日長莫悲冬日短欲識短復長君看寒又暖城中百萬家冤哀雜絲管草沒奉誠園軒車昔曾滿

孤竹迸荒園誤與蓬麻列久擁蕭蕭風空長高高節嚴霜蕩群穢蓬斷麻亦折獨立轉亭亭心期鳳皇別

豔豔剪紅英團團削翠莖託根在褊淺因依泥滓生中有合歡藥池枯難遽呈涼宵露華重低徊當月明

晚荷猶展卷早蟬遽蕭嘹露葉行已重況乃江風搖炎夏火再伏清商暗迴颺寄言抱志士日月東西跳

買馬買鋸牙買犢買破車養禽當養鵲種樹先種花人生負俊健天意與光華莫學蚯蚓輩食泥近土涯

愛直莫愛夸愛疾莫愛斜愛謨莫愛詐愛施莫愛奢擇才不求備任物不過涯用人如用已理國如理家

燿燿刀刃光彎彎弓面張入水斬犀兕入山椎虎狼里中無
老少喚作癲兒郎一日風雨會橫金歸故鄉

團團規內星未必明如月託跡近北辰周天無淪沒老人在
南極地遠光不發見則壽聖明願照高高闕

河清諒嘉瑞

河澌黃

吾帝真聖人時哉不我夢此時爲廢民

光陰本跳躑功業勞苦辛一到江陵郡三年成去塵

野節鞭

神鞭鞭宇宙玉鞭鞭騏驎緊綰野節鞭本用鞭鼉鼉使君鞭
甚長使君馬亦利司馬並馬行司馬馬顛顛短鞭不可施疾
步無由致使君駐馬言願以長鞭遺此遺不尋常此鞭不容
易金堅無繳遶玉滑無塵膩青蛇坼生石不刺山阿地烏龜
旋眼班不染江頭淚長看雷雨痕未忍駑駘試持用換所持
無令等閑弃荅云君何奇贈我君所貴我用亦不凡終身保

明義誓以鞭姦頑不以鞭蹇躋指搗狡兔蹤決撻性平龍睡
惜令寸寸折節節不虛墜因作換鞭詩詩成謂同志而我得
聞之笑君年少意安用換長鞭鞭長亦奚爲我有鞭尺餘泥
拋風雨漬不擬閑贈行唯將爛誇醉春來信馬頭款緩花前
轡願我遲似攣饒君疾如翅

元氏長慶集卷第三

元氏長慶集卷第四

古詩

旱災自咎貽七縣宰

同州

蟲豸

巴蛇

蝮蜂

蜘蛛

蟻子

螟子

浮塵子

三首

蟲

楚歌

十首江陵時作

襄陽道

賦得魚登龍門

貞元曆

是歲秋八月太上改永貞傳位今皇帝

塞馬

鹿角鎮

洞庭湖中地名

感事

三首此後並是學士時詩

題翰林東閣前小松

旱災自咎貽七縣宰

同州

吾聞上帝心降命明且仁臣稹苟有罪胡不災我身胡為旱

一州禍此千萬人一旱猶可忍其旱亦已頻臘雪不滿地膏
雨不降春惻惻詔書下半減麥與緡半租豈不薄尚竭力與
筋竭力不敢憚慚戴天子恩纍纍婦拜姑訥訥翁語孫禾黍
日夜長足得盈我困還填折粟稅酬償貴麥鄰苟無公私責
飲水不爲貧歡言未盈口旱氣已再振六月天不雨秋孟亦
旣旬區區昧陋積禱祝非不勤日馳衰白顏再拜泣甲鱗歸
來重思忖願告諸邑君以彼天道遠豈如人事親團團囹圄
中無乃寃不申擾擾食廩內無乃姦有因軋軋輸送車無乃
使不倫遙遙負檐卒無乃役不均今年無大麥計與珠玉濱
村胥與里吏無乃求取繁符下歛錢急值官因酒嗔誅求與
撻罰無乃不逡巡生小下俚住不曾州縣門訴詞千萬恨無
乃不得聞強豪富酒肉窮獨無蒭薪俱由案牘吏無乃移禍
屯官分市井戶迭配水陸珍未蒙所償直無乃不敢言有一

於此事安可尤蒼旻借使漏刑憲得不虞鬼神自顧頑滯牧
坐貽災沴臻上羞朝廷寄下媿閭里民豈無神明宰爲我同
苦辛共布慈惠語慰此衢客塵

蟲豸詩

七首并序

天之居物於地也有獸宜山宜穴魚宜水宜泥鳥宜木宜洲
蟲宜草宜腐穢風雨會而寒暑時山川正而原野平衍然後
郭開屋室以州之人之宜人不得其宜而之鳥獸蟲魚之所
宜非蟲魚獸鳥之罪也然而自非聖賢人失所宜未嘗無不
得宜之歎云始辛卯年予掾荊州之地洲渚濕墊其動物宜
介其毛物宜翅羽予所舍又荊州樹木洲渚處晝夜常有翅
羽百族鬧心不得閒靜因爲有鳥二十章以自達又數年司
馬通州郡通之地叢穢卑褊丞瘴陰鬱焰爲蟲蛇備有辛螫
蛇之毒百而鼻塞者尤之蟲之輩亦百而蟲螟音莫浮塵蜘蛛

蟻子蝓蜂之類最甚害人其土民具能攻其所毒亦往往合於方籍不知者遭輒死予因賦其七蟲爲二十一章別爲序以備瑣細之形狀而盡藥石之所宜庶亦叔教之意焉

巴蛇三首并序

巴之蛇百類其大蟒其毒寒鼻蟒人常不見寒鼻常遭之毒人則毛髮皆豎起飲溪澗而泥沙盡沸驗方云攻巨蟒用雄黃煙被其腦則裂而鸚鳥能食其小者巴無是物其民常用禁術制之尤効

巴蛇千種毒其最鼻寒蛇掉舌翻紅焰盤身感白花噴人豎毛髮飲浪沸泥沙欲學叔教瘞其如多似麻

越嶺南濱海武都西陷戎雄黃假名石鸚鳥遠難籠詎有隙腸計應無破腦功巴山晝昏黑妖霧毒濛濛

漢帝斬蛇劍晉時燒上天自茲繁巨蟒往往壽千年白晝遮

長道青溪蒸毒煙戰龍蒼海外平地血浮舩

蝮蜂

三首并序

蝮蜂類而大巢在蹇鼻蛇穴下故毒螫倍諸蜂蠆中手足輒斷落及心胃則圯裂用它蜂中人之方療之不能愈巴人往往持禁以制之則差

巴蛇蟠窟穴下有巢蜂近樹禽垂翅依原獸絕蹤微遭斷手足厚毒破心胃昔甚招魂句那知眼自逢

梨笑清都月

京開元多梨花

觀蜂游紫殿春構脾分部伍嚼葉奉君

親翅羽頗同類心神固異倫安知人世裏不有噬人人

蘭蕙本同畹蜂蛇亦雜居害心俱毒螫妖焰兩吹噓雷螫吞噬止枯焚巢穴除可憐相濟惡勿謂禍無餘

蜘蛛

三首并序

巴蜘蛛大而毒其甚者身邊數寸而踣長數倍其身網羅竹

栢盡死中人瘡痛漚濕且痛癢倍常用雄黃苦酒塗所齧仍
用鼠婦蟲食其絲盡輒愈療不速絲及心而療不及矣

蜘蛛天下足巴蜀就中多縫隙容長踦虛空織橫羅縈纏傷
竹栢吞噬及蟲蛾爲送佳人喜珠櫛無柰何

網密將求食絲斜誤著人因依方託緒挂臂遂容身截道蟬
冠礙漫天玉露頻兒童憐小巧漸欲及車輪

稚子憐圓網佳人祝喜絲那知緣暗隙忽復嚙柔肌毒腠攻
猶易焚心療恐遲看看長妖緒和扁欲漣沲

蟻子

三首
并序

巴蟻衆而善攻榛楨徃徃木容完具而心節朽壞屋居者不
省其微而禍成傾壓

蟻子生無處偏因濕處生陰靈煩擾攘拾粒苦驚譁

平聲
牀上

主人病耳中虛藏鳴雷霆齟不省聞汝作牛聲

時術功雖細年深禍亦成攻穿漏江海嗜食困蛟鯨敢憚棲
櫟蠹深藏柱石傾寄言持重者微物莫全輕

攘攘終朝見悠悠卒歲疑詎能分牝牡焉得有蝼蛄蟻徙市
竟何意生涯都幾時巢由或逢我應似我相期

蟆子三首并序

蟆蚊類也其實黑而小不礙紗縠夜伏而晝飛聞柏煙與麝
香輒去蚊蟆與浮塵皆已蛇鱗中之細蟲耳故醫人成瘡秋
夏不愈膏楸葉而傅之則差

蟆子微於蚋朝繁夜則無毫端生羽翼針喙嗜肌膚暗毒應
難免羸形日漸枯將身遠相就不敢恨非辜

晦景權藏毒明時敢噬人不勞生妬怒祇足助酸辛隼皆看
無物地軀庇有鱗天方芻狗我甘與爾相親

有口深堪異趨時詎可量誰令通鼻息何故辨馨香沉水來

滄海崇蘭泛露光那能枉焚蕤爾衆我微茫

浮塵子

并序

浮塵蟻類也其實微不可見與塵相浮而上下人苦之徃徃蒙絮衣自蔽而浮塵輒能通透及人肌膚亦巢巴蛇鱗中故攻之用前術

可歎浮塵子纖埃喻此微寧論隔紗幌并解透綿衣有毒能成瘡無聲不見飛病來雙眼暗何計辨霧霏

乍可巢蛟睫胡爲附鱗鱗已微於蠹蠹仍害及仁人動植皆分命毫芒亦是身哀哉此幽物生死敵浮塵

但覺皮膚憊安知瑣細來因風吹薄霧向日誤輕埃暗嚙堪銷骨潛飛有禍胎然無防備處留待雪霜摧

蠹

三首并序

巴山谷間春秋常雨自五六月至八九月雨則多蠹道路群

飛噬馬牛血及蹄角旦暮尤極繁多人常用日中時趣程逮
雪霜而後盡其嚙人痛劇浮蟻而不能毒留肌故無療術
陰深山有瘴濕墊草多蝨衆噬雖刀毒群飛風雨聲汗粘瘡
瘡痛日曝苦辛行飽爾蛆殘腹安知天地情

千山溪沸石六月火燒雲自顧生無類那堪毒有群博牛皮
若截噬馬血成文蹄角尚如此肌膚安可云

辛螫終非久炎涼本遞興秋風自天落夏孽與霜澄一鏡開
潭面千鋒露石稜氣平蟲豸死雲路好攀登

楚歌十首

江陵時作

楚人千萬戶生死繫時君當壁便爲嗣賢愚安可分干戈長
浩浩篡亂亦紛紛縱有明在下區區何足云

陶虞事已遠尼父獨將明潛穴龍無位幽林蘭自生楚王謀
授邑此意復中傾未別子西語縱來何所成

平生漸昏惑無極轉承恩子建猶相貳伍奢安得存生居宮
雉悶死葬寢園尊豈料奔吳士鞭屍郢市門

懼盈因鄧曼罷獵爲樊姬盛德留金石清風鑒薄帷王忽
妖夢宋玉復淫詞萬事捐宮館空山雲雨期

宜僚南市住未省食人恩臨難忽相感解紛寧用言何如晉
夷甫坐占紫微垣看著五胡亂清談空自專

誰恃王深寵誰爲楚上卿包胥心獨許連夜哭秦兵千乘徒
虛爾一夫安可輕殷勤聘名士莫但倚方城

梁業雄圖盡遺孫世運消宣明徒有號江漢不相朝碑碣高
臨路松枝半作樵唯餘開聖寺猶學武皇妖

江陵南北道長有遠人來死別登舟去生心上馬迴榮枯誠
異日今古盡同灰巫峽朝雲起荆王安在哉

三峽連天水奔波萬里來風濤各自急前後苦相推倒入黃

牛漩驚衝濫湏堆古今流不盡流去不曾迴

八荒同日月萬古共山川生死既由命興衰還付天
栖栖王粲賦憤憤屈平篇各自埋幽恨江流終宛然

襄陽道

羊公名漸遠唯有峴山碑近日稱難繼曹王任馬羣
椒蘭俱下世城郭到今時漢水清如玉流來本爲誰

賦得魚登龍門

用登字

魚貫終何益龍門在苦登有成當作雨無用耻爲鵬
激浪誠難泝雄心亦自憑風雲潛會合鬚鬣忽騰凌
泥滓辭河濁煙霄見海澄迴瞻順流輩誰敢望同升

貞元曆

是歲秋八月太上改
永貞傳位今皇帝

象魏纔頒曆龍鑣已御天
猶看後元曆新署永貞年
半歲光陰在三朝禮數遷
無因書簡冊空得詠詩篇

塞馬

塞馬倦江渚今朝神彩生曉風寒獵獵乍得草頭行夷狄寢
烽候關河無戰聲何由當陣面從爾四蹄輕

鹿角鎮

洞庭湖
中地名

去年湖水滿此地覆行舟萬恠吹高浪千人死亂流誰能問
帝子何事寵陽侯漸恐鯨鯢大波濤及九州

感事三首

此後並是
學士時詩

爲國謀羊舌從來不爲身此心長自保終不學張陳
自笑心何劣區區辨所冤伯仁雖到死終不向人言
富貴年皆長風塵舊轉稀白頭方見絕遙爲一霑衣

題翰林東閣前小松

簷礙脩鱗亞霜侵簇翠黃唯餘入琴韻終待舜絃張

元氏長慶集卷第四

元氏長慶集卷第五

古體詩

清都夜境

春晚寄楊十二

永壽寺看牡丹

春餘遣興

憶雲之

別李三

秋夕遠懷

東西道

分流水

西還

含風夕

秋堂夕

酬樂天

楊子華畫

西州院

臺中鞫獄憶舊事

韋氏館泛舟

劉氏館集隱客

寄隱客

投吳端公崔院長

清都夜境

自此至秋夕七首並
年十六至十八時作

夜久連觀靜斜月何晶熒寥天如碧玉歷歷綴華星樓榭自
陰映雲牖深冥冥纖埃悄不起玉砌寒光清栖鶴露微影枯
松多恠形南廂儼容衛音響如可聆啓聖發空洞朝真趨廣
庭閑開藥珠殿暗閱金字經屏氣動方息凝神心自靈悠悠
車上馬浩思安得寧

春晚寄楊十二兼呈趙八

時楊生館於趙氏

蒙蒙竹樹深簾牖多清陰避日坐林影餘花委芳襟傾樽就
殘酌舒卷續微吟空際颺高蝶風中聆素琴廣庭備幽趣復
對商山岑獨此愛時景曠懷雲外心遷鶯戀嘉木求友多好
音自無琅玕實安得蓮花簪寄之二君子希見雙南金

與楊十二李三早入永壽寺看牡丹

曉入白蓮宮琉璃花界淨開敷多喻草凌亂被幽徑墜砌錦
地鋪當霞日輪映蝶舞香暫飄蜂牽藥難正籠處綵雲合露

湛紅珠瑩結葉影自交搖風光不定繁華有時節安得保全
盛色見盡浮榮希君了真性

春餘遣興

春去日漸遲庭空草偏長餘英間初實雪絮繁珠網好鳥多
息陰新篁已成響簾開斜照入樹裊游絲上絕跡念物閑良
時契心賞單衣頗新綽虛室復清敞置酒奉親賓樹萱自怡
養笑倚連枝花恭扶瑞藤杖步屨恣優游望山多氣象雲葉
遙卷舒風裾動蕭爽簪纓固煩雜江海徒浩蕩野馬籠赤霄
無由負羈鞅

憶雲之

爲魚實愛泉食辛寧避蓼人生既相合不復論窈窕滄海良
有窮白日非長皎何事一人心各在四方表泛若逐水萍居
爲附松蔦流浪隨所之縈紆牽所繞百齡頗踟促況復迷壽

天芟髮君已衰冠歲予非小娛樂不及時暮年壯心少感此
幽念綿遂爲長悄悄中庭草木春歷亂遞相擾奇樹花冥冥
竹竿鳳裊裊幽芳被蘭徑安得寄天抄萬里瀟湘魂夜夜南
枝鳥

別李三

階萱附瑤砌藁蘭偶芳藿高位良有依幽姿亦相託鮑叔知
我貧烹葵不爲薄半面契始終千金比然諾人生繫時命安
得無苦樂但感遊子顏又值餘英落蒼蒼秦樹雲去去緱山
鶴日暮分手歸楊花滿城郭

秋夕遠懷

旦夕天氣爽風飄葉漸輕星繁河漢白露逼衾枕清丹鳥月
中滅莎雞牀下鳴悠悠此懷抱況復多遠情

東西道

天皇開四極便有東西道萬古閱行人行人幾人老顧我倦
行者息陰何不早少壯塵事多那言壯年好

分流水

古時愁別淚滴作分流水日夜東西流分幾千里通塞兩
不見波瀾各自起與君相背飛去去心如此

西還

悠悠洛陽夢鬱鬱灞陵樹落日正西歸逢君又東去

含風夕

此後拾遺時作

炎昏勸煩久逮此含風夕夏服稍輕清秋堂已岑寂載欣涼
宇曠復念佳辰擲絡緯驚歲功顧我何成績青瑩微月鈞幽
暉洞陰魄水鏡涵玉輪若見淵泉壁參差簾牖重次第籠虛
白樹影滿空牀螢光綴深壁悵望牛斗星復爲經年隔露網
裊風珠輕河泛遙碧詎無深稠景感此年流易亦有遲暮年

壯年良自惜循環切中感感今追徃昔接瞬無停陰何言問
陳積馨香推蕙蘭堅貞諭松栢生物固有涯安能比金石況
茲百齡內擾擾紛衆役日月東西驅飛車無留跡來者良未
窮去矣定奚適委順在物爲營營復何益

秋堂夕

炎涼正迴互金火鬱相乘雲雷暗交構川澤方蒸騰清風一
朝勝白露忽已凝草木凡氣盡始見天地澄況此秋堂夕幽
懷曠無朋蕭條簾外雨倏閃案前燈書卷滿牀席蟪蛄懸復
升啼兒屢啞咽勸僮時寢興泛覽昏夜目詠謠暢煩膺況吟
獲鱗章欲罷久不能堯舜事已遠丘道安可勝蜉蝣不信鶴
蜩鷗肯窺鵬當年且不偶歿世何必稱胡爲揭聞見懷貶貶
愛憎焉用汨其泥豈在清如冰非白又非黑誰能點青蠅處
世苟無悶伴狂道非弘無言被人覺予亦笑孫登

酬樂天

時樂天攝尉
子爲拾遺

放鶴在深水置魚在高枝升沉或異勢同謂非所宜君爲邑
中吏皎皎鸞鳳姿顧我何爲者翻侍白玉墀昔作芸香侶三
載不暫離逮茲忽相失旦夕夢夢思崔巍驪山頂宮樹遙參
差祗得兩相望不得長相隨多君歲寒意裁作秋興詩上有
風塵苦下言時節移官家事拘束安得攜手期願爲雲與雨
會合天之垂

楊子華畫三首

楊畫遠於展何言今在茲依然古粧服但感時節移念君一
朝意遺我千載思子亦幾時客安能長苦悲

皓腕卷紅袖錦鞬臂蒼鸚故人斷絃心稚齒從禽樂當年惜
貴遊遺形寄丹艀骨象或依稀鉛華已寥落似對古人民無
復昔城郭子亦觀病身色空俱寂寞

顛倒世人心紛紛乏公是真賞畫不成畫賞真相似丹青各
所尚工拙何足恃求此妄中精哀哉子華子

西州院

東川官舍

自入西州院唯見東川城今夜城頭月非暗又非明文案牀
席滿卷舒賦罪名慘悽且煩勸弃之階下行悵望天迴轉動
搖萬里情參辰次第出牛女顛倒傾況此風中柳枝條千萬
莖到來籬下筍亦已長短生感愴正多緒鷓鴣相喚驚牆上
杜鵑鳥又作思歸鳴以彼撩亂思吟爲幽怨聲吟罷終不寢
繫繫復鐙鐙

臺中鞠獄憶開元觀舊事呈損之兼贈周兄四十
韻

憶在開元觀食栢練玉顏踈慵日高卧自謂輕人豪李生隔
牆住隔牆如隔山怪我久不識先來問驕頑十過乃一往遂

成相往還以我文章卷文章甚煊爛因言辛庾輩亦願放羸
羸既迴數子顧展轉相連攀驅令選科目若在闈與闈學隨
塵土墜漫數公卿關唯恐壞情性安能懼謗訕還招辛庾李
靜處孟巡環進取果由命不由趨險艱穿楊二三子弓矢次
第學推我亦上道再聯朝士班二月除御史三月使巴蠻蠻
民訖反竹感謫訴嚙指明痛療憐蠻不解語爲發昏師姦歸來
五六月旱色天地殷分司別兄弟各各淚潛潛哀哉劇部職
唯數賊罪緩死欵依稀取闕辭方便刪道心常自愧柔髮難
久顯折支望車乘支痛誰置患奇哉乳臭兒緋紫裾被間漸
大官漸貴漸富心漸慳開裝轡頭觸靜拭腰帶斑鷄子繡線
韞猗兒金油去聲鑲香湯洗驄馬翠篋籠白鷗月請公主封冰
受天子頒開筵試歌舞別宅寵妖嬈坐卧摩綿褥捧擁綵絲
鬟旦夕不相離比翼若飛鸞而我亦何苦三十身已鰥愁吟

心骨顫寒卧支體痛

五開反又渠云反

居處雖幽靜尤悔少愉懽不

如周道士鶴嶺臨鐘灣繞院松瑟瑟通畦水潺潺陽坡自尋

蕨村沼看漚菅窮通兩未遂營營真老閑

韋氏館與周隱客杜歸和泛舟

天色低澹澹池光漫油油輕舟閑繳繞不遠池上樓時物欣
外獎真元隨內修神恬津藏滿氣委支節柔衆處豈自異曠
懷誰我儔風車籠野馬八荒安足遊開顏陸渾社握手靈都
周持君寶珠贈頂戴頭上頭

劉氏館集隱客歸和子元及之子蒙晦之

濕墊緣竹徑寥落護岸冰偶然沽市酒不越四五升詩客愛
時景道人話升騰笑言各有趣悠哉古孫登

寄隱客

我年三十二鬢有八九絲非無官次第其如身早衰今人夸

貴富肉食與妖姬而我俱不樂貴富亦何爲況逢多士朝賢
俊若布綦班行次第立朱紫相參差謨猷密勿進羽檄縱橫
馳監察官甚小發言無所裨小官仍不了譴奪亦已隨時成
不之弃得不自弃之陶君喜不遇顧我復何疑潛書周隱士
白雲今有期

元和五年予官不了罰俸西歸三月六日至陝府
與吳十一兄端公崔二十二院長思愴曩游因投
五十韻

小年閑愛春認得春風意未有花草時先釀曉窓睡霞朝澹
雲色霽景牽詩思漸到柳枝頭川光始明媚長安車馬客傾
心奉權貴晝夜塵土中那言早春至此時我獨遊我遊有倫
次閑行曲江岸便宿慈恩寺扣林引寒龜疏叢出幽翠凌晨
過杏園曉露凝芳氣初暘好明淨嫩樹憐低庠排房似綴珠

欲啼紅臉淚新鴛語嬌小淺水光流利冷飲空腹杯因成日
高醉酒醒聞飯鍾隨僧受遺施餐罷還復遊過從上文記行
逢二月半始足遊春騎是時春已老我遊亦云旣藤開九華
觀草結三條隧新筍踴犀株落梅飜蝶翅名倡繡轂車公子
青絲轡朝士遇旬休豪家得春賜提攜好音樂剪鏹空田地
同占杏花園喧闐各叢萃顧予煩寢興復往散樵悴倦僕色
肌羸蹇驢行跛痺春衫未成就冬服漸塵膩傾盖吟短章書
空憶難字遙聞公主笑近被王孫戲邀我上華筵橫頭坐賓
位那知我年少深解酒中事能唱犯聲歌偏精變籌義含詞
待殘拍促舞遞繁吹叫噪擲投盤生獰攝觥使逡巡光景晏
散亂東西異古觀閑閑門依然復幽閑無端矯情性漫學求
科試薄藝何足云虛名偶頻遂拾遺天子前密奏升平議召
見不須更憊庸已猜忌朝陪香案班暮作風塵尉去歲又登

朝登爲栢臺吏臺官相束縛不許放情志寓直勞送迎上堂
煩避諱分司在東洛所職尤不易罰俸得西歸心知受朝庇
常山攻小寇淮右擇良帥國難身不行勞生欲何爲吾兄諸
性靈崔子同臭味投此挂冠詞一生還自恣

元氏長慶集卷第五

Blank manuscript page with vertical columns.

元氏長慶集卷第六

古體

寄吳士矩

宿層峯館寄樂天

酬樂天書懷

酬樂天登樂遊園

酬樂天早夏

酬樂天勸醉

和樂天初授戶曹

和樂天贈吳丹

和樂天秋題曲江

和樂天月夜作

和樂天秋題牡丹

春月

月臨花

紅芍藥

送王十一南行

三歎

遣畫

冬夜懷李侍御

西齋小松

周先生

寄吳士矩端公五十韻

此後並江陵士曹時作

昔在鳳翔日十歲即相識未有好文章逢人賞顏色可憐何

郎面吳生小二十纔冠飾短髮予近梳羅衫紫蟬翼伯舅各

驕縱仁兄未摧抑事業若盃盤詩書甚微縵西州戎馬地賢

豪事雄特百萬時可贏十千良易借寒食桐陰下春風柳林

側藉草送遠遊列筵酬博塞菱蕤雲幕翠璨爛紅茵施鱸縷

輕似絲香醅膩如織將軍頻下城佳人盡傾國媚語嬌不聞

纖腰軟無力歌詞妙宛轉舞態能剗刻箏弦玉指調粉汗紅

綃拭予時最年少專務酒中職未能媿生獐偏矜任狂直曲

庇桃根蓋橫講捎雲式亂布鬬分明惟新間讒慝耻作最先

吐羞言未朝食醉眼漸紛紛酒聲頻餒餒愛黑反扣節參差亂

飛觥往來織強起相維持翻成兩匍匐邊霜颯然降戰馬鳴

不息但喜秋光麗誰憂塞雲黑常隨獵騎走多在豪家匿夜

飲天既明朝歌日還吳荒狂歲云久名利心潛逼時輩多得

途親朋屢相敕開因適農野忽復愛稼穡平生中聖人翻然
腐腸賊亦從酒仙去便被書魔惑脫跡壯士場甘心豎儒域
矜持翠筠管敲斷黃金勒屢益蘭膏燈猶研兔枝墨崎嶇來
掉蕩矯枉事沉默笑甚艱難斂容還劣削與君始分散勉
我勞修飾歧路各營營別離長惻惻行看二十載萬事絲何
極相值或須臾安能洞曾臆昨來陝郊會悲歡兩難克問我
新相知但報長相憶豈無新知者不及小相得亦有生歲游
同年不同德爲別詎幾時伊予墜溝洫大江鼓風浪遠道參
荊棘往事返無期前途浩難測一旦得自由相求北山北
三月二十四日宿曾峯館夜對桐花寄樂天

微月照桐花月微花漠漠怨澹不勝情低徊拂簾幕葉新陰
影細露重枝條弱夜久春恨多風清暗香薄是夕遠思君思
君瘦如削但感事睽違非言官好惡奏書金鑾殿步履青龍

閣我在山館中滿地桐花落

酬樂天書懷見寄

本題云初與微之別後忽夢見之及寤而微之書至兼覽桐花

之什悵然書懷此後五章並次用本韻

新昌北門外與君從此分街衢走車馬塵土不見君君爲分
手歸我行行不息我上秦嶺南君直樞星北秦嶺高崔嵬商
山好顏色月照山館花裁詩寄相憶天明作詩罷草草從所
如憑人寄將去三月無報書荊州白日晚城上鼓鼙鼙行逢
賀州牧致書三四封封題樂天字未坼已霑裳坼書八九讀
淚落千萬行中有酬我詩句句截我腸仍云得詩夜夢我魂
悽涼終言作書處上直金鑾東詩書費一夕萬恨緘其中中
宵宮中出復見宮月斜書罷月亦落曉燈垂暗花想君書罷
時南望勞所思況我江上立吟君懷我詩懷我浩無極江水
秋正深清見萬丈底照我平生心感君求友什因報壯士吟

持謝衆人口銷盡猶是金

酬樂天登樂遊園見憶

昔君樂遊園悵望天欲曛今我大江上快意波翻雲秋空壓
瀟漫瀕洞無垢氛四顧皆豁達我眉今日伸長安隘朝市百
道走埃塵軒車隨對列骨肉非本親誇遊丞相第偷入常侍
門愛君直如髮勿念江湖人

酬樂天早夏見懷

庭柚有垂實鷺巢無宿雛我亦辭社鷺茫茫焉所如君詩夏
方早我歎秋已徂食物風土異衾裯時節殊荒草滿田地近
移江上居八日復切九月明侵半除

酬樂天勸醉

神麴清濁酒牡丹深淺花少年欲相飲此樂何可涯沉機造
神境不必悟楞加醺顏返童貌安用成丹砂劉伶稱酒德所

稱良未多願君聽此曲我爲盡稱嗟一杯顏色好十盞膽氣
加半酣得自恣酩酊歸太和共醉真可樂飛觥掠亂歌獨醉
亦有趣兀然無與他美人醉燈下左右流橫波王孫醉牀上
顛倒眠綺羅君今勸我醉勸醉意如何

和樂天初授戶曹喜而言志

王爵無細大得請卽爲恩君求戶曹掾貴以祿奉親聞君得
所請感我欲霑巾今人重軒冕所重華與紛矜誇仕臺閣奔
走無朝昏君衣不盈篋君食不滿困君言養旣薄何以榮我
門披誠再三請天子憐儉貧詞曹直文苑捧詔榮且忻歸來
高堂上兄弟羅酒罇各稱千萬壽共飲三四巡我實知君者
千里能具陳感君求祿意求祿殊衆人上以奉顏色餘以及
親賓弃名不棄實謀養不謀身可憐白華士永願凌青雲

和樂天贈吳丹

不識吳生面久知吳生道跡雖染世名心本奉天老雌一守
命門迴九填血腦委氣榮衛和咽津顏色好傳聞共甲子衰
隕盡枯槁獨有冰雪容纖華奪鮮綺問人何能爾吳實曠懷
抱弁冕徒挂身身外非所寶伊予固童昧希真亦云早石壇
玉晨尊晝夜長自掃密印視丹田遊神夢三島萬過黃庭經
一食青精稻具搜方朔桃結念安期棗綠髮幸未改丹誠自
能保行當擺塵纓吳門事探討君爲先此詞終期蹇瑤草

和樂天秋題曲江

十載定交契七年鎮相隨長安最多處多是曲江池梅杏春
尚小芰荷秋已衰共愛寥落境相將偏此時綿綿紅蓼水颺
颺白鷺鷥詩句偶未得酒盃聊久持今來雲雨曠舊賞魂夢
知況乃江楓夕和君秋興詩

和樂天別弟後月夜作

聞君別愛弟，明天照夜寒。秋鴈拂簷影，曉琴當砌彈。悵望天
澹澹，因思路漫漫。吟爲別弟操，聞者爲辛酸。況我兄弟遠，一
身形影單。江波浩無極，但見時歲闌。

和樂天秋題牡丹叢

弊宅豔山卉，別來長歎息。吟君晚叢詠，似見摧隤色。欲識別
後容，勤過晚叢側。

春月

春月雖至明，終有靄靄光。不似秋冬色，逼人寒帶霜。纖粉澹
虛壁，輕烟籠半牀。分暉間林影，餘照上虹梁。病久塵事隔，夜
閑清興長。擁袍顛倒領，步履屐東西。廂風柳結柔，援露梅飄暗。
香雪含櫻綻，藥珠感桃綴。房杳杳有餘思，行行安可忘。四鄰
非舊識，無以話中腸。南有居士儼，默坐調心王。欸關一問訊，
爲我披衣裳。延我入深竹，煖我於小堂。視身琉璃瑩，諭指芭

蕉黃復有比丘溢早傳龍樹方口中祕丹訣肘後懸青囊錫
杖雖獨振刀圭期共嘗未知仙近遠已覺神輕翔夜久魂耿
耿月明露蒼蒼悲哉沉眠士寧見茲夕良

月臨花

林檎花

凌風颺颺花透影朧朧月巫峽隔波雲姑峯漏霞雪鏡勻嬌
面粉燈泛高籠纈夜久清露多蹄珠墜還結

紅芍藥

芍藥綻紅綃巴籬織青瑣繁絲感金藥高焰當鑪火剪刻彤
雲片開張赤霜裊煙輕琉璃葉風亞珊瑚朵受露色低迷向
人嬌婀娜醺顏醉後並小女排成坐豔豔錦不如天天桃未
可晴霞畏欲散晚日愁將墮結植本爲誰賞心期在我採之
諒多思幽贈何由果

送王十一南行

夏水漾天未晚暘映遙村風翻烏尾勁脊戀餘芳鐔解袂方
瞬息征帆已翩翻江豚湧高浪槐樹搖去魂遠戍宗侶泊暮
煙洲渚昏離心詎幾許歸苦復寒溫此別信非久胡爲坐憂
煩我留石難轉君泛雲無根萬里湖南月三聲山上猿從茲
耿幽夢夜夜湘與沅

三歎

孤劒鋒刃澁猶能神彩生有時雷雨過暗聞聞聲主人闕
靈寶畏作升天行淬礪當陽鐵刻爲千鎔名遠求鵲鵲瑩同
用玉匣盛顏色縱相類利鈍頗相傾雄爲光電燄雌但深泓
澄龍怒有奇變青蛇終不驚

仙鳳羣皇死葳蕤光彩低非無鴛鴦侶誓不同樹棲飛馳歲
云暮感念雛在泥顧影不自暖寄爾蟠桃雞馴養豈無媿類
族安得齊願言成羽翼奮翅凌丹梯

天驥失龍偶三年常夜嘶哀綠噴風斷渴且含霜啼長恐絕
遺類不復躡雲霓非無駟駟者鶴意不在雞春來筋骨瘦男
影心亦迷自此渥洼種應生濁水泥

遣晝

密竹有清陰曠懷無塵滓況乃秋日光玲瓏曉窻裏旬休聊
自適今辰日高起櫛沐坐前軒風輕鏡如水開卷恣詠謠望
雲閑徙倚新菊媚鮮妍短萍憐霍靡掃除田地靜摘掇園蔬
美幽翫愜懷詩流空堂稱居士客來傷寂寞我念遺煩鄙心跡
兩相忘誰能驗行止

冬夜懷李侍御王太祝段丞

浩露烟壺盡月光閑有餘松篁細陰影重以簾牖踈泛覽星
粲粲輕河悠碧虛纖雲不成葉脉脉風絲舒丹竈熾東序燒
香羅玉書飄飄魂神舉若騫鸞鶴輿感念夙昔意華尚簪與

裾簪裾詎幾許累創吞鉤魚今聞馨香道一以悟臭帑悟覺
誓不惑永抱胎仙居晝夜欣所適安知歲云除行行二三友
君懷復何如

西齋小松 二首

松樹短於我清風亦已多況乃枝上雪動搖微月波幽姿得
閑地詎感歲蹉跎但恐屢終構藉君當柰何

簇簇枝新黃纖纖攢素指柔苙漸依條短莎還半委清風日
夜高凌雲竟何已千歲盤老龍修鱗自茲始

周先生

寥寥空山岑冷冷風松林流月垂鱗光懸泉揚高音希夷周
先生燒香調琴心神功盈三千誰能還黃金

元氏長慶集卷第六

元氏長慶集卷第七

古體詩

遣春十首

表夏十首

解秋十首

遣病十首

寒

玉泉道中

續遣病

感夢

和李相公慈竹十二韻

遣春十首

曉月籠雲影，鶯深餘霧中。
暗芳飄露氣，輕寒生柳風。
冉冉一趨府，未爲勞我躬。
因茲得晨起，但覺情興隆。
久雨憐霽景，偶來隄上行。
空濛天色嫩，杳淼江面平。
百草短長出，衆禽高下鳴。
春陽各有分，予亦澹無情。

鏡皎碧潭水，微波粗成文。
烟光垂碧草，瓊脉散纖雲。
岸柳好

陰影風裾遺垢氛悠然送春目八荒誰與群

低迷籠樹烟明淨暮霞日陽焰波春空平湖漫疑溢雪鷺遠
近飛渚牙淺深出江流復浩蕩相爲坐紆鬱

暄寒深淺春紅日前後花顏色詎相讓生成良有涯梅芳勿
自早菊秀勿自賒各將一時意終年無再華

高屋童稚少春來歸鷺多葺舊良易就新院亦已羅俯憐鷁
化卵仰愧鵬無窠巢棟與巢幕秋風俱奈何

撩亂撲樹蜂摧殘戀房藥風吹雨又頻安得繁於綺酒盃沉
易過世事紛何已莫倚顏似花君看歲如水

繞郭高高冢半是荆王墓後嗣熾陽臺前賢甘華路善惡徒
自分波流盡東注胡然不飲酒坐落桐花樹

花陰莎草長藉莎閑自酌坐看鷺鬬枝輕花滿尊杓葛巾竹
梢掛書卷琴上閣沽酒過此生狂歌眼前樂

梨葉已成陰柳條紛起絮波綠紫屏風螺紅碧籌筋三盃面上熱萬事心中去我意風散雲何勞問行處

表夏十首

夏風多暖暖樹木有繁陰新筍紫長短早櫻紅淺深煙花雲幕重榴豔朝景侵華實各自好詎云芳意沉

初日滿堦前輕風動簾影旬時得休浣高卧閱清景僮兒拂巾箱鷄輒深林井心到物自閑何勞遠箕穎

江瘴炎夏早蒸騰信難度今宵好風月獨此荒庭趣露葉傾暗光流星委餘素但恐清夜徂詎悲朝景暮

孟月夏猶淺奇雲未成峯度霞紅漠漠壓浪白溶溶玉委有餘潤颯馳無去蹤何如捧雲雨噴毒隨蛟龍

流芳遞炎景繁英盡寥落公署香滿庭晴霞覆欄藥栽紅起高焰綴綠排新萼憑此遣幽懷非言念將諠

紅絲散芳樹旋轉光風急烟泛被籠香露濃粧面濕佳人不
在此悵望堦前立忽厭夏景長今春行已及

百舌漸吞聲黃鸝正嬌小雲鴻方警夜籠雞已鳴曉當時客
自適運去誰能矯莫厭夏虫多蜩蟬定相擾

翩翩簾外鷺戢戢巢內雛啖食筋力盡毛衣成紫襦朝來各
飛去雄雌梁上呼養子將備老惡兒那勝無

西山夏雪消江勢東南瀉風波高若天濫潏低於馬正被黃
牛旋難期白帝下我在平地行翻憂濟川者

靈均死波後是節常浴蘭綵樓碧筠糴香秔白玉團逝者良
自苦今人反爲歡哀哉徇名士沒命求所難

解秋十首

清晨頽寒水動搖襟袖輕翳翳林上葉不知秋暗生迴悲鏡
中髮華白三四莖豈無滿頭黑念此衰已萌

微霜纔結露翔鳩初變鷹無乃天地意使之行小懲鵠鵠誠
可惡蔽日有高鵬捨大以擒細我心終不能

往歲學仙侶各在無何鄉同時驚名者次第鷓鴣行而我兩
不遂三十髯添霜日暮江上立蟬鳴楓樹黃

後伏火猶在先秋蟬已多雲色日夜白驕陽能幾何壤隙漏
江海忽微成網羅勿言時不至但恐歲蹉跎

新月纔到地輕河如泛雲螢飛高下火樹影參差文露簾有
微潤清香時暗焚夜閑心寂默洞庭無垢氛

霽麗牀前影飄蕭簾外竹簟涼朝睡重夢覺茶香熟親烹園
內葵憑買家家麴釀酒并毓蔬人來有碁局

寒竹秋雨重凌霄晚花落低徊翠玉梢散亂梔黃萼顏色有
殊異風霜無好惡年年百草芳畢意同蕭索

春非我獨春秋非我獨秋豈念百草死但念霜滿頭頭白古

所同胡爲坐煩憂茫茫百年內處身良未休
西風冷衾簟展轉布華茵來者承玉體去者流芳塵適意醜
爲好及時疎亦親衰周仲尼出無乃爲妖人
漠漠江面燒微微風樹烟今日復今夕秋懷方浩然況我頭
上髮衰白不待年我懷有時極此意何由詮

遣病十首

服藥備江瘴四年方一瘳豈是藥無功伊予久留滯滯留人
固薄瘴久藥難制去日良已甘歸途奈無際

棄置何所任鄭公憐我病三十九萬錢

歲入大率

資予養頑瞑

身賤殺何益恩深報難罄公其千萬年世有天之鄭

憶作孩稚初健美成人列倦學厭日長嬉遊念佳節今來漸
諱年頓與前心別白日速如飛佳晨亦騷屑

昔在痛飲場憎人病辭醉病來身怕酒始悟他人意怕酒豈

不閑悲無少年氣傳語少年兒盃盤莫迴避

憶初頭始白晝夜驚一縷漸及鬢與鬚多來不能數壯年等

閑過過

上如字
下音戈

壯年已五華髮不再青勞生竟何補

在家非不病有病心亦安起居甥姪扶藥餌兄嫂看今病兄
遠路道遙書信難寄言嬌小弟莫作官家官

鷺巢官舍內我爾俱爲客歲晚我獨留秋深爾安適風高翅
羽垂路遠烟波隔去去玉山岑人間網羅窄

簷宇夜來曠暗知秋已生卧悲衾簟冷病覺肢體輕炎昏豈
不勸時去聊自驚浩歎終一夕空堂天欲明

秋依靜處多況乃凌晨趣深竹蟬晝風翠茸衫曉露庭莎病
看長林果閑知數何以強健時公門日勞驚

朝結故鄉念暮作空堂寢夢別淚亦流啼痕暗橫枕昔愁憑
酒遣今病安能飲落盡秋槿花離人疾猶甚

寒

江瘴節候煖臘初梅已殘夜來北風至喜見今日寒扣冰淺
塘水擁雪深竹欄復此滿樽醪但嗟誰與歡

玉泉道中作

楚俗物候晚孟冬纔有霜早農半華實夕水含風涼遐想雲
外寺峯巒眇相望松門接官路泉脉連僧房微露上弦月暗
焚初夜香谷深煙濫淨山虛鍾磬長念此清境遠復憂塵事
妨行行即前路勿滯分寸光

遣病

自此通
州後作

自古誰不死不復記其名今年京城內死者老少并獨孤纔
四十

秘書少
監郁

仕宦方榮榮李三三十九

監察
御史

顧諟登朝有清聲

趙昌八十餘三擁大將旌爲生信異異之死同冥冥其家哭
泣愛一一無異情其類嗟嘆惜各各無重輕萬齡龜菌等一

死天地平以此方我病我病何足驚借如今日死亦足了一
生借使到百年不知何所成況我早師佛屋宅此身形捨彼
復就此去留何所縈前身爲過跡來世即前程但念行不息
豈憂無路行蛻骨龍不死蛻皮蟬自鳴胡爲神蛻體此道人
不明持謝愛朋友寄之仁弟兄吟此可達觀世言何足聽

感夢

夢故兵部裴尚書相公

十月初二日我行蓬州西三十里有館有館名芳溪荒郵屋
舍壞新雨田地泥我病百日餘肌體顧若刳氣填暮不食早
早掩竇圭陰寒筋骨病夜久燈火低忽然寢成夢宛見顏如
珪似歎久離別嗟嗟復悽悽問我何病痛又歎何栖栖荅云
痰滯久與世復相睽重云痰小疾良藥固易擠前時奉橘丸
攻疾有神功何不善和療豈獨頭有風予頃患痰頭風踰月
朴消丸數月而愈今夢中復殷勤平生事款曲無不終悲歡
微前說故盡記往復之詞

兩相極以是半日中言罷相與行行行古城裏同行復一人
不識誰氏子逡巡急吏來喚呼願且止馳至相君前再拜復
再起啓云吏有奉奉命傳所旨事有大驚忙非君不能理答
云久就閑不願見勞使多謝致勤勤未敢相唯唯我因前獻
言此事愚可料亂熱由靜消理繁在知要君如冬月陽奔走
不必召君如銅鏡明萬物自可照願君許蒼生勿復高體調
相君不我言顧我再三笑行行及城戶黯黯餘日輝相君不
我言我一本握手命我從此歸不省別時語但省涕淋漓覺來身
體汗坐卧心骨悲閃閃燈背壁膠膠雞去壻倦童顛倒寢我
淚縱橫垂淚垂啼不止不止啼且聲啼聲覺僮僕僮僕撩亂
驚問我何所苦問我何所思我亦不能語慘慘即路岐前經
新政縣今夕復明辰寘寘滿心氣不得說向人奇哉趙明府
恠我眉不伸云有北來僧住此月與旬自言辨貴骨謂若識

天真談游費問景何不與遂巡僧來爲予語語及昔所知自言有奇中裴相未相時讀書靈山寺住處接園籬指言他日貴畧刻似不移我聞僧此語不覺淚歔歔聲去因言前夕夢無人一相謂無乃裴相君念我曾中氣遣師及此言使我盡前事僧云彼何親言下涕不已我云知我深不幸先我死僧云裴相君如君恩有幾我云滔滔衆好直者皆是唯我與白生感遇同所以官學不同時生小異鄉里拔我塵土中使我名字美美名何足多深分從此始吹噓莫我先頑陋不我鄙徃徃裴相門終年不曾履相門多衆流多譽亦多毀如聞風過塵不動井中水前時予掾荆公在期復起自從裴公無吾道甘已矣白生道亦孤讒謗銷骨髓司馬九江城無人一言理爲師陳苦言揮涕滿十指未死終報恩師聽此男子

和東川李相公慈竹十二韻

次本韻

慈竹不外長密比青瑤華予攢有森束玉立無蹉跎纖粉妍
膩質細瓊交翠柯亭亭霄漢近靄靄雨露多冰碧寒夜聳簫
韶風晝羅煙含朧朧影月泛鮮鮮波鸞鳳一已顧燕雀永不
過幽姿媚庭實顥氣爽天涯峻節高轉露貞筠寒更佳託身
仙壇上靈物神所何時與天籟合音閤日聞陽春歌應憐孤生
者摧折成病痾

元氏長慶集卷第七

元氏長慶集卷第八

古體詩

酬李相公

并啓

酬獨孤二十六

酬劉猛見送

酬樂天江州見寄

郵竹

落月

高荷

和裴校書鷺鶯

夜池

酬楊司業見寄

代杭民作一朝使君去

長慶曆

順宗挽歌詞

憲宗挽歌詞

恭王太妃挽詞

哭呂衡州

悼僧如展

遠安寺水亭

寒食日示姪

別孫村老人

劉家花

褒城驛

和樂天夢亡友

酬樂天見憶

與樂天同葬杓直

酬東川李相公十六韻次用本韻并啓

積啓今月十二日州吏迴伏受相公書示知小生所獻和慈
竹等詩關達鑒覽不蒙罪退而又賜詩一十韻并首序一百
二十三言廢名位之常數比朋友以字之飾揚涓埃投擲珠
玉幸甚幸甚至於廟議末學江花陋詞無不記在雅章以備
光寵不勝惶駭驚慚之至昔楚人始交必有乘車戴笠不忘
相揖之誓誠以爲貴富不相忘之難也況貴賤之隔不啻於
車笠之相懸而相公投貺珍重又豈唯一揖之容易哉積獨
何人享是嘉惠輒復牽課拙劣酬獻所賜是猶百獸與鳳凰
同舞於簫韶之中各極其歡心耳又何暇自審其形容之不
類哉慶歲專人封用上獻死罪死罪謹啓

昔附赤霄羽葳蕤遊紫垣闕班香案上奏語玉晨尊意直撩
忌諱科儀懲傲頑自從真籍除棄置勿復論前時共遊者日
夕黃金軒請帝下巫覡八荒求我氣鸞鳳屢鳴顧燕雀尚籬
藩徒令霄漢外往往塵念存存念豈虛設併投瓊與璫彈珠
古所訝此用何太敦鄒律寒氣變鄭琴祥景奔靈芝繞身出
左右光彩繁碾玉無俗色藥珠非世言重慚前日句陋若穢
並蓀臘月巴地雨瘴江愁浪翻因持駭雞寶一照濁水昏

酬獨孤二十六送歸通州

此後至和樂天
三首並用本韻

再拜捧兄贈拜兄珍重言我有平生志臨別將具論十歲慕
侑儻愛白不愛昏寧愛寒切烈不愛暘溫暾二十走獵騎三
十遊海門增兔跳趯趯惡鵬黑醜醜黿釣氣方壯鵠拳心頗
尊下觀鬚鬢輩一掃莫不存名冠壯士籍功酬明主恩不然
合音身棄何況身上痕金石有銷燬肺腑無寒溫分畫久已

定波濤何足煩嘗希蘇門嘯詎厭巴樹猿瘴水徒浩浩浮雲
亦軒軒長歌莫長歎飲斛莫飲樽生爲醉鄉客死作達士魂

酬劉猛見送

種花有顏色異色卽爲妖養鳥惡羽翮剪翮不待高非無剪
傷者物性難自逃百足雖捷捷商羊亦翹翹伊余狷然質謬
入多士朝任氣有愎戇容身寡朋曹愚狂偶似直靜僻非敢
驕一爲毫髮忤十載山川遙爍鐵不在火割肌不在刀險心
露山嶽流語翻波濤六尺安敢主方寸由自調神劒土不蝕
異布火不焦雖無二物姿庶欲効一毫未能深感感多謝相
勞勞去去我移馬遲遲君過橋雲勢正橫壑江流初滿槽

楚語持此慰遠道此之爲舊交

酬樂天赴江州路上見寄三首

昔在京城心今在吳楚末千山道路險萬里音塵闊天上參

與商地上胡與越終天升沉異滿地網羅設心有無聯環腸
有無繩結有結解不開有環尋不歇山嶽移可盡江海塞可
絕離恨若空虛窮年思不徹生莫強相同相同會相別

襄陽大隄繞我向隄前住燭隨花豔來騎送朝雲去萬竿高
廟竹三月徐亭樹我昔憶君時君今懷我處有身有離別無
地無岐路風塵同古今人世勞新故

人亦有相愛我爾殊衆人朝朝寧不食日日願見君一日不
得見愁腸坐氛氲如何遠相失各作萬里雲雲高風苦多會
合難遽因天上猶有礙何況地上身

郵竹

庭有蕭蕭竹門有聞聞騎囂靜本殊途因依偶同寄亭亭乍
干雲娟娟亦垂地人有異我心我無異人意

落月

落月沉餘影陰渠流暗光蚊聲靄窗戶螢火繞屋梁飛幌翠
雲薄新荷清露香不吟復不寐竟夕池水傍

高荷

種藕百餘根高荷纔四葉颭閃碧雲扇團圓青玉疊亭亭自
擡舉鼎鼎難藏壓不學着水荃一生長怙怙

和裴校書鷺鷥飛

鷺鷥鷺鷥何遽飛鷗鷺雀噪難久依清江見底草堂在一點
白光終不歸

夜池

荷葉團圓莖削削綠萍面上紅衣落滿地明月思啼鶯高屋
無人風張去聲幕

酬楊司業十二兄早秋述情見寄

今春與楊兄會於馮翊數日而

別此詩同州作

白髮故人少相逢意彌遠往事共銷沉前期各衰晚昨來彌
遇苦已復雲離巘秋草古膠庠寒沙廢官苑知心豈忘鮑詠
懷難和阮壯志日蕭條那能競朝幘

代杭民作使君一朝去二首

使君一朝去遺愛在民口惠化境內春才名天下首爲問龔
黃輩兼能作詩否

使君一朝去斷腸如剉藥無復見冰壺唯應鏤金石自此一
州民生男盡名白

長慶曆

年曆復年曆卷盡悲且惜曆日何足悲但悲年運易年年豈
無歎此歎何唧唧所歎別此年永無長慶曆

挽歌傷悼詩

順宗至德大聖大安孝皇帝挽歌詞三首

左拾遺
時作

不改延洪祚因成揖讓朝謳歌同戴啓遏密共思堯雨露施
恩廣梯航會葬遙號弓那獨切曾感昔年招

前春文祖廟大舜嗣堯登及此踰年感還因是月崩壽緣追
孝促業在繼明興儉詔同今古山川繞灞陵

七月悲風起淒涼萬國人羽儀經巷內輶輅轉城闐暝色依
陵早秋聲入輅新自嗟同草木不識永貞春

憲宗章武孝皇帝挽歌詞三首

膳部貞外時作

國付重離後身隨十聖仙北辰移帝座西日到虞泉方丈言
虛設華胥事眇然觸鱗曾在宥偏哭墮髯前

天寶遺餘事元和盛聖功二凶梟帳下三叛斬都中

楊惠琳李師道

傳首京師劉闢李錡吳元濟腰斬都市

始服沙陀虜方吞邏逤戎

沙陀突厥自元和初始通

中狼星如要射猶有鼎湖弓

月落禁垣西星攢曉仗齊風傳宮臨苦雲拂羽儀低路隘車

千兩橋聲馬萬蹄共嗟封石檢不爲報功泥

恭王故太妃挽歌詞二首

校書郎時作

燕姑貽天夢梁王盡孝思雖從魏詔葬得用漢藩儀曙月殘
光歛寒簫度曲遲平生奉恩地哀挽欲何之
文衛羅新壙仙娥掩暝山雪雲埋隴合簫鼓望城還寒樹風
難靜霜郊夜更閑哀榮深孝嗣儀表在河間

哭呂衡州六首

氣敵三人傑交深一紙書我投冰瑩眼君報水憐魚髀股惟
夸瘦膏肓豈暇除傷心死諸葛憂道不憂餘

望有經綸釣虔收宰相刀江文駕風遠雲貌接天高國待球
琳器家藏虎豹韜盡將千載寶埋入五原蒿

白馬雙旌隊青山八陣圖請纓期繫虜枕草誓捐軀勢激三
千壯年應四十無遙聞不瞑目非是不憐吳

鵬鶚生難敵沉檀死更香
兒童喧巷市羸老哭碑堂
鴈起沙汀暗雲連海氣黃
祝融峯上月幾照北人喪

迴鴈峯前鴈春迴盡却迴
聯行四人去同葬一人來
鏡吹臨江返城池隔霧開
滿船深夜哭風棹楚猿哀

杜預春秋癖楊雄著述精
在時兼不語終古定歸名
素水波文細湘江竹葉輕
平生思風月潛寐若爲情

僧如展及韋載同遊碧澗寺
各賦予落句云他生莫忘靈
山座滿壁人名後復稀展共
吟他生之句因話釋氏緣會
所以莫不懷然久之不十日而
展公長逝驚悼返覆則他生豈
有兆耶其間展公仍賦黃字
五十韻飛札相示予方屬和未
畢自此不復撰成徒以四韻爲識

重吟前日他生句豈料踰旬
便隔生會擬一來身塔下無
因

共繞寺廊行紫毫飛札看猶濕黃字新詩和未成縱使得如
羊叔子不聞兼記舊交情

公安縣遠安寺水亭見展公題壁漂然淚流因書
四韻

碧澗去年會與師三兩人今來見題壁師已是前身芟葉迎
僧夏楊花度俗春空將數行淚灑遍塔中塵

寒食日毛空路示姪晦及從簡

我昔孩提從我兄我今衰白爾初成分明寄取原頭路百世
長須此路行

別孫村老人寒食日

年年漸覺老人稀欲別孫翁淚滿衣未死不知何處去此身
終向此原歸

和樂天劉家花

閑坊靜曲同消日淚草傷花不爲春遍問舊交零落盡十人
纔有兩三人

懷城驛二首

容州詩句在懷城幾度經過眼暫明今日重看滿衫淚可憐
名字已前生
憶昔萬株梨映竹遇逢黃令醉殘春梨枯竹盡黃令死今日
再來衰病身

和樂天夢亡友劉太白同遊二首

君詩昨日到通州萬里知君一夢劉閑坐思量小來事祇應
元是夢中遊
老來東郡復西州行處生塵爲喪劉縱使劉君魂魄在也應
至死不同遊

酬樂天見憶兼傷仲遠

死別重泉閼生離萬里賒瘴侵新病骨夢到故人家遙淚陳
根草閑收落地花庾公樓悵望巴子國生涯河任天然曲江
隨峽勢斜與君皆直簷須分老泥沙

與樂天同葬杓直

元伯來相葬山濤誓撫孤不知他日事兼得似君無

元氏長慶集卷第八

人

元氏長慶集卷第九

傷悼詩

夜閑

感小株夜合

醉醒

追昔遊

空屋題

初寒夜寄盧子蒙

謝子蒙見諭

諭子蒙

遣悲懷三首

旅眠

除夜

感夢

合衣寢

竹簟

聽彈烏夜啼

夢井

江陵三夢

張舊蚊幃

獨夜

六年春遣懷八首

荅友封

夢成之

哭小女降真

哭女樊

又哭女樊四十韻

哭子十首

感逝

妻滿月相唁

夜閑

此後並悼亡

感極都無夢魂銷轉易驚風簾半鈎落秋月滿床明悵望臨
堦坐沉吟遶樹行孤琴在幽匣時迸斷絃聲

感小株夜合

纖幹未盈把高條纔過眉不禁風苦動偏受露先萎不分秋
同盡深嗟小便利衰傷心落殘葉猶識合昏期

醉醒

積善坊中前度飲謝家諸婢笑扶行今宵還似當時醉半夜
覺來聞哭聲

追昔遊

謝傳堂前音樂和狗兒吹笛膽娘歌花園欲盛千場飲水閣
初成百度過醉摘櫻桃投小玉嬋梳叢鬢舞曹婆再來門館
唯相弔風落秋池紅葉多

空屋題

十月十四日夜

朝從空屋裏騎馬入空臺盡日推閑事還歸空屋來月明穿
暗隙燈燼落殘灰更想咸陽道魂車昨夜回

初寒夜寄盧子蒙

子蒙近亦喪妻

月是陰秋鏡寒爲寂寞資輕寒酒醒後斜月枕前時倚壁思
閑事回燈檢舊詩聞君亦同病終夜遠相悲

城外回謝子蒙見諭

十里撫稚別一身騎馬回寒煙半堂影燼火滿庭灰稚女憑
人問病夫空自哀潘安寄新詠仍是夜深來

諭子蒙

元集

撫稚君休感無兒我不傷片雲離岫遠雙鷺念巢忙大壑誰
非水華星各自光但令長有酒何必謝家莊

三遣悲懷

謝公最小偏憐女自嫁黔婁百事乖顧我無衣搜蠹篋泥他
沽酒拔金釵野蔬充膳甘長藿落葉添薪仰古槐今日俸錢
過十萬與君營莫復營齋

昔日戲言身後意今朝皆到眼前來衣裳已施行看盡針線
猶存未忍開尚想舊情憐婢僕也曾因夢送錢財誠知此恨
人人有貧賤夫妻百事哀

閑坐悲君亦自悲百年都是幾多時鄧攸無子尋知命潘岳
悼亡猶費詞同穴窅冥何所望他生緣會更難期唯將終夜
長開眼報答平生未展眉

旅眠

內外都無隔帷幙不復張夜眠兼客坐同在火爐牀

除夜

憶昔歲除夜見君花燭前今宵祝文上重疊敘新年閑處低
聲哭空堂背月眠傷心小男女撩亂火堆邊

感夢

行吟坐歎知何極影絕魂銷動隔年今夜商山館中夢分明
同在後堂前

合衣寢

良夕背燈坐方成合衣寢酒醉夜未闌幾回顛倒枕

竹簟

竹簟襯重茵未忍都令卷憶昨初來日看君自施展

聽庾及之彈烏夜啼引

君彈烏夜啼我傳樂府解去聲古題良人在獄妻在閨官家欲

赦烏報妻烏前再拜淚如雨烏作哀聲妻暗語後人寫出烏
啼引吳調哀絃聲楚楚四五年前作拾遺諫書不密丞相知
謫官詔下吏驅遣身作囚拘妻在遠歸來相見淚如珠唯說
閑宵長拜烏君來到舍是烏力糝點烏盤邀女巫今君爲我
千萬彈烏啼啄啄淚瀾瀾感君此曲有深意昨日烏啼桐葉
墜當時爲我賽烏人死葬咸陽原上地

夢井

夢上高高原原上有深井登高意枯渴願見深泉冷徘徊遶
井顧自照泉中影沉浮落井瓶井上無懸綆念此瓶欲沉荒
忙爲求請遍入原上村村空犬仍猛還來遶井哭哭聲通復
哽哽噎夢忽驚覺來房舍靜燈焰碧朧朧淚光疑囹圄鍾聲
夜方半坐卧心難整忽憶咸陽原荒田萬餘頃土厚壙亦深
埋魂在深埂埂深安可越魂通有時逞今宵泉下人化作瓶

相誓感此涕洟瀾瀾涕霑領所傷覺夢間便覺死生境豈
無同穴期生期諒綿永又恐前後魂安能兩知省尋環意無
極坐見天將昞吟此夢并詩春朝好光景

江陵三夢

平生每相夢不省兩相知況乃幽明隔夢魂徒爾爲情知夢
無益非夢見何期今夕亦何夕夢君相見時依稀舊糴服
暗淡昔容儀不道間生死但言將別離分張碎針線襦疊故
幘幘撫稚再三囑淚珠千萬垂囑云唯此女自歎總無兒尚念
嬌且駮未禁寒與飢君復不憖事奉身猶脫遺況有官縛束
安能長顧私他人人生間別婢僕多謾欺君在或有託出門當
付誰言罷泣幽噎我亦涕淋漓驚悲忽然寤坐卧若狂癡月
影牛牀黑虫聲幽草移心魂生次第覺夢久自疑寂默深想
像淚下如流澌百年永已訣一夢何太悲悲君所嬌女棄置

不我隨長安遠於日山川雲間之縱我生羽翼網羅生縶維
今宵淚零落半爲生別滋感君下泉魄動我臨川思一水不
可越黃泉况無涯此懷何由極此夢何由追坐見天欲曙江
風吟樹枝

古原三丈穴深葬一枝瓊崩剝山門壤烟綿墳草生久依荒
隴坐却望遠村行驚覺滿牀月風波江上聲

君骨久爲土我心長似灰百年何處盡三夜夢中來逝水良
已矣行雲安在哉坐看朝日出衆鳥雙徘徊

張舊蚊幃

踰年間生死千里曠南北家居無見期况乃異鄉國破盡裁
縫衣忘收遺翰墨獨有纈紗幃憑人遠携得施張合歡榻展
卷雙鴛翼已矣長空虛依然舊顏色徘徊將就寢徙倚情何
極昔透香田田今無魂惻惻隙穿斜月照燈背空牀黑達理

強開懷夢啼還過臆平生貧寡歡天枉勞苦憶我亦詎幾時
胡爲自摧逼燭蛾焰中舞蠶蠶叢上織焦爛各自求他人顚
何力多離因苟合惡影當務息往事勿復言將來幸前識

獨夜傷懷贈呈張侍御

張生近
喪妻

燼火孤星滅殘燈寸焰明竹風吹面冷簷雪墜堦聲寡鶴連
天叫寒雞徹夜驚祗應張侍御潛會我心情

六年春遣懷八首

傷禽我是籠中鶴沉劍君爲泉下龍重續猶存孤枕在春衫
無復舊裁縫

檢得舊書三四紙高低闊狹粗成行自言併食尋高事唯念
山深驛路長

公無渡河音響絕已隔前春復去秋今日閑窓拂塵土殘絃
猶送細箜篌

婢僕曬君餘服用嬌癡稚女遶牀行玉梳鈿朶香膠解盡日
風吹璫瑁箏

伴客銷愁長日飲偶然乘興便醺醺恠來醒後傍人泣醉裏
時時錯問君

我隨楚澤波中水君作咸陽泉下泥百事無心值寒食身將
稚女帳前啼

童稚癡狂撩亂走繡毬花仗滿堂前病身一到總帷下還向
臨堦背日眠

小於潘岳頭先白學取莊周淚莫多止竟悲君須自省川流
前後各風波

荅友封見贈

荀令香銷潘簾空悼亡詩滿舊屏風扶牀小女君先識應爲
些些似外翁

夢成之

燭暗船風獨夢驚
夢君頻問向南行
覺來不語到明坐
一夜洞庭湖水聲

哭小女降真

雨點輕漚風復驚
偶來何事去何情
浮生未到無生地
暫到人間又一生

哭女樊

秋天淨綠月分明
何事巴猿不賸鳴
應是一聲腸斷去
不容啼到第三聲

哭女樊四十韻

號州長史時作

逝者何由見中人未達情
馬無生角望猿有斷腸鳴
去伴投遐徼來隨夢險程
四年巴養育萬里碣回縈
病是他鄉染魂應遠處驚
山魑邪亂逼沙虱毒潛嬰
母約看寧辨余慵療不

精欲尋方次第俄值疾充盈燈火徒相守香花抵浪擎蓮初
開月梵薜已落朝榮魄散魂將盡形全玉尚瑩空垂兩行血
深送一枝瓊秘祝休巫覡安眠放使令舊衣和篋施殘藥滿
甌傾乳媪閑於社醫僧媿似醒憫渠身覺賸訝佛力難爭騎
竹癡猶子牽車小外甥等閑迷過影遙戲誤啼聲沈紙傷餘
畫扶牀念試行獨留呵面鏡誰弄倚牆筆憶昨工言語憐初
妙長成撩風妬鸚舌凌露觸蘭英翠鳳興真女紅蕖捧化生
祗憂嫌五濁終恐向三清宿惡諸葷味懸知衆物名生而不食葷血
虎豹豺狼等皮毛盡惡斥之巴南所無之物及此而默識其名者數輩環從枯樹得經認寶函
盛愠怒偏憎數分張雅愛平最憐貪栗妹頻救嬾書兄爲占
嬌饒分良多眷戀誠別常回面泣歸定出門迎解恠還家晚
長將遠信呈說人偷罪過要我抱縱橫騰踏遊江舫攀緣看
樂棚和蠻歌字扣反教學妓舞腰輕迢遰離荒服持携到近

京未容誘伎倆唯恨枉聰明往緒心千結新絲鬢百莖暗窻
風報曉秋愧雨聞更敗槿蕭疎館衰楊破壞城此中臨老淚
仍自哭孩嬰

哭子十首

翰林學士時作

維鵜受刺因吾過得馬生災念爾冤獨在中庭倚閑樹亂蟬
嘶噪欲黃昏

纔能辨別東西位未解分明管帶身自食自眠猶未得九重
泉路託何人

爾母溺情連夜哭我身因事有時悲鍾聲欲絕東方動便是
尋常上學時

蓮花上品生真界兜率天中離世途彼此業緣多障礙不知
還得見兒無

節量梨栗愁生疾教示詩書望早成鞭朴校多憐校少又緣

遺恨哭三聲

深嗟爾更無兄弟自歎予應絕子孫寂寞講堂基址在何人
車馬入高門

往年鬢已同潘岳垂老年教作鄧攸煩惱數中除一事自茲
無復子孫憂

長年苦境知何限豈得因兒獨喪明消遣又來緣爾母夜深
和淚有經聲

烏生八子今無七猿叫三聲月正孤寂寞空堂天欲曙拂簾
雙鷺引新雛

頻頻子落長江水夜夜巢邊舊處棲若是愁腸終不斷一年
添得一聲啼

感逝 浙東

頭白夫妻分無子誰令蘭夢感衰翁三聲啼婦卧牀上一寸

斷腸埋土中。蛭甲暗枯。秋葉墜。鷺雛新去。夜巢空。情知此恨。人皆有。應與暮年心不同。

妻滿月日相唁

十月辛勤一月悲。今朝相見淚淋漓。狂花落盡。莫惆悵。猶勝因花壓折枝。

元氏長慶集卷第九

元氏長慶集卷第十

律詩

代曲江老人

開元觀酬吳侍御

春期白二十三不至

黃明府詩并序

酬白學士

代曲江老人百韻

年十六時作

何事花前泣曾逢舊日春
先皇初在鎬賤子正游秦
撥亂干戈後經文禮樂辰
徽章懸象魏貌虎畫騏驎
光武休言戰唐堯念睦姻
琳琅銷柱礎葛藟茂河漣
尚齒惇耆艾搜材拔積薪
裴王持藻鏡姚宋幹陶鈞
內史稱張敞蒼生借寇恂
名卿唯講德命士耻憂貧
杞梓無遭用薊蕘不忘詢
懸金收逸驥鼓瑟薦嘉賓
羽翼皆隨鳳瑜璉肯稱珉
班行容濟濟文質道彬彬
百度依皇極千門闢紫宸
理刑非苟簡稽古蹈因循
書

謬偏求伏詩亡遠聽申繼黜三彪賈群擢八龍荀海外恩方
洽淹中教不泯儒林一同異冠履盡清淳天淨三光麗時和
四序均卑官休力役賤職少艱辛蠻貊同車軌鄉原盡里仁
帝途高蕩蕩風俗厚諄諄秋日耕耘足豐年雨露頻成烟生
不見村豎老猶純耒耜勤千畝牲牢奉六禋南郊禮天地東
野闢原畝校獵求初吉先農卜上寅萬方來合雜五色瑞輪
困池籞呈朱鴈壇場得白鱗耐金光照耀莫壁綵璘玢掉蕩
雲門發蹕蹕鷺羽振集靈撞玉磬和鼓奏金鐔建簾崇牙盛
銜鐘獸目嗔總干形屹崿憂敵背嶙峋文物千官會夷音九
部陳魚龍華外戲歌舞洛中嬪佳節修醺禮非時宴侍臣黎
園明月夜花萼豔陽晨李杜詩篇敵蘇張筆力勻樂章輕鮑
照碑板笑顏竣泰嶽陪封禪汾陰頌鬼神星移逐西顧風暖
助東巡浴德留湯谷蒐畎過渭濱沸天雷殷殷匝地轂鞞鞞

沃土心逾熾豪家禮漸湮老農羞荷鍤貪賈學垂紳曲藝爭
工巧彫機變組紉青鳬連不解紅栗朽相因山澤長擎貨梯
航競獻珍翠毛開越鵝龍眼敞甌閩玉饌薪然蠟椒房燭用
銀銅山供橫賜金屋貯宜嘖班女恩移趙思王賦感甄輝光
隨顧步生死屬搖脣世族功勲久王姬寵愛親街衢連甲第
冠蓋擁朱輪大道垂珠箔當爐踏錦茵軒車隘南陌鍾磬滿
西鄰出入張公子嬌奢石季倫雞場潛介羽馬埒並揚塵韜
袖誇狐腋弓弦尚鹿臙紫絛牽白犬錦韉覆花駟箭倒南山
虎鷹擒東郭貌翻身迎過雁坐射迴鶉竟蓄朱公產爭藏
邴氏緡橋桃矜馬驚倚頓數金銀蔬闕冬中韭羹憐遠處蓴
萬錢纔下筯五醑未稱醇曲水流觴日倡優醉度旬探丸依
郭解投轄伴陳遵共謂長安泰那知遽構屯奸心興桀黠凶
醜比頑嚚斗柄侵妖彗天泉化逆鱗貸恩歎乃祖連禍及吾

民獫狁當前路鯨鯢得要津王師方業業暴卒已磔磔雜虜
同謀夏宗周慙去幽陵園深暮景霜露下秋旻鳳闕悲巢鵬
鵠行亂野麋華林荒茂草寒竹碎貞筠村落空垣壞城隍舊
井堙破船沉古渡戰鬼聚陰燐振臂誰相應擠眉獨不伸毀
容懷赤紱混跡戴黃巾木梗隨波蕩桃源數隱淪弟兄書信
斷鷗鷺往來馴忽遇山光澈遥瞻海氣真祕圖推廢主後聖
合經綸野杏渾休植幽蘭不復紉但驚心憤憤誰戀水粼粼
盡室離深洞輕橈盪小輪殷勤題白石悵望出青蘋夢寐平
生在經過處所新阮郎迷里巷遼鶴記城闌虛過休明代旋
爲朽病身勞生常矻矻語舊苦諄諄晚歲多衰柳先秋媿大
椿眼前年少客無復昔時人

開元觀閑居酬吳士矩侍御四十韻

中有問行藏求藥物之

十八
時作

靜習狂心盡幽居道氣添神編啓黃簡祕錄捧朱籤爛熳煙
霞駐優游歲序淹登壇擁旄節趨殿禮胡髯殿有玄宗皇帝真容醮起
彤庭燭香開白玉匳結盟金劒重斬魑寶刀銛禹步星綱動
焚符竈鬼詹冥搜呼直使章奏役飛廉仙籍聊憑檢浮名復
爲占赤誠祈皓鶴綠髮代青縑虛室常懷素玄關屢引枯貂
蟬徒自寵鷗鷺不相嫌始悟身爲患唯欣祿未恬龜龍戀淮
海雞犬傍閭閻松笠新偏翠山峯遠更尖簫聲吟茂竹虹影
逗虛簷初日先通牖輕颺每透簾露盤朝滴滴鈎月夜纖纖
已得殣霞味應嗤食蓼甜上琴閑度晝耽酒醉銷炎几案隨
宜設詩書逐便拈灌園多抱甕刈藿乍腰鎌野鳥終難繫鷁
鴒本易厭風高雲遠近波駭鯉深潛邸第過從隔蓬壺夢寐
瞻所希顏頗練誰恨突無黔思拙慙圭璧詞煩雜米鹽諭錐
言太小求藥意何謙

語默君休問行藏我

詎兼狂歌終此曲情盡口長箱

病減逢春期白二十二辛大不至十韻

校書郎

病與窮陰退春從血氣生寒膚漸舒展陽脉乍虛盈就日臨
階坐扶牀履地行問人知面瘦祝烏願身輕風暖牽詩興時
新變賣聲飢饉看藥忌閑悶點書名舊雪依深竹微和動早
萌推遷悲往事踈數辯交情琴待嵇中散杯思阮步兵世間
除却病何者不營營

黃明府詩并序

小年曾於解縣連月飲酒予常爲觥錄事曾於賓少府廳中
有一人後至頻犯語令連飛十二觥不勝其困逃席而去醒
後問人前虞鄉黃丞也此後絕不復知元和四年三月予奉
使東川十六日至褒城東數里遙望驛亭前有大池樓榭甚
盛遂巡有黃明府見迎瞻其形容髣髴似識問其前銜則固

曩時之逃席黃丞也說向前事黃生惘然而寤因饋酒一樽
艤舟請予同載予不免其意與之盡懽徧問座隅山川則曰
又褻次其右感今懷古作黃明府詩云

少年曾痛飲黃令困飛觥席上當時走馬前今日迎依稀迷
姓氏積漸識平生故友身皆遠他鄉眼暫明便邀連榻坐兼
共摘別船行酒思臨風亂霜稜掃地平不看深淺酌貪愴古
今情邐迤七盤路坡陀數丈城花疑裏女笑棧想武侯征一
種埋幽石老閑千載名

酬翰林白學士代書一百韻

并序此後
江陵時作

玄元氏之下元日會予家居至枉樂天代書詩一百韻鴻洞
卓犖令人興起心情且置書美予前和七章章次用本韻
韻同意殊謂爲工巧前書可謂寔難之今復次排百韻以
荅懷思之貺云

昔歲俱充賦同年遇有司八人稱迥拔兩郡濫相知同樂天

投革登科予平判人等

逸驥初翻步羈鷹暫脫羈遠途憂地窄高視覺

天卑並入紅蘭署偏親白玉規近朱憐冉冉伐木願偲魚

魯非難識鈇黃自懶持心輕馬融帳謀奪子房帷秀發幽巖

電清澄溢岸陂九霄排直上萬里整前期勇贈棲鸞句慚當

古井詩

予贈樂天詩云皎彼鸞鳳姿樂天贈予詩云無波古井水

多聞全受益擇善頗相

師脫俗殊常調潛工大為還醇憑酎酒運智託圍碁情會

招車胤開行覓戴逵僧餐月燈閣醪宴劫灰池予與樂天約

於月燈閣開遊又嘗與秘書同官醪宴昆明池

勝緊爭先到篇章競出奇輸贏論破

的點竄肯容絲山岫當街翠墻花拂面枝

昔予賦詩云爲見

樂天

知此鸞聲愛嬌小鸞翼翫逶迤轡爲逢車緩鞭緣趣伴施密

攜長上樂偷宿靜坊姬婢性慵朝起新晴助晚嬉相歡常滿

目別處鮮開眉翰墨題名盡光陰聽話移

樂天每與予游從無不書名屋壁又

嘗於新昌宅說一枝花話

自寅至巳猶未畢詞也

綠袍因醉典烏帽逆風遺暗撞輕

籌筋仍題小屈卮

子有第箕草籌筋小蓋酒胡之

本絃纜一

舉下口已三遲逃席衝門出歸倡借去声馬騎狂歌繁節亂

醉舞半衫垂散漫終長簿邀遮守隘岐幾遭朝士笑兼任巷

童隨苟務形骸達渾將性命推何曾愛官序不省計家資忽

悟成虛擲翻然歎未宜使回耽樂事堅赴策賢時寢食都忘

倦園廬遂絕窺勞神甘感感攻短過致致葉怯穿楊箭囊藏

透穎雖起遙望雲雨擺落占泉坻略削荒涼宛搜求激直詞

那能作牛後更擬助鴻基

舊說制策皆以惡計取容為美子與樂天指病危言不顧成敗意在

決求高第初就業時今裴相國戒子慎勿以策苑為虞子深

佩其言然而怪其多大擬取有可取遂切求潛覽功費累月

無所獲先是穆員盧景亮同年應制俱以辭直見黜子求獲

其策皆手自寫之置在篋篋樂天損之軍常詎子篋中有不

第之祥而又西予唱第聽鷄集趁朝忘馬疲內人輿御案朝

景麗神旗首被呼名姓多藏冠等衰千官容眷盼五色照離

披鷄侶從茲洽鷗情轉自縻分張殊品命中外却駟馳出入

稱金籍東西侍碧墀闢班雲洶湧闕扇雉參差切媿尋常質

親瞻咫尺姿日輪光照耀龍服瑞葢擅欲通愚塞生憎効

喔咿倭存真妾婦諫死是男兒便殿承偏召權臣懼撓私廟

堂雖稷契城社有狐狸似錦言應巧如絃數易欺敢嗟身整

黜所恨政無毗予元和元年任拾遺八十三日延英對九月十日貶授河南尉謬辱良由此

昇騰亦在斯再令陪憲禁依舊履跼危使蜀嘗繇遠分臺更

嶮巖匿姦勞發掘破黨惡持疑斧刃迎皆碎盤牙老未姜乍

能還帝笏詎忍折音浙吾支虎尾元來險圭文却類疵浮榮

齊壤芥閑氣詠江籬闕下殷勤拜樽前嘯傲辭飄沉姜蓬梗

忠信敵蠻夷戲誚青雲驛譏題皓髮祠予途中作青雲驛詩病其雲泥一致作四

皓廟詩譏其出處不常貪過谷隱寺留讀峴山碑寺在草沒章臺趾隄

橫楚澤湄野蓮侵稻隴亞柳馱城陂遇物傷凋換登樓思漫

瀾金攢嫩橙子鑿泛遠鸛鵲仰竹藤纏屋苦茅荻補籬南人

荻為籬也竹為瓦田麵梨通蒂朽火米蒂芒炊麵梨軟爛无味葦箏針

筒束鯉魚箭羽鬚茅羹真底可鱸繪漫勞思北渚銷魂望南

風着骨吹度梅衣色漬食稗馬蹄廐南方衣服經夏謂之度

稗蓋北地稗院權和泥驗官酤小麴醱訖音煩繳繞輕去声俗

醜威儀樹罕貞心栢畦豐衛足葵坳窪饒壘矮游惰耿庸縑

病賽烏稱鬼巫占瓦代龜南人染病竟賽烏鬼連陰蛙張王

瘡瘡雪治鑿雨中并作蛙池我正窮於是君寧念及茲一篇

從日下雙鯉送天涯坐捧迷前席行吟忘結綦匡牀鋪錯繡

几案踴靈芝形影同初合參商喻此離扇因秋弃置鏡異月

盈虧壯志誠難奪良辰豈復追宵牛終夜永潘鬢去年衰余

年始三十二歲溟渤深那測穹蒼意在誰馭方輕驤裹車肯

重辛夷臥轍希濡沫低顏受領頤世情焉足怪自省固堪悲

溷衆虛求潔籠禽方訝飢猶勝憶黃犬幸得早圖之

元氏長慶集卷第十

元氏長慶集卷第十一

律詩

紀懷贈李戶曹

荅胡靈之

酬許康佐

送人之嶺南

酬段丞

酬竇校書

泛江翫月

病聞幕中徵樂

酬支封話舊

送王協律游杭越

送馬侍御迴

紀懷贈李六戶曹崔二十功曹五十韻

昔冠諸生首初因三道徵公卿碧雞會名姓白麻稱日月光
遙射煙霄志漸弘榮班張錦繡諫路賜賤藤便欲呈肝膽何
言犯股肱椎埋衝斗劍清徹瑩壺冰赤縣纔分務青驄已過
乘因騎度海鵲擬殺殺天鵬縛虎聲空壯連鰲力未勝風飀

波竟感山壓勢逾崩倖辱徒相困蒼黃性不能酣歌離峴頂
負氣入江陵華表當蟾蜍高樓挂玉繩角聲悲掉蕩城影暗
稜層軍幕威容盛官曹禮數兢心雖出雲鶴身尚觸籠鷹跡
足良甘分排衙苦未曾通名叅將校抵掌見親朋煦沫求涓
滴滄波怯斗升荒居鄰鬼魅羸馬步殘殘白草堂簷短黃梅
雨氣蒸霑黏經汗席颭閃盡油燈夜怯殭膚納朝煩拂面蠅
過從愁厭賤專靜畏猜仍旅寓誰堪託官聯自可憑甲科崔
並驚杜史李齊昇共展排空翼俱遭激遠矧他鄉元易感同
病轉相矜投分多然諾忘言少愛憎誓將探肺腑耻更辨淄
澠會宿形骸達論交意氣增一心吞渤澥戮力拔嵩恒語到
磨圭角疑消破弩癥吹嘘期指掌患難許檐簦鍛翮鸞棲棘
藏鋒箭在弮雪中方覩桂木上莫施罾且泛黃公水兼過被
病僧有時鞭款段盡日醉僂僂躡屐看秧稻敲船和採菱義

魚江火合喚客谷神應嘯傲雖開口幽憂復滿膺望雲緒撥
刺透匣色騰凌每想潢池寇猶稽赤族懲夔龍勞筭畫貔虎
帶威稜逐鳥忠潛奮懸旌意遠凝我弓思徹札絆驥悶牽絙
運甕調辛苦聞雞屢寢興閒隨人兀兀夢聽鼓鼙鼙他勝班
筆行看擲黃陂莫漫澄騏驎高閣上須及壯時登

荅姨兄胡靈之見寄五十韻

并序

九歲解賦詩飲酒至斗餘乃醉時方依倚舅族舅憐不以禮
數檢故得與姨兄胡靈之之輩十數人爲晝夜遊日月跳擲
於今餘二十年矣其間悲歡合散可勝道哉昨枉是篇感徹
肌骨適白翰林又以百韻見贈余因次酬本韻以荅貫珠之
贈焉於吾兄不敢變例復自城至生凡次五十一字靈之本
題兼呈李六侍御是以篇末有云

憶昔鳳翔城留年是事榮理家煩伯舅相宅盡茲引吾兄詩

律蒙親授朋游忝自迎題頭筠管縵教射角弓辭靈之善筆札習騎射

矮馬馳髮韞韞音牛獸面纓對談依赳赳送客步盈盈米枕

諸賢讓蠡杯大戶傾一船席外語三榼拍心精傳盞加分數

橫波擲目成華奴歌浙浙媚子舞卿卿大夫張生好屬詞妓樂歌者華奴善

歌浙浙鹽又有舞者媚子聞設狂爲好誰憂飲敗名屠過

隱朱亥樓夢古秦嬴融令禁言張生常令綱紀環坐唯便草投盤暫廢觥

春郊纔爛熳夕鼓已砑轟荏苒移灰琯喧闐勒塞兵糟漿聞

漸足書劒訝無成抵壁慙虛棄彈珠覺用輕遂籠雲際鶴來

狎谷中鷺學問攻方苦篇章興太清囊疎螢易透錐鈍股多

坑筆陣戈矛合文房棟楠撐豆萁才敏雋羽獵正崢嶸岐下

尋時別京師觸處行醉眠街北廟閑遶宅南營予宅在靖安北街靈之時

寓居永樂南街廟中柳愛凌寒軟梅憐上番驚觀松青黛空

予宅又南鄰弩營欄藥紫霞英開元觀古松五株靖安宅壯盡日聽僧講通宵

丹數本皆曩時遊行之地

詠月明正軌幽趨樂旋被宦途縈吏晉資材枉留秦歲序更

時靈之作吏平陽予酬枚秘閣自茲分散我鬢驚數寸君髮白千莖芸閣懷鉉暇

姑峯帶雪晴何由身倚玉空睹翰飛瓊世道難於劒讒言巧

似笙但憎心可轉不解蹠如擎始効神羊觸俄隨旅鴈征孤

芳安可駐立鼎幾時烹潦倒沉泥滓歎危踐矯衡登樓王粲

望落帽孟家情龍山落帽臺去府城二十里巫峽連天水章臺塞路荆韓

臺去府雨摧漁火燭風引去聲竹枝聲分作屯之蹇那知困亦

亨官曹三語掾國器萬尋楨此後多述李君定文之意逸傑雄

姿迥皇王雅論評蕙依潛可習雲合定誰令原燎逢冰井鴻

流值木蠡智囊推有在勇爵敢徒爭迅拔看鵬舉高音侍鶴

鳴所期人拭目焉肯自佯盲鉉鈍丁寧淬蕪荒展轉耕窮通

須豹變櫻搏笑狼獾捧芝蘭贈還披肺腑呈此生如未死

未擬變平生一本云今日負平生

酬許五康佐

次用本韻

奮迅君何晚，羈離我詎儔。
鶴籠閑警露，鷹縛悶牽韉。
蓬閣深沉省，荆門遠慢州。
課書同吏職，旅宦各鄉愁。
白日傷心過，滄江滿眼流。
嘶風悲代馬，喘月伴吳牛。
枯涸方窮轍，生涯不繫舟。
猿啼三峽雨，蟬報兩京秋。
珠玉慙新贈，芝蘭忝舊游。
他年問狂客，須向老農求。

送侍御之嶺南二十韻

并序

古朋友別皆贈以言，況南方物候飲食與北土異，其甚者夷民喜聚蠱，祕方云以舍銀變黑爲驗，攻之重雄黃，海物多肥腥，啖之好嘔泄，驗方云備之在鹹食，嶺外饒野菌，視之蟲蠹者，無毒羅浮生異果，察其鳥啄者可餐，大抵珠璣璚瑁之所聚，貴潔廉湮鬱暑濕之所蒸，避溢愆其餘，道途所慎，離愴之懷盡之，二百言矣，叙不復云。

漢法戎施幕秦官郡置監蕭何歸舊印

自江陵工曹拜

鮑永授新銜

幣聘雖盈篋泥章未破緘蛛懸絲繚繞鵲報語詰誦再礪神

羊角重開憲簡函

崔君前任已爲御史

聲纓聽趑趑綏珮繡繆繆

音逸

翩憐鴻翥離心覺刃劒聯游虧片玉洞照失明鑒遥想車登

嶺那無淚滿衫茅蒸連蜚氣衣漬度梅駮象關緣谿竹猿鳴

帶雨杉颶風狂浩浩韶石峻嶮嶮宿浦宜深泊祈龍在至誠

瘴江乘早度毒草莫親艾試蠱看銀黑排腥貴食鹹苗須蟲

已蠹巢重鳥先鵠冰瑩懷貪水霜清顧痛巖珠璣當盡擲薏

苡詎能讒荆俗欺王粲吾生問季咸遠書多不達勤爲枉搢

搢

酬段丞與諸基流會宿弊居見贈二十四韻

次用本韻

鳴局寧虛日閑窓任廢時琴書甘盡棄園井詎能窺運石疑

填海爭籌憶坐惟赤心芳苦鬪紅燭以先施蛇勢繁山合鴻

聯度嶺遲堂堂排直陣衮衮逼羸師懸劫偏深猛回征特險
巖旁攻百道進死戰萬般爲異日玄黃隊今宵黑白碁斫營
看迥點對壘重相持善敗雖稱怯驕盈最易欺狼牙當必碎
虎口禍難移乘勝同三捷扶顛望一詞希因送目便敢待指
縱奇退引防邊策雄吟斬將詩眠牀都浪置通夕共忌疲曉
雉風傳角寒蓂雪壓枝繁星收玉版殘月耀冰池僧請聞鍾
粥賓催下藥厄獸炎餘炭在蠟淚短光衰俛仰嗟陳跡殷勤
卜後期公私牽去住車馬各支離分作終身癖兼從是事隳
此中無限興唯怕俗人知

酬竇校書二十韻

次本韻

鷗鷺元相得杯觴每共傳芳遊春爛熳晴望月團圓調笑風
流劇論文屬對全賞花珠並綴看雪壁常連竹寺荒唯好松
栽小更憐潛投孟公轄狂乞莫愁錢塵土拋書卷槍籌弄酒

權令誇齊箭道力鬪抹弓弦但喜添樽滿誰憂泛桂然漸輕
身外役渾證飲中禪及我辭雲陞逢君仕圃田音徽千里斷
魂夢兩情偏足聽猿啼雨深藏馬腹鞭官醪半清濁夷饌雜
腥膻顧影無依倚甘心守靜專那知暮江上俱會落英前款
曲生平在悲涼歲序遷鶴方同北渚鴻又過南天麗句慙虛
擲沉機嬾強牽粗酬珍重意工拙定相懸

泛江翫月十二韻并序

予以元和五年自監察御史貶授江陵士曹掾六月十四日
張季友李景儉二侍御王文仲同錄王衆仲判官兩昆季爲
予載酒炙選聲音自府城之南淮攀月泛舟窮竟一夕予賦
詩以紀之

楚塞分形勢羊公壓大邦朋儕多士子衆量盡敦龐岳壁開
相對荀龍自有雙共將船繫泊况是月臨江遠樹懸金鏡深

潭倒玉幢委波添淨練洞照滅疑釭聞咽沙頭市玲瓏竹岸
總巴童唱巫峽海客話神龍已困連飛盞猶催未倒釭飲荒
情爛熳風棹藥嶂從勝事他年盡雄心此夜降知君皆逸韻
須爲應筵撞

店卧聞幕中諸公徵樂會飲因有戲呈三十韻

濩落因寒甚沉陰與病偕藥囊堆小案書卷塞空齋脹腹看
成鼓羸形漸比柴道情憂易適溫瘴氣難排治癒扶輕杖開
門立靜街耳鳴疑暮角眼暗助昏霾野竹連荒草平陂接斷
崖坐隅甘對鵬當路恐遭豺蛇蠱迷弓影鵬翎落箭斂晚籬
喧鬬雀殘菊半枯荻音悵望悲回鴈依遲傍古槐一生長苦
節三省詎行怪奔北翻成勇司南却是髡客蒼真漠漠風雨
漫喈喈彼美猶谿女其誰占館娃誠知通有日太極浩無涯
布卦求無妄祈天願孔皆藏去聲衰謀計拙地僻往還乖况美

蓮花侶方欣綺席諧鈿車迎妓樂銀翰屈朋儕白紵顰歌黛

同蹄墜舞釵

白紵同蹄皆樂人姓名

纖身霞出海艷臉月臨淮籌筋隨

宜放投盤止罰嗟紅娘留醉打觥使及醒差

舞引紅娘拋打曲名酒中觥使

席上顧我潛孤憤何人想獨懷夜燈燃檠葉凍雪墮墀堦壞

壁虛缸倚深爐小火埋鼠驕銜筆硯被冷束筋骸畢竟圖斟

酌先須遣癘瘵

瘵瘵之徒槍旗如在手

籌筋色目

那復敢歲裏

酬友封話舊敘懷

十二韻依次重用爲韻

風波千里別書信二年稀乍見悲兼喜猶驚是與非身名判

作夢盃盞莫相違草館同牀宿沙頭待月歸春深鄉路遠老

去宦情微魏闕何由到荊州且共依人欺翻省事官冷易藏

威但擬馴鷗鳥無因用弩機開張圖卷軸顛倒醉衫衣蓴菜

銀絲嫩鱸魚雪片肥憐君詩似湧踏馬筆如飛會遣諸伶倡

篇篇入禁圍

送王協律游杭越十韻

去去莫悽悽，餘杭接會稽。松門天竺寺，花洞若耶溪。浣渚逢
新艷，蘭亭識舊題。山經秦帝葬，壘辨越王樓。江樹春常早，城
樓月易低。鏡澄湖面，湄雲疊海潮。齊章甫官人，戴萼絲姹女。
提長干，迎客開小市。隔烟迷紙亂，紅藍壓甌疑。碧玉泥荆南，
無抵物來日爲儂攜。

送東川馬逢侍御使回十韻

風水荆門闊，文章蜀地豪。眼青賓禮重，眉白衆情高。思勇曾
吞筆，投虛慣用刀。詞鋒倚天劒，學海駕雲濤。南郡傳紗帳，東
方讓錦袍。旋吟新樂府，便續古離騷。雪岸猶封草，春江欲滿
槽。餞筵君置醴，隨俗我餽糟。莫嘆巴三峽，休驚鬢二毛。流年
等頭過，人世各勞勞。

元氏長慶集卷第十二

律詩

酬盧祕書

戲贈韓舍人

和權相公行次臨闕

酬樂天東南行詩

和樂天送客

獻滎陽公

酬盧祕書

并序

予自唐歸京之歲祕書郎盧拱作喜遇白贊善學士詩二十韻兼以見貽白時酬和先出予草感末暇皇頻有致師之挑故篇末不無憤辭其次用本韻習然也

偶有衝天氣都無處世才未容榮路穩先踏禍機開分久沉荆掾慙經廝栢臺理推愁易惑鄉思病難裁夜伴吳牛喘春驚朔鴈回北人腸斷送西日眼穿隤唯望魂歸去那知詔下來涸魚千丈水殭鷺一聲雷幽匣提青鏡衰顏拂故埃夢雲

期紫閣厭雨別黃梅親戚迎時到班行見處陪文工猶畏忌
朝士絕嫌猜新識蓬山傑深交翰苑材連投珠作貫獨和玉
成堆劇敵徒相軋羸師亦自媒磨礱刮骨刃翻擲委心灰恐
被神明哭憂爲造化災私調破葉箭定飲舉旗盃金寶潜砂
礫芝蘭似草萊憑君毫髮鑒莫遣翳莓苔

見人詠韓舍人新律詩因有戲贈

喜聞韓古調兼愛近詩篇玉磬聲聲徹金鈴箇箇圓高疎明
月下細膩早春前花態繁於綺閨情軟似綿輕新便妓唱凝
妙入僧禪欲得人人伏能教面面全延之苦拘檢摩詰好因
緣七字排居敬千詞敵樂天侍御八兄能爲七言絕句殷勤
贊善白君好作百韻律詩閑太祝張君好去老通川詠莫漫裁章句須饒紫禁仙

奉和權相公行次臨闕驛逢鄭僕射相公歸朝俄
頃分途因以奉贈詩十四韻

帝下赤霄符搜求造化爐中台歸內座太一直南都黃霸乘
輅入王尊叱馭趨萬人東道送六纛北風驅棧閣繞傾蓋關
門已合繡貫魚行遷迤交馬語踟躕去速熊羆兆來馳虎豹
夫昔憐三易地今訝兩分途別路環山雪離章運寸珠鋒鋟
斷犀兕波浪沒蓬壺區宇聲雖動淮河孽未誅將軍遙策畫
師氏密訐謨漢上壇仍築褒西陣再圖公方先二虜何暇進
愚儒

酬樂天東南行詩一百韻

并序

元和十年三月二十五日予司馬通州二十九日與樂天於
鄆東蒲池村別各賦一絕到通州後予又寄一篇尋而樂天
貺予八首予時瘡病將死一見外不復記憶十三年予以赦
當遷簡省書籍得是八篇吟歎方極適崔果州使至爲予致
樂天去年十二月二日書書中寄予百韻至兩韻凡二十四

章屬李景信校書自忠州訪予連牀遞飲之間悲咤使酒不

三兩日盡和去年已來三十二章皆異李生視草而去四月

十三日子手寫爲上下卷仍依次重用本韻亦不知何時得

見樂天因人或寄去通之人莫可與言詩者唯妻淑在旁知

狀

其本卷尋時於峽州面付樂天別本都在
唱和卷中此卷唯五言大律詩二首而已

我病方吟越君行已過湖

元和十年閏六月至通州染瘴去
危重八月聞樂天司馬江州

應緣直道哭不爲窮途亞竹寒驚牖空堂夜向隅暗魂思背

燭危夢怯乘桴

此後每聯之內半述巴
蜀土風半述江鄉物產坐痛筋骸憊旁嗟物

候殊雨蒸重沸渭浪湧恠睢肝索綆飄蚊蚋蓬麻甃舳艫短

簷苦稻草微俸封

去聲漁租泥聲浦喧撈蛤荒郊險鬪羆鯨吞

近溟漲猿聞接黔巫芒屨涸牛婦丫頭蕩槩夫酢醅荷裹賣

醽酒水淋漓

巴氏造酒如淋醴法舞態翻鸛鵒歌詞咽鷓鴣夷音啼似

笑蠻語謎相呼江郭船添店山城木豎郭吠聲沙市犬爭食

墓林烏獷俗誠堪憚妖神甚可虞欲令仁漸及已被瘡潛圖
膳減思調鼎行稀恐蠹樞雜萑多剖鱗和黍半蒸菰綠粳新
菱實金九小木奴巴橘酸澁大如彈丸芋羹真豔淡鼃炙之夜漫塗蘇
魚鼈那勝烹鯨只似鱸通州江以爲膾楚風輕似蜀巴地濕如
吳氣濁星難見州斜日易晡通宵但雲霧未酉即桑榆此後
巴中風俗瘴窟蛇休蟄炎溪暑不徂俛魂陰叫嘯鵬貌晝踟躕鄉
里家藏蠱官曹世乏儒歛緡偷印信傳箭作符繻椎髻拋巾
幘鑊刀代輶轡當心鞞銅鼓背弣射桑弧巴民盡射木弓豈
復民畛料須將烏獸驅是非渾並漆詞訟敢研朱陋室鴉窺
伺衰形蛛覬覦鬚毛霜點合襟淚血痕濡倍憶京華伴偏忘
我爾軀此後並言與樂天同科共遊處等事謫居今共遠榮路惜同趨科試銓
衡局衙參典校尉書判同年月中分桂樹天上識昌蒲應召
逢鴻澤陪游值賜酺心唯撞衛磬耳不亂齊竽此後並言同應制時事

海岱詞鋒截皇王筆陣毆疾奔凌驤鬣高唱軌吳歛點檢張
儀舌提携傳說圖擺囊看利穎開領出明珠並取千人特皆
非十上徒白麻雲色賦墨詔電光粗衆口貪歸美何顏敢妬
姝秦臺納紅旭鄴匣洗黃壚諫獵寧規避彈豪詎囁肺肝
憎巧曲蹊徑絕縈迂誓遣朝綱振忠饒翰苑輸元和四年爲
監察御史樂
天爲翰林學士調方汗血蠅點忽成虞逐謫栖遯還飛送別孟
痛嗟親愛隔顛望友朋扶狸病翻隨鼠驄羸返作駒物情良
狗俗時論太誣吾瓶罄壘偏耻松摧栢自枯虎雖遭陷弄龍
不怕泥塗此已上並述五年殿
江陵樂天亦遭羅謫錄重喜登賢苑方日佐伍符
九年樂天除太子贊判身入矛戟輕敵比鎗銖駟騎來千里
善予從事唐州也
天書下九衢因教罷飛檄便許到皇都十年春自唐州
詔予召入京舟敗
瞿浮漢驂疲杖過邗郵亭一蕭索烽候各崎嶇餉人推輅
誰何吏執父跋家逃力役連鑣責音通誅防戍兄兼弟收田

婦與姑縑綰工女竭青紫使臣紆望國叅雲樹歸家滿地蕪

破窓塵埽埽幽院鳥鳴鳴此已下並言靖安里無人居觸目荒涼祖竹襲新筍

孫枝壓舊梧晚花狂蛺蝶殘帶宿茱萸始悟摧林秀因街避

繳蘆文房長遣閑經肆未曾鋪鷓鴣方求侶鷗鳶已嚇雛微

還何鄭重斥去亦須更迢迢投遐徼蒼黃出與區通川誠有

咎溢口定無辜三月積之通川八利罷從頭厘剛腸到底剗

薰蕕任盛貯稊稗莫超踰公幹經時卧鍾儀幾歲拘光陰流

似水蒸瘴熱於鑪薄命知然也深交有矣夫救焚期骨肉投

分刻肌膚本題云寄澧州李十舍人果州崔二十二員外開

四拾遺李二十助教實七二妙馳軒陛三英詠袴襦度杜二十

校書兼投吊席八舍人李多嘲鰥蜺寶數集蜘蛛李二十

二十四並居北省李十一崔數子皆奇貨唯予獨朽株邯鄲笑

詩因多詠物之作寶七類匍匐燕薊受椰榆賴學三閭憤甘齊百里愚耽眠稀醒素憑

醉少嗟吁學問徒爲爾書題盡已于別猶多夢寐情尚感周
枯近喜司戎健尋傷掌誥徂今日得樂天書士元名位屈伯
道子孫無舊好飛瓊翰新詩灌玉壺幾催閑處泣終作苦中
娛廉蘭聲相讓燕秦勢豈俱此篇應絕倒休漫捋髭鬚樂天
篇末云此篇擬打足下
寄容州詩故有戲譽

和樂天送客游嶺南二十韻

次用本韻

我自離鄉久君那度嶺頻一杯魂慘澹萬里路艱辛江館連
沙市龍船泊水濱騎田迴北顧桐柱指南鄰大壑浮三島周
天過五均波心踴樓閣規外布星辰交廣間南極浸高北極
衆大如五曜者數狒狒穿筒格猩猩置屐馴郭璞云鸞鸞交
十皆不在星經數狒狒穿筒格猩猩置屐馴
兩目人俗法管中竹筒穿臂以受之狒狒執臂輒笑則脣蔽
嘗以美酒置於其所且排十數屐猩猩見之驟相謂曰吾既
就擒矣然而漸斂至醉醉則穿破屐而行既不能去相與泣
而就橋嘗笑而被格蓋爲此貢兼蛟女絹俗重語兒巾方南

去京華絕遠冠冕不到唯海路稍通舶主腰藏寶南方呼波
吳中商肆多勝云此有語兒巾子懷藏以避強丐黃家砦音柴之區落起塵歌鍾排象背炊爨
上魚身夷民大陳設則巨象背上作樂大魚出浮身若雷山接旗紅賊艦新島夷徐市種廟現趙佗神鳶跼方知瘴
蛇蘇不待春曙潮雲斬斬夜海火燐燐海水夜擊之則盡如
也冠冕中華客梯航異域臣果然皮勝錦吉了舌如人風默
秋茅葉烟埋曉月輪定應玄髮變焉用翠毛珍句漏沙須買
貪泉貨莫親能傳稚子術何患隱之貧

獻榮陽公詩五十韻并序

啓今月十七日公會儒于便廡積亦謬容末席公出棠樹之
首章且識其目曰客有前進士韋張在宋來會學由我而下
聯爲五言以美之諸生怙怙竦竦各盡詞以獻公公則舉其
摧敵推案析理次至數聯應若前定諸儒有不安者隨爲刮

削變嫫爲妍不廢暮而珠貫成就瑕不可掩者積六聯耳退而自咎且盛公之所爲因而次用所聯翩賢等五十一字合爲一詩止詠公之詞業力翰洎生徒學校之事而已也其於勲位崇懿在國籍族地清甲編世家政事德美播謳謠儉仁愛被親戚非小儒造次之所盡大凡受褊狹者不可以語大持杯捲而承澍雨自滿而止又安能測其霽霽之所至哉惶恐無任俯伏待罪謹以啓陳不宣謹啓

鄭驛騎翩翩丘門子弟賢文翁開學日正禮騁途年

張秀榮

陽公首薦

駁骨黃金買英髦絳帳延趨風皆蹠足侍坐各差

登第也

肩解榻招徐稚登樓引仲宣鳳攢題字扇魚落講經筵盛氣

河包濟貞姿嶽柱天臯夔當五百鄒魯重三千科斗翻騰取

關雎教授先

榮陽公寮吏生徒受詩有百數


篆垂朝露滴詩綴夜珠聯逸禮


多心匠焚書舊口傳陳遵修尺牘阮瑀讓飛牋中的顏初啓


抽毫踵未旋森羅萬木合屬對百花全詞海跳波湧文星拂
坐懸戴馮遙避席祖逖後施鞭西蜀凌雲賦東陽詠月篇勁
芟鼇足斷精貫虱心穿浩汗神彌王颿颿興欲仙冰壺通皓
雪綺樹眇晴煙驅駕雷霆走鋪陳錦繡鮮清機登突於甲與
流韻溢山川墨客膺潛服談賓膝誤前張鱗定摧敗折角反
矜憐句句推瓊玉聲聲播管絃纖新揀造化湏洞幹陶甄衛
磬琤銅極齊竿僭濫偏空虛慙炙輠點竄許懷鈞慙色秋來
草哀吟雨後蟬自傷魂慘沮何暇思幽玄稷病瘡二年求醫
在此榮陽公不忍
歸之喜到樽壘側愁親几案邊菁華知竭矣肺腑尚求旃抵
滯渾成醉徘徊轉慕臙老嘆才漸少閑苦病相煎瓦礫難追
琢芻蕘分棄捐漫勞成懇懇那得美娟娟拙劣仍非速迂愚
且異專移時停筆硯揮景乏戈鋌儀舌忻猶在舒帷誓不褰
會將連獻楚深耻謬游燕蒲有臨書葉韋充讀易編沙湏披

見寶經擬帶耕田入霧長期閏持朱本望研輪轅呈曲直鑿
杓取方圓呼吸寧徒爾霑濡豈浪然過簫資響亮隨水漲淪
連惜日看圭短偷光恨壁堅勤勤彫朽木細細導蒙泉傳癖
今應甚頭風昨已痊丹青公舊物一爲變蚩妍

元氏長慶集卷第十二







元氏長慶集

二

LIBRARY
OF THE
UNIVERSITY OF ILLINOIS



CHINA



元氏長慶集卷第十三

律詩

酬樂天江樓夜吟

酬樂天待漏入閣

酬樂天游西湖

江邊

春

月

神麴酒

感石榴

度門寺

大雲寺

和友封題開善寺

酬樂天江樓夜吟稹詩因成三十韻

次用本韻

忽見君新句君吟我舊篇見當巴徼外吟在楚江前思鄙寧
通律聲清遂扣玄三都時覺重一顧世稱妍排韻曾遙荅分
題幾共聯昔憑銀翰寫今賴玉音宣布鼓隨椎響坏泥仰匠
圓鈴因風斷續珠與調牽綿阮籍驚長嘯商陵怨別絃猿羞

啼月峽鶴讓警秋天志士潛興感高僧暫廢禪興飄滄海動
氣合碧雲連點綴工微者吹嗟勢特然休文徒倚檻彦伯浪
迴船妓樂當筵唱兒童滿巷傳改張思婦錦騰躍賈人牋魏
拙虛教出曹風敢望痊定遭才子笑恐賺學生癡裁什情何
厚飛書信不專隼猜鴻蓄縮虎橫大逃遭水墨看雖久瓊瑤
喜尚全纔從魚裏得便向市頭懸夜置堂東序朝鋪座右邊
手尋韋欲絕淚滴紙渾穿甘蕨銷殘醉醍醐醒早眠深藏那
遽滅同詠苦無緣雅羨詩能聖終嗟藥未仙五千誠遠道四
十已中年諸葛亮云楊州萬里濤陽向
餘五千僕今年忽已四十一暗魄多相夢衰容每
自憐卒章還慟哭蚊蚋溢山川

酬樂天待漏入閣見贈

時樂天爲中書舍人
予任翰林學士

未勘銀臺契先排浴殿關沃心因特召承旨絕常班

丞旨學士在諸

學士

颶閃才人袖

思政對學士往
往官官傳詔

嘔鴟軟舉鰲官花低作帳

雲從積成山密視樞機草偷瞻咫尺頗恩垂天語近對久漏
聲閑丹陛曾同立金鑾恨獨攀筆無鴻業潤袍覬紫文殷河
水通天上瀛州接世間謫仙名籍在何不重來還

酬樂天早春閑游西湖頗多野趣恨不得與微之
同賞因思在越官重事殷鏡湖之游或恐未暇因
成十八韻見寄樂天前篇到時適會予亦宴鏡湖
南亭因述目前所睹以成酬答末章亦示暇誠則
勢使之然亦欲粗爲恬養之贈耳

浙東時作

鴈思欲迴賓風聲乍變新各攜紅粉妓俱伴紫垣人水面波
疑穀山腰虹隄似巾柳條黃大帶菱葑韞綠文茵雪盡纔
通屐汀寒未有蘋向陽偏曬羽依岸小游鱗浦嶼崎嶇到林
園次第巡墨池憐嗜學丹井羨登真

隄少墨池雅川丹井皆越中異跡

雅歎

游方盛聊非意所親白頭辭北闕滄海是東鄰問俗煩江界

元集十三
三
蒐畋想渭津故交音訊少歸夢往來頻獨喜同門舊皆爲列
郡臣三刀連地軸一葦礙車輪尚阻青天霧空瞻白玉塵龍
因雕字識犬爲送書馴勝事無窮境流年有限身嬾將閑氣
力爭鬪野塘春

江邊四十韻

官爲修宅卒然有作因招李
六侍御此後並江陵時作

官借江邊宅天生地勢坳欹危饒壞構迢遞接長郊怪鵬頻
棲息跳蛙頗溷殺總無籬繳繞尤怕虎咆哮停潦魚招獺空
倉鼠敵猫土虛煩穴蟻柱朽畏藏蛟蛇虺吞簷雀豺狼逐野
鹿犬驚狂浩浩鷄亂響嚶嚶濩落貧甘守荒涼穢盡包斷簾
飛熠燿當戶網躡蟪蛄曲突翻成沼行廊却代庖橋橫老顛枿
馬病衰芻茭一一牀頭點連連砌下泡辱泥疑在絳避雨想
經嶠相顧憂爲鼃誰能復繫匏誓心來利往卜食過安爰何
計逃昏墊移文報舊交棟梁存伐木苦蓋愧分茅金瑄排黃

荻琅玕衰翠梢花塼水面聞鴛瓦玉聲敲方礎荆山採脩掾
郢匠鉤隱樵雷震蟄破竹箭鳴骹正寢初停午頻眠欲轉胞
困圓故薄祿厨敝備嘉肴各各人寧宇雙雙鸞賀巢高門受
車轍華廐稱蒲稍尺寸皆隨用毫釐敢浪拋篋餘籠白鶴
賸架青鵠製榻容筐在施關拒斗梢欄干防汲井密室待持
膠庭草傭工雜園蔬稚子培本圖閑種植那要擇肥磽綠柚
勤勤數紅榴箇箇抄池清漉螃蜞瓜蠹拾搬蜚蠊篆看沙鳥
窘刀綻海鮫羅灰脩藥竈築堦閣弓弞散誕都由習童蒙剩
懶教最便陶靜飲還作解愁嘲近浦聞歸楫遙城罷曉鐃王
孫如有問須爲併揮鞘

春六十韻

節應寒灰下春生返照中未能消積雪已漸少回風迎氣邦
經重齋誠帝念隆龍驟紫宸北天壓翠壇東仙仗搖佳彩榮

光答聖衷便從威仰座隨入大羅宮先到璇淵底偷穿瑋琚
櫛館娃朝鏡晚太液曉冰融撩摘黯芳情遍搜求好處終九
霄渾可可萬姓尚忪忪晝漏頻加箭宵暉欲半弓驅令三殿
出乞與百蠻同直自方壺島斜臨絕漠戎南巡暖珠樹西轉
麗崆峒度嶺梅甘圻潛泉脉暗洪悠悠鋪塞草冉冉着江楓
蠶役投筐妾耘催荷篠翁旣蒸難發地仍送嬾歸鴻約畧環
區宇殷勤綺縠鄴華山青黛撲渭水碧沙蒙宿露清餘靄晴
烟塞迥空鷺巢纔點綴鷺舌最惺惚膩粉梨園白烟脂甗徑
紅鬱金垂嫩柳晉畫委高籠地甲門闌大天開禁掖崇層臺
張舞鳳閣道架飛虹麴蘖調神鵷鸞竭志忠歌聲齊錫宴
車服獎庸功俊造興時用閭閻賀歲豐倡樓歌細細農野麥
芄芄貴主驕矜盛豪家恃賴雄偏霑打毬彩頻得鑄錢銅專
殺擒楊若殊恩郝鄧通女孫新在內嬰稚近封公游行關心

樂詩書對面，聾盤筵，饒異味。音樂斤庸工，酒愛油衣淺盃，誇
瑪瑙烘挑鬟玉釵，髻刺繡寶裝攏，啓齒呈編貝，彈絲動削葱。
醉圓雙媚，靨波溢兩明瞳，但賞歡無極，那知恨亦充。洞房閑
窈窕，庭院獨葱籠。謝砌榮殘絮，班窓網曙蛭，望夫身化石，爲
伯首如蓬。顧我沉憂士，騎他老病驄。靜街乘曠蕩，初日接曠
曠，飲敗肺常渴，魂驚耳更聰。虛逢好陽艷，其那苦昏悞。僂俛
還移步，持疑又省躬。慵將疲頓質，漫走倦羸僮。季月行當暮，
良辰坐歎窮。晉悲焚介子，魯願浴沂公。燧改鮮妍火，陰繁晦
澹桐。瑞雲低厖厖，香雨潤濛濛。藥溉分窠數，籬栽備幼冲。種
莎憐見葉，護筍冀成筒。有夢多爲蝶，因蒐定作熊。漂沉隨壞
芥，榮茂委蒼穹。震動風千變，晴和鶴一冲。丁寧塞芳侶，須識
未開叢。

月三十韻

葉標新朔霜豪引細輝白眉驚半隱虹勢訝全微涼魄潭
空洞虛弓鴈畏威上弦何汲汲佳色轉依依綺幕殘燈斂粧
樓破鏡飛玲瓏穿竹樹岑寂思悵悵坐愛規將合行看望已
幾絳河水鑑明黃道玉輪巍迥照偏瓊砌餘光借粉闌泛池
相皎潔壓柱共芳菲的的當歌扇娟娟透舞衣殷勤入懷什
懇款墮雲圻素液傳烘盞鳴琴薦碧徽椒房深肅肅蘭路靄
霏霏翡翠通簾影琉璃瑩殿扉西園筵瑋瑋東壁射蜚蜚老
將占天陣幽人釣石磯荷鋤元亮息迴棹子猷歸迢迢同千
里孤高淨九圍從星作風雨配日麗旌旗麟闕寧徒設蠅聲
豈浪譏司存委鄉士新拜出郊畿今古雖云極虧盈不易違
珠胎方夜滿清露忍朝晞漸減嫦娥面徐收楚練機下疑雕
壁碎潘感覺牀稀捐篋辭班女潛波蔽宓妃氛埃誰定滅蟾
兔杳難希湏遣圓明盡良嗟造化非如能付刀尺別爲創璿

璣

飲致用神麴酒三十韻

七月調神麴三春釀綠醺雕鐫荆玉盞烘透內丘瓶試滴盤
心露疑添案上螢滿尊疑止水祝地落繁星翻陋瓊漿濁唯
聞石髓馨水壺通角簾金鏡徹雲屏雪映煙光薄霜涵霽色
冷蚌珠懸皎晶桂魄倒潏溟晝灑蟬將飲宵揮鶴誤聆琉璃
驚太白鍾乳訝微青詎敢辭濡首并憐可鑒形行當遣俗累
便得造禪扃何憚說千日甘從過百齡但令長泛蟻無復恨
漂萍膽壯還增氣機忘反自冥甕眠思畢卓糟籍憶劉伶髣
髴中聖日希夷夾大庭眼前須底物座右任他銘刮骨都無
痛如泥未擬停殘觴猶漠漠華燭已熒熒真性臨時見狂歌
半睡聽喧闐爭意氣調笑學娉婷酩酊焉知極羈離忽暫寧
鷄聲催欲曙蟾影照初醒咽絕鶻啼竹蕭撩鴈去汀遙城傳

漏箭鄉寺響風鈴楚澤一爲梗堯階屢變眞醉荒非獨此愁
夢幾曾經每耻窮途哭今那客淚零感君澄醴酒不遣渭和
涇

感石榴二十韻

何年安石國萬里貢榴花迢遞河源道因依漢使槎酸辛犯
葱嶺憔悴涉龍沙初到標珍木多來比亂麻深拋故園裏少
種貴人家唯我荊州見憐君胡地賒從教當路長兼恣入簷
斜綠葉裁煙翠紅英動日華新簾裙透影踈牖燭籠紗委作
金爐焰飄成玉砌瑕乍驚珠綴密終誤繡幃奢琥珀烘梳碎
燕支嬾頰塗風翻一樹火電轉五雲車絳帳迎宵日芙蕖綻
早牙淺深俱隱映前後各分葩宿露低蓮臉朝光借綺霞暗
虹徒繳繞濯錦莫周遮俗態能嫌舊芳姿尚可嘉非專愛顏
色同恨阻幽遐滿眼思鄉淚相嗟亦自嗟

度門寺

北祖三禪地

神秀禪師造

西山萬樹松門臨溪一帶橋映竹千重

剪鑿基階正包藏景氣濃諸巖分院宇雙嶺抱垣墉舍利開
層塔香爐占小峯道場居士置經藏大師封太子知栽植神
王守要衝由旬排講座丈六寫真容佛語迦陵說僧行猛虎
從脩羅擡日拒樓至拔霜鋒畫井垂枯朽穿池救噉喙焦非
難敗壞槿喻暫丰茸寶界留遺事金棺滅去蹤鉢傳烘碼碯
石長翠芙蓉影帳紗全落繩牀土半壅

金棺中所有

並荒林迷

醉象危壁亞盤龍行色憐初月歸程待曉鐘心源雖了了塵
世苦憧憧宿蔭高聲識齋糧併力春佗生再來此還願總相
逢

大雲寺二十韻

地勝宜臺殿山晴離垢氛現身千佛國護世四王軍碧耀高

樓瓦頽飛半壁文鶴林繁古道鴈塔沒歸雲幡影中天颺鍾
聲下界聞攀蘿極峯頂游目到江濱馴鴿閒依綴調猿靜守
群虎行風捷獵龍睡氣氤氲穫稻禪衣卷燒畬却火焚新英
蜂采掇荒草象耕耘鉢付靈童洗香教善女薰果枝低罽罽
花雨澤雰雰示化維摩疾降魔力士勲聽經神變見說偈鳥
紛紜上境光猶在深谿暗不分竹籠煙欲暝松帶日餘曛真
諦成知別迷心尚有云多生沉五蘊宿習樂三墳諭鹿車雖
設如蠶緒正焚且將平等義還奉聖明君

和友封題開善寺十韻

依次重用本韻

梁王開佛廟雲構歲時遙珠綴飛閑鵠紅泥落碎椒燈籠青
焰短香印白灰銷古匣收遺施行廊畫本朝藏經霑雨爛魔
女捧花嬌亞樹牽藤閣橫查壓石橋竹荒新筍細池淺小魚
跳匠正琉璃瓦僧鋤芍藥苗旋蒸茶嫩葉偏把柳長條便欲

忘歸路方知隱易招

元氏長慶集卷第十三

元氏長慶集卷第十四

律詩

牡丹

象人

松石

春雪映早梅

玉卮無當

數賞

九月盡

雨後花

早歸

晚秋

送林復夢赴辟

憶楊十二

夜合

新竹

秋相望

春病

山竹枝

悟禪

東臺去

戴光弓

劉頗詩

夜飲

六集四
褒城驛

閑

欲曙

寄胡靈之

夜雨

酬李六醉後

歸田

緣路

誚盧戡

遣春

歲日

臨湘樓

晚宴湘亭

酒醒

牡丹二首

此後並是校書郎已前作

簇藥風頻壞
裁紅雨更新
眼看吹落地
便別一年春
繁綠陰全合
衰紅展漸難
風光一擡舉
猶得暫時看

象人

被色空成象
觀空色異真
自悲人是假
那復假爲人

與楊十二巨源
盧十九經濟
同遊大安亭
各賦二

物合爲五韻探得松石

片石與孤松曾經物外逢月臨棲鶴影雲抱老人峯蜀客君
當問秦官我舊封積膏當琥珀新刼長芙蓉待補蒼蒼去樛
柯早變龍

賦得春雪映早梅

飛舞先春雪因依上番梅一枝方漸秀六出已同開積素光
逾密真花節暗催搏風飄不散見睨忽偏摧郢曲琴空奏羌
音笛自哀今朝兩成詠翻挾昔人才

賦得玉卮無當

韻取卮字

共惜連城寶翻成無當卮詎慚君子貴深訝巧工隳泛蟻功
全少如虹色不移可憐殊礫石何計辨糟醅江海誠難滿盤
筵莫忘施縱乖斟酌意猶得對光儀

賦得數真

元作年

將課司天曆先觀近砌
莫一句開應月五日數從星桂滿叢
初合蟾虧影漸零辨時長有素數閏或餘青墜葉推前事新
芽察未形堯年始今歲方欲瑞千齡

賦得九月盡

秋字

霜降三旬後
賞餘一葉秋
玄陰迎落日
涼魄盡殘鈎
半夜灰移瑄
明朝帝御裘
潘安過今夕
休詠賦中愁

賦得雨後花

紅芳憐靜色
深與雨相宜
餘滴下纖蘂
殘珠墮細枝
浣花江上思
啼粉鏡中窺
念此低徊久
風光幸一吹

早歸

春靜曉風微
凌晨帶酒歸
遠山籠宿霧
高樹影朝暉
飲馬魚驚水
穿花露滴衣
嬌鶯似相惱
含顰傍人飛

晚秋

竹露滴寒聲離人曉思驚酒醒秋簾冷風急夏夜輕寢倦解
幽夢慮閑添遠情誰憐獨耿枕斜月透窓明

送林復夢赴章令辟

蜀路危於劍憐君自坦途幾回曾啖炙千里遠銜珠野性便
荒飲時風忌酒徒相門多禮讓前後莫相踰

憶楊十二

楊子愛言詩春天好詠時戀花從馬滯聯句放杯遲日映含
煙竹風牽卧柳絲南山更多興須作白雲期

夜合

綺樹滿朝陽融融有露光雨多疑濯錦風散似分粧葉密煙
蒙火枝低繡拂墻更憐富暑見留詠日偏長

新竹

新篁纔解箨寒色已青葱冉冉偏疑粉蕭蕭漸引風扶疎多

透日寥落未成叢唯有團團節堅貞大小同

秋相望

簷月驚殘夢浮涼滿夏衾蟪蛄低戶網螢火度牆陰爐暗燈
光短牀空帳影深此時相望久高樹憶橫岑

春病

病來閑卧久因見靜時心殘月曉窓迥落花幽院深望山移
坐榻行藥步墻陰車馬門前度遙聞哀苦吟

山竹枝

自化感寺携來至清源投之輞川耳

深院虎溪竹遠公身自栽多慚折君節扶我出山來貴宅安
危步難將混俗材還投輞川水從作老龍回

悟禪三首寄胡果

近聞胡隱士潛認得心王不恨百年促翻悲萬劫長有修終
有限無事亦無殃慎莫通方便應機不頓忘

百年都幾日何事苦覓然晚歲倦爲學閉心易到禪病宜多
宴坐貧似少攀緣自笑無名字因名自在天

近見新章句因知見在心春游晉祠水晴上霍山岑問法僧
當偈還丹客贈金莫驚頭欲白禪觀老彌深

東臺去

僕每爲崔白二學士話陶先生喜不遇之事且曰僕得分司東臺即足以買山家

陶君喜不遇予每爲君言今日東臺去澄心在陸渾旋抽隨
日俸併買近山園千萬崔兼白殷勤承主恩

戴光弓

韋評事見贈也

路府筋角勁戴光因合成因君懷膽氣贈我定交情不擬閑
穿葉那能枉始生唯調一隻箭飛入破聊城

劉頗詩

并序

昌平人劉頗其上一世有義烈頗少落行陣二十解屬文舉
進士科試不就負氣俠路間病羸車蔽樞盡碎之聲囊酬直

而去南歸唐州爲吏所軋勢不支氣屈自火其居出契書投火中繇是以氣聞予聞風四五年而後見因以詩許之一言感激士三世義忠臣破甕嫌妨路燒莊耻屬人迥分遼海氣閑踏洛陽塵儻使權由我還君白馬津

夜飲

燈火隔簾明竹梢風雨聲詩篇隨意贈杯酒越巡行漫唱江朝曲閑徵藥草名莫辭終夜飲朝起又營營

褒城驛

軍大夫
嚴秦修

嚴秦修此驛兼漲驛前池已種千竿竹又栽千樹梨四年三月半新筍晚花時悵望東川去等閑題作詩

閑二首

掩淡洲煙白籬篩日脚紅江喧過雲雨船泊打頭風艇子收魚市鴉兒噪荻叢不堪堤上立滿眼是蚊蟲

青衫經夏黧白髮望鄉稠雨冷新秋簾屋稀欲曙樓連鴻盡
南去雙鯉本東流北信無人寄蟬聲滿樹頭

欲曙

江隄闇暗流漏鼓急殘籌片月低城堞稀星轉角樓鶴媒華
表上鷓鴣柳枝頭不爲來趨府何因欲曙遊

寄胡靈之

早歲顛狂伴城中共幾年有時潛步出連夜小亭眠月影侵
牀上花叢在眼前今宵正風雨空宅楚江邊

夜雨

水恠潛幽草江雲擁廢居雷驚空屋柱電照滿牀書竹瓦風
頻裂茅簷雨漸疎平生滄海意此去怯爲魚

酬李六醉後見寄口號

韻用本

頓愈頭風疾因吟口號詩文章紛似繡珠玉布如綦健羨觥

飛酒蒼黃日映籬命童寒色倦撫稚晚啼饑潦倒慙相識平生頗自奇明公將有問林下是靈龜

歸田

時三十七

陶君三十七挂綬出都門我亦今年去商山浙岸村冬修方丈室春種桔槔園千萬人間事從茲不復言

緣路

總是玲瓏竹兼藏淺漫溪沙平深見底石亂不成泥煙火遙村落桑麻隔稻畦此中如有問甘被到頭迷

謂盧戡與予數約遊三寺戡獨沉醉而不行

乘興無羈束閑行信馬蹄路幽穿竹遠野迥望雲低素帚茅花亂圓珠稻實齊如何盧進士空戀醉如泥

遣春三首

楊公三不惑我惑兩般全逢酒判身病拈花盡意憐水生低

岸沒梅蹙小珠連千萬紅顏輩須驚又一年

柳眼開渾盡梅心動已闌風光好時少杯酒病中難學問慵
都廢聲名老更判唯餘看花伴未免憶長安

失却遊花伴因風浪引將柳堤遙認馬梅徑誤尋香晚景行
看謝春心漸欲狂園林都不到何處枉風光

歲日

一日今年始一年前事空淒涼百年事應與一年同

湘南登臨湘樓

高處望瀟湘花時萬井香雨餘憐日嫩歲閨覺春長霞利分
危榜煙波透遠光情知樓上好不是仲宣鄉

晚宴湘亭

晚日宴清湘晴空走艷陽花低愁露醉絮起覺春狂舞旋紅
裙急歌垂碧袖長甘心出童殺湏一盡時荒

酒醒

飲醉日將盡醒時夜已闌
暗燈風焰曉春席水牕寒
未解縈身帶猶傾墜枕冠
呼兒問狼籍疑是夢中驩

元氏長慶集卷第十四

元氏長慶集卷第十五

律詩

獨游

洞庭湖

雪天

贈熊士登

別熊判官

水上寄樂天

夏陽亭

日高睡

輞川

天壇歸

雨後

晴日

直臺

行宮

醉行

指巡胡

飲新酒

香毬

景申秋

遣行

生春

嘉陵水

漫天嶺

百牢關

酬王全素

寄獻榮陽公

酬樂天寄蘄簾

酬李浙西

酬周從事

代杭民荅樂天

獨游

遠地難逢侶，閑人且獨行。
上山隨老鶴，接酒待殘鶯。
花當西施面，泉勝衛玠清。
鶻鶻滿春野，無限好同聲。

洞庭湖

人生除泛海，便到洞庭波。
駕浪沉西日，吞空接曙河。
虞巡竟安在，軒樂詎曾過。
唯有君山下，狂風萬古多。

雪天

故鄉千里夢，往事萬重悲。
小雪沉陰夜，閒牕老病時。
獨聞歸去鴈，偏詠別來詩。
慙愧紅粧女，頻驚兩鬢絲。

贈熊士登

平生本多思，况復老逢春。今日梅花下，佗鄉值故人。

別嶺南熊判官

十年常遠道，不忍別離聲。况復三巴外，仍逢萬里行。桐花新
雨氣，梨葉晚春晴。到海知何日，風波從此生。

水上寄樂天

眼前明月水先入，漢江流漢水流。江海西江過庾樓，庾樓今
夜月。君豈在樓頭？萬一樓頭望還應，應望我愁。

夏陽亭臨望寄河陽侍御堯

望遠音書絕，臨川意緒長。殷勤眼前水，千里到河陽。

日高睡

隔是身如夢，頻來不爲名。憐君近南住，時得到山行。

輞川

世累爲身累閑忙不自由殷勤輞川水何事出山流

天壇歸

爲結區中累因辭洞裏花還來舊城郭煙火萬人家

雨後

倦寢數殘更孤燈暗又明竹梢餘雨重時復拂簾驚

晴日

多病苦虛羸晴明強展眉讀書心緒少閑卧日長時

直臺

麋入神羊隊鳥驚海鷺眠仍教百餘日迎送直廳前

行宮

寥落古行宮宮花寂寞紅白頭宮女在閑坐說玄宗

醉行

秋風方索漠霜貌足睽携今日騎驄馬街中醉踏泥

指巡胡

遣悶多憑酒公心只仰胡挺身唯直指無意獨欺愚

飲新酒

聞君新酒熟況值菊花秋莫怪平生志圖銷盡日愁

香毬

順俗唯團轉居中莫動搖愛君心不惻猶訝火長燒

景申秋八首

年年秋意緒多向雨中生漸欲煙火近稍憐衣服輕詠詩閑處立憶事夜深行淩落尋常慣淒涼別爲情

蚊幌雨來卷燭蛾燈上稀啼兒冷秋簾思婦問寒衣簾斷螢火入窓明蝙蝠飛良辰日夜去漸與壯心違

嗚嗚簷雷凝丁丁窓雨繁枕傾筒簾滑幔颭案燈翻喚喚魘兒難覺吟詩婢苦煩強眠終不着閑卧暗消魂

瓶瀉高簷雨窓來激箭風病憎燈火暗寒覺薄幃空婢報樵
蘇竭妻愁院落通老夫慵計數教想蔡城東

風頭難着枕病眼厭看書無酒銷長夜回燈照小餘三元推
廢王九曜入乘除廊廟應多筭參差幹太虛

經雨籬落壞入秋田地荒竹垂哀折節蓮敗惜空房小片慈
菇白低叢柚子黃眼前撩亂輩無不是同鄉

雨柳枝枝弱風光片片斜蜻蜒憐曉露蛺蝶戀秋花饑啅空
籬雀寒棲滿樹鴉荒涼池館內不似有人家

病苦十年後連陰十日餘人方教作鼠天豈遣爲魚鮫綻艷
城劍蟲凋鬼火書出聞泥滓盡何地不摧車

遣行十首

慘切風雨多沉吟離別情驚辭前日社蠶是每年聲暗淚深
相感危心亦自驚不如元不識俱作路人行

十五年前事恓惶無限情
病僮更借出羸馬共馳聲
射葉揚纔破聞弓馬已驚
小年辛苦學求得苦辛行

徙倚簷宇下思量去住情
暗螢穿竹見斜雨隔窓聲
枕回轉數聞鷄撩亂驚一
家同草草排比送君行

已愴朋交別復懷兒女情
相兄亦相舊同病又同聲
白髮年年剩秋蓬處處驚
不堪身漸老頻送異鄉行

塞上風雨思城中兄弟情
北隨鷄立位南送鴈來聲
遇適尤兼限聞書喜復驚
唯應遙料得知我伴君行

暮欲歌吹樂暗衝泥水情
稻花秋雨氣江石夜灘聲
犬吠穿籬出鷗眠起水驚
愁君明日夜獨自入山行

七過褒城驛回回各爲情
八年身世夢一種水風聲
尋覓詩章在思量歲月驚
更悲西塞別終夜遶池行

褒縣驛前境曲江池上情
南堤衰柳意西寺晚鍾聲
雲水興

方遠風波心已驚可憐皆老大不得自由行

見說巴風俗都無漢性情猿聲蘆管調羌笛竹鷄聲迎候人
應少平安火莫驚每逢危棧處須作貫魚行

聞道陰平郡翛然古戍情橋兼麋鹿踏山應鼓鼙聲羌婦梳
頭緊蕃牛護尾驚憐君閑悶極只傍白江行

生春

丁酉歲凡
十章

何處生春早春生雲色中籠葱閑着水晡淡欲隨風度曉分
霞態餘光庇雪融晚來低漠漠渾渾欲泥幽叢

何處生春早春生漫雪中渾無到底片唯逐入樓風屋上些
些薄池心旋旋融自悲銷散盡誰假入蘭叢

何處生春早春生霽色中遠林橫反照高樹亞東風水凍霜
威庇泥新地氣融漸知殘雪薄杪近最憐叢

何處生春早春生曙火中星圍分暗陌煙氣滿晴風宮樹棲

鴉亂城樓帶雪融競排闥闔側珂傘自相叢

何處生春早春生曉禁中殿堦龍旆日漏閣寶華風藥樹香
煙重天顏瑞氣融柳梅渾未覺青紫已叢叢

何處生春早春生江路中雨移臨浦市晴候過湖風蘆筍雖
猶短凌澌玉漸融數宗船載足商婦兩眉叢

何處生春早春生野墅中病翁閑向日征婦懶成風斫簋天
雖暖穿區凍未融鞭牛縣門外爭土蓋蠶叢

何處生春早春生冰岸中尚憐扶臘雪漸覺受東風織女雲
橋斷波神玉貌融便成嗚咽去流恨與蓮叢

何處生春早春生柳眼中芽新纔綻日茸短未含風綠誤眉
心重黃鶯蠟淚融碧條殊未合愁緒已先叢

何處生春早春生梅援中藥排難犯雪香乞氣擬來風隴迥
羌聲怨江遙客思融年年最相惱綠未有諸叢

何處生春早春生鳥思中鵲巢移舊歲戴羽旋高風鴻鴈驚沙暖鴛鴦愛水融最憐雙翡翠飛入小梅叢

何處生春早春生池榭中鏤瓊冰陷日文穀水迴風柳愛和身動梅愁合樹融草芽猶未出挑得小萱叢

何處生春早春生稚戲中亂騎殘爆竹半啞小旋風罵雨愁妨走呵冰喜旋融女兒針線盡偷學五辛叢

何處生春早春生人意中曉粧雖近火晴戲漸憐風暗入心情嬾先添酒思融預知花好惡偏在最深叢

何處生春早春生半睡中見燈如見霧聞雨似聞風開眼猶

殘夢擡身便恐融却成雙翅

蝶還遶花叢

一本傍人驚屢壓魂逐牡丹叢

何處生春早春生曉鏡中手寒勻面粉髮動倚簾風宿霧梅

心滴朝光幕上融思牽梳洗嬾空拔綠絲叢

何處生春早春生綺戶中玉櫳穿細日羅幔張輕風柳軟腰

支嫩梅香密氣融。獨眠傍妬物偷鏟。合歡叢

何處生春早。春生老病中。土膏蒸足腫。天暖癢頭風。似覺肌膚展。潛知血氣融。又添新一歲。衰白轉成叢。

何處生春早。春生客思中。旅魂驚北鴈。鄉信是東風。縱有心灰動。無由鬢雪融。未知開眼日。空遶未開叢。

何處生春早。春生濛雨中。裊塵微有氣。拂面細如風。柳誤啼珠密。梅驚粉汗融。滿空愁淡淡。應豫憶芳叢。

嘉陵水

爾是無心水。東流有恨無我心。無說處也共爾何殊。

漫天嶺贈僧

五上兩漫天。因師懺業緣。漫天無盡日。浮世有窮年。

百牢關

天上無窮路。生期七十間。那堪九年内。五度百牢關。

二月十九日酬王十八全素

此後有西韻和並交用本韻

君念世上川嗟予老瘴天那堪十日內又長白頭年

榮陽鄭公以稹寓居嚴茅有池塘之勝寄詩四首

因有意獻

激射分流闊灣環此地多暫停隨梗浪猶閱敗霜荷恨阻還江勢思深到海波自傷才畎澮其柰贈珠何

酬樂天寄蘄州簾

蘄簾未經春君先拭翠筠知爲熱時物預與瘴中人碾玉連心潤編牙小片珍霜凝青汗簡冰透碧游鱗水魄輕涵黛琉璃薄帶塵夢成傷冷滑驚卧老龍身

酬李浙西先因從事見寄之作

近日金鑾直親於漢珥貂內人傳帝命丞相讓吾僚浙郡懸旌遠長安諭日遙因君藥珠贈還一夢煙霄

酬周從事望海亭見寄

年老無流輩行稀足薜蘿熱時憐水近高處見山多衣袖長
堪舞喉嚨轉解歌不辭狂復醉人世有風波

代杭民答樂天

翠幕籠斜日朱衣儼別筵管絃妻欲罷城郭望依然路溢新
城市農開舊廢田春坊幸無事何惜惜三年

元氏長慶集卷第十五

元氏長慶集卷第十六

律詩

杏園

菊花

酬哥舒少府

幽棲

清都春霽

華嶽寺

天壇上境

尋西明寺僧

春遊

晚春

先醉

獨醉

宿醉

懼醉

羨醉

憶醉

病醉

擬醉

勸醉

任醉

同醉

狂醉

伴僧行

古寺

定僧

觀心處

智度師

牡丹

憶楊十二

送復夢

送劉太白

奉誠園

華嶽寺望山

野狐泉柳林

酬胡三問牡丹

酬樂天秋興

杏園

此後並校書郎已前諱

浩浩長安車馬塵狂風吹送每年春門前本是虛空界何事栽花誤世人

菊花

秋叢遶舍似陶家遍遶籬邊日漸斜不是花中偏愛菊此花開盡更無花

酬哥舒大少府寄同年科第

前年科第偏年少未解知羞最愛狂九陌爭馳好鞍馬八人
同看綵衣裳同年科第宏詞呂二吳王十一起拔萃白二十
二居易平判李十一復禮呂四類哥舒大煩崔
十八玄亮逮不肖自言行樂朝朝是豈料浮生漸漸忙賴得
官閑且踈散到君花下憶諸郎

幽棲

野人自愛幽棲所近對長松遠是山盡日望雲心不繫有時
看月夜方閑壺中天地乾坤外夢裡身名旦暮間遼海若思
千歲鶴且留城市會飛還

清都春霽寄胡三吳十一

藥珠宮殿經微雨草樹無塵耀眼光白日當空天氣暖好風
飄樹柳陰涼蜂憐宿露攢芳久鸞得新泥拂戶忙時節催年
春不住武陵花謝憶諸郎

華嶽寺

貞元二十年正月二十五日自洛之京二
月三日春社至華嶽寺懋實師院曾未逾

師因題四韻而巳

山前古寺臨長道來往淹留為愛山雙鷺營巢始西別百花
成子又東還暝驅羸馬頻看埃曉聽鳴鷄欲度關羞見實師
無外役竹窓依舊老身閑

天壇上境

貞元二十年五月十四日夜宿天壇石
側十五日得墊屋馬逢少府書知予

遠上天壇因以長句見贈篇末仍云
靈溪試為訪金丹因於壇上還贈

野人性僻窮深僻芸署官閑不似官萬里洞中朝玉帝上有洞周
里九光霞外宿天壇洪漣浩渺東溟曙白日低回上境寒因
為南昌檢仙籍馬君家世奉還丹

尋西明寺僧不在

春來日日到西林飛錫經行不可尋蓮池舊是無波水莫逐
狂風起浪心

與吳侍御春游

蒼龍闕下陪驄馬紫閣峯頭見白雲
滿眼流光隨日度今朝花落更紛紛

晚春

晝靜簷踈鶯語頻雙雙鬬雀動
堦塵柴扉日暮隨風掩落盡
閑花不見人

先醉

今日樽前敗飲名三杯未盡不能傾
怪來花下長先醉半是
春風蕩酒情

獨醉

一樹芳菲也當春漫隨車馬擁行塵
桃花解笑鶯能語自醉
自眠那藉人

宿醉

風引春心不自由等閑衝席飲多籌朝來始向花前覺度却
醒時一夜愁

懼醉搭爐子象

聞道秋來怯夜寒不辭泥水爲杯盤殷勤懼醉有深意愁到
醒時燈火闌

羨醉

綺陌高樓競醉眠共期顚顚不相憐也應自有尋春日虛度
而今正少年

憶醉

自歎旅人行意速每嫌杯酒緩歸期今朝偏偶醒時別淚落
風前憶醉時

病醉

戲作吳吟贈盧十九經濟
張三十四弘辛丈丘度

醉伴見儂因酒病道儂無酒不相窺那知下藥還沾底人去

人來剝一卮

擬醉

與盧子蒙飲於寶晦之醉後賦詩共十九首
子蒙叙爲別卷自此至狂醉皆是夕所賦

九月閑宵初向火一樽清酒始行盃
憐君城外遙相憶冒雨衝泥黑地來

勸醉

賓家能釀銷愁酒但是愁人便與銷
願我共君俱寂寞只應連夜復連朝

任醉

本怕酒醒渾不飲因君相勸覺情來
殷勤滿酌從聽醉乍可欲醒還一盃

同醉

呂子元度及之杜歸
和同隱客近韋氏池

柏樹臺中推事人杏花壇上鍊真形
心源一種閑如水同醉櫻桃林下春

狂醉

一自柏臺爲御史二年華負兩京春
峴亭今日顛狂醉舞引紅娘亂打人

伴僧行

春來求事百無成因向愁中識道情
花滿杏園千萬樹幾人能伴老僧行

古寺

古寺春餘日半斜竹風蕭爽勝人家
花時不到有花院意在尋僧不在花

定僧

落魄閑行不着家徧尋春寺賞年華
野僧偶向花前定滿樹狂風滿樹花

觀心處

滿坐喧喧笑語頻獨憐方丈了無塵
燈前便是觀心處要似觀心有幾人

智度師二首

四十年前馬上飛功名藏盡擁禪衣
石榴園下擒生處獨自閑行獨自歸

三陷思明三突圍鐵衣拋盡納禪衣
天津橋上無人識閑凭欄竿望落暉

西明寺牡丹

花向琉璃地上生光風炫轉紫雲英
自從天女盤中見直至今朝眼更明

憶楊十二

去時芍藥纔堪贈看却殘花已度春
只爲情深偏愴別等閑相見莫相親

送復夢赴韋令幕

世上如今重檢身
吾徒耽酒作狂人
西曹舊事多持法
慎莫吐佗丞相茵

送劉太白

太白居從善坊

洛陽大底居人少
從善坊西最寂寥
想得劉君獨騎馬
古提愁樹隔中橋

奉誠園

馬司徒舊宅

蕭相深誠奉至尊
舊居求作奉誠園
秋來古巷無人掃
樹滿空牆閉戟門

與太白同之東洛至櫟陽
太白染疾駐行予九月
二十五日至華嶽寺雪後望山

共作洛陽千里伴
老劉因疾駐行軒
今朝獨自山前立
雪滿三峯倚寺門

野狐泉柳林

去日野狐泉上柳紫牙初綻拂眉低秋來寥落驚風雨葉滿空林踏作泥

酬胡三憑人問牡丹

竊見胡三問牡丹爲言依舊滿西欄花時何處偏相憶寥落衰紅雨後看

酬樂天秋興見贈本句云莫怪獨吟秋興苦比君校近二毛年

勸君休作悲秋賦白髮如星也任垂畢竟百年同是夢長年何異少何爲

元氏長慶集卷第十六

卷之五

五

元氏長慶集卷第十七

律詩

雪後宿同軌店

贈韋氏兄弟

永貞二年赦

大隱洞

餞李十二

題李十一居壁

靖安窮居

贈樂天

使東川

駱口驛

清明日

亞枝紅

梁州夢

南秦雪

江樓月

慙問囚

江上行

漢江笛

郵亭月

嘉陵驛

百牢關

江花落

嘉陵江

西縣驛

望喜驛

好時節

夜深行

望驛臺

贈咸陽少府

贈呂校書

封書

李著作作花園

燈影

江陵途中寄樂天

渡漢江

哀病驄

送崔侍御

酬樂天翫月

酬樂天寄通中散

雪後宿同軌店上法護寺鐘樓望月

滿山殘雪滿山風
野寺無門院院空
烟火漸稀孤店靜
月明深夜古樓中

陪韋尚書丈歸履信宅因贈韋氏兄弟

紫垣駟騎入華居公子文衣護錦輿眠閣書生復何事也騎
羸馬從尚書

永貞二年正月二日上御丹鳳樓赦天下予與李
公垂庾順之閑行曲江不及盛觀

春來饒夢慵朝起不看千官擁御樓却着閑行是忙事數人
同傍曲江頭

韋居守晚歲常言退休之志因署其居曰大隱洞
命予賦詩因贈絕句

謝公潜有東山意已向朱門啓洞門大隱猶疑戀朝市不如
名作罷歸園

贈李十二牡丹花片因以餞行

鶯遊餘聲絮墮風牡丹花盡葉成叢可憐顏色經年別收取
朱欄一片紅

題李十一修行里居壁

雲闕朝迴塵騎合
杏花春盡曲江閑
憐君雖在城中住
不隔人家便是山

靖安窮居

喧靜不由居遠近
大都車馬就權門
野人住處無名利
草滿空堦樹滿園

贈樂天

等閑相見銷長日
也有閒時更學琴
不是眼前無外物
不關心事不經心

使東川

并序此後並御史時詩

元和四年三月七日
予以監察御史使川
往來鞍馬間賦詩
凡三十二章秘書省
校書郎白行簡為予
手寫為東川卷今
所錄者但七言絕句
長句耳起駱口驛
盡望驛臺二十二首

云

駱口驛二首

東壁上有李二十員外達吉崔二十

林白二十二居易題擁石關云開雪紅樹等篇有王質夫和馬王不知是何人也

郵亭壁上數行字
崔李題名王白詩
盡日無人共言語
不離墻下至行時

二星徼外通蠻服
五夜燈前草御文
我到東川恰相半
向南看月北看雲

清明日

行至漢上憶與樂天知退杓直拒非順之輩同游

當年寒食好風輕
觸處相隨取次行
今日清明漢江上一身
騎馬縣官迎

亞枝紅

性歲與樂天曾於郭家亭子竹林中見亞枝紅桃花半在池水自後數年不復記得

忽於衰城驛池岸竹間見之宛如舊物深所愴然

平陽池上亞枝紅
悵望山郵是事同
還向萬竿深竹裏
一枝

渾卧碧流中

梁州夢

是夜宿漢川驛夢與杓直樂天同游曲江兼入慈恩寺諸院倏然而寤則遞乘及世

郵吏已傳呼報曉矣

夢君同遠曲江頭也向慈恩院院遊亭吏呼人排去馬忽驚身在古梁州

南秦雪

帝城寒盡臨寒食駱谷春深未有春纔見嶺頭雲似蓋已驚巖下雪如塵千峯筍石千株一本作千條玉萬樹松蘿萬朵銀飛鳥不飛猿不動青驄御史上南秦

江樓月

嘉川驛望月憶杓直樂天知退拒非順之數賢居近曲江開夜多同歩月

嘉陵江岸驛樓中江在樓前月在空月色滿牀兼滿地江聲如鼓復如風誠知遠近皆三五但恐陰晴有異同萬一帝鄉還潔白一本作皎潔幾人潛傍杏園東

慙問囚

蜀門夜行憶與順之在司馬鍊師壇上話出處時

司馬子微壇上頭與君深結白雲儔尚平村落擬連賣王屋
山泉爲別游各待陸渾求一尉共資三逕便同休那知今日
蜀門路帶月夜行緣問囚

江上行

悶見漢江流不息悠悠漫漫竟何成江流不語意相問何事
遠來江上行

漢江上笛

二月十五日夜於西縣白馬驛南樓聞笛悵然憶得小年曾與從兄長楚寫漢

江聞笛賦因而有
愴耳一本作有懷

小年爲寫游梁賦最說漢江聞笛愁今夜聽時在何處月明
西縣驛南樓

郵亭月

於駱口驛見崔二十二題名處數夜後於青山驛翫月憶得崔生好持確論每於宵

話之中常日人生晝務夜安步月閑行吾不與也
言訖堅卧他人雖千百其詞難動揺矣至是愴然

思此題
因有獻

君多務實我多情大抵偏嗔步月明
今夜山郵與蠻嶂君應
堅卧我還行

嘉陵驛二首

篇末有懷

嘉陵驛上空牀客一夜嘉陵江水聲
仍對牆南滿山樹野花
撩亂月朧明

牆外花枝壓短牆月明還照半張牀
無人會得此時意一夜
獨眠西畔廊

百牢關

奉使推小吏任敬仲

嘉陵江上萬重山何事臨江一破顏
自笑只緣任敬仲等閑
身度百牢關

江花落

日暮嘉陵江水東梨花萬片逐江風
江花何處最腸斷半落

江流半在空

嘉陵江二首

秦人惟識秦中水長想吳江與蜀江今日嘉川驛樓下可憐
如練遶明窻

千里嘉陵江水聲何年重遶此江行只應添得清宵夢時見
滿江流月明

西縣驛

去時樓上清明夜月照樓前撩亂花今日成陰復成子可憐
春盡未還家

望喜驛

滿眼文書堆案邊眼昏偷得暫時眠子規驚覺燈又滅一道
月光橫枕前

好時節

身騎驄馬峨眉下面帶霜威卓氏前虛度東川好時節酒樓
元被蜀兒眠

夜深行

夜深猶自遶江行震地江聲似鼓聲漸見戍樓疑近驛百牢
關吏火前迎

望驛臺三月盡

可憐三月三旬足悵望江邊望驛臺料得孟光今日語不曾
春盡不歸來

贈咸陽少府蕭郎

莫怪逢君淚每盈仲由多感有深情陸家幼女託良婿阮氏
諸房無外生顧我自傷爲弟拙念渠能繼事姑名別時何處
最腸斷日暮渭陽驅馬行

贈呂三校書

與呂校書同年科第後爲別七年元
和巳丑歲八月偶於陶化坊會宿

同年同拜校書郎觸處潛行爛熳狂共占花園爭趙辟競添
錢貫定秋娘七年浮世皆經眼八月閑宵忽並牀語到欲明
歡又泣傍人相笑兩相傷

封書

鶴臺南望白雲關城市猶存暫一還書出步虛三百韻藥珠
文字在人間

仁風李著作園醉後寄李十

龐明春月照花枝花下音聲是管兒却笑西京李真外五更
騎馬趁朝時

燈影

洛陽晝夜無車馬漫掛紅紗滿樹頭見說平時燈影裏玄宗
潛伴太真游

貶江陵途中寄樂天杓直以真外郎判鹽鐵樂天

以拾遺在翰林

此後並在江陵士曹時詩李建字杓直

想到江陵無一事酒杯書卷綴新文
紫芽嫩茗和枝採朱橘香苞數瓣分
暇日上山狂逐鹿凌晨過寺飽看雲
筭緡草詔終須解不敢將心遠羨君

渡漢江去年春奉使東川經瞿冢山下

瞿冢去年尋漾水襄陽今日渡江濱
山遙遠樹纔成點浦靜沉碑欲辨文
萬里朝宗誠可羨百川流入渺難分
鯢鯨歸穴東溟溢又作波濤隨伍員

哀病驄呈致用

櫪上病驄啼裊裊江邊廢宅路迢迢
自經梅雨長垂耳乍食菰蔣欲折腰
金絡頭銜光未滅玉花衫色瘦來焦
曾聽禁漏驚衙鼓慣踏康衢怕小橋
半夜雄嘶心不死日高飢餓尾還搖
龍媒薄地天池遠何事牽牛在碧霄

送嶺南崔侍御

我是北人長北望，每嗟南鴈更南飛。君今又作嶺南別，南鴈
北歸君未歸。洞主叅承驚豸角，島夷安集慕霜威。黃家賊用
鑕刀利，白水郎行旱地稀。蜃吐朝光樓隱隱，鼉吹細浪雨霏
霏。毒龍蛻骨轟雷鼓，野象埋牙斲石磯。火布垢塵須火浣，木
綿溫軟當綿衣。桄榔麵礫檳榔遊，海氣常昏海日微。蛟老變
爲妖，婦女舶來多賣假。珠璣此中無限相，憂事請爲殷勤事
事依。

酬樂天八月十五夜禁中獨直翫月見寄

一年秋半月偏深，况就煙霄極賞心。金鳳臺前波漾漾，玉鈎
簾下影沉沉。宴移明處清蘭路，歌待新詞促翰林。何意枚臯
正承詔，瞥然塵念到江陰。

予病瘴樂天寄通中散碧腴垂雲膏仍題四韻以

元氏集
慰遠懷開拆之間因有酬荅

紫河變鍊紅霞散翠液煎研碧玉英金籍真人天上合鹽車
病驥軔前驚愁腸欲轉蛟龍吼醉眼初開日月明唯有思君
治不得膏銷雪盡意還生

元氏長慶集卷第十七

元氏長慶集卷第十八

律詩

陪諸公游通德湖

送友封

放言

酬劉二十八贈石枕

和嚴司空重陽日

送王十一游剡中

重送友封

送致用

靜勝寺

書樂天紙

酬孝甫

和樂天招蔚章

折花贈行

寄劉頗

過王十一館

送孫勝

游三寺

遠望

尋李校書

襄陽樓

游碧澗寺

和竇容州

盧頭陀

醉別

陪諸公游故江西韋大夫通德湖舊居有感題四韻兼呈李六侍御即韋大夫舊寮也

高墉行馬接通湖巨壑藏舟感大夫塵壁暗埋悲舊札風簾吹斷落殘珠煙波漾日侵隤岸狐兔奔叢拂坐隅唯有滿園桃李下膺門偏拜阮元瑜

送友封二首

黔府寶華字友封

桃葉成陰鷺引雛南風吹浪颭檣烏瘴雲拂地黃梅雨明月滿帆青草湖迢遞旅魂歸去遠顛狂酒興病來孤知君兄弟憐詩句遍爲姑將惱大巫

惠和坊裏當時別豈料江陵送上船鵬翼張風期萬里馬頭無角已三年甘將泥尾隨龜後尚有雲心在鶴前若見中丞忽相問爲言腰折氣衝天

放言五首

近來逢酒便高歌醉舞詩狂漸欲魔五斗解醒猶恨少十分
飛盞未嫌多眼前讐敵都休問身外功名一任他死是老閒
生也得擬將何事奈吾何

莫將心事厭長沙雲到何方不是家酒熟鋪糟學漁父飯來
開口似神鷄竹枝待鳳千莖直柳樹迎風一向斜總被天公
霑雨露等頭成長盡生涯

霆轟電烜數聲頻不柰狂夫不藉身縱使被雷燒作燼寧殊
埋骨颺爲塵得成胡蝶尋花樹儻化江魚棹錦鱗必若乖龍
在諸處何須驚動自來人

安得心源處處安何勞終日望林巒玉英惟向火中冷蓮葉
元來水上乾甯戚飯牛圖底事陸通歌鳳也無端孫登不語
啓期樂各自當情各自歡

三十年來世上行也曾狂走趁浮名兩迴左降須知命數度
登朝何處榮乞我杯中松葉滿遮渠肘上柳枝生他時定葬
燒缸地賣與人家得酒盛

劉二十八以文石枕見贈仍題絕句以將厚意因
持壁州鞭酬謝兼廣爲四韻

枕截文瓊珠綴篇野人酬贈壁州鞭用長時節君須策泥醉
風雲我要眠歌眎彩霞臨藥竈執陪仙仗引鑪煙張騫却上
知何日隨會歸期在此年

奉和嚴司空重陽日同崔常侍崔郎中及諸公登
龍山落帽臺佳宴

謝公秋思眇天涯蠟屐登高爲菊花貴重近臣光綺席笑憐
從事落烏紗萸房暗綻紅珠朶茗援寒供白露芽詠碎龍山
歸去號馬奔流電妓奔車

送王十一郎游剡中

越州都在浙河灣
塵土消沉景象閑
百里油盆鏡湖水
千峯鈿朶會稽山
軍城樓閣隨高下
禹廟煙霞自往還
想得玉郎乘畫舸
幾回明月墜雲間

送友封

輕風略略柳欣欣
晴色空濛遠似塵
斗柄未回猶帶閨江痕
潛上已生春
蘭成宅裏尋枯樹
宋玉亭前別故人
心斷洛陽三兩處
窈娘提抱古天津

送致用

淚霑雙袖血成文
不爲悲身爲別君
望鶴眼穿期海外
待烏頭白老江濱
遙看迎浪愁鬢雪
漸失征帆錯認雲
欲識九回腸斷處
潯陽流水九條分

早春登龍山靜勝寺時非休澣司空特許是行因

贈幕下諸公

謝傳知憐景氣初許尋高寺望江春龍文遠水吞平岸羊角
輕風旋細塵山茗粉含鷹觜嫩海榴紅綻錦窠勻歸來笑問
諸從事占得閑行有幾人

書樂天紙

金鑾殿裏書殘紙乞與荊州元判司不忍拈將等閑用半封
京信半題詩

酬孝甫見贈十首

各用舊韻
本意

宋玉秋來續楚詞陰鏗官漫足閑詩親情書札相安慰多道
蕭何作判司

杜甫天材頗絕倫每尋詩卷似情親憐渠直道當時語不着
心源傍古人

十歲荒狂任博徒按莎五木擲梟盧野詩良輔偏憐假長借

金鞍迂酒胡

曾經綽立侍丹墀
綻藥宮花拂面枝
雉尾扇開朝日出
柘黃衫對碧霄垂

一自低心翰墨場
箭韞拋盡負書囊
近來兼愛休糧藥
栢葉紗羅雜豆黃

莫笑風塵滿病顏
此生元在有無間
卷舒蓮葉終難濕
去住雲心一種閑

無事拋碁侵虎口
幾時開眼復聯行
終須殺盡緣邊敵
四面通同掩太荒

原憲甘貧每自開
子春傷足少人哀
巷南唯有陳居士
時學文殊一問來

每識閑人如未識
與君相識便相憐
經旬不解來過宿
忍見空牀夜夜眠

開拆新詩展大璆明珠炫轉玉音浮酬君十首三更坐減却
常時半夜愁

和樂天招錢蔚章看山絕句

碧落招邀閑曠望黃金城外玉方壺人間還有大江海萬里
煙波天上無

折枝花贈行

櫻桃花下送君時一寸春心逐折枝別後相思最多處千株
萬片遶林垂

寄劉頗二首

平生嗜酒顛狂甚不許諸公占丈夫唯愛劉君一片膽近來
還敢似人無

前年碣石煙塵起共看官軍過洛城無限公卿因戰得與君
依舊綠衫行

晨起送使病不行因過王十一館居二首

自笑今朝誤夙興逢他御史瘡相仍過君未起房門掩深映
寒窓一盞燈

密宇深房小火爐飯香魚熟近中厨野人受靜仍耽寢自問
黃昏肯去無

送孫勝

桐花暗淡柳惺惚池帶輕波柳帶風今日與君臨水別可憐
春盡宋亭中

遊三寺回呈上府主嚴司空時因尋寺道出當陽
縣奉命覆視縣囚牽於游衍不暇詳究故以詩自
誚爾

謝公恣縱顛狂掾觸處閑行許自由舉板支頤對山色當筵
吹帽落臺頭貪緣稽首他方佛無暇精心滿縣囚莫責尋常

吐茵吏書囊赤白報君侯

遠望

滿眼傷心冬景和一山紅樹寺邊多仲宣無限思鄉淚漳水東流碧玉波

早春尋李校書

款款春風澹澹雲柳枝低作翠欵裙梅含雞舌兼紅氣江弄瓊花散綠紋帶霧山鶯啼尚小穿沙蘆荷葉纔分今朝何事偏相覓撩亂芳情最是君

過襄陽樓呈上府主嚴司空樓在江陵節度使宅
此隅

襄陽樓下樹陰成荷葉如錢水面平拂水柳花千萬點隔林鶯舌兩三聲有時水畔看雲立每日樓前信馬行早晚暫教王粲上庾公應待月分明

八月六日與僧如展前松滋主簿韋戴同游碧澗
寺賦得扉字韻寺臨蜀江內有碧澗穿注兩廊又
有龍女洞能興雲雨詩中噴字以平聲韻

空闊長江礙鐵圍高低行樹倚巖扉穿廊玉澗噴紅旭踴塔
金輪拆翠微草引風輕馴虎睡洞驅雲入毒龍歸佗生莫忘
靈山別滿壁人名後會稀

奉和寶客州

明公莫訝容州遠一路瀟湘景氣濃班竹初成二妃廟碧蓮
遙聳九疑峯禁林聞道長傾鳳池水那能久滯龍自歎風波
去無極不知何日又相逢

盧頭陀詩

并序

道泉頭陀字源一姓盧氏本名士衍弟曰起郎士致則官閥
可知也少力學善記憶戲解職仕不三十餘歷八諸侯府皆

掌劇事性強邁不錄幽瑣爲吏所搆摘官建州無何有異人
密授心契冥失所在盧氏旣爲大門族兄弟且賢豪惶駭求
索無所得胤子某積歲窮盡荒僻一夕於衡山佛舍衆頭陀
中燈下識之號叫泣血無所顧然而先是衆以爲姜頭陀自
是知其爲盧頭陀矣邇後往來湘潭間不常次舍祇以衡山
爲詣極元和九年張中丞領潭之歲予拜張公於潭適上人
在焉即日詣所舍東寺一見蒙念不礙小劣盡得本末其事
列而序之仍以四韻七言爲贈爾

盧師深話出家由剃盡心花始剃頭馬哭青山別車匿鵲飛
螺髻見羅幃還來舊日經過處似隔前身夢寐游爲向八龍
兄弟說他生緣會此生休

醉別盧頭陀

醉迷狂象別吾師夢覺觀空始自悲盡日笙歌人散後滿江

風雨獨醒時心超幾地行無處雲到何天住有期頓見佛光
身上出已蒙衣內綴摩尼

元氏長慶集卷第十八

五

六

七

元氏長慶集卷第十九

律詩

宴望岳樓

岳陽樓

宴庾敬休

花栽

宿石磯

遭風

贈崔元儒

嚴澗宅

送杜元穎

貽蜀五首

病馬寄李尚書

李中丞

盧評事

張校書

韋兵曹

贈童子郎

桐花詩

西歸絕句

留呈夢得

小碎

和樂天高相宅

仇家酒

贈雲寂

澧西別樂天

寄曇上人

題智師蘭若

蒼溪縣

贈吳渠州

夢李紳

陪張湖南宴望岳樓
積爲監察御史張中丞知雜事

觀象樓前奉末班
絳峯只似殿庭間
今日高樓重陪宴
雨籠衡岳是南山

岳陽樓

岳陽樓上日銜窗
影到深潭赤玉幢
悵望殘春萬般意
滿櫺湖水入西江

寄庾敬休

小來同在曲江頭
不省春時不共游
今日江風好暄暖
可憐

春盡古湘州

花栽二首

買得山花一兩栽，離鄉別土易摧隤。
欲知北客居南意，看取南花北地來。

南花北地種應難，且向船中盡日看。
縱使將來眼前死，猶勝拋擲在空欄。

宿石

石磯江水夜潺湲，半夜江風引杜鵑。
燈暗酒醒顛倒枕，五更斜月入空船。

遭風二十韻

洞庭瀰漫接天迴，一點君山似措杯。
暝色已籠秋竹樹，夕陽猶帶舊樓臺。
湘南買伴乘風信，夏口篙工厄汭迴。
後侶逢灘方拽柁，前宗到浦已眠桅。
俄驚四面雲屏合，坐見千峯雪浪

堆罔象睢盱頻逞怪石尤翻動忽成災騰凌豈但河宮溢塊
軋渾憂地軸摧疑是陰兵致昏黑果聞靈鼓借喧逐龍歸窟
穴深潭漩蜃作波濤古岸隤水客暗游燒野火楓人夜長吼
春雷浸滛沙市兒童亂汨沒汀洲鴈驚哀自歎生涯看轉燭
更悲商旅哭沉財墻烏糾折頭倉掉水狗斜傾尾纜開在昔
詎慙橫海志此時甘乏濟川才歷陽舊事曾爲鼉鉉穴相傳
有化能閉目唯愁滿空電冥心真類不然灰那知否極休徵
至漸覺宵分曙氣催恠族潛收湖黯湛幽妖盡走日崔嵬紫
衣將校臨船問白馬君侯傍柳來喚上驛亭還酩酊兩行紅
袖拂樽罍

贈崔元儒

殷勤夏口阮元瑜二十年前舊飲徒最愛輕欺杏園客也曾
辜負酒家胡些些風景閑猶在事事顛狂老漸無今日頭盤

三兩擲翠娥潛笑白髭鬚

鄂州寓館嚴澗宅

澗不在

鳳有高梧鶴有松偶來江外寄行蹤
花枝滿院空啼鳥塵榻無人憶卧龍
心想夜閑唯足夢眼看春盡不相逢
何時最是思君處月入斜牕曉寺鐘

送杜元穎

江上五年同送客與君長美北歸人
今朝又送君先去千里洛陽城裏塵

貽蜀五首

并序

元和九年蜀從事韋臧文告別蜀多朋舊
稔性懶爲寒溫書因賦代懷五章而贈行亦在其數

病馬詩寄上李尚書

萬里長鳴望蜀門病身猶帶舊瘡痕
遙看雲路心空在久服

鹽車力漸煩尚有高懸雙鏡眼何由並駕兩朱轡唯應夜識
深山道忽遇君侯一報恩

李中丞表臣

韋門同是舊親賓獨恨潘牀簟有塵十里花鈴錦城麗五年
沙尾白頭新倅戎何事勞專席老掾甘心逐衆人却待文星
上天去少分光影照沉淪

盧評事子蒙

爲我殷勤盧子蒙近來無復昔時同懶成積疹推難動禪盡
狂心鍊到空老愛早眠虛夜月病妨盃酒負春風唯公兩弟
閑相訪往往潛然一望公

張校書元夫

未面西川張校書書來稠疊頗相於我聞聲價金應敵衆道
風姿玉不如遠處從人須謹慎少年爲事要舒徐勸君便是

酬君愛莫比尋常贈鯉魚

韋兵曹臧文

處處侯門可曳裾人人爭事蜀尚書摩天氣直山曾拔澈底
心清水共虛鵬翼已翻君好去烏頭未變我何如殷勤爲話
深相感不學馮諼待食魚

贈童子郎

嚴司空孫字照郎十歲能賦詩
性有奇句書題有成人風

衛瓘諸孫衛玠珍可憐雛鳳好青春解拈玉葉排新句認得
金環識舊身十歲佩觿嬌稚子八行飛札老成人楊公莫訝
清無業家有驪珠不復貧

桐花詩

并序此後元和十年詔召
入京及通州司馬已後詩

元和五年予貶掾江陵三月二十四日宿曾峯館山月曉時
見桐花滿地因有八韻寄白翰林詩當時草感未暇紀題及
今六年詔許西歸去時桐樹上孫枝已拱矣予亦白鬚兩莖

而蒼然斑鬢感念前事因題舊詩仍賦桐孫詩一絕又不知
幾何年復來商山道中元和十年正月題

去日桐花半桐葉別來桐樹老桐孫城中過盡無窮事白髮
滿頭歸故園

西歸絕句十二首

雙堠頻頻減去程漸知身得近京城春來愛有歸鄉夢一半
猶疑夢裏行

五年江上損容顏今日春風到武關兩紙京書臨水讀小桃

花樹滿商山

得復言
樂天書

同歸諫院韋丞相共貶河南亞大夫今日還鄉獨憔悴幾人

憐見白髭鬚

韋丞相貫之
裴中丞度

只去長安六日期多應及得杏花時春明門外誰相待不夢

開人夢酒卮

白頭歸舍意如何賀處無窮弔亦多左降去時裴相宅舊來
車馬幾人過

裴相公地

還鄉何用淚沾襟一半雲霄一半沉世事漸多饒悵望舊曾
行處便傷心

閑游寺觀從容到遍問親知次第尋腸斷裴家光德宅無人
掃地戟門深

一世營營死是休生前無事定無由不知山下東流水何事
長須日夜流

今朝西渡丹河水心寄丹河無限愁若到莊前竹園下殷勤
爲遠故山流

丹浙莊之東流

寒憲風雪擁深爐彼此相傷指白鬚一夜思量十年事幾人
強健幾人無

宿賈十二藍田宅

雲覆藍橋雪滿溪須臾便與碧峯齊風回麴市連天合凍壓

花枝着水低

寒花帶雪滿山腰着柳冰珠滿碧條天色漸明回一望玉塵
隨馬度藍橋

留呈夢得子厚致用

題藍橋驛

泉溜才通疑夜磬燒去聲煙餘暖有春泥千層玉帳鋪松蓋五
出銀區印虎蹄暗落金烏山漸黑深埋粉堠路渾迷心知魏
闕無多地十二瓊樓百里西

小碎

小碎詩篇取次書等閑題柱意何如諸郎到處應相問留取
三行代鯉魚

一本留與

和樂天高相宅

莫愁已去無窮事漫苦如今有限身二百年來城裏宅一家
知換幾多人

和樂天仇家酒

病嗟酒戶年年減老覺塵機漸漸深
飲罷醒餘更惆悵不如閑事不經心

和樂天贈雲寂僧

欲離煩惱三千界不在禪門八萬條
心火自生還自滅雲師無路與君銷

澧西別樂天博載樊宗憲李景信兩秀才姪谷三
月三十日相餞送

今朝相送自同游酒語詩情替別愁
忽到澧西揔回去一身騎馬向通州

寄曇高寂三上人

長學對治思苦處偏將死苦教人間
今因爲說無生死無可對治心更閑

題漫天嶺智藏師蘭若僧云住此二十八年

僧臨大道閱浮生來往憧憧利與名二十八年何限客不曾
閑見一人行

蒼溪縣寄揚州兄弟

蒼溪縣下嘉陵水入峽穿江到海流憑仗鯉魚將遠信鴈回
時節到揚州

贈吳渠州從姨兄士則

憶惜分襟童子郎白頭拋擲又他鄉三千里外巴南恨二十
年前城裏狂甯氏舅甥俱寂寞荀家兄弟半淪亡淚因生別
兼懷舊迴首江山欲萬行

長灘夢李紳

孤吟獨寢意千般合眼逢君一夜歡慙愧夢魂無遠近不辭
風雨到長灘

元氏長慶集卷第十九

元氏長慶集卷第十九

元氏長慶集卷第十九

元氏長慶集卷第十九

元氏長慶集卷第二十

律詩

新政縣

南昌灘

見樂天詩

夜坐

聞樂天授江州司馬

歲日贈拒非

送盧戡

雨聲

離筵作

嘉陵水

閬州開元寺

寄樂天書

得樂天書

寄樂天

酬知退

通州

酬樂天書後

相憶淚

喜李十一到

與李十一夜飲

贈李十一

寒食日

三兄遺白角巾

別李十一

酬樂天醉別

酬樂天雨後

和樂天過祕閣

贈楊祕書

王家亭子

酬樂天見夢

琵琶

春詞

新政縣

新政縣前逢月夜嘉陵江底看星辰已聞城上三更鼓不見
心中一箇人鬚鬢暗添巴路雪衣裳無復帝鄉塵曾沾幾許
名兼利勞動生涯涉苦辛

南昌灘

渠江明淨峽逶迤舡到明灘拽柁遲櫓竄動搖妨作夢巴童
指點笑吟詩畬餘宿麥黃山腹日背殘花白水湄物色可憐
心莫恨此行都是獨行時

見樂天詩

通州到日日平西
江館無人虎印泥
忽向破簷殘漏處
見君詩在柱心題

夜坐

雨滯更愁南瘴毒
月明兼喜北風涼
古城樓影橫空館
濕地蟲聲遶暗廊
螢火亂飛秋已近
星辰早沒夜初長
孩提萬里何時見
狼籍家書卧滿牀

聞樂天授江州司馬

殘燈無焰影憧憧
此夕聞君謫九江
垂死病中仍悵望
暗風吹雨入寒牕

歲日贈拒非

思君曲水嗟身老
我望通州感道窮
同入新年兩行淚
白頭翁坐說城中

送盧戡

紅樹蟬聲滿夕陽白頭相送倍相傷
老嗟去日光陰促病覺今年晝夜長
顧我親情皆遠道念君兄弟欲他鄉
紅旗滿眼襄州路此別淚流千萬行

雨聲

風吹竹葉休還動雨點荷心暗復鳴
曾向西江船上宿慣聞寒夜滴蓬聲

奉和榮陽公離筵作

南郡生徒辭絳帳東山妓樂擁油旌
鈞天排比簫韶待猶顧人間有別情

嘉陵水

此後並通州詩

古時應是山頭水自古流來江路深
若使江流會人意也應知我遠來心

閬州開元寺壁題樂天詩

憶君無計寫君詩
寫盡千行說向誰
題在閬州東寺壁
幾時知是見君時

憑李忠州寄書樂天

萬里寄書將上峽
却憑冰峽寄江州
傷心最是江頭月
莫把書將上庾樓

得樂天書

遠信入門先有淚
妻驚女哭問何如
尋常不省曾如此
應是江州司馬書

寄樂天

無身尚擬魂相就
身在那無夢往還
直到他身亦相覓
不能空記樹中環

酬知退

終須修到無修處聞盡聲聞始不聞莫着妄心銷彼我心
無我亦無君

通州

平生欲得山中住天與通州遶郡山睡到日西無一事月儲
三萬買教閑

酬樂天書後三韻

今日廬峯霞遶寺昔時鸞殿鳳廻書兩封相去八年後一種
俱云五夜初漸覺此生都是夢不能將淚滴雙魚

相憶淚

西江流水到江州聞道分成九道流我滴兩行相憶淚遣君
何處遣人求除非入海無由住縱使逢灘未擬休會向伍員
潮上見氣充碩石報心讎

喜李十一景信到

何事相逢翻有淚念君緣我到通州留君剩住君須住我不自由君自由

與李十一夜飲

寒夜燈前賴酒壺與君相對興猶孤忠州刺史應閑卧江水猿聲睡得無

贈李十一

淮水連年起戰塵油旌三換一何頻共君前後俱從事羞見功名與別人

寒食日

今年寒食好風流此日一家同出游碧水青山無限思莫將心道是涪州

三兄以白角巾寄遺髮不勝冠因有感歎

病瘴年深渾禿盡那能勝置角頭巾暗梳蓬髮羞臨鏡私戴

蓮花耻見人白髮過於冠色白銀釘少校領中銀我身四十
猶如此何況吾兄六十身

別李十一五絕

巴南分與親情別不料與君牀並頭爲我遠來休悵望折君
災難是通州

京城每與閑人別猶自傷心與白頭今日別君心更苦別君
緣是在通州

萬里尚能來遠道一程那忍便分頭烏籠猿檻君應會十步
向前非我州

來時見我江南岸今日送君江上頭別後料添新夢寐虎驚

蛇伏

一作是通州

聞君欲去潛銷骨一夜暗添新白頭明朝別後應腸斷獨棹
破船歸到州

酬樂天醉別

前回一去五年別，此別又知何日回。
好住樂天休悵望，匹如元不到京來。

酬樂天雨後見憶

雨滑危梁性命愁，差池一步一生休。
黃泉便是通州郡，漸入深泥漸到州。

和樂天過祕閣書省舊廳

聞君西省重徘徊，祕閣書房次第開。
壁記欲題三漏合，吏人驚問十年來。
經排蠹簡憐初校，芸長陳根識舊栽。
司馬見詩心最苦，滿身蛟蚋哭煙埃。

和樂天贈楊祕書

舊與楊郎在帝城，搜天斡地覓詩情。
曾因並句甘稱小，不爲論年便喚兄。
刮骨直穿由苦鬪，夢腸翻出暫開行。
因君投贈

還相和老去那能競底名

和樂天題王家亭子

風吹筍籊飄紅砌雨打桐花蓋綠莎都大資人無暇日泛池
全少買池多

酬樂天頻夢微之

山水萬重書斷絕念君憐我夢相聞我今因病魂顛倒唯夢
閑人不夢君

琵琶

學語胡兒撼玉玲甘州破裏最星星使君自恨常多事不得
功夫夜夜聽

春詞

山翠湖光似欲流蜂聲鳥思却堪愁西施顏色今何在但看
春風百草頭

元氏長慶集卷第二十

元氏長慶集卷第二十一

律詩

酬樂天春見寄

酬樂天舟泊夜

酬樂天武關南

酬樂天見寄

酬樂天得稭所寄

和樂天尋郭道士

酬樂天寄生衣

酬樂天得予詩

酬樂天見賀

酬樂天歎窮愁

酬樂天三月三日

酬樂天歎損傷

瘴塞

紅荆

黃草峽聽琴

書劍

內狀詩

別穀郎

自責

送公度

喜五兄至

杏花

詠春風

贈別楊巨源

寄樂天

聽婁彈別鶴操

和王侍郎放榜後

酬樂天春寄微之

鸚心明黠雀幽蒙何事相將盡入籠君避海鯨驚浪裏我隨
巴蟒瘴煙中千山塞路音書絕兩地知春曆日同一樹梅花
數升酒醉尋江岸哭東風

酬樂天舟泊夜讀微之詩

知君暗泊西江岸讀我閑詩欲到明今夜通州還不睡滿山
風雨杜鵑聲

酬樂天武關南見微之題山石榴花詩

比因酬贈爲花時不爲君行不復知又更幾年還共到滿墻
塵土兩篇詩

酬樂天見寄

三千里外巴蛇穴四十年來司馬官瘡色滿身治不盡瘡痕
刮骨洗應難常甘人向衰容薄獨訝君將舊眼看前日詩中
高蓋字至今唇舌遍長安

酬樂天得稭所寄紵絲布白輕庸製成衣服以詩
報之

湓城萬里隔巴庸紵薄綿輕共一封腰帶定知今瘦小衣衫
難作遠裁縫唯愁書到炎涼變忽見詩來意緒濃春草綠茸
雲色白想君騎馬好儀容

和樂天尋郭道士不遇

昔常爲僧於
荊州相別

昔年我見杯中渡今日人言鶴上逢兩虎定隨千歲鹿雙林
添作幾株松方瞳應是新燒藥短脚知緣舊施春
欲請僧繇遠相畫苦愁頻變本形容

酬樂天寄生衣

秋茅處處流痰瘡夜鳥聲聲哭瘴雲羸骨不勝纖細物欲將
文服却還君

酬樂天得微之詩知通州事因成四首

茅簷屋舍竹籬州虎怕偏蹄地兩頭

通州元和二年偏蹄虎害人比之白額兩頭地

處處皆有之也暗蠱有時迷酒影浮塵向日似波流沙含水弩多傷

骨田仰畬刀少用牛知得共君相見否近來魂夢轉悠悠

平地才應一頃餘閣欄都大似巢居

巴人多在山城架木入為居自號閣欄頭也

衙官吏聲疑鳥下峽舟船腹似魚市井無錢論尺丈田疇付

火罷耘鋤此中愁殺須甘分惟惜平生舊著書

本句云努力安心過三考

已曾愁殺李尚書又予病甚將平生所為文自題云異日送白二十二郎也

哭鳥畫飛人少見佺魂夜嘯虎行多滿身沙虱無防處獨脚

山魃不奈何甘受鬼神侵骨髓常憂岐路處風波南歌未有

東西分敢唱滄浪一字歌

本句云時時三唱濯纓歌

荒蕪滿院不能鋤甌有塵埃圖乏疏定覺身將囚一種未知生共死何如飢搖困尾喪家狗熱暴枯鱗失水魚苦境萬般君莫問自憐方寸本來虛

酬樂天聞李尚書拜相以詩見賀

初因彈劾死東川又爲親情弄化權予爲監察御史劾奏故臺日又劾奏宰相親因緣遂貶江陵士曹耳百口共經三峽水一時重上兩漫天尚書入用雖旬月司馬銜冤已十年若待更遭秋瘴後便愁平地有重泉

酬樂天歎窮愁見寄

病煎愁緒轉紛紛百里何由說向君老去心情隨日減遠來書信隔年聞三冬有電連春雨九月無霜盡火雲併與巴南終歲熱四時誰道各平分

酬樂天三月三日見寄

常年此日花前醉
今日花前病裏銷
獨倚破簾閑悵望
可憐虛度好春朝

酬樂天歎損傷見寄

前途何在轉忙忙
漸老那能不自傷
病爲怕風多睡月
起因花藥暫扶牀
函關氣索迷真侶
峽水波翻礙故鄉
唯有秋來兩行淚
對君新贈遠詩章

瘴塞

瘴塞巴山哭鳥悲
紅粧少婦歛啼眉
殷勤奉藥來相勸
云是前年欲病時

紅荆

庭中栽得紅荆樹
十月花開不待春
直到孩提盡驚怪
一家同是北來人

黃草峽聽柔之琴二首

胡笳夜奏塞聲寒是我鄉音聽漸難料得小來辛苦學又應知向峽中彈

別鶴凄清覺露寒離聲漸咽命難憐君伴我涪州宿猶有心情徹夜彈

書劍

渝工劍刃皆歐冶巴吏書蹤盡子雲唯我心知有來處泊船黃草夜思君

內狀詩寄楊白二員外

時知制誥

天門暗闢玉瑱鉤晝送中樞曉禁清彤管內人書細膩金奩御印篆分明衝街不避將軍令跋勅兼題宰相名南省郎官誰待詔與君將向世間行

別毅郎

此後三首工部侍郎時詩

爾爺只爲一杯酒此別那知死與生兒有何辜才七歲亦教兒作瘴江行

愛惜爾爺唯有我我今顛顛望何人傷心自比籠中鶴翦盡翅翎愁到身

自責

犀帶金魚束紫袍不能將命報分毫他時得見牛常侍爲爾君前捧佩刀

送公度之福建

此後並同州刺史時作

崇陰猶在建溪磯此去那論是與非若見白頭須盡敬恐曾江岸識胡威

喜五兄自泗州至

眼中三十年來淚一望南雲一度垂慙愧臨淮李常侍遠教形影暫相隨

杏花

常年出入右銀臺每怪春光例早回慙愧杏園行在景同州
園裏也先開

第三歲日詠春風憑楊貞外寄長安柳

三日春風已有情拂人頭面稍憐輕殷勤爲報長安柳莫惜
枝條動軟聲

贈別楊貞外巨源

憶昔西河縣下時青衫顚顚宦名卑揄揚陶令緣求酒結託
蕭娘只在詩朱紫衣裳浮世重蒼黃歲序長年悲白頭後會
知何日一盞煩君不用辭

寄樂天二首

榮辱升沉影與身世情誰是舊雷陳唯應鮑叔猶憐我自保
曾參不殺人山入白樓沙苑暮潮生滄海野塘春老逢佳景

唯惆悵兩地各傷何限神

論才賦命不相干鳳有文章雉有冠羸骨欲銷猶被刻瘡痕
未沒又遭彈劍頭已折藏須蓋丁字雖剛屈莫難休學州前
羅刹石一生身敵海波瀾

聽妻彈別鶴操

別鶴聲聲怨夜絃聞君此奏欲潜然商瞿五十知無子便付
琴書與仲宣

和王侍郎酬廣宣上人觀放牂後相賀

渥洼徒自有權奇伯樂書名世始知竟走墻前稀得雋高縣
日下表無私都中紙貴流傳後海外金填姓字時珍重劉繇
因首薦

進士李景述以
同判解頭及第

爲君送和碧雲詩

元氏長慶集卷第二十二

律詩

酬樂天喜鄰郡

再酬

贈樂天

重贈

西陵晚眺

以州宅謗樂天

重謗州宅景色

酬樂天

寄樂天

戲贈樂天

重酬樂天

再酬復言

整比舊詩寄樂天

酬樂天餘思

寄樂天

酬樂天雪中

和樂天早春

郡齋感懷

代郡齋神荅樂天

酬樂天寄別

和樂天東樓

餘杭周從事

寄浙西李大夫

初除浙東

爲樂天勘詩

長慶曆尾

酬樂天喜鄰郡

此後並越州酬和並各次用本論

蹇驢瘦馬塵中伴
紫綬朱衣夢裏身
符竹偶因成對岸
文章虛被配爲鄰
湖翻白浪常看雪
火照紅粧不待春
老大那能更爭競
任君投募醉鄉人

再酬復言和前篇

經過二郡逢賢牧
聚集諸郎宴老身
清夜漫勞紅燭會
白頭非是翠娥鄰
曾攜酒伴無端宿
自入朝行便別春
潦倒微之從不占
未知公議道何人

贈樂天

莫言鄰境易經過
彼此分符欲柰何
垂老相逢漸難別
白頭期限各無多

重贈

樂人高玲瓏能歌歌予數十詩

休遣玲瓏唱我詩我詩多是別君詞明朝又向江頭別月落潮平是去時

別後西陵晚眺

晚日未拋詩筆硯夕陽空望郡樓臺與君後會知何日不似潮頭暮却迴

以州宅夸於樂天

州城迥遶拂雲堆鏡水稽山滿眼來四面常時對屏障一家終日在樓臺星河似向簷前落鼓角驚從地底迴我是玉皇香按吏謫居猶得住蓬萊

重夸州宅旦暮景色兼酬前篇末句

仙都難盡亦難書暫合登臨不合居繞郭煙嵐新雨後滿山樓閣上燈初人聲曉動千門闢湖色宵涵萬象虛爲問西州

西剎岸濤頭衝突近何如

酬樂天吟張貞外詩見寄因思上京每與樂天於
居敬兄升平里詠張新詩

樂天書內重封到居敬堂前共讀時四友一爲泉路客三人
兩詠浙江詩別無遠近皆難見老減心情自各知盃酒與它
年少隔不相酬贈欲何之

寄樂天

閑夜思君坐到明追尋往事倍傷情同登科後心相合初得
官時髭未生二十年來諳世路三千里外老江城猶應更有
前途在知向人間何處行

戲贈樂天復言

樂事難逢歲易徂白頭光景莫令孤弄濤船更曾觀否望市
之勝地也樓還有會無眼力少將尋按牘心情且強擲泉盧

孫園虎寺隨宜看不必遙遙羨鏡湖

重酬樂天

紅塵擾擾日西徂我興雲心兩共孤暫出已遭千騎擁故交
求見一人無百篇書判從饒白八采詩章未伏盧最笑近來
黃叔度自投名刺占陂湖

再酬復言

繞郭笙歌夜景徂稽山迥帶月輪孤休文欲詠心應破道子
雖來畫得無顧我小才同培塿知君險鬪敵都盧不然豈有
姑蘇郡擬着陂塘比鏡湖

郡務稍簡因得整比舊詩并連綴焚削封章繁委
篋笥僅逾百軸偶成自歎因寄樂天

近來章奏小年詩一種成空盡可悲書得眼昏朱似碧用來
心破髮如絲催身易老緣多事報主深恩在幾時天遣兩家

無嗣子欲將文集與它誰

酬樂天餘思不盡加為六韻之作

律呂同聲我爾身文章君是一伶倫衆推賈誼為才子帝喜

相如作侍臣

樂天先有秦中吟及百節判皆為書肆市賈題其卷云白才子文章又樂天知制誥詞云覽其

詞賦喜與相如並處一時

次韻千言曾報答樂天曾寄予千字律詩數首予皆次用本韻酬和後來遂

以成風耳

直詞三道共經綸樂天與予同應制科並求前輩功直詞策以盡經邦之術其事已具之字

詩謹中爾

元詩駁雜真難辨後輩奸偽作予詩傳流諸處自到會稽已有人寫官詞百篇及雜詩兩卷

皆云是予所撰及手勘驗無一篇是者

白樸流傳用轉新樂天於翰林中書取程式禁中號曰白樸每有新入學士求訪寶重過於六典也

餘于公門戶

豈生塵樂天常贈予詩云其心如肺石動必達窮民東川八十家冤憤一言申因感無

兒之歎故予

商瞿未老猶希冀莫把籊金便付人

自有此句

寄樂天

莫嗟虛老海壖西天下風光數會稽靈汜橋前百里鏡石帆

山嶠五雲溪水銷田地蘆錐短春入枝條柳眼低安得故人
生羽翼飛來相伴醉如泥

酬樂天雪中見寄

知君夜聽風蕭索曉望林亭雪半糊撼落不教封柳眼掃來
偏盡附梅株敲扶密竹枝猶亞煦暖寒禽氣漸蘇坐覺湖聲
迷遠浪回驚雲路在常途錢塘湖上蘋先合梳洗樓前粉暗
鋪石立玉童披鶴氅臺施瑤席換龍鬚滿空飛舞應爲瑞寡
和高歌只自娛莫遣擁簾傷思婦且將盈尺慰農夫稱觴彼
此情何異對景東西事有殊鏡水遶山山盡白琉璃雲母世
間無

和樂天早春見寄

雨香雲澹覺微和誰送春聲入棹歌萱近北堂穿土早柳偏
東面受風多湖添水劑消殘雪江送潮頭湧漫波同受新年

不同賞無由縮地欲如何

酬復言長慶四年元日郡齋感懷見寄

臘盡殘銷春又歸逢新別故欲沾衣自驚身上添年幾休繫

心中小是非富貴祝來何所遂聰明鞭得轉無機

祝富貴鞭聰明皆正

旦童稚俗法

羞看稚子先拈酒悵望平生舊採薇去日漸加餘日

少賀人雖鬧故人稀椒花麗句閑重檢艾髮衰容惜寸輝苦
思正旦酬白雪閑觀風色動青旂千官仗下爐煙裏東海西
頭意獨違

代郡齋神荅樂天

虛白堂神傳好語二年長伴獨吟時夜憐星月多離燭日滉
波濤一下帷爲報何人償酒債引看牆上使君詩

酬樂天重寄別

却報君侯聽苦辭老頭拋我欲何之武牢關外雖分手不似

如今衰白時

和樂天重題別東樓

山容水態使君知樓上從容萬狀移日映文章霞細麗風驅鱗甲浪參差鼓催潮戶凌晨擊笛賽婆官徹夜吹喚客潛揮遠紅袖賣壚高掛小青旗牘鋪床席春眠處高捲簾帷月上時光景無因將得去爲郎抄在和郎詩

餘杭周從事以十章見寄詞調清婉難於遍酬聊和詩首篇以荅來貺

擾擾紛紛旦暮間經營閑事不曾閑多緣老病推辭酒少有功夫久羨山清夜笙歌喧四郭黃昏鍾漏下重關何由得似周從事醉入人家醒始還

寄浙西李大夫四首

柳眼梅心漸欲春白頭西望憶何人金陵太守曾相伴共踏

銀臺一路塵

藥珠深處少人知
網索西臨太液池
浴殿曉聞天語後
步廊

騎馬笑相隨

網索在太液上學上候對啟於此

禁林同直話交情
無夜無曾不到明
最憶西樓人靜後
玉晨

鐘磬兩三聲

玉晨觀在紫宸殿後面也

由來鵬化便圖南
浙右雖雄我未甘
早渡西江好歸去
莫拋

舟楫滯春潭

初除浙東妻有阻色因以四韻曉之

嫁時五月歸巴地
今日雙旌上越州
興慶首行

平聲千命婦在

中書日妻以郡君朝太后於興慶宮猥為班首
會稽旁帶六諸侯
海樓翡翠閑相逐
鏡水鴛鴦暖共游
我有主恩羞未報
君於此外更何求

為樂天自勸詩集因思頃年城南醉歸馬上遞唱

艷曲十餘里不絕長慶初俱以制誥侍宿南郊齋

宮夜後偶吟數十篇兩披諸公洎翰林學士三十
餘人驚起就聰逮至卒吏莫不衆觀群公直至侍
從行禮之時不復聚寐予與樂天吟哦竟亦不絕
因書於樂天卷後越中冬夜風雨不覺將曉諸門
互啓關鐫即事成篇

春野醉吟十里程齊宮潛詠萬人驚今宵不寐到明讀風雨
曉聞開鐫聲

題長慶四年曆日尾

殘曆半張餘十四灰心雪鬢兩悽然定知新歲御樓後從此
不名長慶年

元氏長慶集卷第二十二

元初吳興沈氏卷二十二

子孫承子

元初平陽縣十四天... 官署無常... 安... 官署無常...

元初平陽縣十四天...

元初平陽縣十四天...

元初平陽縣十四天... 官署無常... 安... 官署無常...

元初平陽縣十四天...

元初平陽縣十四天... 官署無常... 安... 官署無常...

元初平陽縣十四天... 官署無常... 安... 官署無常...

元初平陽縣十四天... 官署無常... 安... 官署無常...

元初平陽縣十四天... 官署無常... 安... 官署無常...

元氏長慶集卷第二十三

樂府

樂府古題序

丁酉

夢上天

此後十首
並和劉猛

冬白紵

將進酒

採珠行

董逃行

憶遠曲

夫遠征

織婦詞

田家詞

俠客行

君莫非

此後九首
和李餘

田野狐兔行

當來日大難行

人道短

苦樂相倚曲

出門行

捉捕歌

古築城曲五解

估客樂

樂府古題序

丁酉

詩訖于周離騷訖于楚是後詩之流爲二十四名賦頌銘贊
文誄箴詩行詠吟題怨歎章篇操引謠謳歌曲詞調皆詩人
六義之餘而作者之旨由操而下八名皆起於郊祭軍賓吉
凶苦樂之際在音聲者因聲以度詞審調以節唱句度短長
之數聲韻平上之差莫不由之准度而又別其在琴瑟者爲
操引採民眡者爲謳謠備曲度者摠得謂之歌曲詞調斯皆
由樂以定詞非選調以配樂也由詩而下九名皆屬事而作
雖題號不同而悉謂之爲詩可也後之審樂者徃徃采取其
詞度爲歌曲蓋選詞以配樂非由樂以定詞也而纂撰者由
詩而下十七名盡編爲樂錄樂府等題除饒吹橫吹郊祀清
商等詞在樂志者其餘木蘭仲卿四愁七哀之輩亦未必盡
播於管絃明矣後之文人達樂者少不復如是配別但遇興
紀題徃徃兼以句讀短長爲歌詩之異劉補闕之樂府肇於

漢魏按仲尼學文王操伯牙作流波水仙等操齊牘沐作雉
朝飛衛女作思歸引則不於漢魏而後始亦以明矣況自風
雅至於樂流莫非諷興當時之事以貽後代之人公襲古題
唱和重複於文或有短長於義咸爲贅贖尚不如寓意古題
刺美見事猶有詩人引古以諷之義焉曹劉沈鮑之徒時得
如此亦復稀少近代唯詩人杜甫悲陳陶哀江頭兵車麗人
等凡所歌行率皆即事名篇無復倚旁予少時與友人樂天
李公垂輩謂是爲當遂不復擬賦古題昨梁州見進士劉猛
李餘各賦古樂府詩數十首其中一二十章咸有新意予因
選而和之其有雖用古題全無古義者若出門行不言離別
將進酒特書列女之類是也其或頗同古義全創新詞者則
田家止述軍輸捉捕詞先螻蟻之類是也劉李二子方將極
意於斯文因爲粗明古今歌詩同異之音焉

夢上天

此後十首
並和劉猛

夢上高高天，高高蒼蒼高不極。下視五嶽塊，纍纍仰天依。舊
蒼蒼色踏雲聳，身身更上攀。天上天攀未得，西瞻若水兔輪
低。東望蟠桃海波黑，日月之光不到此。非暗非明煙塞塞，天
悠地遠身跨風。下無階梯上無力，來時畏有他人上。截斷龍
胡斬鵬翼，茫茫漫漫方自悲。哭向青雲椎素臆，哭聲厭咽旁
人惡。喚起驚悲淚飄露，千慙萬謝喚厭人。向使無君終不寤。

冬白紵

吳宮夜長宮漏款，簾幕四垂燈焰暖。西施自舞王自管，雪紵
飏飏鶴翎散。聲促節牽繁舞腰，嬾舞腰嬾王罷飲。蓋覆西施
鳳花錦，身作匡牀臂爲枕。朝珮縱玉王晏寢，寢醒閣報門無
事。子胥死後言爲諱，近王之臣諭王意。共笑越王窮惴惴，夜
夜抱冰寒不睡。

將進酒

將進酒將進酒酒中有毒酖主父言之主父傷主母母爲妾地父妾天仰天俯地不忍言陽爲僵蹠主父前主父不知加妾鞭旁人知妾爲主說主將淚洗鞭頭血推他雷反推主母牽下堂扶妾遣升堂上牀將進酒酒中無毒令主壽願主廻恩歸主母遣妾如此由主父妾爲此事人偶知自慙不密方自悲主今顛倒安置妾貪天偕地誰不爲

採珠行

海波無底珠沉海採珠之人判死採萬人判死一得珠斛量買婢人何在年年採珠珠避人今年採珠由海神海神採珠珠盡死死盡明珠空海水珠爲海物海屬神神今自採何況人

董逃行

董逃董逃董卓逃搢鋌戈甲聲勞嘈剗剗深臍脂焰焰人皆
歎曰爾獨不憶年年取我身上膏膏銷骨盡煙火死長安城
中賊毛起城門四走公卿士走勸劉虞作天子劉虞不敢作
天子曹瞞篡亂從此始董逃董逃人莫喜勝負相環相枕倚
縫綴難成裁破易何況曲針不能伸巧指欲學裁縫須準擬

憶遠曲

憶遠曲郎身不遠郎心遠沙隨郎飯俱在匙郎意看沙那比
飯水中書字無字痕君心暗畫誰會君況妾事姑姑進止身
去門前同萬里一家盡是郎腹心妾似生來無兩耳妾身何
足言聽妾私勸君君今夜醉何處姑來伴妾自閉門嫁夫
恨不早養兒將備老妾自嫁郎身骨立老姑爲郎求娶妾妾
不忍見姑郎忍見爲郎忍耐看姑面

夫遠征

趙卒四十萬盡爲坑中鬼趙王未信趙母言猶點新兵更填
死填死之兵兵氣索秦強趙破括敵起括雖專命起尚輕何
況牽肘之人牽不已坑中之鬼妻在營壘麻戴經驚鴈鳴送
夫之婦又行哭哭聲送死非送行夫遠征遠征不必戍長城
出門便不知死生

織婦詞

織夫何太忙蠶經三卧行欲老蠶神女聖早成絲今年絲稅
抽徵早早徵非是官人惡去歲官家事戎索征人戰苦束刀
瘡主將勲高換羅幕繰繰織帛猶努力變緝撩機苦難織東
家頭白雙女兒爲解挑紋嫁不得予採荆時日擊貢綾
戶有終老不嫁之女簷前
娟娟游絲上上有蜘蛛巧來往羨他蟲豸解緣天能向虛空
織羅網

田家詞

牛吒吒

許角反

田确确旱塊敲牛蹄趵趵音剗種得官倉珠顆穀

六十年來兵簇簇月月食糧車轆轤一日官軍收海服驅牛
駕車食牛肉歸來攸得牛兩角重鑄樓犁作斤斲姑舂婦檐
去輸官輸官不足歸賣屋願官早勝讎早覆農死有兒牛有
犢誓不遣官軍糧不足

俠客行

俠客不怕死怕在事不成事成不肯藏姓名我非竊賊誰夜
行白日堂堂殺索盜九衢草草人面青此客此心師海鯨海
鯨露背橫滄溟海波分作兩虺生分海滅海力俠客有謀人
不識測三尺鐵蛇延二國

君莫非

此後九首
和李餘

鳥不解走獸不解飛兩不相解那得相譏犬不飲露蟬不啖
肥以蟬易犬蟬死犬饑燕在梁棟鼠在堦基各自窠窟人不

能移婦好針縷夫讀書詩男翁女嫁卒不相知懼聾摘耳効
痛嚙眉我不非爾爾無我非

田野狐兔行

種豆耘鋤種禾溝畝禾苗豆甲狐猾兔剪割鵠餒鷹烹麟啖
犬鷹怕兔毫犬被狐引狐兔相須鷹犬相盡茲引反日暗天寒
禾稀豆損鷹犬就烹狐兔俱晒

當來日大難行

當來日大難行前有坂後有坑大梁側小梁傾兩軸相絞兩
輪相撐大牛豎小牛橫烏啄牛背足趺力憊當來日大難行
太行雖險險可使平輪軸自撓牽制不停泥潦漸久荆棘旋
生行必不得不如不行

人道短

古道天道長人道短我道天道短人道長天道晝夜迴轉不

曾住春秋夏忤顛風暴雨電雷狂晴被陰暗月奪日光往
往星宿日亦堂堂天既職性命道德人自強堯舜有聖德天
下能遺壽命永昌泥金刻玉與秦始皇周公傳說何不長宰
相老聃仲尼何事栖遑莽卓恭顯皆數十年富貴梁冀夫婦
車馬煌煌若此顛倒事豈非天道短豈非天道長堯舜留得
神聖事百代天子有典章仲尼留得孝順語千年萬歲父子
不敢相滅亡沒後千餘載唐家天子封作文宣王老君留得
五千字子孫萬萬聖唐謚作玄元帝魂魄坐天堂周公周禮
二十卷有能行者知紀綱傳說命三四紙有能師者稱祖
宗天能天人命人使道無窮若此神聖事誰道人道短豈非
人道長天能種百草猶得十年有氣息舜纔一日芳人能揀
得丁沉蘭蕙料理百和香天解養禽獸餒虎豹豺狼人解和
麴藥充禘祀烝嘗杜鵑無百作天遣百鳥哺雛不遣哺鳳皇

巨蟒壽千歲天遣食牛吞象充腹腸蚊螭與變化鬼怪與隱
藏蚊蚋與利觜枳棘與鋒鏑賴得人道有揀別信任天道真
茫茫若此撩亂事豈非天道短賴得人道長

苦樂相倚曲

古來苦樂之相倚近於掌上之十指君心半夜猜恨生荆棘
滿懷天未明漢成眼瞽飛燕時可憐班女恩已衰未有因由
相決絕猶得半年佯暖熱轉將深意諭旁人緝綴疵瑕遣潛
說一朝詔下辭金屋班姬自痛何倉卒呼天俯地將自明不
悟尋時已銷骨白首官人前再拜願將日月相輝解苦樂相
尋晝夜間燈光那得天明在主今被奪心應苦妾奪深恩初
爲主欲知妾意恨主時主今爲妾思量取班姬收淚抱妾身
我曾排擯無限人

出門行

兄弟同出門同行不同志悽悽分岐路各各營所爲兄上荆
山巔翻石辨虹氣弟沉滄海底偷珠待龍睡出門不數年同
歸亦同遂俱用私所珍升沉自茲異獻珠龍王宮值龍覓珠
次但喜復得珠不求珠所自酬客雙龍女授客六龍轡遣充
行雨神雨澤隨客意雩夏鍾鼓繁榮秋玉帛積彩色畫廊廟
奴僮被珠翠驪駟千萬雙鴛鴦七十二言者未搖舌無人敢
輕議其兄因獻璞再刖不履地門戶親戚踈匡牀妻妾弃銘
心有所待視足無所媿持璞自枕頭淚痕雙血漬一朝龍醒
寤本問偷珠事因知行雨偏妻子五刑備仁兄捧屍哭勢友
掉頭諱喪車黔首葬弔客青蠅至楚有望氣人王前忽長跪
賀生得貴寶不遠王所莅求之果如言剖出浮筠膩白珩無
顏色垂棘有瑕累在楚裂地封入趙連城貴秦遺李斯書書
爲傳國瑞秦亡漢魏傳傳者得神器卞和名永永與寶不相

墜勸爾出門行行難莫行易得還易失難同亦難離善賈
識貪廉良田無稗穉磨劍莫磨錐磨錐成小利

捉捕歌

捉捕復捉捕莫捉狐與兔狐兔藏窟穴豺狼妨道路道路非
不妨最憂螻蟻聚豺狼不陷弄螻蟻潛幽蠹切切主人窓主
人輕細故延緣餌櫟櫪漸入棟梁柱梁棟盡空虛攻穿痕不
露主人坦然意晝夜安寢寤網羅布參差鷹犬走迴互盡力
窮窟穴無心自還顧客來歌捉捕歌竟淚如雨豈是惜狐兔
畏君先後誤願君掃梁棟莫遣螻蟻附次及清道途盡滅豺
狼步主人堂上坐行客門前度然後巡野田遍張畋獵具外
無梟鏡援內有熊羆驅狡兔掘荒榛妖狐薰古墓用力不足
多得禽自無數畏君聽未詳聽客有明喻螻蟻風誰不輕鯨鯢
誰不惡在海尚猶遐在懷交穢汚歌此勸主人主人那不悟

不悟還更歌誰能恐違忤

古築城曲五解

年年塞下丁長作出塞兵自從冒頓強官築遮虜城
築城須努力城高遮得賊但恐賊路多有城遮不得
丁口傳父口莫問城堅不平城被虜圍漢斷城牆走
因茲請休和虜往騎來過半疑兼半信築城猶差義
築城安敢煩願聽丁一言請築鴻臚寺兼愁虜出關

估客樂

估客無住著有利身則行出門求火伴入戶辭父兄兄相
教示求利莫求名求名莫所避求利無不營火伴相勒縛賣
假莫賣誠交關但交假本生齧得失輕自茲相將去誓死意
不更亦解市頭語便無鄉里情鋤石打臂釧糯米吹項瓔歸
來村中賣敲作金玉聲村中田舍娘貴賤不敢爭所費百必

本已得十倍贏顏色轉光靜飲食亦甘馨子本頻蕃息貨販
日兼并求珠駕滄海採珠上荆衡北買党項馬西擒吐蕃鷄
炎洲布火浣蜀地錦織成越婢脂肉滑奚僮眉眼明通筭衣
食費不計遠近程經遊天下徧却到長安城城中東西市聞
客次第迎迎客兼說客多財爲勢傾客心本明黯聞語心已
驚先問十常侍次求百公卿侯家與主第點綴無不精歸來
始安坐富與王者勅市卒醉肉臭縣胥家舍成豈唯絕言語
奔走極使令大兒販材木巧識梁棟形小兒販鹽鹵不入州
縣征一身偃市利突若截海鯨鈎距不敢下下則牙齒橫生
爲估客樂判爾樂一生爾又生兩子錢刀何歲平

元氏長慶集卷第二十三

子凡遇有...

...

...

...

...

...

...

...

...

...

...

元氏長慶集卷第二十四

樂府

連昌宮詞

望雲騅馬歌

和李校書新題樂府十二首序

上陽白髮人

華原磬

五絃彈

西涼伎

法曲

馴犀

立部伎

驃國樂

胡旋女

蠻子朝

縛戎人

陰山道

連昌宮詞

連昌宮中滿宮竹歲久無人森似束又有牆頭千葉桃風動
落花紅蔌蔌宮邊老人爲予泣小年進食曾因入上皇正在

望仙樓太真同凭欄于立樓上樓前盡珠翠炫轉熒煌照天

地歸來如夢復如癡何暇備言宮裏事初過寒食一百六店

舍無煙宮樹綠夜半月高絃索鳴賀老琵琶定場屋力士傳

呼覓念奴念奴潜伴諸郎宿須臾覓得又連催特勅街中許

燃燭春嬌滿眼睡紅綃掠削雲鬟旋裝束飛上九天歌一聲

二十五郎吹管逐逡巡大遍涼州徹色色龜茲轟錄續李暮

壓笛傍宮牆偷得新翻數般曲

念奴天寶中名倡善歌每歲樓下酬宴累日之後萬衆喧

隘嚴安之章黃裳輩關易不能禁衆樂爲之罷奏玄宗遣高力士大呼於樓上曰欲遣念奴唱歌邪二十五郎吹小管逐

看人能聽否未嘗不悄然奉詔其爲當時所重也如此然而玄宗不欲奪快遊之盛未嘗置在宮禁或歲幸湯泉時巡東

洛有司潛遣從行而已又玄宗嘗於上陽宮夜後按新翻一曲屬明夕正月十五日潛遊燈下忽聞酒樓上有笛奏前夕

新曲大駭之明日密遣捕捉笛者詰驗之自云其夕竊於天津橋詵月聞宮中度曲遂於橋柱上搏諧記之臣即長安少

年善笛者李暮也玄宗異而遣之

平明大駕發行宮萬人鼓舞途路中百官

隊仗避岐薛楊氏諸姨車闕風明年十月東都破御路猶存

祿山過驅令供頓不敢藏萬姓無聲淚潛墮兩京定後六七年却尋家舍行宮前莊園燒盡有枯井行宮門閉樹苑然爾後相傳六皇帝不到離宮門久閉往來年少說長安玄武樓成花萼廢去年勅使因斫竹偶值門開暫相逐荆榛櫛比塞池塘狐兔驕癡綠樹木舞榭欹傾基尚在文窻窈窕紗猶綠塵埋粉壁舊花鈿烏啄風箏碎珠玉上皇偏愛臨砌花依然御榻臨堦斜蛇出燕巢盤闕拱菌生香案正當衙寢殿相連端正樓太真梳洗樓上頭晨光未出簾影黑至今反挂珊瑚鈎指似傍人因慟哭却出宮門淚相續自從此後還閉門夜夜狐狸上門屋我聞此語心骨悲太平誰致亂者誰翁言野父何分別耳聞眼見爲君說姚崇宋璟作相公勸諫上皇言語切燮理陰陽禾黍豐調和中外無兵戎長官清平太守好棟選皆言由相公開元之末姚宋死朝廷漸漸由妃子祿山

宮裏養作兒號國門前開如市弄權宰相不記名依稀憶得
楊與李廟謨顛倒四海搖五十年來作瘡痍今皇神聖丞相
明詔書纔下吳蜀平官軍又取淮西賊此賊亦除天下寧年
年耕種宮前道今年不遣子孫耕老翁此意深望幸努力廟
謀休用兵

望雲騅馬歌

并序

德宗皇帝以八馬幸蜀七馬道斃唯望雲騅來往不頓貞元
中老死天廐臣稹作歌以記之

憶昔先皇幸蜀時八馬入谷七馬疲肉綻筋攣四蹄脫七馬
死盡無馬騎天子蒙塵天雨泣巉岵道路淋漓濕崢嶸百草

眇難期諛洞黃泉安可入

白草諛洞並雒谷中地
名古諺云諛洞入黃泉

朱泚圍兵

抽未盡懷光寇騎追行及嬪娥相顧倚樹啼鷄鷺無聲仰天
立圉人初進望雲騅衫色顛顚衆馬欺上前噴吼如有意耳

尖卓立節踔奇君王試遣迴曾臆撮骨鋸牙駢兩肋蹄懸四

矩

或作

腦顙方勝聳三山尾株直圍人畏誚仍相惑此馬無

良空有力頻頻嚙掣轡難施往往跳趨鞍不得色沮聲悲仰
天訴天不遣言君未識亞身受取白玉羈開口銜將紫金勒
君王自此方敢騎似遇良臣久懷惻龍騰魚鼈卓然驚驥盼
驢騾少顏色七聖心迷運方厄五丁力盡路猶窄橐它山上
斧刃堆望秦嶺下錐頭石五六十里真符縣八十四盤青山
驛掣開流電有輝光突過浮雲無朕跡地平險盡施黃屋九
九屬車十二燾齊映前導引驪頭巖震迎號抱驪足路傍垂
白天寶民望驪禮拜見驪哭皆言玄宗當時無此馬不免騎
驪來幸蜀雄雄猛將李令公收城殺賊豺狼空天旋地轉日
再中天子却坐明光宮朝廷無事忘征戰校獵朝迴暮毬宴
御馬齊登擬用槽

廐中號乘輿之馬曰擬用槽

君王自試宣徽殿圉人還

進望雲騅性強步闊無方便分驂擺杖頭太高擎肘迴頭項
難轉人人共惡難迴跋潛遣飛龍減芻秣銀鞍繡韉不復施
空盡茲引反天年御槽活當時鄒諺已有言莫倚功高浪開關
登山縱似望雲騅平地須饒紅叱撥長安三月花垂草果下
翩翩紫騮好千官暖熱李令閑百馬生獐望雲老望雲騅爾
之種類世世奇當時項王乘爾祖分配英豪稱霸王爾身今
日逢聖人從幸巴渝歸入秦功成事遂身退天之道何必隨
群逐隊到死踏紅塵望雲騅用與不用各有時爾勿悲

和李校書新題樂府十二首

并序

予友李公垂貺予樂府新題二十首雅有所謂不虛爲文予
取其病時之尤急者列而和之蓋十二而已昔三代之盛也
士議而庶人謗又曰世理則詞直世忌則詞隱予遭理世而
君盛聖故直其詞以示後使夫後之人謂今日爲不忌之時

馬

上陽白髮人

天寶年中花鳥使

天寶中密號採取
豔異者為花鳥使

撩花狎鳥含春思滿懷

墨詔求嬪御走上高樓半酣醉酣酣直入卿士家閨闈不得

偷迴避良人顧妾心死別小女呼爺血垂淚十中有一得更

衣永配深宮作宮婢御馬南奔胡馬蹙宮女三千合宮弃宮

門一閉不復開上陽花草青苔地月夜閑聞洛水聲秋池暗

度風荷氣日日長看提象門終身不見門前事近年又送數

人來自言興慶南宮至我悲此曲將徹骨更想深冤復酸鼻

此輩賤嬪何足言帝子天孫古稱貴諸王在閤四十年七宅

六宮門戶闕隨燭枝條襲封邑

近古封前代子
孫為二王三恪

肅宗血胤無

官位

肅宗已後諸
王並未出閤

王無妃媵主無壻陽亢陰淫結災累何如

決壅順衆流女遣從夫男作吏

華原磬

李傳云天寶中始廢
泗濱磬用華原石

泗濱浮石裁爲磬古樂踈音少人聽工師小賤牙曠稀不辨
邪聲嫌雅正正聲不屈古調高鍾律參差管絃病鏗金戛瑟
徒相雜投玉敲冰杳然震華原軟石易追琢高下隨人無雅
鄭弃舊美新由樂胥自此黃鍾不能競玄宗愛樂愛新樂梨
園弟子承恩橫霓裳纔徹胡騎來雲門未得蒙親定我藏古
磬藏在心有時激作南風詠伯夔曾撫野獸馴仲尼暫和春
雷盛何時得向筍簾懸爲君一吼君心醒願君每聽念封疆
不遣豺狼勦人命

五絃彈

趙壁五絃彈徵調微聲巉絕何清峭辭雄皓鶴警露啼失子
哀猿繞林嘯風入春松正凌亂鶯含曉舌憐嬌妙鳴鳴暗溜
咽冰泉殺殺霜刀澁寒鞘促節頻催漸繁撥珠幢斗絕金鈴

掉干鞞鳴鏑發胡弓萬片清球擊虞廟衆樂雖同第一部德
宗皇帝常偏召旬休節假暫歸來一聲狂殺長安少主第侯
家最難見反蘇雷按曲皆承詔水精簾外教貴嬪璚瑁筵
心伴中要臣有五賢非此絃或在拘囚或屠釣一賢得進勝
累百兩賢得進同周邵三賢事漢滅暴強四賢鎮岳寧邊徼
五賢並用調五常五常既序三光曜趙壁五絃非此賢九九
何勞設庭燎

西涼伎

吾聞昔日西涼州人煙撲地桑柘稠蒲萄酒熟恣行樂紅豔
青旗朱粉樓樓下當爐稱卓女樓頭伴客名莫愁鄉人不識
離別苦更卒多爲沉滯游哥舒開府設高宴八珍九醞當前
頭前頭百戲競撩亂九劍跳躑霜雪浮師子搖光毛彩豎胡
姬醉舞筋骨柔大宛來獻赤汗馬替普亦奉翠茸裘一朝燕

賊亂中國河湟忽盡空遺丘開遠門前萬里埃今來處到行
原州平時開遠門外立埃云去安西九千九百去京五百而
近何其逼天子縣內半沒爲荒陬西京之道爾阻修連城邊
將但高會每說此曲能不羞

法曲

吾聞黃帝鼓清角弭伏熊羆舞玄鶴舜持干羽苗革心堯用
咸池鳳巢閣大夏護武皆象功功多已訝玄功薄漢祖歌沛
亦有歌秦王破陣非無作作之宗廟見艱難作之軍旅傳糟
粕明皇度曲多新態宛轉侵淫易沉著赤白桃李取花名霓
裳羽衣號天落雅弄雖云已變亂夷音未得相參錯自從胡
騎起煙塵毛毳腥羶滿咸洛女爲胡婦學胡糝伎進胡音務
胡樂音洛火鳳聲沉多咽絕春鶯囀罷長蕭索胡騎與胡糝五
十年來競紛泊

馴犀

李傳云貞元丙子歲南海來貢至十三年冬苦寒死於苑中

建中之初放馴象遠歸林邑近交廣獸返深山鳥構巢鷹鷂
鷄鶻無羈鞅貞元之歲貢馴犀上林置圈官司養玉盆金棧
非不珍虎啖狴牢魚食網渡江之橘踰汶貉反時易性安能
長臘月北風霜雪深蹢躅鱗身遂長往行地無疆費傳驛通
天異物罹幽枉乃知養獸如養人不必人人自敦獎不擾則
得之於理不奪有以多於賞脫衣推食衣食之不若男耕女
令紡堯民不自知有堯但見安閑聊擊壤前觀馴象後觀犀
理國其如指諸掌

立部伎

李傳云太常選坐部伎無性靈者退入立部伎又選立部伎無性靈者退入雅樂可

知矣李君作歌以諷焉

胡部新聲錦筵坐中庭漢振高音播太宗廟樂傳子孫取類
群凶陣初破戢戢攢槍霜雪耀騰騰擊鼓風雷磨初疑遇敵

身啓行終象由文士憲左昔日高宗常立聽曲終然後臨玉
座如今節將一掉頭電捲風收盡摧挫宋晉鄭友歌聲發滿
堂會客齊喧歌珊瑚佩玉動腰身一一貫珠隨咳唾頃向圓
丘見郊祀亦曾正旦親朝賀太常雅樂備宮懸九奏未終百
寮情慙懣難令季札辨遲迴但恐文侯卧工師盡取聾聵人
豈是先王作之過宋沈嘗傳天寶季法曲胡音忽相和明年
十月燕冠來元廟千門虜塵浣太常丞宋沈傳漢中王舊說云玄宗雖雅好度曲然而未
嘗使蕃漢雜奏天寶十三載始詔道調法曲與胡部新聲合作識者異之明年祿山叛我聞此語歎復

驃國樂

李傳云貞元辛巳歲始來獻

驃之樂器頭象馳音聲不合十二和從舞跳趨筋節硬繁詞
變亂名字訛千彈萬唱皆咽咽左旋右轉空傖傖俯地呼天
終不會曲成調變當如何德宗深意在柔遠笙鏞不御停嬪

娥史館書爲朝貢傳太常編入鞮鞞科古時陶堯作天子遜
遁親聽康衢歌又遣道人持木鐸遍採謳謠天下過萬人
有意皆洞達四嶽不敢施煩苛盡令區中擊壤塊燕及海外覃
恩波秦霸周衰古官廢下堙上塞王道頗共矜異俗同聲教
不念齊民方薦瘡傳稱魚鼈亦咸若苟能効此誠足多借如
牛馬未蒙澤豈在抱甕滋龜鼉教化從來有源委必將泳海
先泳河非是倒置自中古驃兮驃兮誰爾訶

胡旋女

李傳云天寶中西國來獻

天寶欲末胡欲亂胡人獻女能胡旋旋得明王不覺迷妖胡
奄到長生殿胡旋之義世莫知胡旋之容我能傳蓬斷霜根
羊角疾竿戴朱盤火輪炫驪珠迸珥逐龍星虹暗暈輕巾掣
流電潛鯨暗翳笄殘謝反海波迴風亂舞當空霞萬過其誰辨
終始四座安能分背面才人觀者相爲言承奉君恩在圓變

是非好惡隨君口南北東西逐君盼
柔軟依身看珮帶徘徊繞指同環釧
佞臣聞此心計迴惑亂君心君眼眩
君言似曲屈如鉤君言好直舒為箭巧
隨清影觸處行妙學春鷲百般轉傾天
側地用君力抑塞周遮恐君見翠華南
幸萬里橋玄宗始悟坤維轉緯書云僧一行嘗奏玄宗曰陛下幸萬里橋聖祚無疆故天寶中歲幸洛陽冀充盈數及上幸蜀至萬里橋乃歎謂左右曰一行之奏其是乎寄言旋目與旋心有國有家當共譴

蠻子朝

李傳云貞元末蜀川始通蠻酋

西南六詔有遺種僻在荒陬路尋壅
部落支離君長賤比諸夷狄為幽冗
犬戎強盛頻侵削降有憤心戰無勇
夜防鈔盜保深山朝望煙塵上高冢
鳥道繩橋來款附非因慕化因為
悚清平官擊金吐嗟求天叩地持雙
珙益州大將韋令公頃實遭時定汧
隴自居劇鎮無他績幸得蠻來固恩
寵為蠻開

道引蠻朝接蠻送蠻常繼踵天子臨軒四方賀朝廷無事唯
端拱漏天走馬春雨寒瀘水飛蛇瘴煙重椎頭醜類除憂患
瘡足役夫勞洵湧匈奴互市歲不供雲蠻通好蠻長驍戎王
養馬漸多年南人耗賴西人恐

縛戎人

近制西邊每擒蕃囚例皆傳置南
方不加鞭撻故李君作歌以諷焉

邊頭大將差健卒入抄擒生快於鶻但逢顏面即捉來半是
蕃人半戎羯大將論功重多級捷書飛奏何超忽聖朝不殺
諧至仁遠送炎方示微罰萬里虛勞肉食費連頭盡被檀裘
暍華茵重席卧腥臊病犬愁鴟聲咽嗚中有一人能漢語自
言家本長安窟小年隨父戍安西河渭瓜沙眼看沒天寶未
亂家數載狼星四角光蓬勃中原禍作邊防危果有豺狼四
來伐蕃馬臙成正翹健蕃兵肉飽爭唐突煙塵亂起無亭燧
主帥驚跳弃旄鉞半夜城摧鵝鴈鳴妻啼子叫曾不歇陰森

神廟未敢依脆薄河冰安可越荆棘深處共潛身前因羨藜
後艱晚平明蕃騎四面走古墓深林盡株櫛少壯為俘頭被
髮老翁留居足多別烏鳶滿野屍狼藉樓榭成灰墻突兀暗
水濺濺入舊池平沙漫漫鋪明月戎王遣將來安慰口不敢
言心咄咄供進腋腋音夜御叱般豈料穹廬揀肥腠五六十
年消息絕中間盟會又猖獗眼穿東日望堯雲腸斷正朝梳漢
髮延州鎮李如暹蓬子將軍之子也嘗沒西蕃及歸自云蕃
法唯正歲一日許唐人沒蕃者服衣冠如暹當此日由是
悲不自勝遂與近來如此思漢者半為老病半埋骨尚教孫
蕃妻密定歸計子學鄉音猶話平時好城關老者儻盡少者壯生長蕃中似
蕃悖不知祖父皆漢民便恐為蕃心矻矻緣邊飽餒十萬眾
何不齊驅一時發年年但捉兩三人精衛銜蘆塞溟渤

陰山道

李傳云元和二年有詔
悉以金銀酬迴鶻馬價

年年買馬陰山道馬死陰山帛空托元和天子念女工內出

金銀代酬犒臣有一言昧死進死生甘分荅恩燾費財爲馬
不獨生耗帛傷工有他盜臣聞平時七十萬匹馬關中不省
聞嘶譟四十八監選龍媒時貢天庭付良造如今垌野十無
一盡在飛龍相踐暴萬束藹芟供旦暮千鍾菽粟長牽漕屯
軍郡國百餘鎮縑細歲奉春冬勞稅戶逋逃例攤配官司折
納仍貪冒挑紋變緝力倍費弃舊從新人所好越穀撩綾織
一端十疋素縑功未到豪家富貴踰常制令族親班無雅操
從騎愛奴絲布衫臂鷹小兒雲錦韜群臣利已要差僭天子
深衷空閔悼綽立花墀鷓鳳行雨露恩波幾時報

元氏長慶集卷第二十四

元氏長慶集卷第二十五

樂府

有鳥

有酒

華之巫

廟之神

有鳥二十章 庚寅

有鳥有鳥名老鴟鴟張貪很老不衰似鷹指爪唯攫肉戾天
羽翮徒翰飛朝偷暮竊恣昏飽後顧前瞻高樹枝珠丸彈射
死不去意在護巢兼護兒

有鳥有鳥毛似鶴行步雖遲性靈惡主人但見閑慢容許占
蓬萊最高閣弱羽羽長憂俊鵲拳疽腸暗著一作把鵲雛啄千年
不死伴靈龜梟心鶴貌何人覺

有鳥有鳥如鸛雀食蛇抱磬天姿惡行經水滸為毒流羽拂
酒杯為死藥漢后忍渴天豈知驪姬墳池君寧覺嗚呼為有

白色毛亦得乘軒謬稱鶴

有鳥有鳥名爲鳩毛衣軟毳心性柔鶻緣暖足憐不喫鷄爲
同科曾共游飛飛漸上高高閣百鳥不猜稱好速佳人許伴
鵲鵲食望爾化爲張氏鉤

有鳥有鳥名野鷄天姿耿介行步齊主人偏養憐整頓玉粟
充腸瑤樹栖池塘潛狎不鳴鴈津梁暗引無用鵲秋鷹迸逐
霜鶻遠鵬鳥護巢當晝啼主人頻問遣妖術力盡計窮音響
悽當時何不早量分莫遣輝光深照泥

有鳥有鳥群翠碧毛羽短長心並窄皆曾偷食渌池魚前去
後來更逼迫食魚滿腹各自飛池上見人長似客飛飛競占
嘉樹林百鳥不爭綠鳳惜

有鳥有鳥群紙鳶因風假勢童子牽去地漸高人眼亂世人
爲爾羽毛全風吹繩斷童子走餘勢尚存猶在天愁爾一朝

還到地落在深泥誰復憐

有鳥有鳥名啄木木中求食常不足偏啄鄧林求一蟲蟲孔未穿長觜禿木皮已穴蟲在心蟲蝕木心根柢覆可憐樹上百鳥見有時飛向新林宿

有鳥有鳥衆蝙蝠長伴佳人占華屋妖鼠多年羽翮生不辨雌雄無本族穿墉伺隙善潛身晝伏宵飛惡明燭大厦雖存柱石傾暗齧棟梁成蠹木

有鳥有鳥名爲鴉深藏孔穴難動搖鷹鷂遶樹探不得隨珠彈盡聲轉嬌主人煩惱罷擒取許占神林爲物妖當時幸有燎原火何不鼓風連夜燒

有鳥有鳥名燕子口中未省無淫滓春風吹送廊廡間秋社驅將散孔裏雷驚雨灑一時蘇雲壓霜摧半年死驅去驅來長信風暫託棟梁何用喜

有鳥有鳥名體烏貪癡突諄天下無田中攫肉吞不足偏入
諸巢探衆鷄歸來仍占主人樹腹飽巢高聲響麤山鷄野鵲
閑受肉鳳皇不得聞罪辜秋鷹掣斷架上索利爪一揮毛血
落可憐鷄鵲慕腥膻猶向巢邊競紛泊

有鳥有鳥謂白鷗雪毛皓白紅嘴殷貴人妾婦愛光彩行提
坐臂怡朱顏妖姬謝寵辭金屋彫籠又伴新人宿無心爲主
擬銜花空長白毛映紅肉

有鳥有鳥群雀兒中庭啄粟籬上飛秋鷹欺小嫌不食鳳皇
容衆從爾隨大鵬忽起遮白日餘風簸蕩山岳移翩翩百萬
徒驚噪扶搖勢遠何由知古來妄說銜花報縱解銜花何所
爲可惜官倉無限粟伯夷餓死黃口肥

有鳥有鳥皆百舌舌端百轉聲咄啞先春盡學百鳥啼真僞
不分聽者悅伶倫鳳律亂宮商蟠木天鷄誤時節朝朝暮暮

主人耳桃李無言管絃咽五月炎光朱火盛陽燭燒陰幽響
絕安知不是卷舌星化作剛刀一時截

有鳥有鳥毛羽黃雄者爲鴛雌者鴛主人併養七十二羅列
彫籠開洞房雄鳴一聲雌鼓翼夜不得栖朝不食氣息榻然
雙翅垂猶入籠中就顏色

有鳥有鳥名鷦鷯鈴子眼精蒼錦襦貴人腕軟憐易臂奮肘
一揮前後呼俊鷽無由拳狡免金鷄不得擒魁狐文王長在
苑中獵何日非熊休賣屠

有鳥有鳥名鸚鵡養在雕籠解人語主人曾問私所聞因說
妖姬暗欺主主人方惑離見疑起歸籠底雙翅垂山鷽野雀
恠鸚語競噪爭窺無已時君不見隋朝籠頭姥嬌養雙鸚囑
新婦一鸚曾說婦無儀悍婦殺鸚欺主母一鸚閉口不復言
母問不言何太久鸚言悍婦殺鸚由母爲逐之鄉里醜當時

主母信爾言顧爾微禽命何有今之主人翻爾疑何事籠中漫開口

有鳥有鳥名俊鵲鷄小鵲癡俊無匹鵲鵲拂鷄血迸天狡兔中拳頭粉骨平明度海朝未食挾上秋空雲影沒瞥然飛下人不知攪碎荒城魅狐窟

有鳥有鳥真白鶴飛上九霄雲漠漠司晨守夜悲鷄犬啄腐吞腥笑鵲鷄堯年值雪度關山晉室聞琴下寥廓遼東盡爾千歲人悵望橋邊舊城郭

有酒十章

有酒有酒鷄初鳴夜長睡足神慮清悄然危坐心不平浩思一氣初彭亨瀕洞浩汗真無名胡不終渾成胡爲沉濁以升清蠢然分畫高下程天蒸地鬱群動萌毛鱗裸介如鬚鬚嗚呼萬物紛已生我可柰何芳杯一傾

有酒有酒東方明一杯既進吞元精尚思天地之始名一元
既二分濁清地居方直天體明胡不八荒圻圻如砥平胡山
高屹崕海泓澄胡不日車杲杲晝夜行胡爲月輪滅缺星矚
町嗚呼不得真宰情我可奈何兮杯再傾

有酒有酒兮湛淥波飲將愉兮氣彌和念萬古之紛羅我獨
慨然而浩歌歌曰天耶地耶肇萬物耶儲胥大庭之君耶恍
耶忽耶有耶傳而信耶久而謬耶文字生而義農作耶仁義
別而聖賢出耶炎始暴耶蚩尤熾耶軒轅戰耶不得已耶仁
耶聖耶愍人之毒耶天蕩蕩耶堯穆穆耶豈其讓耶歸有德
耶舜其貪耶德能嗣耶豈其讓耶授有功耶禹功大耶人戴
之耶益不逮耶啓能德耶家天下耶榮後嗣耶於後嗣之榮
則可耶於天下之榮其可耶嗚呼遠堯舜之日耶何弃舜之
速耶辛癸虐耶湯武革耶順天意耶公天下耶踵夏榮嗣私

其公耶並建萬國均其私耶專征遞伐鬪海內耶秦掃其類
威定之耶二代而殞守不仁耶漢魏而降乘其機耶短長理
亂繫其術耶堯耶舜耶終不可逮耶將德之者不位位者不
逮其德耶時耶時耶時其可耶我可奈何兮一杯又進歌且
歌

有酒有酒兮黯兮溟仰天大呼兮天漫漫兮高兮青高兮漫
兮吾孰知天否與靈取人之仰者無乃在乎昭昭乎曰與夫
日星何三光之並照兮奄雲雨之冥冥幽妖倏忽兮水恠族
形龜鼉岸走兮海若鬪鯨河潰潰兮愈濁濟翻翻兮不寧虵
噴雲而出穴虎嘯風兮屢鳴汗高巢而鳳去兮溺厚地而芝
蘭以之不生葵心傾兮何向松影直而孰明人懼愁兮戴榮
天寂默兮無聲嗚呼天在雲之上兮人在雲之下兮又安能
決雲而上征嗚呼旣上征之不可兮我奈何兮杯復傾

有酒有酒香滿尊君寧不飲開君顏豈不知君飲此心恨君
人獨醒誰與言君寧不見颶風翻海火燎原巨鼇唐突高焰
延精衛銜蘆塞海枯魚噴沫救池燔筋疲力竭波更大鱗焦
甲裂身已乾有翼勸爾升九天有鱗勸爾登龍門九天下視
日月轉龍門上激雷雨奔蟾蜍雖怒誰爾懼鵲旦雖啼誰爾
憐搏空意遠風來壯我可奈何兮一杯又進消我煩

有酒有酒歌且哀江春例早多早梅櫻桃李相續開間以
木蘭之秀香徘徊東風吹盡南風來鸞聲漸澁花摧隕四月
清和豔殘卉芍藥^飛紅蒲映水夏龍痛毒雷雨多蒲葉離披
豔紅死紅豔猶存榴樹花紫苞欲綻高筍牙筍牙成竹冒霜
雪榴花落地還銷歇萬古盈虧相逐行君看夜夜當窻月榮
落虧盈可奈何生成未遍霜霰過霜霰過兮無奈何靈芝負
絕荆棘多荆棘多兮可奈何可奈何兮終奈何秦皇堯舜俱

腐骨我可奈何兮又進一杯歌復歌

有酒有酒方爛漫飲酣拔劍心眼亂聲若雷砰目流電醉舞
翻環身眩轉軋網倒軋坤維旋白日橫空星宿見一夫心醉
萬物變何況蚩尤之蹴踏安得不以熊羆戰嗚呼風后力牧
得親見我可奈何兮又進一杯除健羨

有酒有酒兮告臨江風漫漫兮波長渺渺兮注海海蒼蒼兮
路茫茫彼萬流之混入兮又安能分若畎澮淮河與夫岷吳
之巨江味作鹹而若一雖甘淡兮誰謂爾爲良濟涓涓而縷
貫將奈何兮萬里之渾黃鯨歸穴兮渤溢鼇載山兮低昂陰
火然兮衆族沸渭颶風作兮晝夜猖狂顧千珍與萬恠兮皆
委潤而深藏信天地之瀦蓄兮我可奈何兮一杯又進兮包
大荒

有酒有酒兮日將落餘光委照在林薄陽烏撩亂兮屋上栖

陰恠跳趨兮水中躍月爭光兮星又繁燒橫空兮焰仍爍我可奈何兮時既昏一杯又進兮聊處廓

有酒有酒兮再祝祝予心兮何欲欲天泰而地寧欲人康而歲熟欲鳳翥而鵷隨兮欲龍亨而驥逐欲日盛而星微兮欲滋蘭而殲毒欲人欲而天從苟天未從兮我可奈何兮一杯又進聊自足

華之巫

景成

有一人兮神之側廟森森兮神默默神默默兮可奈何願一見神兮何可得女巫索我何所有神之開閉予之手我能進若神之前神不自言寄予口爾欲見神安爾身買我神錢沽我酒我家又有神之盤爾進此盤神爾安此盤不進行路難陸有摧車舟有瀾我聞此語長太息豈有神明欺正直爾居大道誰南北恣矯神言假神力假神力兮神未悟行道之人

不得度我欲見神誅爾巫豈是因巫假神祐爾巫爾巫獨
不聞乎與其媚於奧不若媚於竈使我傾心事爾巫吾寧驅
車守吾道爾巫爾巫且相保吾心自有丘之禱

廟之神

我馬煩兮釋我車神之廟兮山之阿予一拜而一祝祝予心
之無涯涕洟瀾而零落神寂默而無譁神兮神兮柰神之寂
默而不言何復再拜而再祝鼓吾腹兮歌吾歌歌曰今耶古
耶有耶無耶福不自神耶神不福人耶巫爾惑耶稔而誅耶
謂不得耶終不可謁耶返吾駕而遵吾道廟之木兮山之花

元氏長慶集卷第二十六

樂府

村花晚

紫躑躅

山枇杷

樹上烏

琵琶歌

小胡笳引

去杭州

送王師範

南家桃

志堅師

荅子蒙

辛夷花

廳前栢

夜別筵

三泉驛

何滿子歌

丁溪館別李景信

酬鄭從事宴望海亭

村花晚

庚寅

三春已暮桃李傷棠梨花白蔓菁黃村中女兒爭摘將挿刺

頭鬢相誇張田翁蠶老迷臭香曬暴斂斂薰衣裳非無後秀
與孤芳奈爾千株萬頃之茫茫天公此意何可量長教爾輩
時節長

紫躑躅

紫躑躅滅紫攏裙倚山腹文君新寡乍歸來羞怨春風不能
哭我從相識便相憐但是花叢不迴目去年春別湘水頭今
年夏見青山曲青山驛名迢迢遠在青山上山高水闊難容足願
爲朝日早相瞰願作輕風暗相觸爾躑躅我向通川爾幽獨
可憐今夜宿青山何年却向青山宿山花漸暗月漸明月照
空山滿山綠山空月午夜無人何處知我顏如玉

山枇杷

山枇杷花似牡丹殷鳥間友潑血往年乘傳過青山正值山花
好時節壓枝凝豔已全開映葉香苞纔半裂緊搏紅袖欲支

願慢解

反賀買

絳囊初破結金線叢飄繁藥亂珊瑚朶重纖莖

折因風旋落裙片飛帶日斜看目精熱亞水依巖半傾側籠
雲隱霧多愁絕綠珠語盡身欲投漢武眼穿神漸滅穠姿秀
色人皆愛怨媚羞容我偏別說向閑人人不聽曾向樂天時
一說昨來谷口先相問及到山前已消歇左降通州十日遲
又與幽花一年別山枇杷爾託深山何太拙天高萬里看不
精帝在九重聲不徹園中杏樹良人醉陌上柳枝年少折因
爾幽芳喻昔賢礪溪冷坐權門咽

樹上烏

癸卯

樹上烏洲中有樹巢若鋪百巢一樹知幾烏一鳥不下三四
雛雛又生雛知幾雛老烏未死雛已烏散向人間何處無攫
麕啄卵方可食男女群強最多力靈蛇萬古唯一珠豈可杼
彈千萬億吾不會天教爾輩多子孫告訴天公天不言

琵琶歌

寄管兒兼誨鐵山
此後並新題樂府

琵琶宮調八十一旋宮三調彈不出玄宗偏許賀懷智段師

此藝還相匹自後流傳指撥衰崑崙善才徒爾爲頌聲少得

似雷吼

去聲

絃不敢彈羊皮人間奇事會相續但有卞和無

有玉段師弟子數十人李家管兒稱上足管兒不作供奉兒

拋在東都雙鬢絲逢人便請送盃盞著盡功夫人不知李家

兄弟皆愛酒我是酒徒爲密友著作曾邀連夜宿中碾春溪

華新綠平明船載管兒行盡日聽彈無限曲曲名無限知者

鮮霓裳羽衣偏宛轉涼州大遍最豪嘈六么散序多籠撚我

聞此曲深賞奇賞著奇處驚管兒管兒爲我雙淚垂自彈此

曲長自悲淚垂捍撥朱絃濕冰泉嗚咽流鶯澁因茲彈作雨

霖鈴風雨蕭條鬼神泣一彈旣罷又一彈珠幢夜靜風珊珊

低徊慢弄關山思坐對燕然秋月寒月寒一聲深殿磬驟彈

曲破音繁併百萬金鈴旋去聲玉盤醉客滿船皆暫醒自茲聽
後六七年管兒在洛我朝天游想茲恩杏園裏夢寐仁風花
樹前去年御史留東臺公私戚促顏不開今春制獄正撩亂
晝夜推囚心似灰暫輟歸時尋著作著作南園花拆萼煙脂
耀眼桃正紅雪片滿溪梅已落是夕青春值三五花枝向月
雲含吐著作施罇命管兒管兒久別今方覩管兒還爲彈六
么六么依舊聲迢迢猿鳴雪岫來三峽鶴唳晴空聞九霄
逡巡彈得六么徹霜刀破竹無殘節幽關鷗軋胡鴈悲斷絃
春騷層冰裂我爲含凄歎奇絕許作長歌始終說藝奇思寡
塵事多許來寒暑又經過如今左降在閑處始爲管兒歌此
歌此歌寄管兒管兒管兒憂爾衰爾衰之後繼者誰繼之無
乃在鐵山鐵山已近曹穆間仁善性性靈甚好功猶淺急處未
得臻幽閑努力鐵山勤學取莫遣後來無所祖

小胡笳引

桂府王推官出蜀匠雷氏金徽琴請姜宣彈

雷氏金徽琴王君寶重輕千金三峽流中將得來明窓拂席
幽匣開朱絃宛轉盤鳳足驟擊數聲風雨迴哀笳慢拍董家
本姜生得之妙思付泛徽胡鴈咽蕭蕭繞拍輓轡圓袞袞吞
恨絨情乍輕激故國關山心歷歷潺湲疑是鴈鷗鷯若驕如
聞發鳴鏑流宮變徵漸幽咽別鶴欲飛猿欲絕秋霜滿樹葉
辭風寒雛墜地烏啼血哀絃已罷春恨長恨長何恨懷我鄉
我鄉安在長城窟聞君虜奏心飄忽何時窄袖短貂裘煙脂
山下彎明月

去杭州送王師範

房杜王魏之子孫雖及百代爲清門駿骨鳳毛真可貴崗頭
澤底何足論近世不以勲賢之胄爲令族而以齒齒澤李爲甲門去年江上識君面愛
君風貌情已敦與君言語見君性靈府坦蕩消塵煩自茲心

洽跡亦洽居常並榻游並軒柳陰覆岸鄭監水李花壓樹韋
公園每出新詩共聯綴閑因醉舞相牽援時尋沙尾楓林夕
夜摘蘭叢衣露繁令君別我欲何去自言遠結迢迢婚簡書
五府已再至波濤萬里酬一言爲君再拜贈君語願君靜聽
君勿喧君名師範欲何範君之烈祖遺範存永寧昔在掄鑒
表沙汰沉濁澄浚源君今取友由取士得不別白清與渾昔
公事主盡忠謹雖及死諫誓不諉今君佐藩如佐主得不陳
露訓所恩昔公爲善日不足假寐待旦朝至尊今君三十朝
未與得不寸晷倍璵璠昔公令子尚貴主公執舅禮婦執笄
返拜之儀自此絕關雎之化皎不昏君今遠娉奉明祀得不
齊勵親蘋繁斯言皆爲書佩帶然後別袂乃可捫別袂可捫
不可解解袂開帆悽別魂魂搖江樹鳥飛沒帆挂檣竿鳥尾
翻翻風駕浪拍何處直指杭州由上元上元蕭寺基址在杭

州潮水霜雪屯潮戶迎潮擊潮鼓潮平潮退有潮痕得得爲
題羅刹石古來非獨伍貞寃

南家桃

南家桃樹深紅色日照露光看不得樹小花狂風易吹一夜
風吹滿牆北離人自有經時別眼前落花心歎息更待明年
花滿枝一年迢遞空相憶

志堅師

嵩山老僧披破衲七十八年三十臘靈武朝天遼海征宇宙
曾行三四匝初因怏怏剃却頭便繞嵩山寂師塔淮西未返
半年前已見淮西陣雲合

荅子蒙

報盧君門外雪紛紛紛紛門外雪城中鼓聲絕強梁御史人
觀步安得夜開沽酒戶

辛夷花 問韓貞外

問君辛夷花君言已班駁不畏辛夷不爛開顧我筋骸官束
縛縛遣推囚名御史狼籍囚徒滿田地明日不推綠國忌依
前不得花前醉韓貞外家好辛夷開時乞取三兩枝折枝爲
贈君莫惜縱君不折風亦吹

廳前栢

廳前栢知君曾對羅希奭我本癡狂耽酒人何事與君爲對
敵爲對敵洛陽城中花赤白花赤白囚漸多花之赤白柰爾
何

夜別筵

夜長酒闌燈花長燈花落地復落牀似我別淚三四行滴君
滿坐之衣裳與君別後淚痕在年年著衣心莫改

三泉驛

三泉驛內逢上巳新葉趨塵花落地勸君滿盞君莫辭別後
無人共君醉洛陽城中無限人貴人自貴貧自貧

何滿子歌

張湖南座爲
唐有熊作

何滿能歌能宛轉天寶年中世稱罕嬰刑繫在圜牆間下調
哀音歌憤邁梨園弟子奏玄宗一唱承恩羈網緩便將何滿
爲曲名御譜親題樂府纂魚家入內本領絕葉氏有年聲氣
短自外徒煩記得詞點拍纔成已夸誕我來湖外拜君侯正
值灰飛仲春瑄廣宴江亭爲我開紅粧逼坐花枝暖此時有
熊踏華筵未吐芳詞貌夷坦翠蛾轉盼搖雀釵碧袖歌弄鱗
鶴卵定面凝眸一聲發雲停塵下何勞筭迢迢擊磬遠玲玲
一一貫珠勻款款犯羽含商移調態留情度意拋絃管湘妃
寶瑟水上來秦女玉簫空外滿纏綿疊破最慙慙整頓衣裳
頗閑散冰含遠溜咽還通鷺泥晚花啼漸嬾歛黛吞聲若自

宛鄭袖見捐西子浣陰山鳴鴈曉斷行巫峽哀猿夜呼伴古
者諸侯饗外賓鹿鳴三奏陳圭瓚何如有熊一曲終牙籌記
令紅螺盃

通州丁溪館夜別李景信 三首

月蒙蒙兮山掩掩東東別覓眉歛歛蠡瑱覆時天欲明碧幌
青燈風灩灩以陝反淚消語盡還暫眠唯夢千山萬山險

水環環兮山簇簇啼鳥聲聲婦人哭離牀別臉睡還開燈爇
暗飄珠軟軟山深虎橫館無門夜集巴兒扣空木

雨瀟瀟兮鵲咽咽傾冠倒枕燈臨滅倦僮呼喚磨復眠啼雞
拍翅三聲絕握手相看其柰何柰何其柰天明別

酬鄭從事四年九月宴望海亭次用舊韻

海亭樹木何籠葱寒光透坼秋玲瓏湖山四面爭氣色曠望
不與人間同一拳墀伏東武小龜山別名兩山闔構秦望雄兩峯為秦

望秦

嵌空古墓失文種

墓在州城西山。上圖經：湖水到山，迎楫樞入海。今所存古穴耳。骨

兀恠石疑防風舟舩駢比

反

有宗侶水雲滄泱無始終雪

花布遍稻隴白日脚插入秋波紅興餘望劇酒四坐歌聲舞

豔煙霞中酒酣從事歌送我歌云此樂難再逢良時年少猶

健美使君况是頭白翁我聞此曲深歎息唧唧不異秋草蟲

憶年十五學構厦有意蓋覆天下窮安知四十虛富貴朱紫

束縛心志空耕梳妓女上樓榭止欲歡樂微茫躬雖無趣尚

慕賢聖幸有心目知西東欲將滑甘柔藏府已被鬱噎衝喉

隴君今勸我酒太醉醉語不復能冲融勸君莫學虛富貴不

是賢人難變通

一本富貴不
是賢人通

元氏長慶集卷第二十六

元氏長慶集卷第二十七

賦

樂爲御

善歌如貫珠

鎮圭

觀兵部馬射

郊天日五色祥雲

秦制試樂爲御賦

以和樂行道之本爲韻依次用

臣伏奉庚寅之詔曰天子以樂爲御其義則那臣以爲引重
任者無御不可播盛德者非樂而何蟠乎地而極乎天周流
既超於馬力發乎邇而應乎遠馳聲亦倍於鑾和喻之爲至
此實居多大道既移則舞行象成於倒載小戎或駕則琴音
決勝於騶歌故聖王取彼驪然方諸沃若制其節奏戒平行
作聽祈招之什冀絕跡於覆車賦盤遊之詞俾慮危於朽索
是以南薰馳而虞德盛北里騁而殷道惡控海內當並驚於

勛華執人柄豈爭功於良樂斯御也動無險阻發自和平周旋罔害歡愛則行止之而優游靈府推之而浹洽寰瀛非勞輶輶但布莖英陋乎足跡運以精誠爾或馳驅難期於無災無害我之步驟乃在於大鳴小鳴故曰得禽而詭遇不如率獸以仁聲且跋涉者疲於山川條暢者格乎穹昊慕入律而百蠻麇至錫有功而諸侯軌道豈出戶庭非專擊考乘六氣之辨哂六轡之徒施鼓八風而行知八駿之非實於是屏造父命后或無聲而至矣或先進以道之豈獨周域中而利其銜策亦將肥天下而淪乎骨髓若此則宇宙蓋由乎一馬牽制盡在於四維雖質文更變而公共操持莫不得之者昌失之者損俗化清而鞭朴廢和順積而車書混故臣稭前此而言曰引重任者御爲之先播盛德者樂爲之本伏惟皇帝陛下推是心而居其奧臣徒欲貢所聞而安敢窺其闥

善歌如貫珠賦

以聲氣圓直有
如貫珠依次用

珠以編次歌有繼聲美綿綿而不絕狀累累以相成偏佳朗
暢屢此圓明度彫梁而暗繞誤風綴之頻驚響象而然非謂
結之以繩約氣至則爾故可貫之以精誠原夫以節爲珠以
聲爲緯漸杳杳而無極以多多而益貴悠揚綠水訝合浦之
同歸繚繞青霄環五星之一氣望明月而宛轉感潛蛟之歔
歔若非象照乘之珍安能忘在齊之味其始也長言邐迤度
曲纏綿吟斷章而離離若間引妙囀而一一皆圓小大雖掄
離朱視之而不見唱和相續師乙美之而謂連當其拂樹彌
長凌風乍直意出彈者與高音而臻極及夫屬思漸繁因聲
屢有想無脛者隨促節而奔走以洞徹爲精英比疵瑕於能
否次第其韻且殷勤於士衡之文上下其音謂低昂於遊女
之手窈窕遠矣徘徊繹如髮鬋成象玲瓏構虛頻寄詞於章

句之末願連光於咳唾之餘清而且圓直而不散方同累九之重疊豈比沉泉之撩亂懼而知者初憫默於暗投善則返之乃因循於舊貫美清冷而發越憶輝光之璀璨始終雖異細大靡殊中規矩於圓折成條貫以縈紆似是而非賦湛露則方驚綴冕有聲無實歌芳樹而空想垂珠美惡難掩前後不踰亦比掄材而至者豈獨善歌之謂乎

鎮圭賦

以王者端拱四維鎮寧爲韻依次用

天子之鎮圭十有二寸其長義在撫十有二州之域而爲億兆之王圭比德焉所以美特達之美鎮大名也有以示彈壓之強以之徵守則有土之臣至以之恤患則受災之地康當宁乃無爲於南面朝日乃有事於東方會百辟而執之班五瑞於來者作山龍之端表我則清光皎然雜蒲穀以成行爾則鞠躬如也想夫彤闈乍曉碧砌生寒當玉座而高居狀中

峯之冠瑤岫透爐煙而迥出意秋月之壓雲端是以聖后矜
持庶寮瞻重安八荒於術內故捧必當心握萬務於掌中故
天不盈拱映冕旒則璿樞星綴間黼黻而瓊枝花擁豈獨使
威儀可觀亦以明社稷有奉美哉聖人之制器也靡不有類
銳上以象天方下而法地備采章以盡飾臻崇高而定位夫
衆色不可雜施依方面之正者惟五群山不可以咸寫選域
中之大者有四盡舉凡而得一故相傳而莫二義存敬慎道
在底綏詳觀組約足辨操持俾經制之不亂若縹緲之相維
況國家備物繼周垂衣體舜自天有命非因桐葉而封唐提
象握機故配土行而執鎮豈惟傳歷代之瑞寶抑亦彰受命
之符信者也重曰圭銳也庸作思而百志靈鎮安也安於道
而萬物寧亦嘗三復斯名矣所以表道德之維馨若此則君
爲道之本器乃道之形苟能據於道而依於德亦可以執無

名之璞而逍遙乎大庭

觀兵部馬射賦

以藝成而動舉
必有功爲韻

大司馬以馳射而選才衆君子皆注目而觀藝至張侯之所
乃執弓而誓誓曰今皇帝製羽舞以敷文德擇材官而奮武
衛兼以超乘者爲雄不惟中鵠者得祭用先才捷志亦和平
以多馬爲能故以馬爲試以得祿爲美故以鹿爲正豈獨武
人之利實唯君子之爭射者皆曰諾雖五善之末習庶一舉
而有成於是馬逸駉駉士勇伾伾蓄銳氣候歌詩初聽采蘋
之章共調白羽次逞穿楊之妙忽縱青絲旁瞻突過咸懼發
遲曾驥足之展矣翻猿臂而射之揮弓電掣激矢風追方當
耦象次裂麗龜君爾推班示偏工於小者安然飛鞚故無憂
於殆而信候蹄之不爽則舍拔之無遺故司射舉旌以効勝
曰爾能克備我爵可期賈餘勇者宜乘破竹之勢善量力者

當引負薪之辭由是靡不爭先莫肯爲後皆曰措枉於肘十
得其九忝明試者亦何嘗而不有破的之術萬不失一凡獻
藝者豈自疑於無必衝冠髮怒揚鞭氣逸引滿雷碎騰凌颯
疾皆窮百中之妙盡由一札而出乃知來者之藝蓋亦前人
之匹若此則蹲甲壯基場解觀孔信一場之獨擅終六轡之
未揔豈比乎浮雲迴度開月影而彎環驟雨橫飛挾星精而
搖動雖當至理不忘庸功天子垂衣儼鵷行於北闕夏官司
馬閱騎從於南宮貢士之程職司其舉會欵塞五方之俗觀
校埒百夫之禦得雋爲雄唯能是與星郎草奏上獻拱辰之
防天驕解顏喜見射鵰之侶客獨訂之而笑曰此蓋有司之
拔萃固非吾君之右汝我有筆陣與詞鋒可以偃干戈而息
戎旅司文者聞之而驚曰爾其自礪于爾躬吾將獻爾于王
所

郊天日五色祥雲賦

以題并賦
字爲韻


臣奉某日詔書曰惟元祀月正之三日將有事於南郊直端
門而未出天錫予以雲瑞是何祥而何吉臣拜稽首敢言其
實陛下乘五位而出震迎五帝以郊天五方騰其粹氣故雲
五色以相宣控壇乍直捧日初圓獸蹲而龍鱗熠熠鳥跂而
鳳翼翩翩羽蓋疑而軒皇暫駐風馬駕而王母欲前影帶旂
常疑錯繡之遙動昭章文物皆摘錦之相連觀之者無小無
大謂之曰若煙非煙昔者卿雲作歌於虞舜白雲著詞於漢
武皆跂望而爲言非仰觀而遂覩今陛下德至天地恩覃草
莽當翠輦黃屋之方行見金枝玉葉之可數陋泰山之觸石
方出鄙高唐之舉袂如舞昭布於公侯卿士莫不稱萬歲者
三並美於麟鳳龜龍可以與四靈而爲五於是載筆氏書百
辟之詞曰郁郁紛紛慶霄之雲古有堯舜幸得以爲君象胥

氏譯四夷之歌曰煒煒煌煌天子之祥唐有神聖莫敢不來
王帝用愀然曰予何力澤未周于四海雲胡爲而五色來爾
群后舉爾衆職因五行以修五事由五常以厚五德正五刑
以去五虐繁五稼而除五賊苟順夫人理之父子君臣安知
夫雲物之赤黃蒼黑進我輦路就我陶匏雖有光華之萬狀
不若豐穰於四郊凡百庶寮相趨而顧稍疑江上之綺果異
封中之素補天者雖欲抑之而不出吞筆者安可寢之而無
賦越明日臣稹詠霈澤於鷄竿之前埳斯雲散之爲五采之
湛露

元氏長慶集卷第二十七







元氏長慶集

三

LIBRARY
OF THE
UNIVERSITY OF ILLINOIS

895.108

Ss7s2

722

CHINA

| | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | | |
|---|---|---|---|---|---|---|---|---|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|-----|
| 1 | 2 | 3 | 4 | 5 | 6 | 7 | 8 | 9 | 10 | 11 | 12 | 13 | 14 | 15 | 16 | 17 | 18 | 19 | 20 | 21 | 22 | 23 | 24 | 25 | 26 | 27 | 28 | 29 | 30 | 31 | 32 | 33 | 34 | 35 | 36 | 37 | 38 | 39 | 40 | 41 | 42 | 43 | 44 | 45 | 46 | 47 | 48 | 49 | 50 | 51 | 52 | 53 | 54 | 55 | 56 | 57 | 58 | 59 | 60 | 61 | 62 | 63 | 64 | 65 | 66 | 67 | 68 | 69 | 70 | 71 | 72 | 73 | 74 | 75 | 76 | 77 | 78 | 79 | 80 | 81 | 82 | 83 | 84 | 85 | 86 | 87 | 88 | 89 | 90 | 91 | 92 | 93 | 94 | 95 | 96 | 97 | 98 | 99 | 100 |
|---|---|---|---|---|---|---|---|---|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|----|-----|

元氏長慶集卷第二十八

策

才識兼茂明於體用策一道

才識兼茂明於體用策一道

校書郎時應制考入
三次等充勅頭授左

遺拾

皇帝若曰朕觀古之王者授命君人兢兢業業承天順地靡
不思賢能以濟其理求讜直以聞其過故禹拜昌言而嘉猷
罔伏漢徵極諫而文學稍進匡時濟俗罔不率繇厥後杞循
有名無實而又設以科條增求茂異捨斥已之至諫進無用
之虛文指切著明罕稱於代茲朕所以歎息鬱悼思索其具
是用發懇惻之誠咨體用之要庶乎言之可行行之不倦上
獲其益下輸其情君臣之間驩然相與子大夫得不勉思朕
言而發明之我國家光宅四海年將二百十聖弘化萬邦懷

仁三王之禮靡不講六代之樂罔不舉浸澤于下升中于天
周漢已還莫斯爲盛自禍階漏壞兵宿中原生人困竭耗其
太半農戰非古衣食罕儲念茲疲氓遂垂富貴督耕植之業
而人無戀本之心峻權酷之科而下有重斂之困舉何方而
可以復其盛用何道而可以濟其艱旣徃之失何者宜懲將
來之虞何者當戒昔主父懲患於梟錯而用推恩夷吾致霸
於齊桓而行寓令精求古人之意啓迪來哲之懷眷茲合聞
固所詳究又執契之道垂衣不言委之於下則人用其私專
之於上則下無其効漢元憂游於儒學盛業竟衰光武責課
於公卿峻政非美二途取捨未獲所從予心浩然益所疑惑
予大夫熟究其旨屬之於篇興自朕躬無悼後害

對

臣方病近古之策不行而陛下幸及之是天下人人之福也

微臣其敢忍意而不言乎且臣聞之古者以言賦納豈虛美哉蓋用之也是以益贊禹而班師說復王而作命斯皆用言之大略也洎漢文帝羞不若堯舜始以策求士乃天下郡國有賢良之貢入焉塞詔者晁錯而已至武帝然後董仲舒出然而卒不能選用條對施之天下夫用其策不弃其人以其利於時也得其人而弃其策又何爲乎若此則徒設試言之科而不得用言之實矣降及魏晉朝成而暮敗之不暇又惡足言其策哉我唐列聖君臨策天下之士者多矣異時莫不光揚其名聲寵綏其爵祿然而曾不聞天下之人曰某日天子降某問得某士行某策濟其功抑不知直言之詔屢下而直言之士不出耶亦不知直言之士屢出而直言之策不用耶今陛下肇臨海內務切黎元求斥已之至言責著明之確論實命說代言之盛意也微臣何足以奉承之然臣所以上

愚對皆以指病陳術爲典要不以舉凡體論而飾詞事苟便人雖繁必獻言苟誼理雖鄙必書固不足以副陛下懇惻之誠庶可盡微臣體用之目伏願陛下以臣此策委之有司苟或可觀施之天下使天下之人曰惜哉漢文雖以策求士迨我明天子然後能以策濟人則臣始終之願畢矣如或言不適用策不便時則臣有瞽聖欺天之罪將宣於典刑陛下固不得而宥之矣亦臣之所甘心焉臣伏讀聖策乃見陛下念禮樂之寢微恤黎民之重困責復盛濟艱之術酌推恩寓令之宜斯皆當今之急病也微臣敢不別白而書之昔我高祖武皇帝撥去亂政我太宗文皇帝韃櫟干戈被之以仁風潤之以膏露戢天下之役而天下之人安省天下之刑而天下之人壽通天下之志而天下之氣和揔天下之賢而天下之衆理理故敬讓之節著和故懽愛之教行是以革三王之所

因兼六代之盡美稱至德者舉文皇以代堯舜豈異事哉有誠信以將之也明皇帝即位實號中興方其任姚宋而右賢能也雖禹湯文武之俗不能舉焉四十年間刑罰不試人用滋植四海大和於是奉升中告禪之儀則封泰山而秩嵩華念歲巡時邁之典則去咸鎬而朝洛陽禮既畢行物亦隨耗天寶之後徭戍作興氣盛而微理固然也曩時之乳哺而有之者一朝爲兵殲之兵興以來至今爲梗兵興則戶減戶減則地荒地荒則賦重賦重則人貧人貧則逋役逃征之罪多而權宜之法用矣今陛下躬親本務首問群儒念禮樂之不振歎昇平之未復斯誠天下之人將絕復完之日也微臣何幸而對揚之微臣以爲將欲興禮樂在先富黎人將欲富黎人在先息兵革息兵革之術臣請畧言之夫古所謂銷兵革者非謂幅裂其旗章銷鑠其鋒刃而已也蓋誠信著於上則

忠孝行於下敬讓立於內則夷狄和於外夷狄和則邊鄙之
兵息敬讓立則爭奪之患銷爭奪之患銷則和順之心作和
順之心作而禮樂之道興矣此先王修政輯兵興禮樂富黎
人之大畧也陛下必欲責臣以詳究之術臣又請指事以明
之夫食力之不克雖神農設教天下不能無餒殍之人矣是
以古之不農而食之者四而已矣吏有斷獄之明則食之軍
有臨敵之勇則食之工有便人之巧則食之商有通物之智
則食之是四者率皆明者巧者勇者智者之事也百天下之
人無一二焉苟不能於此者不農則不得食不織則不得衣
人之情衣食迫於中則作業興於外是以游食者恒寡而務
本者恒多豈強之哉彼易圖而此難及也今之事則不然吏
理無考課之明卒伍廢簡稽之實百貨極淫巧之工列肆盡
兼并之賈加以依浮圖者無去華絕俗之貞而有抗役逃刑

之寵戎服者無超乘挽彊之勇而有橫擊詬吏之驕是以十
天下之人九爲游食蠢朴愚謹不能自遷者而後依於農此
又非他彼逸而易安此勞而難處也以惰游之戶藏富而耕
桑之賦愈重曩時之十室共耕而猶不給者今且聚之於一
夫矣雖有慈惠之長仁隱之吏尚不能存若儻斷擊搏之則
將轉移於溝壑矣今之課吏者以賦斂無逋負爲上以臣觀
之足陛下之賦者誠所以害陛下之人耳若然則農桑之賦
旣如彼惰遊之衆又如此耕桑之賦重則戀本之心薄惰遊
之戶衆則富庶之道廢此必然之理也今陛下誠能明考課
之法減冗食之徒絕雕蟲不急之功罷商賈兼并之業潔浮
圖之行峻簡稽之書薄農桑之謠興耕戰之術則惰游之戶
盡歸而戀本之心固矣戀本之心固則富庶之教興矣而貞
觀開元之盛復矣若此則旣往之失由前將來之虞由後在

陛下悠悠懲之戒之慎之久之而已至於主父偃乘七國并吞之後將分裂而矯推恩管夷吾當諸侯爭奪之時先詐力而行寓令皆一時之權術也豈可謂明白四達與日月齊明於聖朝哉臣雖賤庸尚不敢陳王道於帝皇之日况權術乎此臣之所甚羞也故不及詳究言之臣伏讀聖策又見陛下以爲執契則群下用情躬親則庶官無黨以漢文尚學而衰盛業謂光武課吏職而昧通方以臣思之皆不然也夫委之於下而用其情蓋考績之科廢而清濁之流濫也尚儒術而衰盛業蓋章句之學興而經緯之文喪也課吏職而昧通方蓋苛察之法行而會計之期速也臣請條列而言之夫神農之斲耒耜教耕耨所以墾良田而殖嘉穀也然而不能遏糧莠之滋焉其所以待之者芟夷錢鏹之而已唐堯之闢朝廷宅百揆亦所以植禹舜而種臯陶也又不能遏共工驩兜之逆焉

其所以辨之者放弃殛誅之而已神農不以稂莠滋而廢耒耜之用故能存用器之方唐堯不以四罪進而奪舜禹之任故能終任賢之道若此則陛下之所顧如何耳豈可謂任之必不可哉至於考績之科廢章句之學興經緯之道衰會計之期速皆當今之極弊也幸陛下反漢元之事臣請據數以終之今國家之所謂興儒術者豈不以有通經文字之科乎其所謂通經者不過於覆射數字明義者纔至於辨析章條是以中第者歲盈百數而通經之士蔑然以是爲通經通經固若是乎哉至於工文自試者又不過於雕詞鏤句之才搜摘絕離之學苟或出於此者則公卿可坐至郎署可俯求崇樹風聲不由殿最連科者進速累捷者位高擯嘿因循者爲清流行法蒞官爲俗吏以是爲儒術儒術又若是乎哉其所謂課吏職者豈不以朝廷有遷次進拔之用乎臣切觀今之

備朝選而不由文字者百無一二焉夫施衆網以加一禽尚不能得況張一目以羅萬品而望其飛者走者大者小者盡出乎其間其可得乎哉以此察群吏群吏又可察乎哉苟或不可察又可任之而絕其私乎哉此所以陛下將執契而歎用情念垂衣而懼不理蓋臣所謂課察之道不明也陛下誠能使禮部以兩科求士凡自唐禮六典律令凡國之制度之書者用至於九經歷代史能專其一者悉得謂之學士以鐸貫大義與道合符者爲上第口習文理者次之其詩賦判斷以文自試者皆得謂之文士以經緯今古理中是非者爲上第藻績雅麗者次之凡自布衣達于末隸在朝者悉得以兩科求仕禮部第其高下歸之吏部而寵秩之若此則儒術之道興而經緯之文盛矣吏部罷書判身言之選設三式以任人一曰校能之式每歲以朝右崇重者一人與吏部郎校天

下群吏之理最在第一至第三者校定日據其功狀而登進之牧宰字人之官籍之爲理者則上賞行焉若此則遷次之道明而遲速之分定矣二日記功之式每歲群吏之理最在第四者籍而書之滿歲吏部會集而授署之若此者殿最之道存而清濁之流異矣三曰任賢之式每歲內自僕射至于群有司之正長外至於廉問節制者各舉備朝選者一人外自牧守內至于百執事之立於朝者各舉吏郡縣者一人因其所舉而授任之辨其考績而賞罰之不舉賢爲不精不精與不察之罪同若此則保任之法行而賢不肖之位殊矣四曰敘常之式其有業不通于學才不應於文政不登於最行不加於人則限以停年課資之格而役任之若此則敘用之式恒而尺寸之才無所弃矣兩科立則群才遂四式行則庶官當陛下又執左契以御之握樞以正之委庶官如心目之

元氏長慶集卷第二十八
運支體豈支體運而無効於心目乎察群才如明鏡之形美惡豈美惡形而逃隱於明鑑乎然後陛下闢四門使可言之路通明四目以天下之目視達四聰以天下之耳聽不私其心以百姓心爲心端拱巖廊高居深視以冕旒自蔽而秋毫必察以黠纘塞耳而芥動必聞則彼漢元章句之儒光武督責之術又惡足繁爲陛下言之哉且臣聞之聖人在上人不天札若臣者生未及壯戴陛下爲君仁壽歡康未始有極何忽自苦墮肝膽而言天下之事乎誠以國家兵興以來天下之人憊怛悲愁五十年矣自陛下陟位之後戴白之老莫不泣血而話開元之政臣恐此輩不及見陛下功成理定之化而先沒恨於窮泉此臣之所以汲汲於私心也陛下能不憐察其意乎謹對

元氏長慶集卷第二十九

書

論教本書

與史館韓侍郎書

論教本書

臣伏見陛下降明詔修廢學增胄子選司成大哉堯之爲君
伯夷典禮夔教胄子之深旨也然而事有萬萬急於此者敢
冒昧殊死而言之臣聞諸賈生曰三代之君仁且久者教之
然也誠哉是言且夫周成王人之中才也近管蔡則讒入有
周邵則義聞豈可謂天聰明哉然而克終於道者得不謂教
之然耶始其爲太子也未生胎教旣生保教太公爲之師周
公爲之傅邵公爲之保伯禽唐叔與之游禮樂詩書爲之習
目不得閱淫豔妖誘之色耳不得聞優笑凌亂之聲口不得
習操斷擊搏之書居不得近容順陰邪之黨游不得恣追禽

逐獸之樂玩不得有遐異僻絕之珍凡此數者非謂備之於前而不爲也亦將不得見而爲之矣及其長而爲君也血氣既定游習既成雖有放心快已之事日陳於前固不能奪已成之習已定之心矣則彼忠直道德之言固吾之所習聞也陳之者有以諭焉回佞庸違之說固吾之所積懼也諂之者有以辨焉人之情莫不欲耀其所能而黨其所近苟將得志則必快其所蘊矣物之性亦然是以魚得水而游馬逸駕而走鳥乘風而翔火得薪而熾此皆物之快其所蘊也今夫成王所蘊道德也所近聖賢也是以舉其近則周公左而邵公右伯禽魯而太公齊快其蘊則興禮樂而朝諸侯措刑罰而美教化教之至也可不謂信然哉及夫秦則不然滅先王之學曰將以愚天下黜師保之位曰將以明君臣胡亥之生也詩書不得聞聖賢不得近彼趙高者詐宦之戮人也而傳之

以殘忍戕賊之術且日恣睢盱天下以爲貴莫見其面以爲尊是以天下之人未盡愚而胡亥固已不能分獸畜矣趙高之威懾天下而胡亥已自幽於深宮矣李斯者秦之寵丞相也困讒冤死無以自明而況於踈遠之臣庶乎若此則秦之亡有以致之也漢高承之以兵革漢文守之以廉謹卒不能蘇復大訓是以景武昭宣天資甚美纔可以免禍亂哀平之間則不能虞篡弑矣然而惠帝廢易之際猶賴羽翼以勝其邪心是後有國之君議教化者莫不以興廉舉孝設學崇儒爲意曾不知教化之不行自貴者始略其貴者教其賤者無乃鄰於倒置乎洎我太宗文皇帝之在藩邸以至於爲太子也選知道德者十八人與之游習即位之後雖宴游飲食之間若十八人者實在其中上失無不言下情無不達不四三年而名高盛古豈一日二日而致是乎游習之漸也貞觀已

還師傅之官皆宰相兼領其餘官僚選亦甚重馬周以官高恨不得爲司議郎此其驗也文皇之後漸踈賤之至於武后臨朝剪弃王族當中睿二聖危難之際雖有骨鯁敢言之士旣不得在調護保安之職終不能措扶衛之一詞而令近胡安金藏剖腹以明之豈不大哀哉兵興以來茲弊尤甚師資保傅之官非疾廢眊聵不任事者爲之即休戎罷帥不知書者處之至於友諭贊議之徒踈冗散賤之甚者搢紳耻由之夫以匹夫之愛其子者猶求明哲慈惠之師以教之直諒多聞之友以成之豈天下之元子而可以疾廢眊聵不知書者爲之師踈冗散賤不適用者爲之友乎此何足反居上之甚也近制官僚之外往往以沉滯僻老之儒充侍書侍讀之選而又踈弃斥遠之越月踰時不得召見彼又安能傳成道德而保養其躬哉臣以爲積此弊者豈不以皇天眷祐祚我唐

德以舜繼舜以堯繼堯傳陛下十一聖矣莫不生而神明長而仁聖以是爲屑屑習儀者故不之省耳臣獨以爲於列聖之謀則可也計無窮傳後嗣則不可脫或萬代之後有若周成王中才者而又生於深宮優笑之間無周邵保助之教則將不能知喜怒哀樂之所自矣況稼穡之艱難乎今陛下以上聖之資肇臨海內是天下之人傾耳注目之日也特願陛下思成王訓導之功念文皇游習之漸選重師保慎簡宮寮皆用博厚弘深之儒而又練達機務者爲之更進迭見日就月將因令皇太子洎諸王定齒胄講業之儀行嚴師問道之禮至德要道以成之撤膳記過以警之血氣未定則輟禽色之娛以就學聖質旣備則資游習之善以弘德此所謂一有元良萬國以貞之化也豈直修廢學選司成而足倫匹其盛哉而又俾則百王莫不幼同師長同術識君道之素定知天

六集
三
倫之自然然後選用賢良樹爲藩屏出則有晉鄭魯衛之盛
入則有東牟朱虛之強蓋所謂宗子維城犬牙盤石之勢又
豈與夫魏晉以降囚賊其兄弟而自剪其本枝者同年而語
乎微臣竊不自揆思爲陛下建永永無窮之長筭輒敢冒昧
殊死而言之

與史館韓侍郎書

侍郎退之足下稔與前襄州文學掾甄逢遊善逢即故刑部
貲外郎濟之子濟天寶中隱於衛之青巖山採訪使苗公等
五人皆以狀薦凡十徵不起末以左拾遺就拜之適值祿山
朝奏京師懇於上前求爲賓介玄宗可其奏祿山還至衛縣
遣太守鄭遵意詣山致命輟行信宿以俟之甄生懼及其難
俛首從事至天寶十二載祿山反狀潛兆慮不得脫乃僞瘖
其口復隱青巖踰年而祿山叛即日遣僞節度使蔡希德緘

刃逼召且曰或不可強斬首來徇旣而甄生噤閉無言延頸承刃氣和色定若甘心然希德義而捨之祿山亦終不能致慶緒繼逆虜而囚之於東都安國觀代宗復洛甄生卧匡牀詣元帥府至則號標自治代宗爲之動色遂命傳置長安肅宗高其行因授館於三司治所令從賊官囚慙拜之受汚者莫不俯伏仰歎恨不即死於其地且夫辨所從於居易之時堅直操於利仁之世而猶徧淺選懦者之所不爲蓋拂人之心難而害已之避深也況乎天下亂矣王澤竭矣夫死忠者不必顯從亂者不必誅而眷眷本朝甘心白刃難矣哉是以理平則爲公爲卿爲鵷爲鷺世變爲虵爲豕爲鏡爲梟者十恒八九焉若甄生冕弁不加於其身祿食不進於其口於天寶蓋青巖之一男子耳及亂則延頸受刃分死不回不以不必顯而廢忠不以不必誅而從亂叅合古今之士蓋百一焉

稹常讀注記缺而未書謹備所聞蓋欲執事者編此義烈以
永永於來世耳子逢始生之歲顏太師崔太傅皆爲歌詩以
美賢者之有後且序甄生之本末云及逢旣長耕先人舊田
於襄之宜城讀書爲文不諳州里歲饑則力穡節用以給足
親族歲穰則施餘於其鄰里鄉黨之不能自持者前後斥家
財排患難於朋友者數四由是以義聞襄之守狀爲文學始
就羈於吏職稹聞風旣久因與之游逢每冤其父之名不在
於史將欲抱所冤諒京師告訴於司史氏蓋行有日矣以愚
料之甄子僕短馬瘦言簡行孤得不爲驕閹之所排訶則權
力者疑誕以臨之固無自而入矣因曉甄生以無自入之勢
且告以執事者辱與稹游願得所冤之狀告甄生厚相信待
由是輟行旣而自思津賤之中猶願貢所聞於執事得非愚
且僭耶然而誚笑之暇幸垂察焉

元氏長慶集卷第二十九

元氏長慶集卷第三十

書

敘詩寄樂天書

誨姪等書

敘詩寄樂天書

稹九歲學賦詩長者往往驚其可教年十五六粗識聲病時
貞元十年已後德宗皇帝春秋高理務因人最不欲文法吏
生天下罪過外間節將動十餘年不許朝覲死於其地不易
者十八九而又將豪卒懷之處因喪負衆橫相賊殺告變駱
驛使者迭窺旋以狀聞天子曰某色將某能遏亂亂衆寧附
願爲帥名爲衆情其實逼詐因而可之者又十八九前置介
倖因緣交授者亦十四五由是諸侯敢自爲旨意有羅列兒
孩以自固者有開導蠻夷以自重者省寺符篆固几閣甚者
礙詔盲視一境如一室刑殺其下不啻僕畜厚加剝奪名爲

進奉其實貢入之數百一焉京城之中亭第邸店以曲巷斷
侯甸之內水陸腴沃以鄉里計其餘奴婢資財生生之備稱
之朝廷大臣以謹慎不言爲朴雅以時進見者不過一二親
信直臣義士往往抑塞禁省之間時或繕完隕墜豪家大帥
乘聲相扇延及老佛土木妖熾習俗不惟上不欲令有司備
宮闈中小碎須求往往持幣帛以易餅餌吏緣其端剽奪百
貨勢不可禁僕時孩騷不慣聞見獨於書傳中初習理亂萌
漸心體悸震若不可活思欲發之久矣適有人以陳子昂感
遇詩相示吟翫激烈即日爲寄思玄子詩二十首故鄭京兆
於僕爲外諸翁深賜憐獎因以所賦呈獻京兆翁深相駭異
祕書少監王表在座顧謂表曰使此兒五十不死其志義何
如哉惜吾輩不見其成就因召諸子訓責泣下僕亦竊不自
得由是勇於爲文又久之得杜甫詩數百首愛其浩蕩津涯

處處臻到始病沈宋之不存寄興而訝子昂之未暇旁備矣
不數年與詩人楊巨源友善日課爲詩性復僻嬾人事常有
閒暇間則有作識足下時有詩數百篇矣習慣性靈遂成病
蔽每公私感憤道義激揚朋友切磨古今成敗日月遷逝光
景慘舒山川勝勢風雲景色當花對酒樂罷哀餘通滯屈伸
悲歡合散至於疾恙躬身悼懷惜逝凡所對遇異於常者則
欲賦詩又不幸年三十二時有罪譴弃今三十七矣五六年
之間是丈夫心力壯時常在閑處無所役用性不近道未能
淡然忘懷又復嬾於他欲全盛之氣注射語言雜糅精粗遂
成多大然亦未嘗繕寫適值河東李明府景儉在江陵時僻
好僕詩章謂爲能解欲得盡取觀覽僕因撰成卷軸其中有
旨意可觀而詞近古往者爲古諷意亦可觀而流在樂府者
爲樂諷詞雖近古而止於吟寫性情者爲古體詞實樂流而

止於模象物色者爲新題樂府聲勢必順屬對穩切者爲律詩仍以七言五言爲兩體其中有稍存寄興與諷爲流者爲律諷不幸少有伉儷之悲撫存感徃成數十詩取潘子悼亡爲題又有以干教化者近世婦人暈淡眉目綰約頭髮衣服脩廣之度及匹配色澤尤劇恠豔因爲豔詩百餘首詞有今古又兩體自十六時至是元和七年矣有詩八百餘首色類相從共成十體凡二十卷自笑冗亂亦不復置之於行李昨來京師偶在筐篋及通行盡置足下僅亦有說僕聞上士立德其次立事不遇立言凡人急位其次急利下急食僕天與不厚旣乏全然之德命與不遇未遭可爲之事性與不惠復無垂範之言兀兀狂癡行近四十微名取位不過於第八品而冒憲已六七年授通之初有習通之孰者曰通之地濕墊卑褊人士稀少近荒札死亡過半邑無吏市無貨百姓茹草

木刺史以下計粒而食大有虎貍虺之患小有蟆蚋浮塵
蜘蛛絡蜂之類皆能鑽齧肌膚使人瘡痂夏多陰露秋爲痢
瘡地無醫巫藥石萬里病者有百死一生之慮夫何以僕之
命不厚也如此智不足也又如此其所詣之憂險也又復如
此則安能保持萬全與足下必復京輦以須他日立言事之
驗耶但恐一旦與急食相扶而終使足下受天下友不如已
之誚是用悉所爲文留穢箱笥比夫格弈檮塞之戲猶曰愈
於飽食僕所爲不又愈於格弈檮塞之戲乎昨行巴南道中
又有詩五十一首文書中得七年已後所爲向二百篇繁亂
冗雜不復置之執事前所爲寄思玄子者小歲云爲文不能
自足其意貴其起予之始且志京兆翁見過之由今亦寫爲
古諷之一移諸左右僕少時授吹噓之術於鄭先生病嬾不
就今在閑處思欲怡神保和以求其病異日亦不復費詞於

無用之文矣省視之煩庶亦已於是乎

誨姪等書

告菴等吾謫竄方始見汝未期粗以所懷貽誨於汝汝等心志未立冠歲行登古人譏十九童心能不自懼吾不能遠諭他人汝獨不見吾兄之奉家法乎吾家世儉貧先人遺訓常恐置產怠子孫故家無樵蘇之地爾所詳也吾竊見吾兄自二十年來以下士之祿持窘絕之家其間半是乞丐羈游以相給足然而吾生三十二年矣知衣食之所自始東都爲御史時吾常自思尚不省受吾兄正色之訓而况於鞭笞詰責乎嗚呼吾所以幸而爲兄者則汝所以得而爲父矣有父如此尚不足爲汝師乎吾尚有血誠將告于汝吾幼乏岐嶷十歲知方嚴毅之訓不聞師友之資盡廢憶得初讀書時感慈育一言之歎遂志于學是時尚在鳳翔每借書於齊倉曹家

徒步執卷就陸姊夫師授栖栖勤勤其始也若此至年十五
得明經及第因捧先人舊書於西窓下鑽仰沉吟僅於不窺
園井矣如是者十年然後粗霑一命粗成一名及今思之上
不能及烏鳥之報復下未能減親戚之飢寒抱豐終身偷活
今日故李密云生願爲人兄得奉養之日長吾每念此言無
不雨涕汝等又見吾自爲御史來効職無避禍之心臨事有
致命之志尚知之乎吾此意雖吾弟兄未忍及此蓋以往歲
忝職諫官不忍小見妄干朝聽謫弃河南泣血西歸生死無
告不幸餘命不殞重戴冠纓常誓効死君前揚名後代歿有
以謝先人於地下耳嗚呼及其時而不思旣思之而不及尚
何言哉今汝等父母天地兄弟成行不於此時佩服詩書以
求榮達其爲人耶其曰人耶吾又以吾兄所職易涉悔尤汝
等出入游從亦宜切慎吾誠不宜言及於此吾生長京城朋

從不少然而未嘗識倡優之門不曾於喧譁縱觀汝信之乎
吾終鮮姊妹陸氏諸生念之倍汝小婢子等既抱吾殁身之
恨未有吾克已之誠日夜思之若忘生次汝因便錄吾此書
寄之庶其自發千萬努力無弃斯須稊付崙鄭等

元氏長慶集卷第三十

元氏長慶集卷第三十一

書

代諭淮西書

上門下裴相公書

代諭淮西書

某月日山南東道節度兼申光蔡等州招撫使檢校司空嚴
某致書前彰義軍兵馬使吳侍御及淮西將士官吏申光蔡
等州百姓等奉十月十九日詔書以某充申光蔡招撫使某
月日遣使齎勅送付界首布告訖某頃鎮太原與吳侍御伯
父相國公同受恩寄交問歲時歡好不絕僅十餘年可謂至
矣及吳侍御先尚書繼當寵命某又領鎮荆南前好復修款
密如舊弔喪問疾禮無不時亦可謂勤矣某於吳侍御伯父
先父既等夷於吳侍御實丈人行固已私矣况朝廷以吳侍

御因喪擾惑迷誤詔旨欲思致訓未忍加兵仍以某爲招撫之使是吳尚書之嗣旣絕而由某有復聯之望捧詔以來夙夜憂歎不任憐痛之懷某欲上徵古類恐引論不明切爲諸公以近事灼然在耳目者言之今吳侍御弃喪背禮捨父干君誘聚師徒希求爵位者豈不以貞元末年天下方鎮物故徃徃依憑衆請而得者十恒二三以此爲自偷之證耶甚不然也德宗皇帝御天下日久春秋高理務便安不欲生事或謀及卒伍而置師長蓋一時之權也今天子二十八即皇帝位控一海內臣妾夷狄赫然皇威熏灼白日初楊惠琳劉闢李錡猶守故態謂朝廷未即誅擒曾不知逾月之間皆頭懸藁街膏斬都市此諸公之所聞見也自是蠻夷懾竄戎臣震惕相與奔走朝闕之不暇今廟堂之上命將擇帥容易於卿長即吳侍御希求非望之志安得復行於今日哉此衆

可憑位不可取之明驗也今吳侍御蓄聚糗糧繕完城壘偷
侵縣邑不自危亡者豈不以貞元中吳相國爲讒邪所鬬錯
謾朝章韓太保率衆奉詞而吳相國終以宥免又以此爲自
偷之證耶又不然也日者謀議之臣筭畫不審韓太保行陣
之將耳總統非所長而又徵天下烏合之衆以授之是以遷
延進退不時成功然猶吳相國悔過乞降深自咎責朝廷多
之僅乃全活且吳相國躬服節儉衣食與士卒同蓄貨力耕
向三十載然後粗能支一戰耳今吳尚書馭衆日淺吳侍御
年位俱卑諸將之在下者皆怏怏苟容非有威懷信服之志
百姓日蹙賦歛月加天兵四臨耕織盡廢竊聞壯者劫而爲
兵老弱妻孥吞聲於道路而欲以吳相國三十年拊循積聚
之力爲自比甚相懸矣况國家命全軍之將用不竭之資烏
尚書董懷汝之師李尚書舉陳許之衆柳中丞以鄂之全軍

軍於安陸令狐中丞以淮南之銳旅屯於壽春某以襄陽之勁卒數萬集於唐而又益之以魏博之驍騎江陵之強弩以攻則彼有壓卵之危以守則我無出疆之費用三州之賦敵天下四海之饒以一旅之師抗天下無窮之衆雖妾婦駭孩猶知笑之而況於義夫壯士哉若聖天子推含垢之化圖不戰之功使環而守之塞其飛走則男不得耕女不得織鹽茗之路絕倉廩之積空不三數月求諸公於枯魚之肆矣儻或神筭風驅天威電激使齊攻四面各裂一隅彼若聚而待之則自窮分而應之則不足東抗則西入南備則北侵腹背受攻首尾皆畏赤族之刑旣迫輿觀之計方施則固難期於曩時之宥免矣此又力不可支勢不可久之明驗也今吳侍御厚利買交嚴刑劫質謂王師可敵謂已衆不離者豈不以大將李義等言甘約重許與死生之爲耶又不然也夫李錡據

吳楚之雄兼權管之利選才養士向十五年獨以張子良爲腹心不貳之將故授以銳健先鋒之兵又以裴行立爲骨肉不欺之親故授以敢死酬恩之卒然而一朝遷延王命稱疾不朝子良朝倒戈以攻於外而行立夕縱火以應於內錡則戮死而張裴甚榮此又諸公之所聞見也劉闢乘韋令饒衍之後廬藏穀帛以億萬計啖養士卒憑恃阻固以仇良輔有樸厚不搖之心是以成其要害而授之兵然而天兵一麾因壘來下席卷餘孽巴蜀大定闢則戮死而良輔甚榮此又諸公之所聞見也廬從史內蘊私邪外張威武惑天聽逗留王師以烏尚書有委用親信之恩故授之以爪牙衛已之衆然而虜略潛施元凶就執烏尚書清壘整旅以俟命從史放死而尚書甚榮此又諸公之所見聞也此數君子者豈受利不厚而誓約不明哉蓋逆順之理殊而子孫之禍大也且田

太保李安藉累伐繼襲之勢身沒之後胤子不肖將卒聚謀而請之天子天子嘉其忠而與之賚百萬之財以贍軍復三年之賦以勵俗輟郎署之英以榮其賓介而坐專席操郡國者又相繼彼魏博三軍之士豈獨不受恩於田氏父子耶蓋苦其束縛禁閉終日以城門爲戰場思復泰然游泳於王澤耳今國家用烏尚書爲重鎮所以警諸將囚縛受賞之功用仇大夫爲先驅所以警城堡降下寵榮之利使田大夫統魏博向義之旅所以勵三軍去邪附正之機柰何吳侍御碎六尺之軀爲李義輩求福之費絕公侯之嗣爲淮西軍受賞之資其爲人謀也則厚矣自謀何薄哉此又將不可恃而兵不可保之明驗也今天子垂惻隱之詔建招撫之名吳侍御若束身歸朝將吏等繼踵向闕縱不得與烏尚書張金吾分封並位受立功之賞獨不得與田懷諫命服趨朝奉先人之家

嗣耶且張伯靖五溪之蠻隸耳聚徒殺人爲惡甚大聖上怜其愚詔某招致之而猶據戎行之右職忝佐郡之清貲豈獨於吳侍御洎淮西之將吏而阻其自新之路哉諺曰天不可違又曰時不可失書至之日善自圖之如或違天失時寢而不報則王師進擊於外義士潛謀於中身首之戮指期肘腋之危坐見異日爲天下戮笑而李義等伐封侯之利豈不大哀哉戎事方殷未獲周盡感念平昔興然動懷

上門下裴相公書

昔者相公之掾洛也種獲陪侍道途不以妄庸語及章句則固竊聞閣下以文皇初起居郎書居安思危四字於笏上爲至戒矣今陛下當晉武平吳之後閣下即周公東征而還安孰甚焉思豈可廢况今四邸並開掃門之賓競至碣石餘疹束身之款未堅則閣下推食握髮之意可遽移之於高枕擊

鍾之逸乎且夫得人則理之談實老生之常語至於切近猶飢者欲食不可惡熟俗而不言也若稹之末學淺見又安敢引喻古昔於閣下獨憶得近日故裴兵部之爲人也堅辨清淨號爲名流及其爲相也構致群材使棟梁榱桷咸適其用人頗隘之至於激濁揚清亦無所愛吝是以秉政不累月閣下自外寮爲起居郎韋相自巴州知制誥張河南自邕幕爲御史李西川自饒州爲雜端密勿建梁之地半得其人如故韋簡州勲及稹等技於疑礙置之朝行者又十數然後排異已之巨敵引協心之至交當時一二年間幾至於姦無蹊隧而政有根本矣及山東沴作上以兵事咨之則對以禁暴息人之外不能有以佐震耀是以罇俎之謀不專於廊廟蓋兼善精微之士素熟於心胷而泛駕乘桴之才未嘗校量於左右也比於閣下今日之雄材大略爲短矣然而即世之後雖

無李嚴廖立之思而十年之內備將相號名卿者多其引拔
嗚呼方鮑叔之功斯不細矣昨者閣下方事淮蔡獨當鑪錘
內蘊深謀外排群議始以追韓信拔呂蒙爲急務固非叔孫
通薦儒之日也今殊勲旣建王化方行亦常念魏鄭公守成
之難而三復文皇帝思危之詔乎以愚思之欲人之不怨莫
若遷授之有常欲人之竭誠莫若援拯於焚溺何謂有常而
不怨以省言之由後行爲前行以臺言之自察院轉殿院苟
不如是則怨矣苟能如是何恩哉何謂援拯而竭誠某又不
敢移之於他人借如小生之庸且昧也固不及班行之中輩
又敢自讓於郎吏之末者乎向使元和之一年爲拾遺二年
爲補闕不三四年爲員外又三四年爲正郎則宰物者雖朝
許之以綸誥暮許之以專席厚則厚矣遽責其隳肝瀝膽同
廝養之用力亦難哉及夫爲計不良困於溝瀆者十年矣苟

有舒其胝攣置之趨走者又安敢愛氣力吝心髓於和扁耶
是猶龜鼃之有泉鳥鳥之有林何嘗媿於水木苟或縶而籠
之鎖而檻之其或放之投之者則必啁啾顧慕以報之報其
免於難也今天下病溝瀆困籠檻思閣下藥之養之投之放
之者豈特小生而已哉且曩時之窒閣下及小生者豈不以
閣下疏有居安思危之字爲抵忌對上以河南縣尉非貶官
爲說乎向非裴兵部一二明之則某終老於窮賤固其宜也
儻閣下復三二年遲迴於外任則少陽邀望之際固未得奉
煌煌之命以周知其巢穴矣當元濟討除之始又安能定已
成之策於上前排未亡之疑於衆口哉今天下能不有萬一
於閣下之才略而猶跼足帖脅私自憐愛其志力哉況當今
陛下在宥四海與人爲天特降舍垢弃瑕之書且授隨才任
能之柄於閣下閣下若能蕩滌痕累洞開嫌疑如振塵

愛士如救餒使恃才薄行者自贖於煩辱以能見忌者騁力於通衢上以副陛下咸與惟新之懷次有以廣閣下常善救人之道從使千百年外謂閣下與裴兵部爲交相短長亦足爲賢相矣未盡善也且夫當陛下肇臨宇宙之初與得天久照之後愈光明矣安有裴兵部拔群材於前則盡行閣下拔群材於後則盡廢以閣下沐浴恩波之始與徽猷克壯之秋愈汪洋矣又安有救裴案之罪換禹錫之官則盡易振天下之窮滯行渙汗之條目則盡難某雖至愚未敢然也某自十年遭罹多故每欲發書朋舊尚不敢陳盡其情豈不知干宰相有不測之罪耶孰自計之與其瘡死蠻夷自題不遇之勝比夫塵穢尊重伏危言之刑無異也聊因所善緘獻鄙誠翹企刑書不敢逃讓

元氏長慶集卷第三十一

元氏長慶集卷第三十一

六

元氏長慶集卷第三十二

表奏

敘奏

獻事表

敘奏

劉秩云奏不可削予以爲有可得而削之者有不可得而削之者貢謀猷持嗜慾君有之則譽歸於上臣專之則譽歸於下苟而存之其讓也非道也經制度明利害區邪正辨嫌惑存之則事分著去之則是非泯苟而削之其過也非道也元和初章武皇帝新即位臣下未有以言刮視聽者予始以對詔在拾遺中供奉由是獻教本書諫職論事等表十數通仍爲裴度李正辭韋纁訟所言當行而宰相曲道上語上頗悟召見問狀宰相大惡之不一月出爲河南尉後累歲補侍御

史使東川謹以元和赦書劾節度使嚴礪籍塗山甫等八十
八家過賦梓遂之民數百萬朝廷異之奪七刺史料悉以所
籍歸於人會潘孟陽代礪爲節度使貪墨過礪且有所承迎
雖不敢盡廢詔因命當得所籍者皆入資資過其稱權薪盜
賦無不爲仍爲礪密狀不當得醜謚予自東川而還朋礪者
潛切齒矣無何外莅東都臺天子久不在都都下多不法百
司皆牢獄有裁接吏械人逾歲而臺府不得而知之者予因
飛奏絕百司專禁錮河南尉判官予劾之忤宰相旨監徐帥
死於軍徐帥郵傳其柩柩至洛其下歐詬主郵吏予命吏徙
柩於外不得復乘傳浙西觀察使封杖決安吉令至死河南
尹誣奏書生尹太階請死之飛龍使誘趙寔家逃奴爲養子
田季安盜娶洛陽衣冠女汴州没入死商錢且千萬滑州賦
於民以千授於人以八百朝廷饋東師主計者誤命牛車四

千三十乘飛藟越太行類是數十事或移或奏皆止之貞元以來不慣用文法內外寵臣皆喑鳴會河南尹房式詐譖事發奏攝之前所喑鳴者皆叫噪宰相素以劾判官事相銜乘是黜予江陵掾後十年始爲膳部貞外郎穆宗初宰相更用事丞相段公一日獨得對因請亟用兵部郎中薛存慶考功貞外郎牛僧孺予亦在請中上然之不十數日次用爲給舍他相忿恨者日夜構飛語予懼罪比上書自明上憐之三召與語語及兵賦洎西北邊因命經紀之是後書奏及進見皆言天下事外間不知多臆度陛下益憐其不漏省中語召入禁司且欲亟任爲宰相是時裴太原亦有宰相望巧者謀欲俱廢之乃以予所無構於裴裴奏至驗之皆失實上以裴方擁兵不欲校曲直出予爲工部侍郎而相裴之期亦衰矣不累月上盡得所構者雖不能暴揚之遂果初意卒命予與裴

俱宰相復有購狂民告予借客刺裴者鞫之復無狀然而裴與予以故俱罷相始元和十五年八月得見上至是未二歲僭忝恩寵無是之速者遭罹謗咎亦無是之甚者是以心腹腎腸糜費於扶衛危亡之不暇又惡暇經紀陛下之所付哉然而造次顛沛之中前後列上兵賦邊防之狀可得而存者一百一十有五苟而削之是傷先帝之器使也至於陳情辨志之章去之則無以自明於朋友也其餘郡縣之請奏賀慶之常禮因亦附之於件目始教本書至爲人雜奏二十有七軸凡二百七十有七奏終歿吾世貽之子孫式所以明經制之難行而銷毀之易至也

獻事表

臣聞理亂之始各有萌象二者無門在君上啓之而已所謂萌象豈有他哉容直言廣視聽躬勤庶務委信大臣使左右

近習者不敢蔽踈遠之臣庶此理之象也此而不理萬無一焉大臣不親直言不進抵忌諱者殺犯左右者刑與一二近習者決事於深宮之中群臣莫得參籌畫此亂之萌也此而不亂亦萬無一焉是以古者人君即位之始萌象未見之時必有狂直敢言之士抵忌諱獻危言在上者苟或宥而容之激而進之則天下之君子望風而悅曰彼之狂而猶容於上上之人其欲來天下之士乎吾之道可以行矣其小人竦利而言曰彼之直可以得幸於上吾將直言以徼利可也由是天下之賢不肖各以所忠貢言於上上下下之志霑然而通得失之情幽遠必達合天下之智理萬物之心人人樂得其所戴其上如赤子之親慈母也雖欲誘之爲亂其可得乎臣故曰容直言廣視聽而不理者萬無一焉及夫進計者入而不出直言者戮而不容則天下之君子自謀於心曰與其言且

不用而身爲戮吾寧危行言遜以保其終乎其小人擇利而
言曰君之所惡者拂心逆耳之言也吾將苟順是非以事之
可也由是進見者革而不內言事者寢而不聞若此則十步
之事不得見也朝廷之情不得聞也而況於天下之大四方
之遠乎故曰聾瞽之君非無耳目也蓋左右前後者屏蔽之
不使視聽爾此而不亂其可得哉昔太宗文皇帝初即位時
天下之人莫有諫者唯孫伏伽嘗以小事持諫於上文皇帝
大悅厚賜田宅以勉之自是言事者惟懼乎言不直諫不極
不能激文皇之盛意曾不以觸龍鱗犯忌諱爲不可矣於是
房杜王魏之徒議可否於前天下四方之人言得失於外不
四三年而天下大理豈文皇獨運聰明於上哉蓋亦群下各
盡其言以宣揚發暢於天下也且夫樂全安而惡戮辱古今
之情一也豈獨貞觀之人輕犯忌諱而好戮辱哉蓋文皇激

而進之之功也喜順從而怒謫犯亦古今之情一也豈獨文
皇甘逆耳而怒從心哉蓋以順從之利輕而危亡之禍大無
窮之業重而奉已之事微思爲子孫垂不朽建永安之計也
爲後嗣者其可順一朝之意而輕用文皇之天下乎累聖傳
序於今垂二百年矣莫不率由斯道致俗和平況陛下以上
聖之資紹復前統即位之日天下惟新罪叔文之徒而凶邪
之黨散懸惠琳之首而悖亂之氣消發承光之詐而假威之
孽除反焦陂之田而蒸庶之情感其餘滌瑕緩死薄賦恤人
賜帛者年旌閭孝悌脩廢學建義倉莫不曲被殊私覃于有
截斯皆陛下上法堯舜近法太宗致理之萌形見者數十豈
臣庸劣一二能明然而下臣竊復孜孜咄咄有所未決者獨
以陛下即位已來旣周歲矣百辟卿士至于天下四方之人
曾未有獻一計進一言受陛下伏伽之賞者左右前後拾遺

補闕亦未有奏一封執一諫受陛下激而進之之勸者設諫鼓置匭函曾未聞雪一冤決一事明陛下無幽不察之意者若臣等備位諫列名爲供奉官曠日彌年不得召見每就列位屏氣鞠躬不敢仰視又安暇議得失獻可否哉供奉官尚爾又況於踈遠之臣庶雖有特達不群之智思欲自効其路何階遂使凡今之人以諫鼓匭函爲虛器謂拾遺補闕爲冗員臣竊思之以陛下之睿博弘深勵精求理豈或入而不出言而不用哉蓋群下因循不能有所發明之罪也且臣思之今之備召承顧問者獨一二執政而已每一對敷不及俄頃問議天下之事臣竊料之恭承聖問仰謝寵光之暇又安暇陳理亂議教化哉其餘瑣瑣有司或時一召見言簿書之出入計錢穀之登降不暇又安足置牙齒間臣竊惟陛下以景命惟新之初何如貞觀致理之後當貞觀致理之後以房杜

王魏匡輔之智而猶上封進計者荐至獻可替否者日聞今
陛下當致理之初在四方多虞之日然而言事進計者終歲
無一人豈非群下因循竊位之罪乎若臣稔者稟性驚鈍昧
然無識然以當陛下臨御之始首陛下策賢之科擢授諫司
恩萬常品若復默默與在位者處則臣莫大之罪亦萬於常
品矣輒敢冒昧殊死件奏十事於後一曰教太子以崇邦本
二曰任諸王以固磐石三曰出宮人以消水旱四曰嫁諸女
以遂人倫五曰無時召宰相以講庶政六曰序次對百辟以
廣聰明七曰復正衙奏事以示躬親八曰許方幅糾彈以懾
姦佞九曰禁非時貢獻以絕誅求十曰省出入畋遊以防銜
蹶凡此十者設使言之而是而見用非臣之福也天下之
福也苟或言之而非非而見罪乃臣之分也亦臣之願也

元氏長慶集卷第三十二

元氏長慶集卷第三十二

五

元氏長慶集卷第三十三

表

論追制表

論諫職表

論討賊表

論西戎表

同州刺史謝上表

賀汴州誅李昇表

論追制表

臣聞令之必行於下者信也。今苟不信，患莫大焉。今陛下初臨寓內，務切黎元，至於牧守字人之官，所宜詳擇。苟未得人，不當虛授。苟或任使不可，屢遷臣竊見近除寧州刺史，論係虔州刺史高弘本，通州刺史豆盧靖曾，不涉旬並已追制。又以杜兼爲蘇州刺史，行未半途，復改郎署。臣不知誰請於陛下而授之，誰請於陛下而追之。是則授之非授之，是則追之非以非爲是者，罰必加，然後人不敢輕其舉，以是爲非。

者罪必及然後下不敢用其私此先王所以不令而人從不言而人信豈異事哉率是道也今陛下如綸之令朝降反汗之詔夕施紛紛紜紜無所歸咎臣竊恐陛下之令未能取信於朝廷而況於取信天下乎臣伏願陛下徵舉者之詞察追者之請若舉者之詞直則請而追之者不得無過若追之者理勝則舉而授之者不得無辜賞罰是非所宜明當況陛下肇臨黎庶教化惟新誥令之間四方所仰小有得失天下必聞臣實庸愚謬居諫列職當言責不敢偷安苟有所裨萬死無恨無任愚迫懇款之至

論諫職表

臣聞先王之制祿也居其位而不行其職者誅是以上無虛授下不隱情臣竊觀今之備位素餐不行其職者莫過於臣輩臣聞太宗文皇帝時王珪魏徵爲諫官文皇雖宴游寢食

之間王魏實在其所用至於文皇發一言則王魏善之而後
出舉一事則王魏慮之而後行以文皇之明合王魏之智是
以舉無遺事言有典常文皇猶以爲視聽之未廣也因命三
品已上入議軍國大政必遣諫官一員隨入以參驗之當是
之時司股肱耳目之任者有君臣之義焉有父子之恩焉有
朋友之歡焉是以否無不替可無不行不四三年而天下大
理蠻夷君長帶刀入侍者不可勝計豈干戈征伐之所致乎
蓋擁蔽之患銷而幽遠之情達也若此然後可以稱天子之
諍臣矣近之司諫諍者則不然大不得備召見次不得參時
政排行就列疊疊而已且臣聞之諫官之職曰左右前後拾
遺補闕大則廷議小則上封近年已來正衙不奏事庶官罷
巡對若此則不見遺闕補拾何階不得敷陳廷議安設其所
謂舉諫職者唯獨誥令有不便除授有不當則奏一封執一

見而已以臣思之君臣之際論列是非諷諭於未形籌畫於至密尚不能回至尊之盛意備譏慝之巧言而況於既行之誥令已命之除授然後奏一對執一見思欲收絲綸之詔迴日月之光信無裨於萬一矣至使凡今之人以上封進計爲妄動拾遺補闕爲冗貲以此稱供奉官與王珪魏徵爲等列臣雖至愚能不自媿且陛下若以爲臣等無所裨補不足參侍從固不當假以名器立之於朝苟以爲務廣聰明稍關理道又不當屏弃疎賤之使至於此伏願陛下許臣於延英候對召臣一見賜以溫顏使臣得盡愚懇之誠備陳諫官之職苟或言有可採得裨陛下萬分之一是臣千載之一時也如或言不詣理塵黷聖聰則臣自寘刑書以謝謬官之罪亦臣之所以甘心也無任懇款發憤効職忘軀之至謹詣東上閤門奉表以聞

論討賊表

臣伏見賊闢有不庭之罪陛下尚覆露以待之此誠陛下罪已泣辜之仁也微臣何足以識之哉然臣聞之天之所以爲天者以其能化物也物之性不一故天之道有和煦震曜之異焉始其生也動之以幽伏被之以春陽扇之以仁風潤之以膏雨則百果草木之柔者順者油然而生矣及夫勾曲角觚堅本頑心凝者滯者幽者蟄者扇之以和煦而不出潤之以膏雨而不滋則必迅之以雷霆曜之以威赫然後頑滯之心改幽蟄之氣宣豈天之道仁於彼而厲於此乎化與不化之異也是以蚩尤之亂作黃帝鑄五兵以殺絕之共工之行惡虞舜揭五刑以放死之豈不欲慕華胥舞干羽而躋之於仁壽哉蓋不可化也及夫舞干而適至因壘而來歸此又物之可化者也豈黃帝虞舜文王之德有優劣哉蓋蚩尤共工

苗人崇人罪有深淺也今陛下法天之德與物爲春凡在生
成孰不柔茂而蕞爾微醜天將弃之寘蝨賊於其心假螻蟻
以爲聚忠臣孝子思得食其肉而快其心久矣陛下猶聳之
以名爵導之以訓誥崇之以寵章而不至假之以旄鉞而益
驕戕賊我忠貞損污我仁義人人不勝其憤有司不忍其威
是以違陛下匿瑕含垢之仁順皇天震曜殺戮之用此誠天
下人人快憤激忠之日也陛下猶思因墨以降之舞干以化
之善則善矣其如天下之憤何其如天下之憤何臣願陛下
可有司之奏法皇天之威與公卿大臣議斬叛弔人之師以
快天下人人之憤實天下幸甚微臣無任懇悃嫉惡之至

論西戎表

蒙恩顧問竊見陛下患戎之意深矣自貞元以來國家所以
甘億兆之費於塞下蓋以大戎有侵軼之患而邊人思守禦

之利也然而河湟之地日削田萊之業日空塞下之人日亡
戎狄之心日熾若此非他不得備之之術也且臣聞之君之
命帥帥之命將將之使卒猶心之使臂臂之使指然後敵可
擒而軍可制也今之屯戍者則不然衆其城堡異其師長獲
一馬則圖功虜一戎則告捷至於屠縣道掠萬人則曰力弱
不足以應敵援寡不足以摧凶苟謹閑繕完不失其守者則
朝廷議賞之不給又孰肯摧鋒刃冒殊死而出入於係虜哉
此又非他衆分力散而責師之刑無所加也而又加之以爲
農者不教戰屯聚者不兼農寇至則卒伍被甲而乘城野人
空拳以應敵此又耕戰之術不修而屯聚之方太逸也今夫
邠岐汧隴之地皆后稷公劉之所理也土宜植物人務稼穡
陛下誠能使本道節制廣於荒隙大建屯田塞下諸軍除使
令守防之外一切出之於野限人名田復其租入然後因其

八集三
阡陌制之閭井因其卒伍樹之師長固其塋塹以備不虞犬
戎適至則有連阡接畛之兵戎騎纔歸則復耰鋤獲耨之事
若此則曩時之聚食者盡歸之於服勤之農矣前此之係虜
者盡化爲守禦之兵矣三五年間塞下有相因之粟邊人無
侵軼之虞陛下又董之以良師威之以必刑則彼瑣瑣之戎
陛下將署其君長征其牛羊奴虜以擒之可也螻蟻以攘之
可也又何必詢王恢使蘇武用晁錯訪婁敬而後復河湟稱
即叙哉此備戎之大略也方今猶有急於此者臣敢冒昧殊
死而言之臣聞善奕碁者將劫其碁必固其贏是以敵可殺
而地不危今庸蜀有大吠之驚南蠻絕貢誠之路陛下又輟
邊將以統問罪之師脫或蜂蠆相完尚稽天討兵連不解綿
夏涉秋則大戎乘釁啓心之日也陛下其圖之臣無任懇款
憂邊之至

同州刺史謝上表

臣罪重責輕憂惶失據慮爲臺府迫逐不敢徘徊闕庭便自
朝堂匍匐進發謹以今月九日到州上訖臣某辜負聖朝辱
累恩獎便合自求死所豈宜尚忝官榮誠恐誠慙死罪死罪
臣八歲喪父家貧無業母兄乞丐以供資養衣不布體食不
充腸幼學之年不蒙師訓因感隣里兒稚有父兄爲開學校
涕咽發憤願知詩書慈母哀臣親爲教授年十有五得明經
出身自是苦心爲文夙夜強學年二十四登乙科授校書郎
年二十八蒙制舉首選授左拾遺始自爲學至於升朝無朋
友爲臣吹噓無親黨爲臣援庇莫非苦已實不因人獨立成
性遂無交結任拾遺日屢陳時政蒙先皇帝召問延英旋爲
宰相所憎貶臣河南縣尉及爲監察御史又不敢規避專心
糾繩復爲宰相怒臣不庇親黨因以他事貶臣江陵判司廢

奔十年分死溝瀆元和十四年憲宗皇帝開釋有罪始授臣膳部員外郎與臣同省署者多是臣初登朝時舉人任卿相者半是臣同諫院時遺闕愚臣既不能低心曲就輩流亦以望風怒臣不料陛下天聽過卑知臣薄藝朱書授臣制誥延英召臣賜緋宰相惡臣不出其門由是百計侵毀陛下察臣無罪寵獎逾深召臣面授舍人遣充承旨學士金章紫服光飾陋軀生人之榮臣亦至矣然臣益遭誹謗日夜憂危唯陛下聖鑒照臨彌加保任竟排群議擢備台司臣忝有肺肝豈並尋常宰相况當行營退散之後牛元翼未出之間每聞陛下軫念之言微臣恨不身先士卒所以問計策遣干友朋等救解深州蓋欲上副聖情豈是別懷他意不料姦人疑臣殺害裴度妄有告論塵黷聖聰愧羞天地臣本待辨明亦了便擬殺身謝責豈料聖慈尚在薄貶同州雖違咫尺之顏不遠

郊畿之境伏料必是宸衷獨斷乞臣此官若遣他人商量乍可與臣遠處藩鎮豈肯遣臣俯近闕庭臣所恨今月三日尚蒙召對延英此時不解泣血仰辭天顏便至今日竄逐臣自離京國目斷魂銷每至五更朝謁之時臣實制淚不得若餘生未死他時萬一歸還不敢更望得見天顏但得再聞京城鐘鼓之音臣雖黃土覆面無恨九原臣某無任自恨自慙攀戀聖慈之至然臣一日未死亦合有所陳論或聞党項小有動搖臣今謹具手疏陳奏伏望恕臣死罪特留聖覽臣此表并臣手疏並請留中不出辭願今在邊事卷謹遣某官某乙奉表謝罪以聞

賀汴州誅李汭表

臣某言伏見逆賊李汭已就誅夷韓充入汴州訖一方既定率土無虞凡在臣僚實增欣抃臣某中賀伏以汴州抱吳楚

元集三十三
之津梁據咽喉之要地將驕卒悍易動難安急攻則越逸是
憂緩取則遷延易變自非陛下盡排群議獨斷宸衷外委將
臣內敷睿筭風行號令天助機謀則何以斬此鯨鯢破茲梟
鏡臣摧凶志切投國恩深仰荷威靈倍萬常品限以符守不
敢稱慶闕庭無任踴躍屏營之至

元氏長慶集卷第三十三

元氏長慶集卷第三十四

表狀

賀聖體平復御紫宸殿受朝賀表

代李中丞謝官表

爲嚴司空謝招討使表

賀誅吳元濟表

爲蕭相讓官表

爲蕭相謝追贈祖父祖妣亡父表

遷廟議狀

錢貨議狀

兩省供奉官諫駕幸溫湯狀

賀聖體平復御紫宸殿受朝賀表

臣聞兩耀有晦明所以成其不已四瀆有盈縮所以成其不竭不有燎火無以辨玉質不有霜霰無以見松心是以軒轅神倦然後夢華胥之游秦穆疾寐然後享鈞天之樂竟以瘳瘠而爲聖禹以胼胝而稱功斯皆因疾成妍以勞逢福非臣

臆度敢進瞽言昨者聖體不安纔經累日穆卜罔害勿藥有瘳此所以表北極之長尊配南山而永固者也况日臨黃道萬物皆榮帝御紫宸千官畢賀臣以守符外郡不獲稱慶明庭空懷鼓舞之心有阻賡歌之末無任跳躍懽忻瞻望徘徊之至

代李中丞謝官表

臣某言伏奉今月二十九日制授臣御史中丞寵秩踰涯心魂戰越臣某中謝臣生值聖時蔭分天屬雖牽絲入仕或因瑣碎之文而執簡當朝實由睦族而致頃以材驚氣直屢弃遐荒陛下擢自遠藩任兼臺閣夙夜循省効報無階誰謂天眷曲臨過蒙獎拔坐令專席位忝中司固當陳乞於天安敢叨榮於已如或綸言既降丹慊莫從則當破柱求姦碎首請事死而後已義不苟然增日月之末光荅天地之殊造無任

爲嚴司空謝招討使表

臣某言中使某乙至伏奉今月十九日勅以臣兼充申光蔡等州招撫使并賜臣手詔兩道天光下濟聖澤逾深捧詔慙惶心魂戰越臣某中謝伏以陛下威加四海德被萬方下蜀無束馬之勞平吳但斬鯨而已百蠻迷職九有懷仁凡在生成孰不柔茂而蕞爾元濟天將勦除真蠱賊於其心假螻蟻以爲聚父死不葬王命未臨擅脅師徒偷侵縣道此誠仁人孝子決憤激忠之日也陛下尚先含垢未忍加誅曲示綏懷俾臣招撫臣誠雖懇倒性本孱愚任重憂深驚惶失據然以苗心可化舜舞方興仰荷威靈冀其柔服臣即日與鄰道計會奉宣詔旨誘諭頑凶威愛並施使之來格如或尚驅梟鏡不襲椒蘭臣則誓死剪除俾無遺孽其歸投百姓等臣並准詔別加優卹置在安全仰副聖情不令驚擾臣先奉恩詔令

臣發赴唐州不獲奔走伏謝闕庭無任恐懼之至

賀誅吳元濟表

臣聞拯遺耻於溝瀆非聖不能掃餘沴以雪霜非天不可日
者神奔申蔡蓄爲汙瀦五十年間三后貽顧眇爾元濟繼爲
凶妖謂君命可逃謂父死爲利陛下凝茲睿筭取彼凶殘不
越殷宗之期遂勦淮夷之命威動區宇道光祖宗凡在生成
孰不懽忭臣忝官藩翰率舞闕庭瞻望徘徊無任踴躍屏營
之至

爲蕭相讓官表

臣某言伏奉今日制授臣某官恩加望外寵過憂深魂魄驚
翔手足失墜臣某中謝臣猥以凡才謬居重任當陛下惟新
之始辱陛下爰立之恩有累樞衡無裨袞職外致匈奴之哂
內失蒼生之心推換炎涼因循聖澤妨塞賢路塵忝台階自

顧疲駭方求息駕豈謂陛下特迓宸鑒曲用朽才再提腹背之毛重委股肱之地大孤人望獨簡帝心雖君父恩深莫知其惡而驚駭力竭何以自安豈敢退而生全實願求其死所伏望再移天眷重選時英特回加膝之恩別受沃心之相全陛下始終之道成微臣生死之榮無任懇迫慙惶之至

爲蕭相謝追贈祖父祖妣亡父表

恩波下濟澤被窮泉天眷旁臨日聞幽窆臣某中謝臣祖臣父或勲或賢義著族姻名書國藉逮臣不肖有累前人妄繼玄成之官實媿仲弓之德自陛下遣臣待罪宰相不能有以匡逮聖明齷齪知慙屏營失據常恐孔傳銘鼎折足可期于啓閭門構堂無所豈謂偶逢昌運幸沐殊私赦臣致寇之辜念臣積善之本追崇祖祢錫命官封子道有光升卿之言果驗孫謀表慶令伯之報方申海嶽恩深洎埃効淺彷徨自顧

跼蹐何安無任感德忘軀之至

遷廟議狀

謹案禮官以順宗至德大聖大安孝皇帝神主升祔則中宗
太和大聖大昭孝皇帝神主爲代數當遷之廟議者云中宗
復辟中興當爲百代不遷之廟臺省官等又議云則天爲居
攝則中宗非中興不得爲不遷之廟以愚所裁皆非得禮之
中案禮官與臺省官等議但以爲中宗非中興故不得爲不
遷之宗曾不知雖實爲中興亦不得爲不遷之廟何則祖有
功而宗有德蓋謂始有功者爲祖始有德者爲宗非謂後代
有功有德者盡爲祖宗也禮緯云唐虞立二昭二穆與太祖
之廟爲五夏不立太祖之廟四廟而已至後代以禹爲宗亦
立五廟其餘仲康復厥位少康代寒浞豈非嗣夏中興哉並
無祖宗之號至殷以契爲始祖初立五廟後代以湯爲宗遂

立六廟太戊武丁之徒雖有中宗高宗之名蓋子孫加之懿號而已亦無不祧之說周人以后稷爲始祖後代又祖文王爲宗武王遂立七廟唐虞夏殷周雖立廟之數不同其實親之廟皆以四爲准禮記王制云天子七廟三昭三穆與太祖之廟七蓋后稷文武三廟爲不遷其餘成康已降盡爲祧廟故周禮守祧注云先公之祧祔于后稷之廟先王之祧祔於文武之廟若以爲後代有功有德者盡爲不遷之廟則成康刑措宣王中興平王東周之始王並無不祧之說豈非有功有德哉蓋以爲七廟之數既定若親盡之廟不毀則親親之昭穆無所設矣故不得不祧耳至漢承秦滅學之後諸儒不通大義匡衡貢禹之徒遂建議云高帝爲太祖孝文爲太宗孝武爲代宗孝宣爲中宗惠景已下爲遷廟適值漢祚不永昭成已降德不逮於四君向若漢有八百之祚繼德之君

有若孝文孝武者七人盡爲不遷之廟豈可後代遂不祀其祖禰哉不經之言孰甚於此又有以七廟之外別立祖宗之廟爲說者以理推之尤爲不可假如聖朝以景皇帝爲太祖神堯大聖大光孝皇帝爲高祖文武大聖大廣孝皇帝爲太宗別立昭穆之廟六合不遷之廟爲九蓋以爲積厚者流澤廣故以增親親之廟六矣夫傳無窮者爲萬代計國家以聖生聖以明繼明無非有德之宗盡爲有功之祖則百祖千宗盡居別廟於禮又可乎必若俟其褒貶然後定祧遷則是臣子有輕議之非萬代無可傳之法考殷周則無據言情禮則兩乖考古宜今孰云可者曷若削漢朝不經之說徵殷周可久之文從親盡則遷之常規爲萬代不朽之定制不易親親之祀終無惑惑之疑誠一王之盛典也謹議

奉進止當今百姓之困衆情所知減稅則國用不充欲依舊則人困轉甚皆由貨輕錢重徵稅暗加宜令百寮各陳意見以革其弊右閏正月十七日宰相奉宣進止如前者臣以爲當今百姓之困其弊數十不獨在於錢貨徵稅之謂也旣聖問言之又以爲黎庶之重困不在於賦稅之闇加患在於剝奪之不已錢貨之輕重不在於議論之不當患在於號令之不行今天下賦稅一法也厚薄一槩也然而廉能莅之則生息貪愚莅之則敗傷蓋得人則理之明驗也豈徵稅暗加之謂乎自嶺已南以金銀爲貨幣自巴已外以鹽帛爲交易黔巫溪峽大抵用水銀硃砂繒絲巾帽以相市然而前人以之理後人以之擾東郡以之耗西郡以之贏又得人則理之明驗也豈錢重貨輕之謂乎自國家置兩稅已來天下之財限爲三品一曰上供二曰留使三曰留州皆量出以爲入定額

以給資然而節將有進獻以市國恩者有賂遺以買私名者有藏鏹滯帛以貽子孫者有高樓廣榭以燬第宅者彼之俸入有常也公私有分也此何從而得之又國家置度支轉運已來一則管鹽以易貨一則受財以經費近制有年進月進之名有正至三節之獻彼之管鹽有常也受財有數也此又何從而得之且百姓國家之百姓也貨財國家之貨財也不足則取之有餘則捨之在我而已又何必授之重柄假之利權徇彼之微恩成我之怨府哉今陛下初臨億兆首問群寮誠能禁藩鎮大臣不時之獻罷度支轉運別進之名絕賂遺之私節侈靡之俗峻風憲之舉深贓罪之刑精覈考課之條慎選字人之長若此則不減稅而人安不改法而人理矣至於古今言錢幣之輕重者孰矣或更大錢或放私鑄或龜或貝或皮或刀或禁埋藏或禁銷毀或禁器用或禁滯積皆可

以救一時之弊也然而或損或益者蓋法有行不行之謂也
臣不敢遠徵古證竊見元和以來初有公私器用禁銅之令
次有交易錢帛兼行之法近有積錢不得過數之限每更守
尹則必有用錢不得加除之榜然而銅器備列於公私錢帛
不兼於賣鬻積錢不出於墻垣欺濫遍行於市井亦未聞鞭
一夫黜一吏賞一告訐壞一蓄藏豈法不便於時耶蓋行之
不至也陛下誠能採古今救弊之方施賞罰必行之令則聖
祖神宗之法制何限前賢後智之議論何窮豈待愚臣盜竊
古人之見自稱革弊之術哉謹錄奏聞伏聽勅旨

兩省供奉官諫駕幸溫湯狀

今月二十一日車駕欲幸溫湯右臣等伏以駕幸溫湯始自
玄宗皇帝乘開元致理之後當天寶盈羨之秋葺殿宇於驪
山置官曹於昭應警蹕於繚垣之內周行於馳道之中萬乘

齊驅有司盡去無妨朝會不廢戒嚴而猶物議喧囂財力耗
頓數年之外天下蕭然累聖已來深懲覆轍驪宮圯毀永絕
修營官曹盡復於田某殿宇半埋於巖谷深林有逸才之獸
環山無匡衛之廬陛下若騎從輕馳則道途無拱辰之備若
乘輿稍具則邑縣有駕肩之憂若悵殿宿張則原野非徼巡
之所若鑾車夕入則門禁失啓閉之時六軍守衛於空宮百
吏宴安於私室忝爲臣子誰不惕然況陛下新御寶圖將行
大典郊天之儀方設謁陵之禮未遑遽有溫泉之行恐失人
神之望臣等謬居榮近冒死上言伏乞特罷宸游曲面天眷
稍待昇平之後別卜游幸之期則云亭之禪可登崆峒之駕
非遠豈必驅馳一徃竦駭群情勝境未周聖躬徒倦臣等無
任懇迫忘軀之至謹詣東上閣門奏狀以聞伏候勅旨

年十二月二十日
兩省三十人同狀

元和
十五

元氏長慶集卷第三十四

正方是...

元氏長慶集卷第三十五

狀

辨日旁瑞氣狀

謝准朱書撰田弘正碑文狀

謝恩賜告身衣服并借馬狀

謝賜設狀

謝御札狀

進田弘正碑文狀

進詩狀

進西北邊圖經狀

進西北邊圖狀

進雙鷄等狀

辨日旁瑞氣狀

今月二日日旁瑞氣

右奉宣其日日上有橫赤氣五色鮮明黃潤日兩邊各有嘉氣內赤外青宰臣稱賀云是五色雲見不知是否者謹按乙

已占有赤氣橫在日上謂之戴其分當有益土進爵推戴人君之象又人君當立王侯封建親戚以爲福祐之徵竊見其日除王潛郭釗田布等官則陛下凡有舉措盡合天心微臣所引占書悉皆期驗伏請以戴氣宣付史官不可誤書五色雲見又云青赤短小在日旁謂之珥微曲向日謂之抱珥者纓珥之象天子有喜并有和親之事又當拜將抱者扶抱向就之象鄰國臣佐來降天子有喜賀之事子孫之慶臣下忠誠輔主國中歡喜和合今北狄和親西戎通好昨者承元請命其日三將同升萬姓歡呼四方來賀亦可謂陛下凡有舉措盡合天心微臣所引占書悉皆明驗伏請亦以抱珥宣付史官不可誤書五色雲見以前謹具圖籍所載如右伏以五色慶雲蓋是小瑞戴氣抱珥所謂殊祥宰臣忽遽之間未暇精究其事此皆陛下禮行郊廟誠達神祇展百拜而忘疲入

九室而流涕近臣興感上帝垂休克呈捧日之祥以表動天之德微臣同霑侍從別感恩慈方當鼓舞之時恨不叫呼而賀然臣以爲陛下特宜手勅宰臣云今月二日卿等所言日旁五色雲見參驗圖書蓋是戴珥之象此皆祖宗積慶特爾子孫之祥豈冲昧微誠能致昊穹之貺宜令有司擇日告廟上以奉高祖無窮之祐次以報憲宗有截之功誕告華夷並令知悉若此則陛下感通之德已見九霄推讓之風將光萬葉爛然宸翰手勅以示於宰臣煥乎天文撰詔自生於聖旨事超萬古道冠百王伏惟天恩密賜裁察

謝准朱書撰田弘正碑文狀

魏博節度使李愬請與田弘正立德政碑

右臣伏奉今月二十四日勅令臣撰前件碑文者伏以田弘正首變魏俗彰先帝之睿謀近入鎮州宣陛下之神武積成

忠懇大有勲勞人懷去思願刻金石陛下所宜外詔台席內
委翰林妙選雄文式揚丕績豈謂天光曲照御札特書猥付
微臣實非常例臣頃以特恩拔擢便欲効死仰酬遂竭愚誠
累蒙召對自去年九月已後橫遭謗毀無因再覩天顏分隨
枯朽而凋永絕恩波之望豈料聖慈長在記憶姓名無人奏
請撰碑便自宸衷宣付微臣忝非木石粗有肺肝空懷感涕
之心未獲殺身之所無任感恩思報鏤骨銘肌之至

謝恩賜告身衣服并借馬狀

忽降天書乍乘雲驥頒衣煥目賁帛盈庭皆非朽陋之才宜
受光揚之賜微臣無任抃躍慙惶之至況臣性本踈愚素無
朋黨去年陛下擢自郎吏命掌書詞非因宰相奏論特是聖
慈超授感恩深切頻獻封章遂遭分外侵誣不敢保全軀命
豈謂恩光轉至渥澤逾深出自宸衷選居近地便令入院當

日召見天顏口勅授官面賜章服按令承旨不顧班資近日寵榮無臣此例發言感泣指日誓心苟無死節之誠願受鬼誅之禍伏奉恩旨令臣明日本司赴上舊例更合中謝伏緣先有疏論邊事及幽州事宜兼李愿入朝並要面自論奏伏料二十日入假已後南衙機務稍閑特乞恩許臣中謝謹錄奏聞伏候勅旨

謝賜設狀

臣聞推食之賜用勸勲勞置醴之恩以待賢彥微臣猥承天眷擢自內庭雨露頻施涓埃莫効陛下載分美祿特降珍羞空懷滿腹之慙未有沃心之便既充膚革誓竭肺腑竊位素餐實非誠願微臣無任感激恩私之至

謝御札狀

御札二十三字

右泰倫重晏至賜臣前件御札其中聖旨云鎮州逆亂枉害忠良若與元翼鎮州節度使即是捨賊之門者伏以睿筭若神聖慈猶父視凶狡之構亂義在克清念台輔之銜寃期於必報此蓋仁深天地勇過雷霆臣實庸愚難議窺測況臣謀猷失次罪戾是憂宸翰忽臨天章煥發舞鳳回翔於懷袖飛龍顧盼於縑緇豈獨傳之子孫便可鏤於肌骨微臣無任踴躍光榮之至

進田弘正碑文狀

田弘正魏博德政碑文

右前件碑文伏蒙御筆朱書遣臣撰述恩生望外事出宸衷銘鏤骨肌難酬雨露然臣伏以陛下所以令臣與弘正立碑蓋欲遣魏博及鎮州將吏等並知弘正首懷忠義以致功勳臣若苟務文章廣徵經典非唯將吏不會亦恐弘正未詳雖

臨四達之衢難記萬人之口臣所以効馬遷史體敘事直書
約李斯碑文勒銘稱制使弘正見銘而戒逸將吏觀敘而愛
忠不隱實功不爲溢美文雖朴野事頗彰明伏乞天慈特留
宸鑒其碑文謹隨狀封進謹具奏聞伏候勅旨

進詩狀

臣某雜詩十卷

右臣面奉聖旨令臣寫錄雜詩進來者伏惟皇帝陛下學深
江海文動星辰乙夜觀書秋風詠賦微臣入院之始學士等
盛傳陛下親批賀雨一章體備鸞鳳思含珠玉臣雖不得目
覩宸翰臣實竊得心念聖言旣仰燭龍之光難逞聚螢之照
欲爲陳獻益自慙惶况臣九歲學詩少經貧賤十年謫宦備
極恓惶凡所爲文多因感激故自古風詩至古今樂府稍存
寄興頗近謳謠雖無作者之風粗中道人之採自律詩百韻

至於兩韻七言或因朋友戲投或以悲歡自遣既無六義皆
出一時詞旨繁蕪倍增慙恐今謹隨狀進呈無任戰汗屏營
之至

進西北邊圖經狀

京西京北圖經四卷

右臣今月二日進京西京北圖一面山川險易細大無遺猶
慮幅尺高低閱覽有煩於睿鑒屋壁施設俯仰頗勞於聖躬
尋於古今圖籍之中纂撰京西京北圖經共成四卷所與衽
席之上歆枕而郡邑可觀游幸之時倚馬而山川盡在又太
和公主下嫁伏恐聖慮念其道途臣今具錄天德城已北到
回鶻衙帳已來食宿井泉附於圖經之內并別寫一本與圖
經序謹同封進其圖四卷隨狀進呈

進西北邊圖狀

京西京北州鎮烽戍道路等圖一面

右臣先畫聖唐西極圖三面草本並畢伏候面自奏論方擬呈進前月十一日於思政殿面奉聖旨云諸家所進河隴圖勘驗皆有差異并檢尋近日烽鎮城堡不得令臣所畫稍須精詳伏緣臣先畫西極圖疆界闊遠郡國繁多若烽鎮館驛盡言即山川勝帖太密恐煩聖覽不甚分明愚臣數日之間別畫一京西京北州鎮烽戍道路等圖已畢纖毫必載尺寸無遺若邊上奏報煙塵陛下便可坐觀處所若欲驗臣此圖與諸家所進何如伏乞聖明於南衙及北軍中召取一久任邊將者或於中使內有經過邊上校熟者宣示其遣辨別精粗即知愚臣一一皆有依憑不敢妄加增減其聖唐西極圖三本伏緣經略意大事須面自陳伏恐次及降誕務繁未敢進狀候對其京西京北鎮烽戍道路等圖并序謹隨狀進呈

進雙鷄等狀

同州防禦使供進烏鵲并雙鷄共四聯

右臣當州元和十五年奉宣令採雙鷄五聯各重四斤頻年
採取一聯不獲自臣到州詢問採捕人等皆云二十年採得
一聯鷄爾後更不曾採得昨旬日之內併獲兩聯斤兩輕重
稍符詔旨況浚郊初啓既以大剪豺狼驚鳥自來可以助清
梟鏡臣所恨身無羽翼不獲陪奉屬車擒狐兔之根源破妖
狐之群黨臣某無任忘軀思奮覩物感恩之至謹遣某官某
乙隨狀奉進謹進

元氏長慶集卷第三十六

狀

進馬狀

爲蕭相謝告身狀

爲令狐相謝賜金石交紅雪狀

爲蕭相國謝太夫人國號告身狀

爲令狐相謝回一子官與弟狀

賀降誕日德音狀

中書省議賦稅及鑄錢等狀

中書省議舉縣令狀

進馬狀

同州防禦烏馬一疋八歲堪打毬及獵

右臣竊聞道路相傳車駕欲蹙游幸溫湯未知虛實者臣職
居守土侍從無因羨魏闕之埃塵猶隨日御恨新豐之鷄犬

亦聽車音目斷魂銷形留神往又得進奏官狀知河中華州
京兆府並於昭應排比進獻臣當州素乏所出無以粗展丹
誠臣既別受恩私又不合獨無壤莫伏以前件馬北方正色
東道竒蹤調習多時備諳林力解擊毬者每嘉其環迴斗轉
動必愜心善獵射者皆歎其度塹踰溝走不換足欲隨正至
獻賀竊慮群衆混同徘徊顧瞻蓄銳斯久今者宸游近甸帝
降靈泉施展是時戢藏何益伏望陛下揚鞭頓轡取驗馴良
結尾絡頭試觀神彩臣某深恩未報愚志空存自慙駑鈍之
姿莫展驅馳之効捫心戀主因馬諭身輕冒天威無任戰汗
其馬謹隨狀進謹進

爲蕭相謝告身狀

恩賜臣俛告身一通

右中使某乙至奉宣進止賜臣某官告身一通鳳銜真誥虬

捧天書錦帙金牋霞明日照臣聞高宗命說乃申納誨之詞
大舜相龍爰有聖讒之訓空聞簡策未煥縑緗如臣寵榮豈
足爲諭慙惶踴躍進退難安拜受恩光戰汗交集無任感戴
殊私之至

爲令狐相國謝賜金石凌紅雪狀

恩賜金石凌紅雪各一合

右中使某乙至奉宣進止以臣將赴山陵時屬炎暑賜前件
紅雪等并合臣職司復土戀切攀髯方當匍匐而前敢有赫
曦之懼豈謂天光下濟靈藥旁沾念臣有丹赤之愚故賜臣
以洗心之物察臣有木訥之性故賜臣以苦口之滋就日疑
不治之清冰在合若遇圓之絳雪恩加望外感極愚衷無任
跼蹐屏營之至

爲蕭相國謝太夫人國號誥身狀

元集三十一
恩賜臣母國號告身一通

右某月日某乙奉宣恩旨賜臣母前件告身恩光灼耀捧戴
兢惶對揚天休無任戰越臣家傳儒素母實劬勞每織屨以
資臣宦游嘗斷織以勉臣師學念臣庸昧本望非高所希捧
檄之榮敢思開國之慶陛下恩加望外簡自宸衷石窰封疆
已光於萬葉藻珠文字重降於九霄朝野謂之殊私宗族以
爲榮觀臣及臣母以朴以歡誓將齋戒洗心永奉真人之誥
緘膝在笥深藏太常之符寶過金籙瑞同鵲印蓼蕭知感雨
露難疇無任抃躍戴恩之至

爲令狐相國謝回一子官與弟狀

臣弟定蒙恩授京兆府藍田縣尉

右臣伏奉某月日勅以所賜臣一子官迴授臣弟定京兆府
藍田縣尉寵過憂來恩殊感極彷徨自顧悚惕難居臣本凡

才猷當重任雖星辰軌道幸屬聖時而歲月環周實妨賢路
未蒙罪退益自慙惶豈謂天慈仍加渥澤特降推恩之命曲
成友愛之私九族生光百年何報况藍田美邑黃綬清流旋
觀冉冉之趨倍慶怡怡之樂手足交抃形影相輝空鏤肝心
難醅雨露無任抃躍感恩之至

賀降誕日德音狀

降誕日德音

右臣等伏奉今日日勅書以降誕之辰奉迎皇太后宮中上
壽獲申歡慰宜集百寮及外命婦進名賀皇太后仍御光順
門內殿與百寮相見便爲常式者伏以誕聖嘉辰承天令節
新恩肇降品彙咸休皇太后念樞星之祥重游甲觀群執事
排閭闔而人盡唱賡歌同沾就日之榮實慶溥天之樂况百
寮承式萬歲傳聲永爲利見之規彌荷無窮之澤臣等謬參

樞務親奉德音慶抃之誠倍萬常品無任鼓舞歡呼之至

中書省議賦稅及鑄錢等狀

中書門下奏據楊於陵等議狀請天下兩稅權酒鹽利等悉以布帛絲綿等物充稅一切不徵見錢者

右據中書門下狀稱應徵兩稅起元和十六年已後並配端匹斤兩之物以爲稅額不用計錢令其折納仍約元和十五年徵納布帛等估回計者伏以兩稅不納見錢百姓誠爲穩便或慮土宜不等恐須更有商量請令天下州縣有山野溪洞無布帛絲綿之處得以九穀百貨一物已上但堪本處交易用度者並許折納便充留州留使錢數仍令依當處堪納兩稅匹段及雜貨估價計折輸納給用之時並不得令有加權臣等又見比來州縣緣不納見錢抑令小戶數人并合共成端匹期會來往費擾倍多令請天下州縣有貧下戶兩稅

數少情願輸納見錢者亦任穩便若此則上無抑配之名下有樂輸之利以茲折中實謂得宜又據中書門下狀稱鹽利酒利本以權率計錢有殊兩稅之名不可除去錢額但合納見錢者亦請令折納時估匹段者伏以糴鹽價錢自有本使收管不要州縣條流至於權酒利錢雖則名目不同其實出於百姓今天下十分州府九分是隨兩稅均配其中一分置店沽酒蓋是分外誅求一則厚取疲人二則嚴刑檢下上供既有定數餘利並入使司事實煩苛法非畫一今請天下州府權酒錢一切據貫配入兩稅仍取兩貫已上戶均配兩貫已下戶不在配限先有置店沽酒處並請勒停若此則賦歛無名額之煩貧富有等差之異人知定准吏絕因緣臣等商量以此爲便

右據中書門下狀欲令諸道公私銅器各納節度團練等使

令本處軍人鎔鑄其鑄本請以留州留使錢年支未用物充
待一年後鑄銅器盡勒停其州府有出銅鉛可以廣鑄處每
年與本充鑄者臣等約計天下百姓有銅器用度者分數無
多散納諸使斤兩蓋寡創置鑪冶器具頗繁一年勒停並是
廢物軍人既未素習鎔鑄亦恐甚難又每年留州留使錢額
本約一年用度支留若待鑄得新錢然遣當州給用必恐百
事久闕不應時須臣等商量請令諸使諸州一切在所許百
姓以銅器折納稅錢并度支給價收市每年每季隨便近有
監冶處據數送納所冀鑪冶無創置之勞工匠有素習之便
不煩鑄本自有利宜其州府出銅鉛可廣鑄處請委諸道有
銅鉛處長吏各言利害具狀申陳叅酌衆情然議可否以前
據中書門下奏請令中書門下兩省重議可否奏聞者臣等
謹議如前謹錄奏聞伏候勅旨

元和十五年八月日中書舍人臣武儒衡等奏駕部郎中知制誥臣李宗閔中書舍人臣王起庫部郎中知制誥臣牛僧孺祠部郎中知制誥臣元稹

中書省議舉縣令狀

吏部重奏舉薦縣令節文

右吏部以停年課資之格取宰邑字人之官公幹強白者拘以考淺疾廢毫贖者得在選中倒置是非無甚於此朝廷將欲漸去其弊所以特設舉薦之科明詔既行起請尋下有司再議釐革何以取信於人據吏部云增加新戶開墾荒田已是考課舊條獄絕繫囚寃人申雪亦是政途常事舉察吏不法恐生告訐之風有利益公家又未指陳其目選授者例無異績尚得四考守常舉薦者縱未殊尤豈可二年便罷今請但行連坐舉主之文不必更依吏部分外條件又云見任官

及處士散試官並請停集且起家散試固有才能見任他官何妨撫字若皆限其資歷即與常選何殊今請除見任縣令其餘並令赴集又云檢勘榜樣剥放程式及試書判並請准平選人例處分若此則案牘之吏得肆姦欺書判雖工何關政術有同減選赴集豈是特舉與官今請應舉薦人量納文狀便令注擬亦不在駁放及試書判之限又云並請注破碎之縣責其効實本舉良能冀蒙優獎皆居破碎之處恐同貶降之條以前數件並恐不可施行伏請但依起請節文處分仍請據今年縣令真闕先盡舉薦人數留闕有餘然後許注擬平選人等冀將允當同前五舍人同署

元氏長慶集卷第三十七

狀

彈奏劔南東川節度使狀

彈奏山南西道兩稅外草狀

彈奏劔南東川節度使狀

劔南東川詳覆使

故劔南東川節度觀察處置等使嚴礪在任日擅沒管
內將士官吏及百姓前資寄住等莊宅奴婢今於兩稅
外加配錢米及草等謹件如後

嚴礪擅籍沒管內將士官吏百姓及前資寄住塗山甫等八
十八戶莊宅共一百二十二所奴婢共二十七人並在諸州
項內分析

右臣伏准前後制勅令出使御史所在訪察不法具狀奏聞

臣昨奉三月一日敕令往劔南東川詳覆瀘川監官任敬仲
贓犯於彼訪聞嚴礪在任日擅沒前件莊宅奴婢等至今月
十七日詳覆事畢追得所沒莊宅奴婢文案及執行案典耿
琚馬元亮等檢勘得實據嚴礪元和二年正月十八日舉牒
稱管內諸州應經逆賊劉闢重圍內并賊軍到處所有應接
及投事西川軍將州縣官所由典正前資寄住等所犯雖經
需澤莊田須有所歸其有莊宅奴婢桑柘錢物斛斗邸店碾
磴等悉皆搜檢得塗山甫等八十八戶案內並不經驗問虛
實亦不具事職名便收家產沒官其時都不聞奏所收資財
奴婢悉皆貨賣破用及配充作坊驅使其莊宅桑田元和二
年三年租課嚴礪並已徵收支用訖臣伏准元和元年十月
五日制西川諸州諸鎮刺史大將及參佐官吏將健百姓等
應被脅從補署職掌一切不問又准元和二年正月三日敕

文自今日已前反逆緣坐並與洗滌况前件人等悉是東川將吏百姓及寄住衣冠與逆黨素無管屬賊軍奄至暫被脅從狂寇既平再蒙恩蕩嚴礪公違詔命苟利資財擅破八十餘家曾無一字聞奏豈惟剥下實謂欺天其莊宅等至今被使司收管臣訪聞本主並在側近控告無路漸至流亡伏乞聖慈勒本道長吏及諸州刺史招緝疲人一切却還產業庶使孤窮有托編戶再安其本判官及所管刺史仍乞重加貶責以絕姦欺

嚴礪又於管內諸州元和二年兩稅錢外加配百姓草共四十一萬四千八百六十七束每束重一十一斤

右臣伏准前後制敕及每歲百條兩稅留州留使錢外加率一錢一物州府長吏並同枉法計贓仍令出使御史訪察聞奏又准元和三年赦文大辟罪已下蒙恩滌蕩惟官典犯贓

不在此限臣訪聞嚴礪加配前件草准前日月追得文案及
執行案典姚孚檢勘得實據嚴礪元和二年七月二十一日
舉牒稱管內郵驛要草於諸州秋稅錢上每貫加配一束至
三年秋稅又准前加配計當上件草臣伏准每年旨條館驛
自有正料不合於兩稅錢外擅有加徵况嚴礪元和三年舉
牒已云准二年舊例徵收必恐自此相承永使疲人重困伏
乞勒本道長吏嚴加禁斷本判官及刺史等伏乞准前科責
以息誅求

嚴礪又於梓遂兩州元和二年兩稅外加徵錢共七千貫文
米共五千石

右臣准前月日追得文案及執行案典趙明之檢勘得實據
嚴礪元和二年六月舉牒稱綿劍兩州供元和元年北軍頓
遞費用倍多量於梓遂兩州秋稅外加配上件錢米添頓綿

劔兩州頓遞費用者臣又牒勘綿州得報稱元和二年軍資錢米悉准舊額徵收盡送使訖並不曾交領得梓遂等州錢米添填頓遞亦無尅折當州錢米處者臣又牒勘劔州得報稱元和元年所供頓遞侵用百姓腹內兩年夏稅錢四千二十三貫三文使司令於其年軍資錢內尅下訖其米即用元和元年米充並不侵用二年軍資米數使司亦不曾支梓遂州錢米充填者臣伏念綿劔兩州供頓自合准敕優矜梓遂百姓何辜擅令倍出租賦况所徵錢米數內惟尅下劔州軍資錢四千二十三貫三文其餘錢米並是嚴礪加徵別有支用其本判官及遂州刺史悉合科處以例將來擅收沒塗山甫等莊宅奴婢及於兩稅外加配錢米草等本判官及諸州刺史名銜并所收色目謹具如後

擅收沒奴婢莊宅等元舉牒判官度支副使檢校尚書

刑部員外郎兼侍御史賜緋魚袋崔廷

都計諸州擅沒莊共六十三所宅四十八所奴一十人婢一十七人

於管內諸州元和二年三年秋稅錢外隨貫加配草元舉牒判官觀察判官殿中侍御史內供奉盧訥

都計諸州共加配草四十一萬四千八百六十七束

加徵梓遂兩州元和二年秋稅外錢及米元舉牒判官攝節度判官監察御史裏行裴訢

計兩州加徵錢共七千貫文米共五千石

梓州刺史檢校尚書左僕射兼御史大夫嚴礪元和四年三月八日身亡

擅收塗山甫等莊二十九所宅四十一所奴九人婢一十七人加徵三千貫文米二千石草七萬五千九百五十三束

和元

二年三萬一千七百九十二束元
和三年四萬四千一百六十束

遂州刺史柳蒙

擅收沒李簡等莊八所宅四所奴一人加徵錢四千貫文米

三千石草四萬九千五百三十五束元和二年二萬四千五百

五千四百八十二束

綿州刺史陶鎰

擅收沒文懷進等莊二十所宅十三所加徵草八萬八千六

百八十八束

元和二年三萬八千九百九十三束
元和三年五萬五千九百九十五束

劍州刺史崔實成

元和二年十一月五
日改授印州刺史

擅收沒鄧琮等莊六所加徵草二萬一千八百七十七束和

二年九千三百九十九束
和三年一萬二千七百七十八束

普州刺史李恂

元和二年加徵錢草六千束三年加徵草九千四百五十束

合州刺史張平

元和二年加配草三千四百六十二束三年加徵草五千六百五束

榮州刺史陳當

元和二年加徵草九千四百三束三年加徵草五千四百二十七束

渝州刺史邵膺

元和二年加徵草二千六百一十四束三年加徵草三千七百二十七束

瀘州刺史兼御史劉文翼

元和二年加徵草三千八百五十三束三年加徵草三千八百五十一束

資州元和二年加徵草一萬五千七百九十八束三年一萬

六千二百二十五束

簡州元和二年加徵草二萬四千一百四束三年二萬三千一百一十八束

陵州元和二年加徵草二萬四千六百六束三年二萬三千八百六十一束

龍州元和二年加徵草八百九十一束三年八百一十一束
右已上本判官及刺史等名銜并所徵收色目謹具如前其
資州等四州刺史或緣割屬西川或緣停替遷授伏乞委本
道長吏各據徵收年月具勘名銜聞奏

以前件狀如前伏以聖慈軫念切在蒼生臨御五年三布赦
令殷勤曉諭優惠困窮似涉擾人頻加禁斷况嚴礪本是梓
州百姓素無才行可稱久在兵間過蒙獎拔陛下錄其微効
移鎮東川杖節還鄉寵光無比固合撫綏黎庶上副天心獨

元集三十七
減征徭內榮鄉里而乃橫徵暴賦不奉典常擅破人家自豐
私室訪聞管內產業阡陌相連童僕資財動以萬計雖即沒
身謝咎而猶遺患在人謂宜謚以醜名削其褒贈用懲不法
以警將來其本判官及諸州刺史等或苟務容軀競謀侵削
或分憂列郡莫顧詔條但受節將拍撫不懼朝廷典憲共爲
蒙蔽皆合痛繩臣職在觸邪不勝其憤謹錄奏聞伏候勅旨
中書門下牒御史臺

牒奉勅籍沒資財不明罪犯稅外科配豈顧章程致使銜冤
無由仰訴不有察視孰當舉明所沒莊宅奴婢一物已上並
委觀察使據元沒數一一分付本主縱有已貨賣破除者亦
收贖却還其加徵錢米草等亦委觀察使嚴加禁斷仍榜示
村鄉使百姓知委判官崔廷等名叨參佐非道容身刺史柳
蒙等任竊藩條無心守職成此弊政害及平人撫事論情豈

宜免戾但以罪非首坐法合會恩亦有恩後加徵又已去官
停職俾從寬宥重此典常其恩後加徵草及柳蒙陶鎰李愆
張平邵膺陳當劉文翼等宜各罰兩月俸料仍書下考餘並
釋放牒至准敕故牒

彈奏山南西道兩稅外草狀

山南西道管内州府每年兩稅外配率供驛禾草共四萬六
千四百七十七圍每圍重二十斤

興元府二萬圍內五千圍每年折徵價錢充使司雜用
每圍一百二十文據元和三年使牒減免不徵餘一萬
五圍見徵率

洋州一萬五千圍

利州一萬一千四百七十七圍

右訪聞前件州府每年兩稅外加配驛草遂於路次州縣檢

六十三
勘文案據諭後使牒並稱准舊例於兩稅外科配又牒山南
西道觀察處置等使裴玢勘得報稱自建中元年已後每年
隨稅據貫配率前件禾草將供驛用者伏准元和元年已後
三度赦文每年旨條兩稅留州留使錢外加率一錢一物州
府長吏並以枉法贓論又准今年二月三日制節文諸道兩
稅外推率比來制敕處分非不丁寧如聞或未遵行尚有欺
弊永言奉法事理當然申敕長吏明加禁斷如刺史承使牒
於界內推率明加懲責仍委御史臺及出使郎中官御史訪
察聞奏者伏以前件草並是兩稅外徵率准制台勅本道明
州府長吏仍令節級科處分勘責得實以前劔南
東川詳覆使監察御史元稹奏謹具如前

中書門下牒御史臺

牒奉勅積習多年成此乖越然在長吏合尋根由循失政之

規置無名之稅雖原情可恕而在法宜懲觀察使宜罰一月俸刺史各罰一季俸仍令自元和四年已後禁斷牒至准敕故牒

元氏長慶集卷第三十七

10

元氏長慶集卷第三十八

狀

論浙西觀察使封杖決殺縣令事

論轉牒事

爲河南百姓訴車

同州奏均田

當州兩稅地

論浙西觀察使封杖決殺縣令事

浙西觀察使潤州刺史韓臯去年七月封杖決湖州安吉縣令孫澥四日致死

右御史臺奏得東臺狀訪聞有前件事先牒湖州勘得報稱孫澥先準使牒差攝烏程縣今日判狀追村正沈肱不出正帖不用印奉觀察使七月十六日牒決孫澥斃杖十下仍差衙前虞候安士文監決第三等杖二十二日安士文到科決孫澥官忝字人一邑父母白狀追攝過犯絕輕科罰所施合

是本州刺史且觀察使職在六條訪察事有不法即合具狀
奏聞封杖決人不知何典數日致死又託以痢疾爲念冤魂
有傷和氣其湖州刺史受命專城過於畏懦受使司軍將科
決縣令致死寢而不言並請准科以明典憲其諸道觀察使
輒封杖決巡內官吏典法無文伏望嚴加禁斷庶使遐方士
子免有銜冤

敕封杖決人殊非文法因此致死有足矜嗟韓臯備歷中外
合遵典憲有此乖越良所憮然罰一月俸料據決孫澥月日
是舊刺史辛祕離任之後新刺史范傳正未到之時俱無愆
尤不可議罰餘依

論傳牒事

據武德軍節度使王紹六月二十七日違敕擅牒路次州縣
館驛供給當道故監軍孟昇進喪柩赴上都向當部送軍將

官健驢馬等轉牒白一道謹具如前又得東都都亭驛狀報前件喪柩人馬等準武寧軍節度轉牒祇供今月二十三日未時到驛宿者伏準前後制敕入驛須給正券並無轉牒供擬之例況喪柩私行不合擅入館驛停止及給遞乘人夫等當時追得都甸當押衙趙仵到責狀稱孟監軍去六月十四日身亡至七月五日蒙本使差押領神柩到上都領得轉牒累路州縣並是館驛供熟食草料人夫牛等又狀稱其監軍只是亡日聞奏更不別奏只是本使僕射發遣亦別無敕追者謹檢興元元年閏十月十四日敕應緣公事乘驛一切合給正券比來或聞諸州諸使妄出食牒煩擾館驛自今已後除門下省東都留守及諸州府給券外餘並不得輒入館驛宜委諸道觀察使及所在州縣切加促捕如違犯請資官所在勒留具名聞奏餘並量事科決仍具給牒所由牒中書門

下者又准元和二年四月十五日敕節文諸道差使赶上都
奏事及押領進奉官并部領諸軍防秋軍資錢物官及邊軍
合於度支請受軍資糧料等官並在給券餘並不得給如違
本道專知判官錄事叅軍並準興元元年十二月十七日敕
處分者謹詳前後敕文並不令喪柩入驛入轉牒州縣祇供
今月二十四日已牒河南府並不令供給人牛及熟食草料
等仍牒都亭驛畫時發遣出驛并追得本道牒到在臺收納
訖右件謹具如前伏以凶柩入驛穢觸典常轉牒祇供違越
制敕正僕射位崇端揆合守朝章徇苟且之請紊經制之法
給長行人畜甚衆勞傳遞牛夫頗多弊緣路之疲人奉一朝
之私惠恐須明罰以勵將來伏準前後敕文給券違越並合
申牒中書門下不敢別狀彈奏伏乞特有科繩其本判官等
準敕並合節級科附謹具事由如前伏聽處分具狀上中書

門下謹錄狀上

為河南府百姓訴車

河南府應供行營般糧草等車準敕糧料使牒共顧四千三十五乘每乘每里脚錢三十五文約計從東都至行營所八百餘里錢二千八文共給鹽利虛估匹段絹一匹約估四千已上時估七百文細一匹約估五千時估八百文約計二十八千得細絹共六匹折當實錢四千五百

五百乘準敕供懷州已來載草

右件草準元敕令於河次收貯待河開般運送至行營續準度支奏令差河南鄭滑河陽等道車共一千乘般載今據每車彊弱相兼用牛四頭每頭日食草各三束計一十二束從武德界至行營約六百里車行一十二日程往來二十四日并停住約三十餘日計每車須食草三百六十束料及人糧

在外若自齎持每車更須四乘車別載緣路糧草若於累路
旋買計一千車每頓須買草六千餘束州縣店肆必無祇供
得辦況今年河路元不甚凍及至裝車般載至發時已是來
年正月上旬已後即水路自然去得只校旬日之間實恐虛
成其敝

三千五百三十五乘准糧料使及東都河陰兩院牒般
載軍糧

右件軍糧伏據中書門下奏稱若併糴貯恐事平之後無支
用處且令收糴來年春季糧料今據邢洺魏博等州和糴已
合支得累月即前件糧亦合得春水路般載以前兩件車準
數並令和雇今據度支河陰匹段十乘估價召雇一乘不得
今府司還是據戶科配況河南府耕牛素少昨因軍過宰殺
及充遞車已無太半今若更發四千餘車約計用牛一萬二

千頭假令估價並得實錢百姓悉皆願去亦須草木盡化爲牛然可充給頭數今假令府司排戶差遣十分發得一二即來歲春農必當盡廢百姓見坐流亡河南府旣然即鄭滑河陽亦是小處假使凶豎即擒伏恐饑荒荐至萬一尚稽天討不知何以供求稊忝在官司備知利害伏以事非職任不敢上言仰荷陶甄冀裨萬一無任冒昧狂愚之至伏聽詳察處分謹錄狀上

同州奏均田

當州自於七縣田地數內均配兩稅元額頃畝便請分給諸色職田州使田官田與百姓其草粟腳錢等便請於萬戶上均率又均攤左神策郃陽鎮軍田粟及特放百姓稅麻及除去斛斗錢草零數等利宜分析如後

當州兩稅地

右件地並是貞元四年檢責至今已是三十六年其間人戶
逃移田地荒廢又近河諸縣每年河路吞侵沙苑側近日有
沙礫填掩百姓稅額已定皆是虛額徵率其間亦有豪富兼
并廣占阡陌十分田地纔稅二三致使窮獨逋亡賦稅不辦
州縣轉破實在於斯臣自到州便欲差官檢量又慮疲人煩
擾昨因農務稍暇臣遂設法各令百姓自通手實狀又令里
正書手等傍爲穩審並不遣官吏擅到村鄉百姓等皆知臣
欲一例均平所通田地略無欺隱臣便據所通悉與除去逃
戶荒地及河侵沙掩等地其餘見定頃畝然取兩稅元額地
數通計七縣沃瘠一例作分抽稅自此貧富彊弱一切均平
徵歛賦租庶無逋欠三二年外此州實冀稍校完全

當州京官及州縣官職田公廨田并州使官田驛田等
右臣當州百姓田地每畝只稅粟九升五合草四分地頭攤

酒錢共出二十一文已下其諸色職田每畝約稅粟三斗草
三束脚錢一百二十文若是京官上司職田又須百姓變米
雇車般送比量正稅近於四倍加徵既緣差稅至重州縣遂
逐年抑配百姓租佃或有隔越鄉村被配一畝二畝之者或
有身居市井亦令虛額出稅之者其公廨田官田驛田等所
稅輕重約與職田相似亦是抑配百姓租佃疲人患苦無過
於斯伏準長慶元年七月赦文京兆府職田令於萬戶上均
配與臣當州事宜相類臣今因重配元額稅地便請盡將此
色田地一切給與百姓任爲永業一依正稅粟草及地頭推
酒錢數納稅其餘所欠職田斛斗錢草等只於夏稅地上每
畝加一合秋稅地上每畝各加六合草一分其餘脚錢只收
地頭權酒錢上分釐充數便足百姓元不加配其上司職田
合變米送城者比緣百姓自出車牛及零碎春碾動逾春夏

送納不得到城臣今便於當州近城縣納粟官爲變碾取本色脚錢州司和雇情願車牛般載差綱送納計萬戶所加至少使四倍之稅永除上司職祿及時公私俱受其利

當州供左神策邨陽鎮軍田粟二千石

右自置軍鎮日伏準敕令取百姓蒿荒田地一百頃給充軍田並緣田地零碎軍司佃用不得遂令縣司每畝出粟二斗其粟並是一縣百姓稅上加配偏當重斂事實不均臣今已於七縣應稅地上量事配率自此亦冀均平

元氏長慶集卷第三十八

元氏長慶集卷第三十九

狀

論當州朝邑等三縣代納夏陽韓城兩縣率錢狀

浙東論罷進海味狀

論當州朝邑等三縣代納夏陽韓城兩縣率錢狀
右准元和十三年敕緣夏陽韓城兩縣殘破量減逃戶率稅
每年攤配朝邑澄城郃陽三縣代納錢六百七十九貫九百
二十一文斛斗三千一百五十二碩一斗三升三合草九千
九束零並不計臣今因令百姓自通田地落下兩縣蒿荒之
外並據見定頃畝一例徵率自然兩縣已減元額稅地請更
不令三縣代納差科

當州稅麻

右當州從前稅麻地七十五頃六十七畝四壟每年計麻一

萬一千八百七十四兩充州司諸色公用臣昨因均配地稅
尋檢三數十年兩稅文案只見逐年配率麻地並不言兩稅
數內爲復數外既無條敕可憑臣今一切放免不稅

當州所徵斛斗草及地頭等錢畸零分數

右從前所徵斛斗升合之外又有抄勺圭撮錢草即有分釐
毫銖案牘交加不可勘算人戶輸納元無畸零感數所成盡
是姦吏欺沒臣今所徵斛斗並請成合草並請成分錢並請
成文在百姓納數元無所加於官司簿書永絕姦詐其感數
粟麥草等便充填所欠職田等數其錢當州每畝元稅二十
文三分六釐人戶元納二十一文整數臣今只收納二十一
文內分釐零數將充職田脚錢二千六百餘貫便足更不分
外攤徵回姦吏隱欺之賦除百姓重歛之困如此處置庶有
利宜以前件謹具利宜如前逐縣兩稅元額頃畝并攤配職

田分數及感成文分合等錢草斛斗數謹具分析在前件狀如前伏以當州田地鹹鹵瘠薄兼帶山原通計十畝不敵京畿一二加以檢責年深貧富偏併稅額已定徵率轉難臣昨所奏累年逋懸其敝實由於此臣今並已均融抽稅又免配佃職田間里之間稍合蘇息伏緣請配職田地充百姓永業事須奉敕處分然冀永有遵憑伏望聖慈允臣所奏謹錄奏聞伏聽敕旨

浙東論罷進海味狀

浙江東道都團練觀察處置等使當管明州每年進淡菜一

石五斗海蚶一石五斗

每十里置遞夫二十四人

右件海味等起自元和四年每年每色令進五斗至元和九年因一縣令獻表上論準詔停進仍令所在勒回人夫當處放散至元和十五年伏奉聖旨却令供進至今每年每色各

進一石五斗臣昨之任行至泗州已見排比遞夫及到鎮詢問至十一月二十日方合起進每十里置遞夫二十四人明州去京四千餘里約計排夫九千六百餘人假如州縣只先期十日追集猶計用夫九萬六千餘功方得前件海味到京臣伏見元和十四年先皇帝特詔荆南令貢荔枝陛下即位後以其遠物勞人只令一度進送充獻景靈自此停進當時書之史策以爲美談去年江淮旱儉陛下又降德音令有司於旨條之內減省常貢斯皆陛下遠法堯舜近法太宗減膳卹災愛人惜費之大德也况淡菜等味不登於俎豆名不載於方書海物鹹腥增痰損肺俗稱補益蓋是方言每年常役九萬餘人竊恐有乖陛下罷荔枝減常貢之盛意蓋守土之臣不敢備論之過也臣別受恩私合盡愚懇此事又是臣當道所進不敢不言如蒙聖慈特賜允許伏乞賜臣等手詔勒

停仍乞準元和九年敕旨宣下度支鹽鐵所在勒回實冀海隅蒼生同霑聖澤謹錄奏聞伏候敕旨

中書門下牒 牒浙東觀察使

當道每年供進淡菜一石五斗

海蚶一石五斗

牒奉敕如聞浙東所進淡菜海蚶等道途稍遠勞役至多起今已後並宜停進其今年合進者如已發在路亦宜所在勒回牒至准敕故牒

元氏長慶集卷第三十九

天

...

1. The first step in the process of identifying a problem is to recognize that a problem exists. This involves gathering information about the situation and identifying the specific issue that needs to be addressed.

1. The first part of the paper is devoted to the study of the properties of the function $f(x)$ defined by the equation

李在皇朝已錄其書宜以在錄

此等書目係由各省督撫彙編，其書目之繁簡，視各省之文獻之豐缺而定。如浙江、廣東、福建、四川等省，其書目之繁，較之他省為多。而如雲南、貴州、廣西等省，其書目之簡，較之他省為少。此等書目之彙編，實為各省文獻之總彙，亦為研究各省文獻之重要參考。

...

上海南京路四四四號

1

2

三、四、五、六、七、八、九、十、十一、十二、十三、十四、十五、十六、十七、十八、十九、二十、二十一、二十二、二十三、二十四、二十五、二十六、二十七、二十八、二十九、三十、三十一、三十二、三十三、三十四、三十五、三十六、三十七、三十八、三十九、四十、四十一、四十二、四十三、四十四、四十五、四十六、四十七、四十八、四十九、五十、五十一、五十二、五十三、五十四、五十五、五十六、五十七、五十八、五十九、六十、六十一、六十二、六十三、六十四、六十五、六十六、六十七、六十八、六十九、七十、七十一、七十二、七十三、七十四、七十五、七十六、七十七、七十八、七十九、八十、八十一、八十二、八十三、八十四、八十五、八十六、八十七、八十八、八十九、九十、九十一、九十二、九十三、九十四、九十五、九十六、九十七、九十八、九十九、一百。

卷之六

元氏長慶集卷第四十

制誥

冊文武孝德皇帝敕文

處分幽州德音

戒勵風俗德音

制誥序

制誥本於書書之誥命訓誓皆一時之約束也自非訓導職業則必指言美惡以明誅賞之意焉是以讀說命則知輔相之不易讀胤征則知廢怠之可誅秦漢已來未之或改近世以科試取士文章司言者苟務利飾不根事實升之者美溢於詞而不知所以美之之謂黜之者罪溢於紙而不知所以罪之之來而又拘以屬對跼以圓方類之於賦判者流先王之約束蓋掃地矣元和十五年余始以祠部郎中知制誥初約束不暇及後累月輒以古道干丞相丞相信然之又明年

召入禁林專掌內命上好文一日從容議及此上曰通事舍人不知書便其宜宣贊之外無不可自是司言之臣皆得追用古道不從中覆然而余所宣行者文不能自足其意率皆淺近無以變例追而序之蓋所以表明天子之復古而張後來者之趣尚耳

冊文武孝德皇帝赦文

門下昔我高祖太宗化隋爲唐奄宅區夏包舉四海全付子孫其事何哉彼昏盈而我勞勩也明皇承之能大其業六戎八蠻罔不貢奉由是庶尹施政庶吏施刑視人不勤視盜不謹燕冠勃起洞無藩籬六十有七年兵革大試其事何哉據逸安而易萌漸也逮我聖父勤身披攘斬斷誅除天下略定曾是幽冀賜予懷來荷賴景靈丕訓不墜環歲之內二方平寧粵余何功時帝之力而卿大夫猥以大號加予眇身讓于

四三益甚其請皇太后始聞其事歡然慰心慈旨下臨臣誠
上追祗受典禮懷乎予懷尚念昔者七十二君莫不升中慶
成自以爲堯舜莫已若也然而不爲堯舜之行者來代無傳
焉朕嘗推是爲心不欲名浮於實今卿大夫謂我爲文武孝
德矣其將何道以匡予予其業兢兢日慎一日慕陶堯虞
舜之行以自勉思文祖憲考之道以自勗予苟不思無忘納
誨於戲溢美之名旣不克讓及物之澤又何愛焉可大赦天
下

處分幽州德音

勅昔我玄宗明皇帝得姚元崇宋璟使之鋪陳大法以和人
神而又益之以張說蘇頌嘉貞九齡之徒皆能始終彌縫不
失紀律四十年間海內滋殖風俗謹朴君臣平寧人無爭端
而卿大夫羞以賊罪鞠人於聖代矣况伺察平由是網漏吞

舟視盜不謹冠羯乘釁勃爲妖氛天下持兵垂七十載朕因
眊末獲承祖宗分不得見四方無姑息之臣而九有復升平
之境矣上帝念我賚予忠賢盡獻提封恢績舊服使遼陽八
州之衆重覩開元之儀者則予侍中總之力也名藩厚位予
何愛焉劉總已極上台仍移重鎮兄弟子姪各授官榮大將
賓寮亦皆超擢管內州縣官吏肅存古等二百餘人悉是劉
總選任材能久令假攝並與正授用獎勤勞尚念幽州將士
夙著勲庸易帥之初諒宜優錫共賜錢一百萬貫以內庫及
戶部見在匹段支送充賞給幽州盧龍并瀛莫等州將士又
念八州之內九賦用殷慶澤旁流所宜霑貸其管內八州百
姓並宜給復一年仍令給事中薛存慶徃彼宣慰親諭朕懷
州縣之中或有殘破偏甚者委弘靖量事便宜優卹務令存
立劉總素以清靜理人固當開釋尚恐自罹禁網亦念哀矜

管內見禁囚徒罪無輕重並宜赦免大將及判官等雖已頒
官爵而或慮闕遺宜委弘靖具名銜聞奏如有父母在者別
具上聞當加優卹朕以劉總父子頻立戰功永言將吏之中
慮有沒於王事當道從前已來官吏將士等或忠義可嘉身
已淪沒者委弘靖條錄聞奏當加追贈平時舊老始見胡塵
復覩朝儀得無悽怛遐想撫其兒稚自此免於兵鋒言念及
茲用加優給管內有高年憊獨或疾瘵不能自存者委弘靖
差官就問量給粟帛管內州縣官吏有奉職清強惠及百姓
者委弘靖具事跡奏聞當與量加進改燕趙之間古多奇士
隗臺如在代豈乏賢如有隱於山谷退在丘園行義素高名
節可尚或才兼文武卓然可獎者亦委弘靖具名薦聞於戲
古人云安不忘危魏徵對太宗以守成之不易茲朕小子抑
又何知而鎮異克和幽燕復古慄慄夙夜不遑安寧實惟祖

宗之休尚賴股肱之力咨爾輔弼至于方嶽爾當勉於姚宋之功予亦無忘於天寶之戒宣示中外宜體朕懷

戒勵風俗德音

勅朕聞昔者卿大夫相與讓於朝士庶人相與讓於列周成王措刑不用漢文帝耻言人過真理古也朕甚慕焉中代以還爭端斯起掩抑其言則專蔽誘掖其說則侵誣自非責實循名不能彰善癉惡故孝宣必有敢告乃下光武不能單辭遽行語稱訕上之非律有隱名之禁皆所以防三至之毀重兩造之明是以爵人於朝則皆勸刑人於市則皆懼罪有歸而賞有事也末俗偷巧內荏外剛卿大夫無進思盡忠之誠多退有後言之謗士庶人無切磋琢磨之益多銷鑠浸潤之讒進則諛言諂笑以相求退則群居雜處以相議留中不出之請蓋發其陰私公論不容之詞實生於朋黨擢一官則曰

恩皆自我黜一職則曰事出他門比周之跡已彰尚矜介特由徑之蹤盡露自謂貞方居省寺者不能以勤恪莅官而曰務從簡易提紀綱者不能以準繩檢下而曰密奏風聞獻章疏者更相是非備顧問者互有憎愛苟非秦鏡照膽堯羊觸邪時君聽之安可不惑參斷一謬俗化益訛禍發齒牙言生枝葉率是道也朕甚憫焉我國家貞觀開元同符三代風俗歸厚禮讓偕行兵興已來人散久矣始欲導之以德不欲驅之以刑然而信有未孚理有未至曾無耻格益用凋剝小則綜覈之權見侵於下輩大則樞機之重旁撓於薄徒尚念因而化之亦既去其尤者而宰臣等懼其浸染未克澄清備列祖宗之書願垂戒勵之詔遂申誥教頗用殷勤各當自省厥躬與我同底于道凡百多士宜體朕懷

元氏長慶集卷第四十

元氏長慶集

四

元氏長慶集卷第四十一

制誥

招討鎮州制

批宰臣請上尊號第二表

批宰臣請上尊號第三表

批宰臣請上尊號第四表

批劉悟謝上表

批王播謝官表

幽州平告太廟祝文

秋分日祭百神文

招討鎮州制

門下朕嘗讀玄元書至於佳兵者是樂殺人因念自孩名之逮于羈州十三年不能爲成人豈忍一朝之忿驅而殺之然而田弘正首以六州之衆歸於朝廷開先帝之雄圖變河朔之舊俗除去苛暴昭宣惠和愛人如身養士如子拊循教訓必以忠孝爲先是以魏之師徒一年而知恩二年而知禮三

年而知相與讓於道矣故南征淮蔡東伐青齊北定趙地元
勲茂績皆自魏師肆我憲宗付之心膂入則輔弼出則藩宣
推誠不疑近實無比顧朕小子獲受丕圖嗣守不遑何暇恢
復而承元請覲冀部擇才苟非勲賢不敢輕授是用咨我元
老臨於是邦而又寵諸將以懋官加三軍以厚賞復其租入
惠彼蒸黎於此一方之人可謂無有不至而梟音未革狼顧
猶存忍害忠良恣爲殘賊臨軒震悼撫几驚嗟天乎不仁一
至於此朕下爲君父上奉祖宗肆舟楫於鯨鯢啗股肱於虵
豕尚欲因循忍耻僂俛偷安非唯傷心於田氏之子孫亦將
何顏謁先帝之陵廟人神共憤卿士叶謀咸願誅夷用申冤
痛便合興師進討以翦奸凶尚念一軍之中豈無義勇倉卒
變動必非衆謀苟得罪人其餘何過宜令魏博橫海昭義河
東義武等軍各出全軍以臨界首仍各飛書檄具諭朝旨如

王廷湊能執首謀爲亂扇動三軍者送付鄰道或就鎮州處置然後束身歸朝必當超獎三品正貲官并與實封二百戶其餘三軍將士一切不問其中大將等或有能相勸諭翻然改圖者各隨事跡當加寵擢如王廷湊遂迷不寤諸道宜便進軍以時翦滅苟不得已至於用師其有效忠則宜懸賞如有能斬凶渠者先是六品已下官宜與三品正貲官先是五品已上官節級升進仍與實封三百戶莊宅各一區錢二萬貫以一州歸順者便與當州刺史仍賜實封二百戶如先是刺史以州歸順者超三資與官仍賜實封二百戶以一縣歸順者超兩資與官賜實封一百戶如有能率所管兵馬及以城鎮來降者並超三資與官仍賜實封一百戶錢一萬貫以身降者亦與轉改仍賜錢帛應赴行營將士如有能梟斬凶渠者亦准前例處分其有城鎮將士百姓等守節拒賊身死

王事者各委長吏優給其家仍具事跡聞奏當加褒贈其有
潛謀誅斬渠魁被其屠戮者宜優加追贈并賜錢帛仍與一
子官諸軍所至不得妄加殺戮及焚燒廬舍掠奪資產并有
拘執以爲俘馘其管內州縣有能自置義營堡柵王師所至
能相率來歸各加酬獎時當秋候務切農功邊界之人懼廢
耕織應緣軍務所須並不得干擾百姓如要車牛夫役及工
匠之類並宜和雇情願仍優給價錢賊平之後應立功將士
並與超資改官節級賜物其長行官吏歸降者亦當優厚褒
賞幽陵變擾誠謂亂常以其旁及賓寮有異上加台鉉校其
輕重示以招携尚開迷復之門用廣自新之路昔者堯舜之
俗比屋可封虞芮之人讓畔可感仁義則水火可蹈忠信則
蠻貊可行由是言之亦在化之而已逮我長理何其遠哉豈
朕之滿假荒寧自聖而不可教耶將朝之魁梧骨鯁自持而

莫我念也二者之來皆朕不敏內省終夕其心洗然於戲封域之中干戈作矣廊廟罇俎無忘弭寧布告朕懷以須良畫主者施行

批宰臣請上尊號第二表

朕聞天職生植聖職教化天職舉則四時行聖職修則萬方理然而天不以行四時而爲德故蕩蕩無名聖不以理萬方而爲功故謙謙不宰顧朕小子獲承丕圖上賴祖宗之靈下託股肱之力先定鎮冀次來幽燕皆吾日月之所照臨車書之所轍跡失之則有以自愧得之則何足自多況今四海雖清物力方固六戎雖伏邊備尚勞百吏雖存官業多曠萬目雖設紀律未張有此四者不遑荒寧思與卿士夙夜俾乂卿宜爲我提振大法修明政經懾竄戎夷阜康黎庶四者旣理名焉用之朕方以臯夔之務委卿卿宜以堯舜之事教我驟

加徽號深耻近名循省表章難遂來請

批宰臣請上尊號第三表

昔齊桓議封禪管仲驟諫其未宜晉武平江東何曾深惟於
遠馭彼二臣者居安思危之志明而有犯無隱之誠切也况
朕寡德謬應昌期賴先帝削平之威蒙列聖濬濟之澤聿來
燕冀甫靖華夷既無德而有成實以祥而為懼卿等所宜朝
夕納誨警予荒寧雖休勿休日慎一日而乃過為溢美頻上
鴻名諒多忠赤之誠殊非藥石之愛汝為予礪為朕揣摩汝
為予舟為朕康濟強我懿號不若使我為有道之君加我虛
尊不若使我居無過之地宜罷來請用副廼懷

批宰臣請上尊號第四表

朕以月正元日祗見于九廟對越于上玄千官在前萬乘居
後觀聲明文物之盛望城社宮闕之尊尚念高祖太宗艱難

於經營德宗憲考殷憂於續復懼不克荷以羞前人夤畏嚴恭式冀無過而燕趙底定戎獫和寧實惟列聖之休焉敢自大其意左右輔弼庶尹師長猥以鴻名願加薄德三詔執事抑而不行物議愈堅予衷未信四陳章表備列古今且曰告虔之時寧忘繼志問安之下胡不慰心有竊於顯榮難從於封執於戲允恭克讓旣見奪於群情克已爲仁庶自勤於三省勉依來請深用媿懷

批劉悟謝上表

朕聞上黨亦天下之勁兵昔者李抱真用之一舉破朱滔再舉感田悅訓養十萬威聲殷然人到于今號爲良將夫以卿之勇義才畧猶將遠慕韓彭區區抱真夫豈難繼况以克融廷湊之狂脆小賤比朱滔田悅之熾大結連是猶以孩嬰而校育育也蜂蟻相聚其能久乎卿宜密運謨猷明宣號令避

強擊情取暴撫羸勿爭地豕之鋒宜得鯨鯢之首再圖麟閣
永煥縑緗無爲他人所先當使功居第一策勲在近勿復爲
勞所謝知

批王播謝官表

朕聞有衆不言弱有地不言貧是以管夷吾用區區之齊而
諸侯九合今朕四海之大億兆之衆獨不能擒廷湊克融而
曰物力先困朕甚惑焉况高祖太宗之法令具存德宗憲考
之舊章猶在制誥比下選拔日聞較量重輕勤卹仁隱而室
閭益耗縣道益貧職業壞壞程品差戾議論講貫殊無古風
豈朕聽之不聰而股肱耳目莫得宜其効也先皇帝以卿有
廊廟之畫倚以爲相眇朕小子得而用之卿宜勉竭誠懷副
茲嘉屬無爲齷齪以傷先帝之明所謝知

幽州平告太廟祝文

維長慶元年歲次辛丑五月景申朔十四日巳酉孝曾孫嗣
皇帝臣諱敢昭告于太祖景皇帝天革隋暴付唐養理高祖
太宗奉順天紀玄宗平寧六合同軌物盛而微墉崇則毀網
漏鯨鯢隙開螻蟻幽燕狼顧齊趙虎視割據封壤傳序孫子
不貢不覲自卒自始聖父披攘霆駭波委擒滅斬除如運支
指冀方獨迷再伐再已碣石是徵承詔唯唯逮臣寡昧虔奉
先旨洞開誠明滌濯痕耻承元雲奔總亦風靡悉率賦輿盡
獻州里不命一將不戮一士不費一金不亡一矢五紀逆命
一朝如砥實天垂休實聖垂祉敢薦成功以永千祀尚饗順
宗室

改云孝孫
嗣皇帝

憲宗一室

改爲孝子
嗣皇帝

餘並同

秋分日祭百神文

維長慶元年歲次辛丑八月甲子朔十八日辛巳皇帝遣通
議大夫行內侍省常侍賜紫金魚袋李某祭于百神之靈朕

元集四
三
庵宅萬有亭毒品類日月所照永思和寧上極于天下蟠于
地包山絕海窮冥入玄至于毛鱗鰥羽之神咸秩無文以祛
不若秋序始肅時將順成且報且祈用舉常祀罔害嘉穀以
貽神羞

元氏長慶集卷第四十一

元氏長慶集卷第四十二

制誥

授王播中書侍郎平章事兼鹽鐵使制

加裴度幽鎮兩道招撫使制

加裴度鎮州四面招討使制

授劉總守司徒兼侍中天平軍節度使制

許劉總出家制

加烏重胤檢校司徒制

授王播中書侍郎平章事兼鹽鐵使制

門下昔蕭何用新造之漢而能調發子弟完補敗亡使關東糧饋不絕者以其盡得秦之圖籍而周知其衆寡也我國家乘十一聖之區寓提億兆人之生齒而曰不能足食足兵朕甚憐焉得非調陰陽撫夷夏者不欲侵貨泉之任而主會計校盈虛者不得參邦國之重乎子將兼之允在能者諸道鹽

鐵轉運等使太中大夫守刑部尚書王播在德宗時以對詔
入仕踐更臺閣由御史中丞大京兆尹掌縣官鹽鐵爲春官
尚書乃長巴髻以控蠻蜚盡稱厥職達于予聞洎詔徵還便
殿與語得所未得聞所未聞昭然發矇幾至前席重委操軔
鋌刃益精國有羨財而人不加賦東師在野物力蕭然不有
主張孰能戡濟是用命爾作相仍以舊務因之爾其西備戎
羗東定燕冀內實九府外豐萬人百度群倫罔不在爾於戲
典謨訓誥行之具存邪正是非知之孔易予唯以不敏不明
茲故用爾爲股肱耳目又安能一二戒誨垂之空言爾其自
勵于爾心無令觀聽者論爾於鄉校可依前件

加裴度幽鎮兩道招撫使制

門下夫以區區秦伯而猶念晉國曰其君是惡其人何罪况
朕均養億兆爲之君親燕人冀人皆吾乳哺而育之安忍以

豺狼驅脅之故絕其飛走盡致網羅止行犯命之誅是用開
其一面河東節度觀察處置等使金紫光祿大夫守司空兼
門下侍郎同中書門下平章事太原尹北都留守上柱國晉
國公食邑三千戶裴度昔者區域之中蜂蟻巢聚蔡有逆孽
齊有狡童厥初圖征疑議滿野不懼不惑挺然披攘苟無司
南允罔能濟佑我憲考爲唐神宗實惟股肱運用忠力肆朕
小子蒙受景靈冀服於前燕平於後而撫御失理盤牙復生
求思弭寧中夜有得國有元老夫何患焉用是亟宣懇惻之
誠就加招撫之命於戲頃者師道元濟乘累代襲授之資藉
山東結連之勢以丞相布畫於千里之外使諸將持重於四
封之中而猶劉悟裂虵豕之軀李祐漬鯨鯢之腹蓋逆順之
情異而忠孝之道明也况幽鎮無名暴狂以丞相進觀其宜
以諸將齊奮其力斧鑕之刑坐迫椒蘭之氣外薰誰不自愛

其生焉能與亂同死度宜開懷緩帶以待其歸可依前守司
空兼門下侍郎同中書門下平章事河東節度使充幽鎮兩
道招撫使餘如故

加裴度鎮州四面招討使制

門下傳云死者不復生刑者不復屬是以先王斬一支指殺
一大彘莫不伏念隱悼至于旬時決而行者蓋不得已也予
於鎮人亦然伏念俟其悛革詎止旬時前命相臣招懷撫諭
矜其誑誤示以生門期於盡脫網羅豈欲驅之陷穽而豺狼
當道荆棘牽衣雖欲歸之於仁厥路無由而至况王師壓境
義勇爭先朕每抑其鋒鏑未忍覆其巢穴是猶愛稂莠而傷
稼穡養癰疽以潰肌膚獨懷兒女之仁慮失祖宗之典今上
台居鎮筭畫無遺操晉陽之利兵驅屈產之良馬舉河東義
成之衆合滄景澤潞之師當元翼授命之初乘田布雪寃之

忿舉毛拾芥其易可知兼用恩威尚存招致宜令河東節度使裴度充鎮州四面招討使於戲以一城之卒敵天下之師徇猖蹶之徒抗君父之命吾哀爾輩死實無名苟能自新亦異容汝主者施行

授劉總守司徒兼侍中天平軍節度使制

門下百谷所以朝巨海海不疑其貳於我也五嶽所以鎮厚地地不畏其軋於已也故山澤之氣上騰天應之則爲雲爲雨台輔之精下降君得之則稱帝稱皇是以採群疑者終不能成大功推至信者必有以來大順況朕志先定臣誠素通偃七十年之干戈垂千萬代之竹帛非我獨斷安能遽行某官某生知禮樂神授機符移孝資忠本仁祖義學弄之始畫地而壁壘勢成言兵之時聚米而山川形具象賢秉哲脫俗遺榮慕清淨以爲宗會富貴之來逼自居劇鎮亟立殊勲威

定兩藩化行八郡日者除凶淮甸易帥常山張吾掎角之雄
賴爾股肱之力加以深衷早達密款屢聞求奉浮圖之真願
弃全燕之重誠嘉素尚難遂過中縱妻子之可捐豈君父之
能捨朕惟鄒魯之地鄆實居多俗尚師儒人推朴厚施之美
化豈無衆善之因革其非心寧失大雄之旨是用正名台座
重委藩方爾其張我四維敷我五教握龍節以率下露蟬冕
以行春宜體夔龍之令圖勿徇巢由之獨行可守司徒兼侍
中使持節鄆州諸軍事守鄆州刺史充天平軍節度鄆曹濮
等州觀察處置等使散官勳封如故王者施行

許劉總出家制

門下朕聞西方有金仙子自著書云昔我於無量劫中捨國
城妻子以求法要朕嘗聞其語未見其人安知股肱之間目
驗茲事脫身羈網誠樂所從捨我繫維能無永歎遂其高尚

良用憮然具官劉總五嶽孕靈三台降瑞位兼將相代襲勲
庸視軒冕若浮雲弃妻孥猶脫屣屢陳章表懇願捨家勉喻
再三終然不奪朕又移之重鎮寵以上公莫顧中人之情遂
超開士之跡於戲張良却粒尚想高縱范蠡登舟空瞻遺象
功留鼎鬲誓著山河長存魚水之歡勿忘香火之願宜賜法
號大覺仍賜僧臘五十夏主者施行

加烏重胤檢校司徒制

門下古之命將莫不登諸齋壇告於郊廟分其閭閻推其車
轂非所以寵異崇大而姑息之蓋先王之懋典授之專柄然
後遷延者必罪選懦者必懲式所以使恩威並流而人人無
辭於賞罰也橫海軍節度滄德棣等州觀察處置等使銀青
光祿大夫檢校司空使持節滄州諸軍事兼滄州刺史御史
大夫上柱國邠國公食邑三千戶烏重胤嘗以懷汝之師南

伐叛蔡博大持重不要奇勝不用鉄鉞不嚴刁斗舉必示信
戰必尅期寇讎知其仁士卒懷其惠梟鏡就執第其勲庸雖
坐樹不言而圖功甚大先皇帝分命水土換其旌旄俾廉於
滄以長橫海幽鎮既亂人心或搖師衆無譁而湯池自固者
重胤蓋有之矣而又明於斥候善揣敵情動靜以聞茲實賴
汝是用升其秩序以大威聲進位上公式光戎律此所以慰
薦爾之忠力也爾其勉之於戲甘之誓曰用命賞于祖不用
命戮于社朕奉祖宗而守社稷也其能私賞罰於天下乎賞
既不俟於成功罰固難期於後効矣若驚之寵無忘戒之可
檢校司徒依前充橫海軍節度使

元氏長慶集卷第四十三

制誥

授李愿檢校司空宣武軍節度使制

授劉悟檢校司空幽州節度使制

授劉悟昭義軍節度使制

加陳楚檢校左僕射制

授馬總檢校刑部尚書天平軍節度使制

授田布魏博節度使制

授李愿檢校司空宣武軍節度使制

門下昔者魯侯伯禽徒以周公之故遂荒大東重耳以定傾
之勞子孫不絕於晉昔我太師西平王在德宗時能復京邑
書于鼎彝每懷宮廟之安實念山河之永而又繼其英哲克
生令人惟弟惟兄莫非頗牧尚想德施於十代何吝恩積於

一門鳳翔節度使李愿生長綺紈之中而素風自得蘊鬱驍
雄之氣而性與溫恭怡怡於季孟之間翼翼於班行之內始
爲夏帥遂著能名蹄角齒毛之良一無取於夷落而不貪之
寶大布朔陲洎領徐方會征淮右鄰寇陰狡將助鴟張來犯
東郊冀延晷刻爾乃提持戈戟淬礪卒徒一戰而蜂蠆盡殲
不時而梟鏡就戮聿來岐下號令益明繕完甲兵爲我保障
朕以浚郊重地尤藉長材俾爲司空以表東夏持我邦憲用
清爾人夫四海九州非不廣也然而靈武魏博至于大梁斷
長補短方數千里皆爾伯仲又何加焉於戲睢陽在爾之東
張巡效忠之誠尚在夷門在爾之境侯嬴報恩之跡猶存又
安知憧憧往來之徒不有以仁義匡於爾者勉服休命其戒
之可檢校司空兼汴州刺史宣武軍節度使散官勳如故

授劉悟檢校司空幽州節度使制

門下朕聞將星明則英豪用靈旗指則氛祲銷勁草可以受
疾風盤桓然後見利器苟非處劇何以用長況幽并少年燕
趙奇士居常以紫駟自聘失意則白刃相讎將領司難是先
才傑昭義軍節度副大使知節度事澤潞磁邢洺等州觀察
制置使金紫光祿大夫檢校尚書右僕射兼潞州大都督府
長史御史大夫上柱國彭城郡王食邑三百戶劉悟天與忠
誠人推敬讓蘊孟賁之勇不以力聞避廉頗之強使之心伏
是以居危邦以智免臨大節以功高嘗見委於先朝屢作藩
於右地朕以遠陽巨鎮自我康寧姑欲撫之以仁然後示之
以禮而守臣嬰疾幕吏擅權撓政行私虧恩剥下過爲筆楚
妄作威稜不均饗士之羊徒養乘軒之鶴致茲擾變職此之
由不有將才孰懲兇戲敷求朕志深謂汝諧是用拔奇式冀
宣力帖以亞相寵之上公俾光十乘之行以壯三軍之氣可

檢校司空兼幽州大都督府長史御史大夫充幽州盧龍軍節度副大使知節度事觀察處置押奚契丹兩蕃經略盧龍等使散官勲封如故

授劉悟昭義軍節度使制

門下昔潢池驟變則龔遂亟行河內去思而寇恂來復所以順人情而急時病也況鷄澤衡漳附于上黨控帶河洛扼束燕趙其土堵其人勁養理訓習尤所重難而幽州盧龍軍節度使檢校司空劉悟前臨是邦其政方睦甲兵完利師徒具嚴刑當罪而人不寃賞當功而財不費軍政威而非虐吏道察而不苛州里行信讓之風鄉曲除武斷之患方將久次以惠斯人而難起幽陵救深焚溺輟於旣理與彼惟新乘軒纔及於邢郊妖彗忽生於冀分空沉台座未辯魁渠予懷震驚物聽傾駭校其遠邇當有後先遂駐腹心之雉以供臂指之

用復還龍節再息棠陰勉受新恩無移舊貫可依前檢校司空兼潞州大都督府長史兼御史大夫昭義軍節度副大使知節度事澤潞磁邢洺等州觀察使勲封如故

加陳楚檢校左僕射制

門下昔楚師多寒楚子巡而撫之士皆如挾纊明號令之可以動人也由是天以雷霆蘇蠶氣兵以鼓鼙作戰力高官重秩其爲號令也不亦多乎我無愛焉加以戎師亦所以作萬之氣增一鼓之雄也義成軍節度使檢校工部尚書陳楚茂昭之甥酷似其舅總齊義武於今六年以兩郡之賦興備三軍之供費民不勞耗而兵能繕完政有經美今遼陽奠分紛亂交虐楚實間居於此其勤可知自非國之干城總之利器安能爲我堡障芟夷寇讎欲將激其壯心夫何恪於好爵加之左揆以盛中權苟有庸功豈無後命於戲書云功懋懋

賞言其當也傳曰捨爵策勲言其速也今則寇未平而進律
賊方獻而先恩吾於將臣可謂無所負也苟不自効其如法
何可檢校左僕射使持節定州諸軍事兼定州刺史充義武
軍節度使散官勲封如故主者施行

授馬總檢校刑部尚書天平軍節度使制

門下吏久其職人安其業此前代所以稱理古也況奪三軍
慈愛之師換百姓仁惠之長有迎新送故之困朝令夕改之
煩自非有爲而爲曷若且仍其舊前天平軍節度使檢校禮
部尚書馬總始以檄奏翩翩早從軍府儒學之外自此知兵
踐歷他官所至皆理處馭南海仁聲甚遙還珠之祥前事復
出先皇帝以淮夷未殄命相出征總雖元僚亦佐叅畫大勲
旣剪台衡復歸遂以丞相度旌旗授之於總總果善於其職
蔡人宜之會鄆寇底平復換麾節丕變汙俗大蘇惇愛不時

成功周月報政朕飽其聲績渴見儀形如聞就路之初頗有
擁轅之戀由是罷徵黃霸復借寇恂誠阻急賢之心姑務從
人之欲仍加憲部以壯戎藩勉服新恩用彰前効可檢校刑
部尚書餘如故

授田布魏博節度使制

門下經曰父母之仇不同天雖及匹夫而猶寢苦枕干以期
必報是以子胥不徇伍奢之死卒能發既葬之墓鞭不義之
屍取貴春秋垂名萬古而況於身登將壇父死人手家讎國
耻併在一門當懷嘗膽之心豈娛絕漿之禮金華無避其在
茲乎前四鎮北庭行軍兼涇原節度使檢校右散騎常侍御
史大夫田布咨爾先臣惟國元老首自河朔來朝帝庭而又
東取青齊北討深趙提挈義旅勤勞王家冒白刃而不疑推
赤心而自信屬冀方求帥余所重難輟自大名付茲巨鎮而

中台暗拆上將妖侵蠱賊潛寘於腹心豺狼勃興於肘腋人
神憤痛朝野驚嗟深軫予懷誓擒惡以爾布詩書並習忠
孝兩全嘗用魏師克征淮孽素行恩信共著勲庸豈無奮激
之徒爲報寇讎之黨且魏之諸將由爾父之崇高魏之三軍
蒙爾父之仁愛昔旣同其美利今豈忘其深寃爾其淬礪勇
夫敬恭義士一飯之飽必同於卒伍一毫之費必用其干矛
非笑畫勿萌於心非軍旅勿宣於口居則席藁寒則抱冰以
喪禮處之若哀心感著必有爲橫身刎頸感智捐軀下報營
魂旁清醜類於戲至誠可託稔惡難逃矧彼凶狂去將安往
墨纓居體玄纁在前題鼓執金無忘哀敬可起復寧遠將軍
守右金吾衛大將軍貞外同正貞檢校工部尚書兼魏州大
都督府長史御史大夫充魏博等州節度觀察處置等使勲
賜如故王者施行

元氏長慶集卷第四十三

元氏長慶集卷第四十三

五

子長卷之四十三

元氏長慶集卷第四十四

制誥

授楊元卿涇原節度使制

授牛元翼深冀等州節度使制

授牛元翼成德軍節度使制

授韓臯吏部尚書趙宗儒太常卿制

授趙宗儒尚書左僕射制 授韓臯尚書左僕射制

授李絳檢校右僕射兼兵部尚書制

授楊元卿涇原節度使制

門下士之捐妻子冒白刃勇於爲國輕於爲身貢先見之明
於群疑之際者大則書竹帛以示後次則建麾纛以臨戎功
不見圖則勞者何勸忠不見賞則勃者何誅聿求其人用激
爾類守右金吾衛將軍權句當左街事楊元卿衣冠貴胄文

武長材嘗求三略之師耻學一夫之敵是以陷豺狼之穴履
尾甚危蓄鷹鵠之心卑飛待擊請分金以間楚願奉璧以伐
虞身以智全家因義喪誅蔡之始實有力焉及典方州尤彰
績効自居環尹益茂勲勤西旅未平寔資良帥拔於不次式
佇奇功爾其闢我土疆謹我封守視我士卒如爾子攘我夷
狄如爾仇勉竭乃誠以敷朕意珥貂持簡用示兼榮可朝散
大夫檢校左常侍使持節涇州諸軍事兼涇州刺史御史大
夫充四鎮北庭行軍兼涇原等州節度觀察處置等使勲賜
如故主者施行

授牛元翼深冀州節度使制

門下鷹隼擊則妖鳥除弧弓張則天狼滅湯沐具而蟣虱相
弔針石熾而癰疽立潰苟得韓盧而示之狡兔則可備俎豆
而俟於脯醢矣復何憂於越逸乎夫將者亦蟣聚之湯沐而

渠魁之韓盧也我得之矣又何患焉檢校右散騎常侍深州
刺史牛元翼挺生河朔之間迥鍾海嶽之秀幼爲兒戲營壘
已成長學神樞風雲暗曉衆推然諾已任功名善用奇兵尤
精技擊陳安之矛丈八顏高之弓六鈞或山立於軍前或肉
飛於馬上而又謙能養勇孝以資忠雖膽力過人而心誠許
國自常山作沴上將罹災慟哭轅門誓清妖孽羽書三奏駟
騎四馳上請廟謀旁徵鄰援指期斬叛魁已圖功斷自予衷
開懷用爾夫以爾之材力而取彼之凶殘是猶以火焚枯以
石壓卵虫臂拒轍鷄肋承拳萬萬相殊破之必矣而況於鎮
之黎人皆朕之赤子爾之部曲即鎮之卒徒聞爾鼙鼓之音
懷爾椒蘭之德吾知此輩誰不革心爾其寒者衣之飢者食
之無廢室廬無害農稼苟獲戎首置之藁街下以報忠臣之
冤上以告先帝之廟則蚩蚩從亂子又何誅於戲殺人盈城

爾其深戒孥戮誓衆朕不忍言再換蟬冠持新武節恩不虛授爾其敬之可檢校左常侍深冀等州節度觀察等使

授牛元翼成德軍節度使制

門下王庭湊山東一叛卒也非有席歟藉寵之資強大結連之勢一朝驅朕赤子弄吾甲兵是猶以羊將狼其下必當潰其心腹而猶越月踰時莫見春其喉者豈非常山無帥趙子弟未有所歸耶翕而受之我有長畫某官某燕趙間號爲飛將望其旗幟者莫不風靡雨散圖而戰伐不可勝畫而又忠孝謹廉慈仁和惠愛養士伍均如鳴鳩鎮之三軍爭在麾下自領深冀殷然雷霆居四戰之中堅一城之守以少擊衆以智料愚鼓角不驚而梯衝自隕人願爲用寇不敢前掃吾氛煙捨此安往前所謂我有長畫莫若命爾以來鎮人是用益以二州超之八座帥我成德廉其四封爾宜來者懷之迷者

論之老者視之幼者撫之狂者遏之逆者絕之惟是六者爾其懋哉可鎮州大都督成德軍節度使深冀趙等州觀察處置等使

韓臯吏部尚書趙宗儒太常卿制

勅今天下官人之道或幾乎息矣禮樂之用又安能施設於俗化哉是以選賢與能之柄或礙於胥徒冠婚喪祭之儀不行於卿士蠹理害教斯孰甚焉改而更張我則未暇就爲之制其在於選任素重之望以鎮之乎金紫光祿大夫檢校尚書右僕射韓臯銀青光祿大夫守吏部尚書趙宗儒等仕宦臺閣周環大僚或三四朝或五十載新進趨風之士更至迭處於將相間而臯等精義不渝物務尤勁事朕小子猶吾祖宗肆予冲人庭實彪炳夫銓鏡萬品不無勸勤簫韶九成頗延頤養更用舊老以均勞逸至於官業非予敢知祇聽法儀

六集四
三
廢用咨稟換保傳之重仍端揆之榮唯恐不多無以優異臯
可檢校尚書右僕射兼吏部尚書宗儒可守太子少傅兼太
常卿事散官勲封如故

授趙宗儒尚書左僕射制

勅銀青光祿大夫守太子少傅兼判太常卿事趙宗儒昔叔
孫通徒以綿蕝草具之功遂獲封侯之賞況朕始見天地初
朝祖宗哀勵祗嚴不克是懼惟爾肇自清廟逮于還宮贊導
法儀踰於四百俛伏趨數訖無尤違夫何叔孫可用是比顧
朕冲昧實賴老成不有甄陞孰明勤盡奉常正秩左揆兼榮
六樂九儀興替在此無忘勗率已厚人倫可檢校尚書左僕
射兼太常卿散官勲如故

授韓臯尚書左僕射制

勅夫一邑之政而猶資老者之智用壯者之波況朝廷之大

得不以耆年重望居表正之地以儀刑百辟乎惟爾金紫光祿大夫檢校尚書右僕射兼吏部尚書韓臯始以直言事代宗皇帝司諫諍復以文章政術事德宗皇帝爲舍人中丞京兆尹在順宗憲宗時出領藩方入備卿長逮于小子歷事五君勤亦至矣而又處權近之位未嘗以恩幸自寵於一時當趣嚮之間終不以薄厚見窺於衆目豈所謂徐公之行已有常而詩人之風雨不改耶日者銓覈群才兼榮揆務頗煩倫擬有異優崇罷去職勞正名端揆俾絕積薪之歎且明尚齒之心凡百庶僚無忘咨稟可守尚書左僕射餘如故

授李絳檢校右僕射兼兵部尚書制

勅中大夫守御史大夫賜紫金魚袋李絳昔先皇帝誨予小子曰堯時有神羊在廷屈軼指佞汝知之乎夫邪正在人焉有異物朕有臣李絳猶漢臣之汲黯也我百歲後爾其用之

爲神羊屈軼斯可矣子小子銘鏤丕訓夙夜求思是用致理
之初付授邦憲且欲吾丞相以降皆俾下之以示優
賞命安其步武無爲屑屑之儀而絳屢以疾辭不寧
焉敢以勞倦之故煩先帝舊臣昔晉僕射何季玄病
猶命坐家視事張子孺拜大司馬仍令兼錄尚書則卧
獨專於郡符端右可以旁綏戎政由古道也爾其處議
勉居喉舌慎所觀聽爲人司南可檢校尚書右僕射兼兵部
尚書散官勲封如故

元氏長慶集卷第四十四

元氏長慶集卷第四十五

制誥

授王播刑部尚書諸道鹽鐵轉運等使制

授杜元穎戶部侍郎依前翰林學士制

沈傳師授中書舍人制 崔稜授尚書戶部侍郎制

裴向授左散騎常侍制 崔郾授諫議大夫制

白居易授尚書主客郎中知制誥制

李拭授宗正卿等制 裴武授司農卿制

授王播刑部尚書諸道鹽鐵轉運等使制

勅漢諸儒議鹽鐵者百輩終莫能罷以其均口賦利則貴賤盡征於王府矣而國家歲漕關東之粟帛以實京師亦重事也并是兩者非才勿居劍南西川節度副大使知節度事中散大夫檢校戶部尚書兼成都尹御史大夫賜紫金魚袋王

播昔我憲宗章武皇帝梟琳於夏擒闢於蜀縛錡於吳而又繼之以元濟師道之役十五年間蓋煩費矣然而資用饒而人不加賦朕甚異焉謀及耆艾以求其故皆曰蜀帥播是時司筦樞者八年忠而能勤善於其職先皇帝咨訪委遇用之不疑下竭其才而上專其任也是用徵自益部授之刑曹復以舊務煩之式所以藉爾奉力之熟耳於戲知人則指憲考能之顧茲不明敢有貳事爾其追奉先眷佐予冲人忠盡始終以服休命可守刑部尚書充諸道鹽鐵轉運等使散官勲如故

授杜元穎戶部侍郎依前翰林學士制

勅元穎昔我憲宗章武皇帝熏灼威名兵定八極大索俊乂以徵謀猷其在禁林尤集賢彥越正月夕庚子將弃倦勤付朕眇末乃詔元穎佑予冲人以導揚丕訓爾亦祇奉顧命咨

授舊章輔登哀憂俾克依據是夜而六宮承式厥明而百吏受遺草定法儀茲實賴汝官不稱事予懷慊然而又詞源奧深機用周敏授之以詔而益辦扣之以疑而益明慎獨以修身推誠以事朕職勞可舉德懋宜升不俟踰時寧拘滿歲綸誥清秩版圖劇曹例無兼榮特以甄寵予以國士待汝汝以忠臣報予効乃肺肝司朕耳目可守尚書戶部侍郎知制誥依前翰林學士散官勲如故

沈傳師授中書舍人制

勅書云臣作朕股肱耳目言天下不可一人理也今國家崇建執事以任股肱妙選侍臣實司耳目股肱良則心膂正耳目審則視聽明苟非端人何以近我而朝議郎守尚書兵部郎中知制誥充翰林學士上護軍賜紫金魚袋沈傳師絜淨精微風流儒雅名俱道勝信在言前謙而愈光卑以自牧專

對無不達群居若不知而又煥有文章發爲辭誥使吾禁中無漏露之患而朕語言與三代同風勤亦至矣事我滿歲命汝即真勉竭乃誠以輔台德可守中書舍人依前翰林學士散官勲賜如故

授崔稜尚書戶部侍郎制

勅朝議大夫權知尚書戶部侍郎判度支上柱國賜紫金魚袋崔稜惟朕憲考亟征不廷熏剔幽妖擒滅罪疾用力滋廣理財是切而姦臣乘上之急刻括以充其求帝用憫然思克憂濟乃詔南服傳置甚繁爾稜授以耗登之書俾陳生聚之術善於其職嚴而不殘辟名用物者逃無所入減私奉公者得以自明吏不敢欺人不加賦公費當其所則不吝上求非其故則不獻挺直廉厚真爲吏師試可甄明歲滿當陟朕保其始爾思其終始終不渝乃可用又守尚書戶部依前

判度支散官勲賜如故

授裴向左散騎常侍制

勅周文王侍從之臣無可使結襪者我知之矣左右前後無非令人朕以將壯之年臣妾天下司其忿速其在於持重溫良之士以鑒之乎前陝虢等州都防禦觀察處置等使中散大夫守陝州大都督府長史賜紫金魚袋裴向搢紳之徒言其閨門之行僅至於衣無常主兒無常父矣推是爲政仁何遠乎是以發自王畿至于陝服多歷年所終無尤違每移孝友之風以懲強暴之俗甘棠之下廉讓興焉予欲用爲垂璫夾乘之官以代吾盤盂韋弦之戒不亦可乎可守左散騎常侍餘如故

崔鄴授諫議大夫

勅鄴昔我太宗文皇帝以魏徵爲人鏡而姦膽形於下逆耳

聞於上及徵沒而猶歎過失之不聞夫以朕之不敏不明託
于人上月環其七而善惡蔑聞豈諫爭之臣未盡規於不德
耶朕甚懼焉以爾鄙端厚誠明濟之文學柔而能立謙而逾
光命汝弼予式冀無過於戲宋景公一諸侯耳而陳星退之
詞齊威王獨何人哉能辨日聞之佞爾其極諫朕不漏言可
守諫議大夫餘如故

白居易授尚書主客郎中知制誥

勅先帝付朕四海九州之重尚賴威靈天下甫定思獲論議
文章之臣以自左右俾之詳考今古周知物情而朝議郎行
尚書司門員外郎白居易州里舉進士有司升甲科元和初
對詔稱旨翱翔翰林藹然直聲留在人口朕嘗視其詞賦甚
喜與相如並處一時由是召自南賓序補郎位會牛僧孺以
御史丞解制誥職嗣掌書命人推爾先予亦飽其風猷爾宜

副茲超異可守尚書主客郎中知制誥餘如故

李拭授宗正卿等

勅李拭韋虔度等明皇而下其屬未遠諸王在閣朕得其寒溫睿宗而上五十餘族長幼秩序盡委之於大宗正苟非能賢不敢輕授以爾拭踐履中外論倫古今主宗之盟綽有餘譽而執事者又曰殿中丞揔六尚以供名物當進圭進爵之時不敢虛位僉以虔度文學儒素旁通政經執憲南臺挺直不撓以之代拭允謂其良仍假左貂之冠加於宗正之首朕不敢無私於吾屬也拭可檢校左散騎常侍兼宗正卿虔度可守殿中監餘如故

裴武授司農卿

勅農天下之本也故國有九列而司農氏居其一焉前代非牟融之循理康成之儒學不在茲選今海內無事思與公卿

等樹立根柢以制四方是用外選方伯之善職者入補茲任
謂之恩榮具官裴武子聞其先始以孝友書其國籍其後累
有丞相爲唐名臣賢彥因仍代濟不絕武亦嗣其忠孝益熾
家聲鬱爲元僚所至稱理嘗居內史屢入正卿自華至荆無
非劇地鈐轄豪右衣食煒燁嚴而不殘仁而有制鎮定南服
予方賴之而亟請來朝因求內任嘉其戀我難奪乃誠假以
秩宗之榮用制國臬之重費而不屈其在勉之可檢校禮部
尚書兼司農卿餘如故

元氏長慶集卷第四十五

元氏長慶集卷第四十六

制誥

盧士玫權知京兆尹制 劉士涇授太僕卿制

裴堪授工部尚書致仕制

于季友授右羽林將軍制

邵同授太府少卿充吐蕃和好使

元宗簡授京兆少尹制 劉師老授右司郎中制

楊嗣復授尚書兵部郎中制

鄭涵授尚書考功郎中馮宿刑部郎中制

高允恭授尚書戶部郎中判度支案制

高允恭授侍御史知雜事制

伯耆授尚書兵部員外郎制

盧士玫權知京兆尹制

勅朕日出而御便殿召丞相已下計事而大京兆得在其中非常吏也誠以爲海內法式自京師始輦轂之下盜賊爲先尹正非人則賢不肖阿枉奏覆隔塞則上下不通假之恩威用讐豪右具官盧士玫自居郎署執政者言其溫重不回守法專固副內史事物議歸之日者景陵將建龜筮有時予心怛然懼不克濟爾嘗倅職應其供求和而不同檢而不溢端於已事朕甚嘉焉試命元僚亦旣不撓今圓丘甫及慶澤將施攘剽椎埋必有幸生之者案牘卒吏亦當因緣爲姦公費則多而利不下究惟是數者爾司其憂爲爾正名無吝操剽可權知京兆尹餘如故

劉士涇授太僕卿制

勅卿寺甚重不易其人其或以勲以親以報以勸又何愛焉檢校大理少卿駙馬都尉劉士涇去歲西戎跳入涇上京師

戒嚴朕慨然有思廉頗李牧之志而習事者言爾父司空之
在涇也築平涼等八城二堡塹保定平原使涇人益樹麥禾
以復后稷公劉之教十有六年犬戎不敢東顧朕聞其人思
見其後果有令子在吾懿親與之討論自亦奇士鋪陳將略
殊有父風訪其班資則曰亞諸卿之間嘗十年矣今乃除其
憂服命以大僚豈惟報爾先臣榮吾戚里亦欲使緣邊諸將
視其愛子爲我竭誠可守太僕卿駙馬都尉餘如故

裴堪授工部尚書致仕制

勅書曰冲子嗣則無遺壽耆朕以眇末憲章祖宗是用錫于
邦伯庶尹至于舊有位人式示知恩以期于理而裴堪等奉
事先帝無非舊老更歷中外備有典刑以疾以年皆致厥政
遺名自遂勇退推高並沐新恩例升榮級裨朕厥德猶俟安
車可依前件

于季友授右羽林將軍制

勅具官于季友天子六軍必有材官倏飛超乘挽強之士在焉董之以威待之以信分八舍之衆寡均二廣之勞逸不吳不揚不掉不挫皆將軍之命也是以李大亮上直禁中而文皇甘寢則心腹爪牙之任斯不細矣以爾季友時予舊姻念徃興懷度才思用榮以服色列于藩垣爾其敬恭無替朕命可守右羽林將軍知軍事仍賜紫金魚袋

邵同授太府少卿充吐蕃和好使

勅邵同修好息人古之善政至於兵交而猶使在其間況西戎舅甥之國爲日久矣前命使臣洎介臣賈持節計告且明不侵不叛之誠而洎等誑誤戎王爲國生事廢我成命咎有所歸而猶彼國君長戒吏乞盟無言不酬思有以報以爾同科甲言語職宣詞令備習地訓周知物情識汲黯之便宜得

月氏之要領命汝報聘達予深誠夫用爾之直去其疎用爾之權去其詐用爾之剛去其忿用爾之慎去其疑繼魏絳之和奮由余之智使朕高枕無西顧之憂者在同此去同其勉之授以亞卿仍兼獨坐回無辱命賞有疊章可守太府少卿兼通事舍人兼御史中丞持節充入吐蕃答請和好使餘如故

元宗簡授京兆少尹制

勅元宗簡劉約等叙彞倫節浮競必在於遷次有準以崇廉讓之風是以置具貲限資考而猶幸得貪求之士不絕於埃塵間今古之常也聞爾等端靜廉雅行浮於名非公事未常至於卿相之門何其自持之優也內史貳秩重而不煩中臺諸郎清而無雜各勉榮授無移素風宗簡可權知京兆少尹約可行尚書司門貳外郎並散官勲賜如故

劉師老授右司郎中制

勅侍御史內供奉劉師老郭行餘等曩者劉悟以全齊之地
斬叛來獻惟帝念功始以鈇鉞祭戟玄纛青旗命悟建行臺
於鄭滑得置軍司馬以下官屬妙選賢彥以司謨猷師老行
餘皆以天子命爲悟僚介會悟遷領他鎮爾等寔來握蘭懷
芸皆授清秩出入甄異又何加焉師老可尚書右司郎中行
餘可守祕書省著作郎餘如故

楊嗣復授尚書兵部郎中

勅吏部郎中楊嗣復官天下文武之重事也兵部郎中二員
一在侍從不居外省旁求其一頗甚難之而執事者皆曰近
以文章詞賦之士爲名輩由此者坐至公卿閑達憲章用是
稀少而吏曹郎嗣復州里秀異議論宏博宜其以所長自多
然而操剴吏事細大無遺用副虛求允謂宜稱爾其試守茲

任爲予簡稽苟能修明旋議超陟可權知兵部郎中餘如故
鄭涵授尚書考功郎中馮宿刑部郎中制

勅二帝三王之所以仁聲無窮績用明而刑罰當也尚書郎
專是兩者疇將若予僉曰涵文無害可以彰善惡宿思無邪
可以盡哀敬庶尹百吏之能否四海九州之性命用汝叅斷
汝其戒之夫刻則害善放則利淫滯則不通流則自撓惟是
四者時考之難亟則失情緩則留獄深則礙恕縱則生姦惟
是四者時刑之難八者不亂然後可以有志於理矣朕所注
意爾其盡心可

高允恭授尚書戶部郎中判度支案制

勅允恭書云明德慎罰明猶慎之况朕不德茲用省于有司
之獄莫不伏念隱悼周知物情惟爾允恭告我祥刑罔不率
協稽爾明効陟于他曹大比生齒之書仍掌折毫之牘戎車

方駕物力未豐剖滯應期斯任不細推爾惟吝之意罔或失財用爾無害之文以懲刺下惟不欲過過則不逮率是數者時維厥中可守尚書戶部郎中判度支案散官勲如故


高允恭授侍御史知雜事制


勅御史府不以一職名官蓋總察群司典掌衆政副其丞者是選尤難而御史丞僧孺首以朝議郎守尚書戶部郎中判度支案飛騎尉高允恭聞於予曰允恭始以儒家子能文入官在監察御史時分務東臺無所顧慮爲刑部郎中能守訓典復以人曹郎佐掌邦計懸石允釐撓而不煩簡而不傲靜專勤直志行修明乞以臺郎兼授憲簡雜錯之務一以咨之朕俞其言爾其自勉無俾僧孺狹於知人可以本官兼侍御史知雜事餘如故

栢耆授尚書兵部員外郎制

勅守起居舍人賜緋魚袋耆朕聞亟遷則曩倫數滯賞則
勞臣怠兼用兩者謂之政經夫南憲右掖至于中臺我朝之
極選也俾爾環歲之內周歷茲任豈無意焉元和中盜殺丞
相疾傷議臣齊冀之間交以禍端相嫁耆自青谿窖中提轉
丸捍闔之書馳於諸鎮使承宗疑否隔塞一朝豁然納質獻
地克終於善承宗既沒承元授事耆又將朕教告命于承元
萬衆無譁一方底定此而不錄將何以勸凡百多士無急病
之心可守尚書兵部員外郎賜緋魚袋

元氏長慶集卷第四十六





元氏長慶集

四

LIBRARY
OF THE
UNIVERSITY OF ILLINOIS

895.108

Ss7s2

v.723

CHINA



AC
149
.S8
v.723

元氏長慶集卷第四十七

制誥

高鉞授起居郎

班肅授尚書司封員外郎

獨孤朗授尚書都官員外郎

范季睦授尚書倉部員外郎

楊汝士授右補闕

唐慶萬年縣令

裴注侍御史

李翊監察御史

王永太常博士

李從易宗正寺丞

盧均等三人授通事舍人

顏峴右贊善大夫

荆浦左清道率府率

王惠超左清道率府率

高鉞授起居郎

元集四十七

勅行而不息者時也久而不可泯者書也微史氏吾其面墻
於堯舜禹湯之事矣尚書郎亦有會計奏議之重非博達精
究之才其可以充備茲選乎高鈇何士乂等富有文章優於
行實掇拾巨益殆無闕遺前以東觀擇才因而命鈇視其所
以是見書詞俾侗朕之起居遂編之於簡牘不亦詳且實耶
而士乂亦以久次當遷移補郎位允膺清秩無忘慎終鈇可
守起居郎依前充史館修撰士乂可尚書水部員外郎餘如
故

班肅授尚書司封員外郎

勅朝議郎前坊州刺史賜緋魚袋班肅馳競之徒能於寒暑
之際不以憂畏移其薄厚之道者鮮矣聞爾爲祠部員外郎
值吾黜姦之日遊其門者莫不跼竄奔迸懼懼其身唯爾私
分不渝進退有素搢紳之論有以多之復爾中臺以厚吾俗

勉慎其始無輕所從可行尚書司封員外郎餘如故

獨孤朗授尚書都官員外郎

勅殿中侍御史充史館修撰獨孤朗左拾遺韋瓘汝等皆冠
圓冠曳方屨以儒服事朕朕甚偉之朗能彰善癉惡屬詞可
觀瓘嘗旅進迂爭極言無隱求所以補朕過失從而記之而
又書丞相已下百執事舉措以爲來代法非爾而誰是用命
爾遞遷諫列次補外郎竄定闕文裁成義類此仲尼春秋之
職業也爾等自謂何如哉其可上下心手於愛惡是非乎朗
可尚書都官員外郎依前史館修撰瓘可守右補闕充史館
修撰餘如故

范季睦授尚書倉部員外郎

勅權知倉部員外郎判度支案范季睦野有餓殍不知發狗
彘食人之食不知檢此經常之失政也而况於戎車未息飛

輓猶勤新熟之時豈宜無備乃詔執事聿求其才乘我有秋
大實倉廩僉曰季睦副予虛懷汝其往哉予用訓汝夫庶賈
五之不爭之謂也出納必各有司之常也貳上下之價則茫
昧者受弊雜苦良之貨則豪右者受贏惟一惟公乃罔不同
惟平惟實乃罔不吉爾其戒之無替朕命可尚書倉部員外
郎依前判度支案充京西京北糴使餘如故

楊汝士授右補闕

勅朕聞袞職有闕仲山甫補之蓋所以節宣天子之嗜欲而
彌縫其不及也我國家設司諫署以神明其耳目凡在茲選
實難其人監察御史楊汝士等文擅菁華言無枝葉更佐大
府爲時聞人是用置爾於左右前後拾遺補闕苟言之而不
用時予之不明或抑之而不言惟爾之不恪方我傾聽之始
命爾司聰之榮各懋厥誠無悼後悔可依前件

唐慶萬年縣令

勅朝議郎守尚書比部郎中賜緋魚袋唐慶輦轂之下豪黠
僥輕擾之則獄市不容緩之則囊橐相聚是以前代惟京令
得與御史丞分進道路以其捕逐之急也執事言爾慶推束
池鹵生息倍稱布露飭散於羅落之間而盜賊終不敢近推
是爲理真吾所求之劇令也無或畏避以艱憚發可守萬年
縣令餘如故

裴注侍御史

勅諸道鹽鐵轉運東都留後兼侍御史裴注等法者古今所
公共也一日去之則百職盡墜是以秦漢以降御史府莫不
用剛果勁正之士以維持紀綱季代而還埋輪破柱之徒絕
不復出朕甚異焉去歲以來比命御史丞爲宰相益欲慰薦
人之不敢爲也爾等或以學文當僧孺慎揀之初

元集四十七
遇朝廷渴用之日又安可迴惑顧慮於豪黠而姑以揖讓步趨之際爲塞職乎可依前件

李珣監察御史

勅前監察御史裏行李珣比制多以詳練法理者行於御史府或滿歲即真或不時署位亦試可之義也以爾珣文學周敏操行端方執喪有聞俯以就制復爾故秩勉修乃誠可行監察御史

王永太常博士

勅前東都留守推官將仕郎兼監察御史王永朕明年有事于南郊謁清宮朝太廟繁文縟禮予心懽然雖舊章具存而其思問求可以教諸生習儀於朝廷者有司以永來上永其所職無令觀聽者有云可守太常博士

李從易宗正丞

勅朝議郎京兆府士曹參軍李從易昔劉氏子孫在屬籍者
十餘萬我唐光有天下二百餘年伯仲叔季幼子童孫可勝
道哉第其賢能以次序昭穆皆吾宗寺之職也凡在選任每
難其人以爾天屬謹良修明吏理檢身好學有儒者法儀宗
長以聞朕不敢議承上莅下無忌敬恭可守宗正寺丞

盧均等三人授通事舍人

勅守門下省符寶郎賜緋魚袋盧均等辨色而朝百辟輯瑞
以會萬方正錯立族談之儀宣注意登庸之命鏘鏘濟濟進
退以時名為侍臣以贊導吾左右者通事舍人之任也今郊
丘有日事務方殷爾等各茂聲光副朕茲選宜膺寵命無廢
國容可依前件

顏峴右贊善大夫

勅安邑解縣兩池推鹽巡官監察御史裏行顏峴古者公卿

之子代爲公卿所以貴貴也況賢者之後死政之孤寧繫班
資以礙升獎惟爾峴嘗與從父太師深犯蜂蠆毒螫之下太
師沒焉爾之不回幸而能脫終超逆地來謁奉天列聖念功
訪求太師之後有司昧蔽不以爾聞今朕將建東朝深思贊
諭異時使朕愛子知忠孝之道如爾峴吾何患焉可守太子
右贊善大夫餘如故

荆浦左清道率府率

勅奉天定難功臣壯武將軍行右清道率府率上柱國賜紫
金魚袋左龍武軍宿衛荆浦等初朕宅憂西朝祇受丕訓爾
或執携金吾清道前馬或操撓戈戟立陞周廬星拱翼舒誰
何不若迺詔超陟因及序常用報有勞且升久次各揚其職
無弃朕司可

王惠超左清道率府率

勅奉天定難功臣壯武將軍守右內率府率充左街副使上
柱國王惠超等率侍衛以導從吾於黃麾左右者皆東朝之
勤吏也乘我出震之憂逢時作解之慶咸當序進式示加恩
並列周防宜勤夙夜可依前件

元氏長慶集卷第四十七

元氏長慶集卷第四十八

制誥

崔弘禮鄭州刺史

元佑洋州刺史

索重光雅州刺史李踐方大理寺丞

齊巽饒州刺史王堪禮州刺史

元萸杭州刺史

韓察明州刺史

韋行立處州刺史

王進岌冀州刺史

論倚忻州刺史

王元琬銀州刺史

陳諫循州刺史

萬璟皓端州刺史

趙真長戶部郎中兼侍御史

王沂河南府永寧縣令

吉旼京兆府渭南縣令

駱怡壽州長史

裴溫兼監察御史裏行充清海軍節度叅謀

韓克從太子通事舍人

崔方實試太子詹事

李歸仙鎮州右司馬

齊煦華州定縣令

韋珩京兆府美原縣令

裴訓檢校尚書庫部郎中充河南節度判官

蔡少卿兼監察御史

李立則檢校虞部員外郎知鹽鐵東都留後

常亮元權知橋陵臺令

杜載監察御史

崔旣檢校都官員外郎兼侍御史

崔弘禮鄭州刺史

勅朕讀詩至于羔裘緇衣之章未嘗不三復沉吟蓋明有國
善善之功且思舍命不渝之君子也春秋時鄭多良士是以
師子大叔之政而群盜之氣替消聞穎考叔之言而孝子之
心不匱山川在地日月在天今古雖殊人存政舉文林郎守

相州刺史兼御史中丞賜紫金魚袋崔弘禮操心尚氣餘力有文感慨風雲號爲奇士累更大郡備有休聲予聞則多未校其實侍中弘正以課來上書爲第一不有升陟謂之蔽能得於信臣予用丕允郊圻密邇美惡日聞爾其歌鷄鳴以自勤稽風雨以守度與我共理副其所知可使持節鄭州刺史餘如故

元佑洋州刺史

勅朝散大夫守京兆尹上騎都尉元佑風俗之薄厚由長吏之所尚也聞爾佑以甲乙科爲校書郎甚有名譽一朝以先臣不幸爲黜而自晦其身者二十年何其爲子之多也自歷朝序仁聲益彰不雜風塵而微猷遂遠洋州近郡美惡足以流京師將以慈惠廉讓之道長理之此吾有望於爾矣可使持節洋州刺史

元集卷八
索重光雅州刺史李踐方大理寺丞

勅盧國郡貫平羌江帶邛峽關西南蠻經略之地也大理寺
專獄犴視刑書我國家生人之司命也任非其才爲患不細
前鄜坊丹延等州觀察判官侍御史內供奉賜緋魚袋索重
光佐觀風於鄜時聞有能名前湖南都團練判官兼監察御
史李踐方叅練卒於湘中號爲柔立宜當慈惠之選且盡哀
敬之心姑務勝殘無或枉撓佇爾布政叶予好生重光可使
持節雅州刺史散官勲賜如故踐方可大理寺丞

齊奘饒州刺史王堪澧州刺史

勅尚書刑部郎中齊奘岳州刺史王堪等隸江之西饒爲沃
野澧亦旁荆之劇郡而鄱陽有鎔銀擷茗之利俗用僇輕政
無刑威盜賊多有沅湘間沉怨抑激有屈原遺風吏無廉平
人用愁苦惟爾奘洎堪等皆踐臺閣丞歷名部號爲良能俾

分兩地之憂佇聽二天之諺嗟可使持節饒州刺史堪可使持節澧州刺史餘如故

元萁杭州刺史等

勅饒州刺史元萁等自天子至于侯甸男邦大小之勢不同子育黎元其揆一也是以郎官出宰百里牧守入爲三公此所以前代稱理古也近俗偷末倒置是非省寺以地望自高郡縣以勢卑自劣盤牙不解稂莠不除比比有之患由此起今餘杭鍾離新安順政三有財用一隣戎狄將有所授每難其人以萁之理課甄明以弘度之奏議詳允以玄亮之學古從政以公達之守道立身僉命爲邦庶可勝殘而去殺矣敬奉詔條用慰羣獨可依前件

韓察明州刺史等

勅朕子育黎民保乎混一物之不至將我德澤流布于遠邇

者其惟良二千石乎前京兆府富平縣令韓察等久於吏職
皆著能名昔嘗奉詔風聲尚在或歷居郊侍惠養有方命
汝臨人勿違其俗天明近於海鵲則姦生通理於巴急則吏
擾汚當泄會滯則怨起推是三者引而伸之然後可以憂人
之憂矣爾其勉之可依前件

韋行立處州刺史

勅守衛尉少卿襲邦國公韋行立聞爾貴遊之子也出入省
寺二十餘年終無尤違斯亦鮮矣江南諸郡戶籍非少皆有
賦入之難爾爲吾往理縉雲以宣朕化無虐憚獨俾傷惠和
可使持節處州刺史

王進岌冀州刺史

勅元從奉天定難功臣行右羽林軍大將軍兼御史大夫王
進岌冀方陶堯之所理也其俗質強有古人遺風兵興已來

習爲奮武之地非勇毅仁隱之者不能兼牧其畝以爾戰伐
居多班資已重副朕茲選必有可觀夫理亂繩維緩之翼遂
之政也忠信可以服暴強仲尼之言也率是兩者以臨其人
吾無憂於千里之內矣式兼亞相周賁外臺可開府儀同三
司使持節行冀州刺史兼御史大夫充本州團練守捉使功
臣勲封如故

論倚忻州刺史

勅前使持節守忻州刺史賜紫金魚袋論倚日者議鎮之勞
例皆甄獎有美能泌早聞其勤因以泌爲忻州刺史會泌隱
惡彰敗不終其任司空度上言前刺史倚忻人懷之復換他
守人用不協遂仍■以復於忻勉居舊邦無替前効可使
持節忻州刺史

王元琬銀州刺史

勅夏綏銀等州節度

檢校太子詹事王元琬河朔之

間豐有水草爾能當事多以畜擾爲事吏二千石已上不能拊循競致侵削難其蹄角齒毛之異廉者半價而買貪者豪奪其良困於誅求起爲盜賊朕甚患焉近以戎臣祐旁領四郡奉宣詔條祐以元琬僉曰公幹乞爲圍陰罔或不減貽祐之恥可使持節都督銀州刺史充本州押蕃落使餘如故

陳諫循州刺史

勅封州刺史陳諫倜儻好奇之士常患於不慎所從負累於俗過而能改人其捨諸以爾諫敏於儒學志於政經自理臨封尋彰美化分憂是切滿歲宜遷始求循吏之才以撫遠方之俗爾其樹德朕不記瑕可使持節循州刺史

萬憬皓端州刺史

勅前順州刺史借紫金魚袋萬憬皓赦所以宥不幸也爾爲

郡守無違詔條而以疾罷去非不幸歟今朕還爾符印俾臨高要之人守吾憲章憊則有辟可使持節端州刺史餘如故

趙真長戶部郎中兼侍御史等

勅臣藩洎逢吉尚書於陵所請劔南西川節度判官某官趙真長等皆以文學政事得參公選觀其列狀尉薦甚勤人各有知朕無不可矧以羊祜之風流盡在文翁之學校復興咨爾真長等無替令猷勉當毗贊淮河之師旅近息荆江之賦入素殷咨爾應等無瘵厭官以擾生聚各揚乃職用副朕懷真長可行其官依前充職應可某官充戶部巡官勾當河南淮南等道兩稅餘如故

王沂河南府永寧縣令等

勅前汴宋亳穎等州觀察推官殿中侍御史內供奉賜緋魚袋王沂前宣武軍節度推官監察御史裏行范傳規等比制

諸侯吏府罷則歸之有司以叙常秩近或不時以聞謬異前
詔朕申明之以復故典而去歲司徒弘以沂等入覲因獻其
能越在後庚之前且寵上台之請命汝好爵時予加恩勉字
邦畿無虐黎獻沂可河南府永寧縣令傳規可陝州安邑縣
令餘如故

吉改京兆府渭南縣令

勅前河南府登封縣令吉改畿邦之宰任得其人蓋有以又
我黎庶足以張吾京師也自輦轂在鎬灋洛務輕長命之善
康東人者往往移隸內史今京兆尹季同以改有幹蠱之稱
流聞于西遂陳換縣之求無替字人之術可守京兆府渭南
縣令

駱怡壽州長史

勅前江州司馬貞外同正員駱怡等一肯而去其人則改行

自新之徒蔑由進矣况吏議不一負累多門原涉不必終於廉夫而周處卒爲名士此亦曰曩時之明驗也爾等受譴既久省宥斯頻各勵日新以期天秩並復資品宜乎慎終可依前件

裴溫兼監察御史裏行充清海軍節度叅謀

勅前洛陽縣尉裴溫等南極北向戶北至于桂林旁帶邕容分置征鎮而南海尤居劇地舊制輒得臨蒞諸管叅酌庶務茲惟郡僚溫等受知於人爲報不易勤盡檢白可以無瑕可依前件

韓克從太子通事舍人

勅前河中府叅軍韓克從聞爾之齒長矣而猶趨馳冉冉其何以堪今命爾爲東朝舍人以司贊引豈獨加之恩獎抑亦示其優容宜勤厥官以服休命可守太子通事舍人餘如故

崔方實試太子詹事

勅咨州兵馬使試殿中侍御史崔方實蠻蠻之間有黃賊者
踰竄窟穴代爲侵攘南人患之爲日固久而公素破其酋長
大獲俘囚檄奏以聞朕實嘉尚是用錫其使者金幣器服而
又試爲崇班俾耀遠人以勸來効可試太子詹事餘如故

李歸仙鎮州右司馬

勅成德軍節度衙前馬步都知兵馬使檢校右散騎常侍使
持節澶州刺史兼御史大夫充本州防禦使李歸仙去歲成
德換帥之際人皆効忠惟爾職在轅門位兼符竹功實居最
議當甄升而弘正以牧長親人遙領非便司武故事兼可理
戎並仍帖秩之榮式遂上台之請可檢校右散騎常侍兼鎮
州右司馬替元闕兼御史大夫餘如故

齊煦華州定縣令

勅齊煦等今一邑之長古一國之君也刑罰綱紀約略受制於朝廷大抵休戚與奪之間蓋一專於令長矣然而天下至大百吏至衆吾安能以一耳一目觀聽其短長煦等皆奉詔條爲人求漢慰薦於爾豈其等皆欺予各勉厥誠以臻于理煦可

韋珩京兆府美原縣令

勅韋珩等昔先王胥災肆赦則殊死已降無不宥免而受賄枉法者獨不在數常常罪之以此防吏吏猶有豪奪於人者朕甚憫焉日者覃懷有過籍之賦使吾百姓無聊生於下非珩等爲吾發覺則吾終不得聞東人之疾苦矣今美原藍田皆吾甸內之邑爾其爲吾養理生息以惠困窮使天下長人之吏知朕明用廉激貪之意焉

裴訓檢校尚書庫部郎中充河南節度判官

勅守京兆府醴泉縣令裴誚等昔寶憲以元舅出征大開幕府以致賢彥是以銘燕然備勲籍用叅畫也爾等佐釗斯任不細苟或無狀其思有尤可依前件

蔡少卿兼監察御史

勅容管經畧左押衙兵馬使蔡少卿蠻之有黃賊者東南人之虺蜮也經畧臣公素隳摺妖巢收復故地俾爾以如和縣等捷書來上道路悠遠其勤可嘉寵以憲官用光戎秩可

李立則檢校虞部員外郎知鹽鐵東都留後

勅李立則國有移用之職曰轉運使每歲傳置貨賄於京師其大都邑之中則委吏以專留事漕洛之間蓋其一也而柳公綽言爾強白幹舉吏難其倫乞以臺省官假借恩榮俾專劇務勉服所職無忘謹廉可

常亮元權知橋陵臺令

勅常亮元等大宗正言爾等或親或能備識其行誠盡才辦
可以修奉園陵吾先帝之衣冠所在夙夜思念哀敬不心爾
其盡恭以勗諸吏可依前件

杜載監察御史

勅杜載西旅違言侵坑縣道雖有備無患而予心惕然惟爾
載奉捷潛奏乘駟以奔吉語亟來人用胥悅念毆攘之略誠
在將軍獎飛馳之勞宜加憲秩歸語爾帥無忘乃庸可

崔旆檢校都官員外郎兼侍御史

勅崔旆等自元和以來有大勲烈於天下先帝賚予以保衡
者唯司空度度亦齊慄祗畏不自滿大慎簡其屬毗于厥政
惟旆及洙咸在茲選是用輟我糾察副其勤求惟爾敬玄舊
佐藩服効誠于長議以序遷我我鐵冠晶晶銀印受之以任
其樂所從可依前件

元氏長慶集卷第四十八

元氏長慶集卷第四十九

制誥

范傳式河南府壽安縣令

王炅兼侍御史

高端婺州長史

李昆滑州司馬

劉頗河中府河西縣令

王迪貶永州司馬

王悅昭武校尉行左千牛備身

崔適翊麾校尉守左千牛備身

姚文壽右監門衛將軍知內侍省事

徐智爰右監門衛將軍

邵常政內侍省內謁者監

宋常春內僕局令

青州道渤海授金吾將軍等放還蕃

青州道渤海等授諸衛將軍放還蕃

令狐楚等加階

蕭俛等加勳

蕭俛等加封爵

李逢吉等加階

李光顏加階

王仲舒等加階

郭釗等轉勳

武儒衡等加階

崔元略等加階

胡証授定遠將軍

諸使收淄青叙錄將士等授官爵勳

劍南西川節度使下將士叙勳

鄭氏封才人

七女封公主

王承宗母吳氏封齊國太夫人

范傳式河南府壽安縣令

勅范傳式御史府多以法律見徵苟覆視之不明於薄責而何道傳式在先朝時嘗爲監察御史會孫革以廐牧競田之

獄來上朝廷意其未具復命傳式理之不能精求盡以前使岐人衆來告我職爾之由須示薄懲用明失實嗟乎長人之吏信在言前當革非心無因故態過而不改寧罔後艱可

王昶兼侍御史

勅王昶等乃祖乃父勤勞邦家佐吾先臣相國捍患摧兇世爲勲籍故吾聞成德諸將心猶悚然爾等初喪元戎能以整送迎新舊之際不無夙夜之勞言念功庸宜升秩序憲署命之崇班特示加恩匪用彛典可依前件

高端婺州長史

勅高端等周官歲終則稽其醫事以制其食斯亦賞勞之也爾等皆執藝術待詔公車和六飲六膳以會其時察五色五聲以知其變朕嘗因苦口必念沃心每思藥石之臣咸聽肺肝之語凡百多士無以羨疾愛予因爾厥官用警有位

李昆滑州司馬

勅李昆日者王承元以成德喪師之狀來告爾實將之能承元之意上通朝廷之澤下究昆有力焉將議獎勞是宜秩郡丞憲吏用表兼榮可權知滑州司馬兼監察御史

劉頗河中府河西縣令

勅劉頗朕以自鄜而北夷夏雜居號爲難理乃詔執事求以綏懷控壓之者皆曰頗在茲選且言其伐蔡之後常叅於懷汝之師部分弛張允協軍政遂命試領銀州郡事衆寧附邊人宜之連帥以聞議請甄獎河西近邊擇吏惟精勿吝牛刀爲我烹割可

王迪貶永州司馬

勅王迪爲吏不廉受賄六十餘萬據其贓罪合寘重條言以爲伐蔡之時陷其家屬適遭蜂蠆並爲鯨鯢尚念爾于

茲當從末減議遷郡佐無忤懷心可守永州司馬貞外置同
正貞仍所在驛發遣

王悅昭武校尉行左千牛備身

勅執千牛刀以侍奉吾左右者命子弟之選也莊憲皇后姪
王悅等或勲戚蔭餘或公卿貴胤佩觿有趨蹌之美釋褐叅
侍從之榮勉奉我朝廷之儀敬順爾父兄之教可依前件

崔適翊麾校尉守左千牛備身

勅三品子崔適等左右備身在吾旒宸之側非貴遊子弟之
可親信者不在選中爾等閭閻甚崇教誨斯至事我猶事父
畏法猶畏師勿惰勿佻以期無誨斯可與成人並行於朝廷
矣可依前件

姚文壽右監門衛將軍知內侍省事

勅姚文壽出入中外備嘗劇職靜以自勝高而益謙先皇帝

以其忠愿謹信知書有文每決務官中付以密命已事而復終無漏言朕方藉良能奪其情禮起自哀疚命爲監臨和而有常威而不侮修身處衆兩得其宜憂服旣除庸功可獎崇階厚秩兼以命之無怠慎修用副毗倚可冠軍大將軍行右監門衛將軍知內侍省事封賜如故

徐智爰右監門衛將軍

勅徐智爰邠之地后稷公劉之所理也俗饒稼穡土宜六擾內扞郊圻外攘夷狄故吾特命禮樂詩書之上將俾爲長城立監臨戎亦慎茲選以爾自更事任已著公方端介而不失人心謙和而能宣朕命寵以將軍之號仍加內省之榮復職舊藩勉終前効可雲麾將軍右監門衛將軍知內侍省事餘如故

邵常政內侍省内謁者監

勅天子有內諸臣所以叅侍奉備傳達而將外諸臣之復也其或久更事任績効甄明者必擇其良能而分命焉元從興元朝議郎行內侍邵常政等或扈從於艱難之際或服勤著廉善之名宜序班資用優階秩夫莫東司而臨象教爾無忘於肅清將成命以察戎行爾無忘於畏慎正闔闔以親賓客爾無忘於敬恭行是三者可以長守其祿位而不離於榮近矣各揚爾職稱朕意焉可依前件

宋常春等內僕局令

勅近制選內臣之善於其職者監視諸鎮蓋所以將我腹心之命達于瓜牙之士也宣義郎行內侍宋常春等皆以謹信多才得叅侍從更掌上府尤見吏能守官無毫髮之瑕勵已有冰霜之操跡其聲實可備監臨汝其往哉予用訓爾夫處衆莫若順犯衆則不安約身莫若廉奉身則不足推是兩者

引而伸之然後入可以近天子之光出可以護將軍之旅矣
罔或失墜以貽後艱勉當柱國之榮無忘立表之誓全寶可
宣德郎行內侍省官聞局令貢外置同正貢常春可徵仕郎
內侍省內僕局令貢外置同正貢

青州道渤海授金吾將軍等放還蕃

勅慎能至王姪大公則等洲東之國知義之道與華夏同風
者爾輩是也冒越深阻和會于庭予嘉乃誠命以崇秩用奮
威衛保爾恩榮無怠無違永作藩服可依前件

青州道渤海等授諸衛將軍放還蕃

勅大定順王姪大多英等我十有二衛將軍以率其屬皆匡
備左右爲吾近臣自非勲庸不以輕授以汝各贊琛賁勞於
梯航俾耀遠人宜示恩寵歸撫爾類知吾勸來可依前件

令狐楚等加階

門下朕聞君法天大臣體君命數名等威上下以兩昔漢丞相金印紫綬黃扉黑轡亦所以異車服於百辟也今朕宰相階級不稱甚無謂焉既當行慶之恩宜用加崇之典守門下侍郎同中書門下平章事賜紫金魚袋令狐楚端慎嚴恪夙夜在公按度懸衡守而不失守中書侍郎同中書門下平章事賜紫金魚袋蕭俛深敏敬恭寤寐思理伏蒲焚藁知無不爲守中書侍郎同中書門下平章事賜紫金魚袋段文昌坦易堅白風雨有常推賢與能如恐不及咨汝三后弼予一人汝爲股肱耳目以資予敷心腹腎腸以告汝汝其一乃志以奉上周乃惠以接下敬乃事以臨官是三者孫叔敖嘗用之於楚矣位愈高而士愈戴祿愈厚而人愈懷夫以朕之不敏不明尚克用濟實賴吾二三臣朝夕之誨詩云無言不酬無德不報爰因進等之詔用申交警之詞各竭乃誠同底于

道康天下平太階而後越級之賜行焉茲謂叙常非以爲報
楚可太中大夫俛可朝議大夫文昌可中散大夫餘各如故

蕭俛等加勲

某等越正月惟朕憲考集大命于朕躬宅憂昏逾罔克攸濟
惟爾俛屢贊大儀以詔予一人惟爾文昌作策度以道揚末
命俾小子審訓弗違時乃之休王功曰勲茲用報汝尚克納
誨毋忘協心銘于太常永作元輔可

蕭俛等加封爵

門下列爵惟五所以褒有德也朝議大夫守門下侍郎同中
書門下平章事上騎都尉襲徐國公賜紫金魚袋蕭俛等外
撫四夷內順百度同德比義以堯舜之道事予厥惟懋哉遂
行益地之詔俛乃讓封於弟亦協推恩開國承家永綏厥後
惟克恭敬以和神人可依前件

李逢吉等加階

其官李逢吉是朕皇子時侍讀也忠孝之訓何嘗忘之惟秘
洎璫寔惟藩臣克壯威猷用以垣翰楊造等祇事內外夙夜
惟寅並沐前恩遞升榮級上下有等式示獎章可依前件

李光顏加階

門下朕聞有天下者道德仁義以爲理城郭溝池以爲固故
曰不教人戰是謂弃之有備無患可以應卒此先王歐攘戎
狄保障黎元之大畧也五原居宥夏靈慶之中當蛇豕豺狼
之突將搤咽喉之要爰命腹心之臣厥有成功宜膺茂典邠
寧慶等州節度觀察處置等使金紫光祿大夫檢校司空兼
邠州刺史上柱國武威郡開國公李光顏氣敵三軍心師百
行有下莊之勇守之以仁有日磾之誠濟之以武叱咤則風
雲迴合間宴則罇俎周旋蓋文武之令才真古今之良將是

以淮蔡之役百勝功高青齊之師一面居最朕以蕭關尚警馬嶺猶虞五餌之詐可羞百雉之城爰度先是屬役每難其人惟爾良能果諧予願程功而不憊于素訖事而不勞于人比命有司褒乃實力僉曰古諸侯勲德優盛則就加特進以寵之我國家封植崇重有朝請一字以異之予嘉乃勤兼用兩者茲謂上賞爾惟欽哉可特進餘如故

王仲舒等加階

門下階陞所以升堂奧也歷清貫者亦由是而登進焉國朝由散官而命爲大夫者凡十一等以銀青朝散爲名者非我特制則不克授蓋門戶有榮戟之榮腰佩有龜綢之異也朝議郎守中書舍人王仲舒等或歷職清近代予格言或分命藩方宣我程品或縣車以請老或持節以臨人或親或能或勞或久皆承霈澤之慶宜當並命之榮凡爾四十有三人各

服我休命並朝散大夫餘如故

郭釗等轉勲

粵若十有二勲以馭親賢以詔勞舊以稽秩序以行慶賜而刑部尚書兼司農卿郭釗實我元舅寅亮朕躬傳師洎肇共司予言發揚書命倭貳教官長財善物証居環尹夜警晝巡堪致厥政時惟舊老高陽而下五十有六人分命內外祗勤于理越二月發大號于天下延寵庶官錫爾崇勲無替嘉命武儒衡等加階

某乙等古人以朝散大夫爲榮是以自矜於歌詠況今由是級者則服色驟加誠足貴矣儒衡等皆吾內外之臣並在賢能之選頃因慶澤第許崇階朕不食言勉當嘉命

崔元略等加階

某官某乙階之設二十有庸有事有叙有加用是四者以詔

百吏由郕而上至于元略曰加曰叙進而下至于景曰事曰庸光我侍從之臣且優致政之老詔賢詔德於是乎在堂與益近爾其敬之

胡証授定遠將軍

門下寧遠將軍兼左金吾衛大將軍御史大夫充左街使賜紫金魚袋胡証等近古赦天下則勲秩階爵因緣而行亦欲與卿大夫同美利也爾等率其屬部分義甚明皆吾勞臣是有恩獎益進榮級宜其允恭可依前件

諸使收淄青叙錄將士等授官爵勲

某等能執于戈討定逋孽功懋懋賞厥惟舊哉分命庶官秩建五等次用于十有二勲式示等威蓋以勞之小大爲上下也

劍南西川節度使下將士叙勲

門下劔南西川節度使下准制叙勲將士朝議大夫試太子家令上護軍史憲等蜀形勝之地也南控蠻蜑西搃戎羗厲禁之勞實賴汝三千八百六十有六人之力使之必報並賜崇勲各懋乃誠最率以敬可依前件

鄭氏封才人

勅古者天子設六宮以詔內理是以關雎樂得淑女憂在進賢將聽鷄鳴之詩豈惟魚貫之序鄭氏山東令族海內良家每師班女之文嘗慕樊姬之德桃姿焜耀蘭行馨香爰用擇才冀無傷善勉當選進之重無忘和平之心可才人

七女封公主

門下長女等抱子弄孫之榮貴賤之大情也朕以四海奉皇太后於南宮問安之時諸女侍側螽斯之慶上慰慈顏鴈鳩之仁內懷均養雖穠華可尚出閤未期而湯沐先施分封有

據宜加美號以表令儀可依前件主者施行

王承宗母吳氏封齊國太夫人

勅古成德軍節度鎮冀深趙等州觀察處置等使金紫光祿大夫檢校尚書左僕射贈侍中王承宗母燕國太夫人吳氏魯文在手燕夢徵蘭道以匡夫仁而訓子教日殫竭誠之操義必資忠戒陳嬰自大之心明於處順是以承宗辭代之際承元領務之初或輟哭以據床每形言於憂國人知趣向道實光明宜受進封之恩用表貫霜之節可封齊國太夫人

元氏長慶集卷第四十九

元氏長慶集卷第五十

制誥

李愬妻韋氏封魏國夫人

贈田弘正父庭玠等

贈烏重胤父承玘等

贈韓愈父仲卿尚書吏部侍郎

贈韋審規父漸等

贈田弘正母鄭氏等

追封孔戣母韋氏等

追封李逢吉母王氏等

追封李遜母崔氏博陵郡太君

追封王潛母齊國大長公主

追封王璠母李氏等

贈鄭餘慶太保

贈王承宗侍中

贈裴行立左散騎常侍

贈陳憲忠衡州刺史

贈楚繼吾等

贈于頔謚

追封宋若華

入朝奚大首領梅落悟孤等二十五人授官階制

授入朝契丹首領達于只枕等二十九人果毅別將

劉惠通授謁者監制

李愬妻韋氏封魏國夫人

勅夫尊於朝婦貴於室由古道也安有邦君之妻而無湯沐之地乎京國公李愬妻韋氏德宗皇帝之外孫也笄年事愬克有令儀天陰雖高猶執婦道持其門戶使愬有姻族之和奉其蘋蘩使愬有蒸嘗之潔愬當分閭之際終無內顧之憂者由此婦也今愬積行累功以致爵位六遷重鎮名列上台而韋氏猶限綵章未嘗開國甚不稱也因愬大名之邦式建小君之號可封魏國夫人

贈田弘正父庭珪等

門下朕聞昔者明王之以孝理天下也莫不因嚴以教敬推

類以明恩朕以眇身欽承大寶爲億兆人之君父奉十一聖之宗祧捧烏號知群臣有良弓之思瞻彼蒼念群臣有所天之感是用仲月五日申命有司大錫追崇式彰餘慶而魏博等州節度觀察處置等使魏州大都督府長史田弘正亡父贈兵部尚書庭玠等教必以忠歿而不朽茂仲弓之德而位屈當年副孔父之恭而福流來裔惟爾弘正爲朕方叔以殿大邦惟爾夷簡爲朕河間以光宗籍惟爾度爲朕呂望以司專征子有勞於王家父豈忘於錫命進以師長之贈加之保傳之尊咨爾三臣告是五廟永錫忠孝賚于邦家可依前件

贈烏重胤父承玘等

勅朕聞水積者不涸德積者不窮肆我高祖武皇帝傳序累聖逮子冲人嗣守朝廷之常不克是懼而侯甸藩服亦克用又誠賴吾邦伯庶君之不墜吾祖宗之典也追念本始無忘

爾先永錫追榮用章彞訓檢校司空使持節滄州刺史烏重胤亡父贈工部尚書承玘等根本粹茂源流浚發載誕頗牧降生申甫或並列藩方或常參鼎鼐承我制詔備陳孝思皆曰閱禮資忠實賴先臣之教欲報之德願言克從遂命褒崇以幽顯可依前件

贈韓愈父仲卿尚書吏部侍郎

勅國子祭酒韓愈父贈秘書少監仲卿等子生則射桑弧蓬矢以告四方三月孩而名之十年出就外傳孔丘雖欲遠於鯉也而猶教之詩禮所以相承先而重後嗣也然而免水火之災從師友之後服軒冕以爲卿大夫者一族幾何人惟爾愈雄文奧學秉筆者師之與緘等各用所長列宮朝右榮則至矣其父皆不及焉歿而有知能不望顯揚於地下贈以崇秩慰其幽魂推吾永懷示用怛然於此可依前件

贈韋審規父漸等

勅朕嗣立之二月五日在宥天下澤被幽顯凡百執事延崇于先而守尚書左司郎中韋審規父大理卿漸等生有列爵歿有懿行德積于身慶儲于後嘉乃令子爲吾望郎遂可有司之奏以錫先臣之命可依前件

贈田弘正母鄭氏等

門下檢校司徒田弘正母贈韓國太夫人鄭氏等詩云哀哀父母生我劬勞欲報之德昊天罔極子欲養而親不待之詞也朕有臣弘正等皆社稷之臣也或寄重股肱或親連肺腑而克忠于國克孝于家歌康公念母之詩感日殫見圖而泣朕方推廣孝以闡大猷廼詔有司深惟贈典若曰幽魏并揚實鎮之大旣以命于勲賢齊晉清河惟號之美可用光于窀穸永錫爾類予何愛焉嗚呼子爲列嶽之崇母用追封之禮

亦可謂生榮死哀孝子事親之終也惟爾欽哉無或失墜可依前件

追封孔幾母韋氏等

勅穎考叔食美而思遺其親此孝子不違於一飯也而況於萬石在前累茵在側慰心不及非贈而何尚書吏部侍郎孔幾母贈扶風郡太君韋氏等柔以睦姻明於訓子惟嬪之禮始自敬姜擇鄰之規優於孟母慶鍾嗣子皆我蓋臣祇告有司丕序先烈錫以大邑達其深誠庶無風樹之嗟且壯秋霜之節可依前件

追封李逢吉母王氏等

勅孝子之於事親也貧則有啜菽之歡仕則有捧檄之慶離則有陟屺之歎歿則有累茵之悲推而言之其揆一也不有追錫何以達情檢校吏部尚書使持節襄州刺史李逢吉母

贈平陽郡太夫人王氏等皆朕公卿之母也或象感台階生
申及甫或氣鍾河嶽非龔則黃出入恩榮羽儀中外苟無善
訓安得令人簡想徽猷用弘封邑式光子道以盛母儀可依
前件

追封李遜母崔氏博陵郡太君

勅檢校禮部尚書使持節許州刺史李遜母贈義封縣太君
崔氏等昔康公貴爲諸侯而念母之詞甚悲悲親之不逮也
曾參仕三釜而其心甚樂樂及於親也今遜等有地千里有
祿萬鍾願指氣使無不隨順所不足者其唯風樹寒泉之思
乎朕方推廣孝豈吝加恩並封啓邑之榮咸慰循陔之念可
依前件

追封王潛母齊國大長公主

勅檢校兵部尚書王潛母贈晉國大長公主於朕祖宗之姑

姊妹也始以肅雍之德下嫁於公侯淑問怡聲禮無違者訓其愛子有過嚴君不因恩澤以求郎每致忠貞而事主使勤貴富戒數廉能鬱爲勲臣實資聖善徽猷盡在典禮宜加猶狹平陽之封式廣營丘之地克宣朕命用慰潛心可贈齊國大長公主

追封王璠母李氏等

勅守起居舍人賜緋魚袋王璠母贈成紀縣太君李氏等古人云生願爲人兄欲奉養之日長也若此則及子之貴顯親之榮能幾何人是以聖王因心以設教由是揚名追孝之禮生焉朕宅帝位思弘大孝乃詔執事追用䟽封而璠等皆以諷賦語言得叅侍從欲報之歎發乎肺肝追加啓土之榮用深罷社之痛可依前件

贈鄭餘慶太保

勅朕聞仲尼歿而魯公誅之柳莊死而衛靈請往夫以區區
魯衛而猶念賢臣碩德也如是况朕小子獲承祖宗實賴一
二元老朝夕教誨以儀形于四方天胡不仁遽爾殲奪而今
而後誰其屏余故金紫光祿大夫檢校司徒兼太子少師鄭
餘慶始以衣冠禮樂行於山東餘力文章遂成儒學出入清
近盈五十年再任台衡屢分戎律凡所劇職無不踐更貴而
能謙卑以自牧嘗直行於臺閣柔睦用於閨門受命有考父
之恭待士有公孫之廣焚書逸禮盡所口傳古史舊章如因
心匠朕方咨稟庶罔昏逾神將祝予痛悼何及乞言旣阻贈
典宜加追書保養之榮用彰明允之德可依前件

贈王承宗侍中

勅天子之於百辟也公則有君臣之義私則有父子之恩生
則有列爵以報功沒則有加榮以錫命遠則罷朝以申悼近

則幸第以臨喪而況於代濟勲庸時方委遇死而可作吾何
愛焉故檢校尚書右僕射王承宗海岱孕靈弓裘襲藝詩書
禮樂稟訓於祖先勇敢謨猷自生於誠腑逮居劇鎮益辨長
材每懷戀闕之誠遂行割地之効屢陳密款方俟來朝天不
與年素志沒地表章前上忠懇備存不以二子爲憂且曰三
軍求帥承元繼志雅有兄風雄藩旣耀於連枝寵秩宜加於
幽宥上台之首左輔之崇特越曩章用明加等忠魂尚在期
爾有知可贈侍中仍令所司備禮冊命賻布帛五百段米粟
三百石委度支逐便支送

贈裴行立左散騎常侍

勅秦郡守分土疆以牧人漢刺史乘輅車而按部兼是兩者
才唯艱哉而況於鎮定遠荒經略逋寇毗倚方切忽焉薨殂
不有追崇肩彰憫悼故朝散大夫持節桂州刺史兼御史中

承裴行立積德之門代濟英哲班超奮筆志在功名酈寄秉
心義先忠孝累更事任益見良能龔遂著稱於潢池處默去
思於交趾遺風尚在錫命宜加寵以貂蟬賻之穀帛用光幽
窆式慰營魂可贈左散騎常侍賻布帛三百段米粟二百石
仍委度支逐便支送

贈陳憲忠衡州刺史

勅故元從奉天定難功臣柳川刺史陳憲忠在德宗時執羈
勒以從遂加戡難之名在憲宗時沐雨露之恩實被念功之
詔朕敬承先志崇獎舊勲爰命有司用申常典生有熊當其
軾歿有鴈隨其車可謂男子之哀榮矣可贈使持節衡州諸
軍事衡州刺史

贈楚繼吾等

勅故容州本管經略招討左押衙兼行營中軍兵馬使檢校

太子詹事楚繼吾故廉州古丘營鎮將試殿中監衛弘本等
比以荒服不虔侵掠縣道乃詔毅勇爲人毆攘而繼吾等奮
不顧身深入巢穴豺狼雖殪蜂蠆誤加方聞振臂之雄忽有
歸元之嘆其帥具上其功伐請議褒崇言念云亡尤用憫
悼不有異等孰以勸忠追有土之榮用明死政之節繼吾
可贈使持節都督容州諸軍事容州刺史弘本可贈使持節
都督邕州諸軍事邕州刺史

贈于頔謚

昔羽父爲無駭請謚於魯侯而衛君亦自稱公叔文子之跡
則考行必在於有司賜謚或行於君命久矣其官祗奉三朝
橫鎮襄漢雖便宜從事難以法繩而武毅立名實爲威克來
朝而後亦旣降心敬以事君明能知子朕以禮存錫命恩在
展親考以慮深通敏之文參用追悔前過之義深詔執事宜

謚曰思

追封宋若華

勅司徒之妻有禮齊加石窳延鄉之母有德漢置封丘生旣不渝沒亦宜及故宋若華我德宗孝文皇帝躬勤庶務寤寐以之乃命女子之知書可付信者省奏中宮而若華等伯姪季妹三英粲兮皆在選中叅掌宥密班姬裂素之詠謝氏散鹽之章琤然王音記在彤管先皇帝乙夜觀書之際亦嘗傳窈窕德象之篇於若華言念云亡禮宜加等特追封邑豈礙彝章可贈河南郡君

入朝奚大首領梅落悟孤等二十五人授官階制勅其等各以貴寶會于明庭旣飲食以勞之又爵秩以遣之式所以示懷柔於遠人也爾宜將我皇風慰彼黎獻可依前件

授入朝契丹首領達于只枕等二十九人果毅別將

勅朕聞德教加于四海則遠人斯屆余德不類而爾等寔來良用愧于厥衷是以置野廬以勞其勤委舌人以通其意始於郊迓還以禮成寵秩仍加厚意斯在被服冠冕無妄敬恭可各授

劉惠通授謁者監制

勅宣議郎內侍省宮閑局令賜緋魚袋劉惠通愿吾愛之俾在左右將我密命達于四方去盡行人之詞還致諸臣之復言必忠信事無尤違使朕不出戶而知三軍之意者爾有力焉深念其勤將以爲報階秩兼進用示恩榮可依前件

元氏長慶集卷第五十一

序

白氏長慶集序

記

永福寺石壁法華經記 翰林承旨學士記

白氏長慶集序

白氏長慶集者太原人白居易之所作居易字樂天樂天始
言試指之無二字能不誤具樂天與予書始旣言讀書勤敏與他兒
異五六歲識聲韻十五志詩賦二十七舉進士貞元末進士
尚馳兢不尚文就中六籍尤擯落禮部侍郎高郢始用經藝
爲進退樂天一舉擢上第明年拔萃甲科由是性習相近遠
求玄珠斬白蛇等賦及百道判新進士競相傳於京師矣會
憲宗皇帝冊召天下士樂天對詔稱旨又登甲科未幾入翰

林掌制詰比比上書言得失因爲賀雨秦中吟等數十章指
言天下事時人比之風騷焉予始與樂天同校秘書之名多
以詩章相贈答會予譴掾江陵樂天猶在翰林寄予百韻律
詩及雜體前後數十章是後各佐江通復相酬寄巴蜀江楚
間泊長安中少年遞相倣倣競作新詞自謂爲元和詩而樂
天秦中吟賀雨諷諭等篇時人罕能知者然而二十年間禁
省觀寺郵候墻壁之上無不書王公妾婦牛童馬走之口無
不道至於繕寫模勒街賣於市井或持之以交酒茗者處處
皆是楊越間多作書模勒樂天及予雜詩賣於市肆之中也其甚者有至於盜竊名姓
苟求售雜亂間廁無可奈何予於平水市中鏡湖傍草市名見村
校諸童競習詩召而問之皆對曰先生教我樂天微之詩固
亦不知予之爲微之也又云鷄林賈人求市頗切自云本國
宰相每以百金換一篇其甚僞者宰相輒能辯別之自篇章

已來未有如是流傳之廣者長慶四年樂天自杭州刺史以
右庶子詔還予時刺會稽因得盡徵其文手自排纘成五十
卷凡二千一百九十一首前輩多以前集中集爲名予以爲
陛下明年秋當改元長慶訖於是因號曰白氏長慶集大凡
人之文各有所長樂天之長可以爲多矣夫以諷諭之詩長
於激閑適之詩長於遣感傷之詩長於切五字律詩百言而
上長於贍五字七字百言而下長於情賦贊箴戒之類長於
當碑記叙事制誥長於實啓表奏狀長於直書檄詞策剖判
長於盡摠而言之不多乎哉至於樂天之官族景行與予
之交分淺深非叙文之要也故不書長慶四年冬十二月十
日微之序

記

永福寺石壁法華經記

元集卷五

按沙門釋惠皎自狀其事云永福寺一名孤山寺在杭州錢塘湖心孤山上石壁法華經在寺之某所始以元和十二年嚴休復爲刺史時惠皎萌厥心卒以長慶四年白居易爲刺史時成厥事上下其石六尺有五寸短長其石五十七尺有六寸座周於下蓋周於上堂周於石砌周於堂凡買工鑿經六萬九千二百有五十錢經之數經旣訖又成二石爲二碑其一碑凡輸錢於經者由十而上皆得名於碑其輸錢之貴者若杭州刺史吏部郎中嚴休復中書舍人杭州刺史白居易刑部郎中湖州刺史崔玄亮刑部郎中睦州刺史韋文悟處州刺史韋行立衢州刺史張聿御史中丞蘇州刺史李乂御史大夫越州刺史元稹右司郎中處州刺史陳祐九刺史之外搢紳之由杭者若宣慰使庫部郎中知制誥賈餗以降不附於經石之列必以輸錢先後爲次第不以貴賤老幼

多少爲先後其一碑僧之徒思得聲名人文其事以自廣予始以長慶二年相先帝無狀譴於同又明年徙會稽路出於杭杭民競相觀睹刺史白恠問之皆曰非欲觀宰相蓋欲觀曩所聞之元白耳由是僧之徒誤以予爲名聲人相與日夜攻刺史白乞予文予觀僧之徒所以經於石文於碑蓋欲相與爲不朽計且欲自大其本術今夫碑旣文經旣石而又九諸侯相率貢錢於所事由近而言亦可謂來異宗而成不朽矣由遠而言則不知幾萬千歲而外地與天相軌陰與陽相蕩火與風相射名與形相滅則四海九州皆大空中一微塵耳又安知其朽與不朽哉然而羊叔子識枯樹中舊環張僧繇世世爲畫師歷陽之氣至今爲城郭狗一叱而異世卒不可化鍛之子學數息則易成此又性與物一相遊而終不能兩相忘矣又安知夫六萬九千之文刻石永永因衆性合成

獨不能爲千萬劫含藏之不朽耶由是思之則僧之徒得計矣至於佛書之妙奧僧當爲予言不當爲僧言况斯文止於紀石刺故不及講貫其義云長慶四年四月十一日浙江東道都團練觀察處置等使通議大夫使持節都督越州諸軍事越州刺史兼御史大夫上柱國賜紫金魚袋元稹記

翰林承旨學士記

舊制學士無得以承旨爲名者應對顧問參會旅次班第以官爲上下憲宗章武孝皇帝以永貞元年即大位始命鄭公爲承旨學士位在諸學士上居在東第一閣乘輿奉郊廟輒得乘厩馬自浴殿由內朝以從揚鷄竿布大澤則丹鳳之西南隅外賓客進見於麟德則止直禁中以俟大凡大誥令大廢置丞相之密畫內外之密奏上之所甚注意者莫不專對他人無得而參非自異也法不當言用是十七年間由鄭至

杜十一人而九叅大政其不至者衛詔及門而返事通然也

禁省中備傳其事

至於張則弄相印以俟其病間者久之卒不典命也已若此則安可以昧陋不肖之槓繼居九丞相二名卿之後乎俛仰瞻睹如遭大賓每自誨其心曰以若之不俊不明而又使欲惡歌曲攻於內且決事於冥冥之中無暴揚報効之言不忿行私易也然而陰潛之神必有記善惡之餘者以君父之遇若如是而猶舉枉措直可乎哉使若之心忽而爲他人盡數若之所爲而終不自愧斯可矣昔魯共王餘晝先賢於屋壁以自警臨我以十一賢之名氏豈直自警哉由是謹其遷授書于座隅長慶元年八月十日記

元氏長慶集卷第五十一

[illegible]

元氏長慶集卷第五十二

碑銘

沂國公魏博德政碑

南陽郡王贈某官碑文銘

沂國公魏博德政碑

陛下以元年正月壬戌詔臣稹曰朕有臣弘正自魏入鎮魏人思之因守臣懇狀其德政乞文爾司予言其文以付臣拜稽首退而奏書於陛下曰始安祿山以玄宗四十四年盜幽州兵劫擊郡縣踰關據京天下掉撓肅宗征之海內甫定而夾河五十餘州或服或叛更立迭奪廢置征伐朝覲賦入之宜皆自爲意五紀四宗容受隱忍田承嗣始有魏博相衛貝澶之地承嗣卒以其地傳兄子悅悅傳緒緒傳季安旣而季安悍誕淫驕風勃蠱蠹發則喜殺左右漸及於骨肉往往顧

妻子曰安用此由是內外惴悸妻元氏因人不忍移置他所
餘一月乃卒是歲先皇帝元和之七年八月也季安子懷諫
始十餘歲衆襲能名之爲副大使而家臣蔣士則逆虐用事
士衆不分服日夜相告曰田中丞與博大孝敬於軍謹廉讀
儒家書好言君臣事儻可依倚爲將帥乎聞者皆踴躍一朝
牙旗下衆來捧附興仆地不肯起衆亦不肯去乃大言曰爾
輩即欲用吾語能不殺副大使且許吾取天子恩澤洗汝痕
穢使千萬衆知君臣父子之道從我乎皆曰諾遂殺蔣士則
等十數人以興知留後事移懷諫於外明年歸之朝蓋七年
之十月四日也興乃圖六州之地域籍其人與三軍之生齒
自寅司馬已下至於郡邑史之廢置盡獻於先帝先帝詔興
以工部尚書長魏博相衛貝瀘之地仍勅司封郎中知制誥
裴度使於興且以錢一百五十萬緡賜其軍曲赦管內使百

姓一年勿復事問者羣賑乏困褒誅之不以法者魏之人
相喜曰歸天子乃如是耶興又悉取魏之僭服異器人臣所
不當爲者斥去之先帝曰興吾六州善心者田興也使興弘
吾至正不亦可乎因名曰弘正先是魏諸賓猶僕役也將卒
無畏避弘正始求副節度以下於朝至則迎迓承奉功雖勲
將莫不乘者避謁者趨付授咨度始用賓禮先是諸將之外
有權者莫不拘劫妻子以爲固四方之來聘問者莫不防礙
出入以爲密士吏工賈限其往來人多懼愁稀復會聚至是
皆曠然矣魏之人又相喜曰人之生不當如是耶滑以水害
聞於朝請移河於衛之四十里且役衛工三萬餘詔弘正議
之皆曰壤吾地役吾人以利他邑古無有也弘正曰魏於滑
信彼此矣朝廷何異焉不時興工以教人讓魏俗丕又先帝
多之以右僕射就加焉十三年又加司空以子布之會蔡有

勞也是歲李師道燒河陰驚洛邑陰通元濟詔弘正誅之明年破賊五萬於東阿進收鄆之陽谷距其城四十里營焉二月壬戌劉悟斬師道加司徒平章事復歸於魏其年八月朝京師先帝待之有加焉乞留不獲詔加侍中以遣之又明年陛下以成德喪師詔弘正入焉初王武俊以戰朱滔功得有趙地傳子孫凡三十九年矣至承宗爲盧從史李師道所誣誤先皇帝征而赦之者再憂畏慙慙不克來覲旣而聞陛下天覆海深悉包悉受乃果自信將朝有時未行會病將歿以志付其弟承元聽命於朝陛下語宰相曰弘正在魏吾何患焉即日內出五詔詔弘正爲中書令節度於鎮且詔父子皆爲帥以大其威十一月甲寅成德獻狀曰弘正自至魏魏人哭之鎮人歌之奉宣詔條除去僭異猶魏政也且臣聞之德之至者有二政之大者有三三政一曰仁爲惠政二曰法爲

善政三曰謙爲和政二德一曰忠爲令德二曰孝爲吉德今
弘正獻魏博六州之地平淄青四代之寇入鎮冀不測之泉
可以爲忠矣祖考食宗廟父子分土疆兄弟羅軒冕可以爲
孝矣始初山東鍵閉束縛泳而游之歌而舞之可以爲仁矣
始初山東逼越廢怠裁而制之舉而用之可以爲法矣始初
山東傲恨侵取地以讓之功以助之可以爲謙矣謙法仁孝
資之以忠不曰德政謂之何哉臣請奉制以一百九十二字
付守臣懇銘之石用申約束銘曰

帝命弘正予言是聽理亂有數其道甚明亂則隱約理由亂
生旣理復亂生於旣輕唐受天命海內承平高祖太宗不荒
不寧玄宗抑厄其否乃革四十三年奄有不宅始視燕寇胡
鷄弄兒雖我寵重彼將胡爲所細所忽忽焉而懼四后垂顧
山東不夷逮我聖父殷憂儉克乘其淫驕乃伐乃殛爾視群

孽胡爲而亡僭久而大頑昏暴狂爾亦自視胡爲而昌憂畏
逼側永思悠長曩爾之無今爾之有旣克而有在克而守惟
爾惟我而今而後爾雖穹崇無忘辱詬我雖平寧無忘燕寇
銘之戎之以永聲臭

唐故開府儀同三司檢校兵部尚書兼左驍衛上
將軍充大內皇城留守御史大夫上柱國南陽郡

王贈某官碑文銘

南陽王姓張氏諱奉國本名子良以某年月日薨于家其子
岌哭於其黨曰唐制三品以上歿旣葬碑於墓以文其行我
父當得碑家且貧無以買其文卿大夫誰我肯哀者由是因
其舅捧南陽王所受制詔凡八通歷抵卿大夫之爲文者予
與焉予故聞南陽王忠功每義之然其請明日子岌狀其故
聞官閣以告曰我南陽西鄂人我高祖盈左武衛將軍閑廐

使我曾祖蘭朝散大夫沙州別駕我祖景春朝請大夫太僕少卿我父南陽王太僕府君之第某子也少學讀經史子至古今成敗之言尤所窮究遂貫穿於神樞鬼藏之間而盡得擒縱弛張之術矣大曆末始以戎服事郭汾陽於邠建中以騎五百討希烈於蔡遭太夫人喪號叫請罷遂克終制僕射張建封以壽帥移於徐始以渦口三城授於我僕射歿而徐師亂子乘亂以自立王不忍討以師二萬歸于潤德宗異之詔召至京授侍御史復職于浙西就加御史中丞又加國子祭酒是元和之元年也二年李錡叛王擒之以獻加檢校工部尚書兼右金吾衛將軍御史大夫上柱國進封南陽郡王食實封一百五十戶遂錫嘉名尋遷檢校刑部尚書充振武麟勝等州節度管田觀察處置等使復以刑部尚書兼左金吾衛將軍御史大夫歷左龍武統軍鴻臚卿就加檢校兵

部尚書轉左驍衛上將軍充大內皇城留守以疾薨壽八十
三特詔贈某官我南陽郡夫人能氏祖元皓皇朝禮部尚書
左金吾衛將軍進國公岌與嵩南陽夫人之二子也嵩任某
官岌以某官奪喪制葬以某年月日於某地岌不肖能言先
將軍之職官而不能知先將軍之勲業矣乞爲碑予按僕射
張建封以貞元十六年薨於徐徐人立其子惜求命南陽王
不義其所爲以渦之衆盡棄去由是泗濠之守皆據郡情不
能令卒帖徐由南陽王之斷其臂也元和之二年潤帥錡求
覲京師旣許之不克覲辱中貴人殺其臣寮以令下楊帥錡
以叛告朝廷甚憂之初錡筦鹽於潤有年矣削虐暴俚其下
甚畏之而庫便之藏以億計潤之師故南韓晉公之所教訓
弩勁劍利號爲難當是時初定蜀兵始散物力未完加誅於
錡甚難之憲宗皇帝不得已下誅詔不浹日露章自潤曰十

月十二日錡就擒從亂者無遺餘問其狀則曰錡旣叛以是月十一日命南陽王田少卿李奉仙率銳衆以圖池南陽王喜養士又能爲逆順言明日與二將誓所部迴討錡城守不敢出環其城是夕攻愈急錡衆壞散縋于城下遂就擒自是南陽王勲名顯於代姓卑順不伐在振武時以檢儉同士卒勞苦居餘官皆謹慎專至如不及在朝廷十餘年似無功能者未嘗圖進取薨之日家甚貧幾無以葬其身天子憐之廢視朝賻布帛給班劍鼓吹以葬之嗚呼舉三十年爲言其間至將相者凡百數耳目相遠之後非其子孫能識其姓名者十不能一二焉若南陽王縛錡弃愴鑒徐究潤自取爵位以貽不朽無幾希矣碑於其墓不亦宜乎銘曰

在昔徐師知于南陽付授兵柄 俾爲防徐喪其帥徐人恃強強以愴嗣不歸其喪我欲盡殄愴亦與亡不忍自我焚其

六集五十一
構堂我或不去愔盡必

其能久長乃挈萬衆賓

于隣疆愔果愔愔不假不狂逮及終歿全歸其吭潤錡待我不踰于行一日叛

昏荒我乃遽取歸之天王非不可殺示人不戕報愔以惠報錡以常稱示厚薄俾文相當失勇克義不伐不揚銘于墓石以永無疆

元氏長慶集卷第五十二

元氏長慶集卷第五十三

碑銘

贈左散騎常侍薛公神道碑

故中書令贈太尉沂國公墓誌銘

故京兆府鰲屋縣尉元君墓誌銘

唐故越州刺史兼御史中丞浙江東道觀察等使

贈左散騎常侍河東薛公神道碑文銘

天下萬族言多大冠冕人物者凡八姓薛其一也自晉安西將軍懿避寇汾陰後世子孫遂與裴氏柳氏爲河東三著姓近世諸薛群從伯季死喪猶相功縷者數十人迭居中外要秩皆邠州刺史寶胤之二世三世孫公諱戎字元夫父曰湖州長史贈刑部尚書同母曰贈某郡太夫人陸氏尚書景融女祖曰河南縣令贈給事中縑河南於邠州爲季子刑部五

男又終郎丹終賓客擁終御史公實刑部府君第某子今尚書兵部侍郎集賢殿學士放於公爲季弟公初不樂爲吏徒以家世多貴富門戶當有持之者曾兩弟相繼舉進士皆中選公自喜遂入陽羨山年四十餘不出李衡爲刺史能以禮下公及衡觀察江西求公爲幕中賓公許衡衡遷復爲觀察使齊映乞自佐映卒湖南觀察使李巽遽辟之未幾福建觀察使柳冕奏署書下詔公判冕觀察府中事累遷殿中侍御史冤俾公攝行泉州刺史事時貞元中寵重方鎮方鎮喜自用不用朝廷法公在郡用朝廷法不用冕所自用者冕惡之先是宦者薛盈珍譖馬總爲泉州別駕冕諭公陷總總無罪公不忍陷冕怒并囚之值冕病俱得脫公由總以義聞冕卒閩濟美代冕使福建復請公副團練事始受五品服濟美使浙東公亦隨副之轉侍御史給事中穆質有直氣愛公稱於

朝因拜尚書刑部員外郎改河南令王師出征以中貴人護
諸將州府吏迎迓館穀畏不及持畚斲於道路者相接唯公
境內按故道塗無所役且制闌閼無得授留守卒壞公制公
命寘諸獄留守怒遣將率徒略出之公不與卒致留守諸市
人皆賴之遷衢州刺史到所部視前刺史所爲皆便俗公忻
然無所改不周月而政就移刺湖州其最患人者荻塘河水
渚淤逼塞不能負舟公濬之百餘里改刺常州不累月遽刺
越州仍以御史中丞觀察團練浙東西所部郡皆禁酒官自
爲壚以酒禁坐死者每歲不知數而產生祠祀之家受酒於
官皆醕偽滓壞不宜復進於桮捲者公即日奏罷之舊制包
橘之貢取於人未三貢鬻者罪且死公命市貢之鬻者無所
禁旬月之內越俗無餘弊朝廷宜之積累歲不遷長慶元年
以疾自去九月庚申薨于蘇州之私第始生歲丁亥至是七

十五年矣天子廢視朝使使者贈賵賻祭臨且以左散騎常侍追加焉十一月庚申洎夫人韋氏葬偃師河南府君之墓左公後娶季夫人亦又歿于天子曰汭始九歲洽次之有女四人皆及其嫁公始以隱者心爲吏不尚約束不求名譽

人便安尤惡苛雜爲郡時有善歸之所部縣爲鎮時有善歸之所部郡是以在郡在鎮時無灼灼可驚者旣去人思賦歛多饒裕人然而儉於用予視其庫庾案牘盈羨無逋負予在中書時公旣歿浙東使上公所羨之財貫緡積帛之數凡三十有九萬則其去他郡也可知矣惜乎今之人揚善政者少公旣不自稱人亦莫能盡知公之所以理至於脫馬總之禍抗居守之略弛酒禁市貢橘惠施於人而歿而盈羨皆予之適知者非公之不能有多於此也性誠厚溫重然而歡愛親戚及爲大官遠近多歸之衣食婚嫁之外無餘財一旦盡

所有分遺親戚曰吾病矣爾輩各爲歸去資親戚故舊皆哭泣盡散去及公去越之日徒御不過數十人觀者嗟嘆多出涕公爲河南令余以御史理東臺自是熟公之所爲又嘗與公季弟放爲南北曹侍郎公歿矣非我傳信孰當傳焉銘曰婉婉汾州厥生九子子又生孫實大以祉祉延于公有浙之東仲氏臨汝季氏南官門戶有赫有赫斯融我祿斯美我族斯豐朋舊親戚羈離困窮無遠無邇有來斯雍公之喪矣族亦瘁止分散舟車各自鄉里有今之季悲哀不已前年孟亡今年仲死撫視遺孤瞻望墳壘何以推之古今同此貽之斯文以永來祀

故中書令贈太尉沂國公墓誌銘

長慶二年某月某日司禮氏持第一品憶弩已下備衛椎鉦鼓鳴鐃簫笳笛前導我沂國公洎某國夫人某氏合葬於某

縣某鄉某里某原先是沂國嗣子肇乞予銘墓石按沂國公
姓田氏諱某字某平州廬龍人曾祖璟官至鄭州別駕祖延
暉官至安東都護府司馬沂國既貴贈尚書右僕射父庭玠
官至銀青光祿大夫相州刺史中丞沂國既貴贈累至司空
公本諱興司空第某子幼敏雋年十八爲魏博衙前都知兵
馬使自是魏劇地劇職盡更之由太子賓客沂國公累加殿
中御史侍御史中丞秘書監元和七年同節度副使步射之
衆皆隸焉魏帥季安卒子懷諫始十餘歲惡輩樹之不累月
魏法大壞一旦萬衆相叫噪皆曰田中丞當爲帥公曰叱叱
止止衆曰何謂也公曰爾輩牽制孺子猶一累焉能受爾
輩即欲受吾使用我乎皆曰諾公曰孺子之家敢有辱者死
擅殺人者死掠財者死天子未命敢有言吾麾節者死訖吾
世敢有不從吾忠孝者死汝輩可乎皆曰可公乃狀其事於

先帝先帝大悅降工部尚書魏博相衛貝澶六州節度支度
管田觀察處置制刺節以授之而又賜緡錢赦死罪復租入
公乃獻地圖編口籍修職貢上吏貢凡魏之廢置不關於有
司者悉罷軍司馬已下皆請命於廷然後斬暴亂叙勞舊除
僭異弛禁閉家家始以燈火相會聚親戚吉凶通弔問出入
封無所詰魏之人老者聞見平時多出涕少者不知所以然
百辟四方皆奉賀明年錫嘉名又明年加僕射十三年子布
功於蔡加司空十四年帥師克東平加司徒平章宰相事八
月朝京師乞侍從先帝付以山東加侍中實封以遣之十五
年會上新即位成德表帥上曰非吾勲賢莫可入者轉中書
令以往焉是日命子布節度河陽以張之公旣入鎮去就事
法猶在魏魏之人相與立石乞文於陛下陛下詔臣積爲文
以付之先是瀛之樂壽博野入於鎮公乃奏歸之長慶元年

七月幽州亂公即日命將悉帥麾下集於境鎮人初受制未慣用於王是月二十八日潛作亂公薨于師年至五十八天子震悼罷五日朝冊贈太尉下詔徵天下兵且命子布脫縲經總魏師以自報兵勢未合布寃憤自殺遂罷討三年鎮人歸其喪詔葬有加焉嗚呼魏之法虐切疑忌諸將以才多死者公旣故爲刺史子又多才好讀書識理亂形勢孝友信義士衆多附服官望已重不宜免然而晦養謹慎物下二十年訖無禍用是建大勲更大鎮模樣聲名施於後世身以忠歿子以孝歿纍纍在墳下者如公幾何人公若干男若干女子布終魏博節度使子肇鳳翔府少尹子犛某將軍子某某官子某某官女邵氏某氏婦近世勲將尤貴富者言李郭然而汾陽西平猶不得父子並世爲節制公與子布同日登將壇諸子泊伯季龜緇金銀被腰佩者十數人不亦多乎哉銘曰

忠乎仁乎可以用於彼而不可用於此乎何魏人之不我以異而鎮人之不與我爲徒化萇弘而爲血辨青旂於葦蒲感異物之先兆豈人力之能圖送橫之客歌薤露于嗟沂公今已乎

唐故京兆府盩厔縣尉元君墓誌銘

唐盩厔縣尉諱某字某姓元氏於有魏昭成皇帝爲十四世孫曾曰尚食奉御某祖曰綿州長史贈太子賓客某父曰都官郎中岳州刺史某母曰某望閭夫人妻曰隴西李氏女子曰某曰某女曰某君始以蔭入仕四仕爲盩厔尉丁太夫人憂遂不復仕享年五十五以疾歿於衢州元和十五年四月日歸祔於咸陽縣之某鄉某里君少孤力學通五經書善鼓琴能爲五言七言近體詩事親愉愉然終身不忘嬰兒之慕奉兄恭恭然若童子之愛敬臨弟姪妻子煦煦然窮年無愠

厲居官以謹廉貞順而仁愛寮友之悍誣鄙異者游於君則
必怡然無自疑於我矣嗚呼揔是數者非古之所謂淑人君
子歟不壽不達命適然也是月二十一日猶子晦跪於予曰
某日孤子震襄祔事請銘於季父由是銘銘曰
或仁而夭或鄙而壽天乎不識人乎安究我之北原五世其
墓子子孫孫前後左右歿有令人乃克來祔斯焉克終亦又
何疚

元氏長慶集卷第五十三

元氏長慶集卷第五十四

碑銘

唐贈太子少保崔公墓誌銘

贈工部尚書李公墓誌銘

有唐贈太子少保崔公墓誌銘

公諱俊字某以孝公爲從祖父則其官族可知也沔弟濤官至大理少卿濤生儀甫官至大理丞贈刑部侍郎公即刑部之第某子母曰范陽盧氏贈本郡太君公再娶前夫人榮陽鄭之尚女後夫人范陽盧國倚女封范陽郡君七女三男三女旣嫁鄭出也兩男三女出於盧逞千牛廼明經迅挽郎公以長慶三年二月四日薨於洛陽時邕里壽至七十一年官至戶部尚書贈太子少保階至正議大夫勲至上柱國爵至安平縣開國男紫服金魚之賜其尚矣葬以其年十一月之

某日於某地公始以太廟郎再任爲東陽主簿刺史李衡一
以自得衡遷湖南賓置之府罷授宣州錄事參軍觀察使崔
某狀爲南陵會南陵賦錢三萬稅輸之戶天地相遠不可等
級由是歲累逋負人被鞭迫而又屠牛鑄錢則殺吏卒莫敢
遽止者公始至怙怙然無約束適有屠牛鑄錢之徒敗覺者
盡窟穴誅之群盜皆散走一旦命負檐者三四人悉以米鹽
醢醬之具寘於檐從十數輩直抵里中佛舍下因召集老艾
十餘人與之坐遍謂里中賦輸之粗等者吾不復問貧富高
下之大不相當亟言之不言罪且死不實罪亦死旣言之皆
筆於書然後取所負米鹽醢醬飽所從而去又一里亦如之
凡十數日盡得諸里所傳書因爲戶輸之籍有自十萬錢而
至於千百者有自千百錢而登於十萬者卒事懸於門莫敢
隱匿者是歲前逋負盡入焉宣使駭異之當去復留者凡七

載欽州闕刺史府中賓皆願去宣帥衍不遣去以公攝理之用能也累遷京兆府司錄拜侍御史轉膳部員外郎轉運使官會朝廷始置兩稅使俾之聽郡縣授公檢校膳部郎中襄州湖鄂之稅皆蒞焉且主轉運留務於江陵公乃取一大吏劾其賊其餘眇小不法者牒按之所蒞皆震竦歲餘計奏憲宗皇帝深嘉之命金紫加檢校職方郎中移治留務於楊子仍兼淮浙宣建等兩稅使尋拜蘇州刺史遷湖南都團練觀察處置使兼御史中丞潭州刺史破壞豪黠除去冗費歲中廩藏皆羨溢憲宗驛召至京城擢拜戶部侍郎判度支不累月會上新即位頃掌內外修奉景陵一日下詔移五鎮幽州鎮州賜錢皆億萬郊天地上徽名太和公主嫁可汗吐蕃請降使使者往返凡數輩幽州因將帥鎮州殺將帥食饒半天下兵自七月至十二月一出於有司則其供辦之能可知

也陛下特加工部尚書以償之會鳳翔闕節度宰相奏名皆不可上曰得之矣明日出白麻書以公爲檢校禮部尚書兼鳳翔府尹御史大夫充鳳翔隴州節度觀察處置使先是岐吳諸山多榘櫟柱棟之材而薪炭粟芻之類京師藉賴焉負氣勢者名爲相市實出於官公則求者無所與由是負氣勢者相與皆怨恨又無可爲毀乃揚言曰以崔之峭削廉隘好是非人士衆不願久爲帥陛下一旦問宰相予雖心知其不然然亦惑於衆口卒不能堅辨上意賴上仁聖不受讒乃以公爲檢校禮部尚書河南尹是後岐下諸將比比有來者予謂曰公於里閭間吾不復問矣軍怨乎吏怨乎何爲謗皆曰舉其一二可知也凡軍之怨怨不均也先是岐之軍食於者同一斛食於省者盈一一焉公乃歲以六十四萬斛盈由是言之怨乎哉吏之怨怨不厚也先是鄭少師得

上吏之俸有加焉然而後鄭者輒以所加之俸管於庫其吏以下未嘗獲一錢公乃悉出所餘命糾掾已下均取之著令曰自是加俸貯於尅府賞信易取也人人皆便之言歎憤多出涕理河南不旬月家家自謂有崔尹卒吏無敢其門識事者皆曰三五十年無是尹都者是歲七月抗疏言臣七十當致仕詞意不可遏朝廷嘉之拜戶部尚書以遂志近世未有心膽既強聲勢方穩而能自引去者明年春暴疾薨于家予與公更相知善有年矣公方氣性剛方理家理身廉儉峻直頗有文章考公之所尚仁孝友愛內外死喪婚嫁之不能自持者莫不已任之嘗以戶部侍郎爲其兄乞換一散品致仕官天子憐其意特以太子諭德與其兄至於親戚僚友間無所闕由是議論不能饒借所無者而所無者亦以起畏避之爲理尚嚴明勤於舉察胥吏輩始皆難於公然而

終卒無大過詞色朗厲若不可支梧然而下於已者能以理決之無不即時換已見此其所多也銘曰

勇怯聲佞直特勁正根平性抑厄病橫耆壽景盛由乎命我以其勁齒與位併銘于子孫用我爲鏡

唐故中大夫尚書刑部侍郎上柱國隴西縣開國男贈工部尚書李公墓誌銘

按李發事魏爲橫野將軍申國公十一世而生有唐綏州刺史明明生太子中允進德進德生昌明令珍玉珍玉生雅州別駕贈禮部尚書震公即尚書第三子諱建字杓直始以進士第二人試校秘書郎判容州招討事復調爲本官會德宗皇帝選文學公被薦上問少信臣皆曰聞而不之面唯宰相罪珣瑜對曰臣爲吏部侍郎時以文入官當校秘書者八其書則馳他人書建不馳故獨得上嘉之使居翰林中就拜左

拾遺會德宗皇帝崩鄆帥擅師于曹詔歸之公不肯與姑息
時王叔文恃幸異公意不隨卒用公意鄆果帖後一年司直
給事府會朝廷以觀察防禦事授路恕治於鄆恕即日就公
乃自貳降拜六而後許詔賜五品服供奉殿中以貳焉舍恕
復取不宜爲賓者公罷去歸爲殿中侍御史有詔天下捨三
節來獻先是襄帥均獻在邸丞相命俟節以獻之公力爭不
可意作謬官詩尋爲貢外比部郎轉兵部吏部始命由文由
部而仕者歲得調編類條式以便觀者罷成勞書凡成否之
狀急一月人皆便之遷本曹郎換兵部郎中知制誥丞相視
草時微有竄益遂不復出樂爲少京兆會仲兄尚書遜被口
詔上疏明白出刺澧州入以亞太常於禮部中覈貢士用已
鑒取文章選用多薦說者遂爲禮部侍郎遷刑部權於吏部
郎衆品一夕無他恙而奄忽將盡舉族環之請召呪妖巫搖

首若不欲者寡嫂至歛衣若禮焉競不克言而遂薨年五十
八是歲長慶元年之二月二十有三日也上爲之一日不視
事以工部尚書追命之後四月祔先君於鳳翔府某縣某鄉
某里實五月之二十有五曰夫人渭源縣君房氏容州濟之
女在太尉瑄爲猶孫生五男長曰訥始二十朴恪慤碩次第
焉二女皆十年而下長於議論用體識爲文章於朋友間好
盡言然而未嘗以勝負形喜愠進退之際幾微不苟受官法
與操行牢不奪亦未嘗皎皎自辨性絮廉而沓貪有才者昔
進之考行取友甚峻能銖兩人倫而滔滔者莫見其厚薄終
肯延薦人常爲諱避其短善承受得喪故沒身無誕歎之言
沒之日會上合百辟宴御史吏驟聞其喪聞者皆怛然愛惜
無異詞公始校秘書時與同省郎白居易元稹定死生分至
是稹與白哭泣不自勝且相謂曰杓直常自言在江陵時無

衣食賴伯兄造焦勞營爲縱兩弟游學不數年與仲兄遜舉進士並世爲公卿而伯兄先杓直歿今杓直復不以疾聞於許一旦發其喪其兄何如哉許信至果誨其猶子訥曰爾父有不朽行宜得知者銘吾悲撓不忍爲爾其告若父之執子訥遂來告曰爲誌且銘銘曰

日出入安歸今日之日是前日耶非君去此安之念君夢君兮是君耶非之死信冥冥兮安用銘此爲死而尚可識兮魚膏大夜安忍觀此詞

元氏長慶集卷第五十四

元氏長慶集卷第五十五

碑銘行狀

贈左散騎常侍裴公墓誌銘

贈太保嚴公行狀

唐故福建等州都團練觀察處置等使中大夫使
持節都督福州諸軍事守福州刺史兼御史中丞
上柱國賜紫金魚袋贈左散騎常侍裴公墓誌銘
公諱某字某河東聞喜其望也唐故長安縣令諱安期贈左
散騎常侍諱後已贈工部尚書諱郃其父祖其曾也贈晉陽
縣太君王氏其母也故清河縣君房氏其室也昭應縣令稷
虔州刺史慤蓋屋縣令及其季也進士誨進士警其子也辛
少穆李堯一陽觀李及其壻也叅軍於彭尉於雒丞於湖城
復尉於奉先主簿於太常錄事於華戶曹於京兆檢校水部

貢外郎侍御史佐於襄令於醴泉檢校庫部貢外郎侍御史
兼中丞團練觀察於福建其官也中大夫上柱國紫綬金魚
其階其勲其賜也歲某月之某日癸卯某月之某日甲辰某
月之某日其始其薨其葬也某縣某鄉某里之某原其墓也
少好學家貧甘役勞於師雨則負諸弟以往卒能通開元禮
書中甲科在湖城時杖刺史若初寵卒返致若初謝在華時
會刺史故相郢將至舊法盡取行器於人公不取給官司所
有粗陳之其他廉法不撓皆稱是刺史郢卒以上下考訓之
初狀請曰京兆尹於陵由是奏爲劇曹掾佐襄時新換帥公
爲新帥均馳撫其師會衆卒將食舊帥賓公遏之不果食旣
而均至傲很不用禮公去之在坊時歲旱廩庫空少不數年
皆羨溢在鄭時朝廷有事淄蔡驢車粟芻一出於鄭均次役
役征人用不擾義成節度光顏將出師乞自副且專留事訖

師還不絕糧饗義成換帥仍爲副皆帶刺史事理鄭凡三年
鄭人宜便觀察福建時遠俗佻剝食稅重繁急則散去緩則
偷苟持之五載不失所逮其就徵内外以才自許爲劇職者
皆開路不幸薨於楊天子聞之罷一日朝降使者賻粟帛仍
以左散騎常侍追加焉予與公姻懿相習熟及予來東自謂
與公會于途晨涉淮而夕聞其訃其子誨雅知予有舊因請
銘大凡公之行孝愛友順顯揚前人冬曹晉陽寵備幽窆而
又勤盡讓不爲競爭官卑時多爲官重者所與居重官人皆
以經慣吏理爲美談不如是安能富貴其身哉銘曰
實而無文行則不振不有好辭安知今聞我有祿位榮于子
孫亦又記誌其期不泯

故金紫光祿大夫檢校司徒兼太子少傅贈太保
鄭國公食邑三千戶嚴公行狀

曾祖方約皇利州司功叅軍贈太常少卿

祖挹之皇徐州符離縣尉

父丹皇殿中侍御史東川租庸鹽鐵青苗等
使贈禮部尚書

某州某縣某鄉某里嚴某字某年七十七

公少好學始以大曆八年舉進士禮部侍郎張謂妙選時彥
在選中不數年補太子正字歷櫟陽尉試爲大理評事福州
支使復以監察裏行爲宣歙觀察判官轉殿中兼侍御史充
團副加檢校著作郎賜章服入拜尚書刑部員外郎一年轉
太原少尹賜金紫尋加北都副留守兼御史中丞又加行軍
司馬檢校司封郎中特命爲銀青光祿大夫檢校工部尚書
河東節度支使營田觀察處置等使兼太原尹御史大夫北
都留守再命加檢校尚書右僕射三命加金紫光祿大夫檢

校尚書左僕射扶風郡開國公食邑二千戶四命加檢校司空始特命至是凡九年朝京師真拜尚書右僕射依前檢校尋以檢校司空拜荆南節度觀察支度等使兼江陵尹御史大夫進封鄭國公食邑三千戶後累歲遷山南東道節度觀察處置支度營田等使兼襄州刺史司空大夫皆如故就加淮西招撫使徵拜太子少保依前檢校司空換檢校司徒兼太子少保判光祿卿事復換太子少傅依前檢校司徒疾告久之有司上言百日不視事當絕俸特詔有司無絕俸長慶二年五月二十七日薨于家上爲一日不聽朝詔贈太保出內帑以贈賻之恩有加也初貞元中宣歙觀察使劉蕡以公勤信精盡深所委異十年之間政無細大一以咨之及蕡府除掌贊餘務德宗皇帝善公之所爲是有刑曹之命且欲任用焉會太原節度使李說嬰疾曠廢遂命副助之其實將代

說矣公事說愈謹待下愈謹及訖薨而人人皆願爲帥德宗
皇帝因人焉元和初楊惠琳反於夏公上言曰陛下新即位
惠琳不誅威去矣臣請偏師斷其頭優詔許之公乃秣芻以
載於車丞糧以曝於日齎輓輕重人利百倍惠琳誅是有金
紫大夫尚書左揆開國扶風之命焉明年賊闢劫蜀兵以叛
詔公分師以會伐今司空光顏將往會公乃悉出帳下衛以
驍果之柄以付之然後豐其資賞副以兼乘涉棧道者五千
餘騎人無徒步而進者馬有羨力兵不勞困蜀人駭竄自我
功爲多役罷是有檢校司空之命焉公之始帥太原也內外
乘馬不過千餘匹三年旱而秣之者六千匹出之於野者以
萬數及命十不能一二焉嘗大閱於并城東種落畢會旗幟
滿野周迴七十里不絕時迴鵲悔綠將軍來在會聞金鼓震
伏其在江陵也蠻酋張伯靖殺長吏劫據辰錦諸州連九洞

以自固詔公討之公上言曰緣谿諸蠻狐鼠踰王師步趨不習嵌嶮沂水行舟進寸退里晝不得戰夜則掩覆攻實危道招可懷來臣今謹以便宜未宣討詔先遣所部將李志烈齎書諭旨俟其悛心不十餘日伯靖果以隸黔六州之地乞降下公天子褒異一以委公公命志烈復往伯靖遂以其下舒秀和等來就戮詔公皆署麾下將以撫之由是六州平而伯靖亦卒爲我用荆俗不理室居架竹苦茅卑庠徧風旱摩憂熯然自火公乃陶瓦積材半入其直勉勸假借俾自爲之數月之間屢閏如化災害減少人始歌之及朝廷有淮蔡之師乃命公爲襄陽節度以招撫之旣至再旬而師濟漢器備車徒皆若素具俸秩廩祿一以資軍公之大推誠厚下善用人之所長故誅琳破闢柔伯靖秀和皆談笑指麾而人人自輸其効理身理家和易孝敬親喪不自支事兄嫂有

過人者前後四顯親而先府君位尚書先夫人封號國朋友
姻戚泳游於德宇者如歸焉自始建牙選將開幕壁於今纔
二十年矣目擊爲將相者逮不肖凡九人焉其餘從公而同
奉朝請者可知矣公之先自兩漢至隋氏郡守列侯駙馬御
史郡丞將軍刺史著作郎數百年冠冕不絕代若公之出入
更踐位與壽極其上無如也高祖協貞觀中文皇征遼爲海
東運糧使洮州都督自高祖至王考禮部府君爲政皆嚴明
無畏避初府君爲松滋江陵令恃豪賴軍目氣勢者比比皆
杖殺邑人相與刻石歌詠之先是開元天寶間安之尉京劇
挺之更右職破壞豪黠如神明至是挺之子武洎府君又著
稱有唐言剴斷者先嚴氏焉自公始用儒素謙廉見推於早
歲及爲大官益自勞謹貴貴尊尊而哀賤下於已者雖走胥
負卒幼子童孫終不得聞辱詬之言而窺急墮之容矣用是

享年七十七仕五十年一爲尚書三歷僕射六兼大夫五任
司空再踐司徒三居保傅階崇金紫爵極國公荆并襄皆天
下重地也繼爲統帥者十有四年前後秦名刺率百辟以慰
慶吉凶者凡八載然而褫免之誚不聞於耳憂悔之緒不萌
於心非夫上取信於其君下取信於其友權近不疑於畏逼
我旅賴我以安全其孰能如此哉詩所謂終溫且惠淑慎其
身於實敢信備錄聞諸有司謹狀上尚書考功積燮贊無狀
孤負明恩天付郡符官未稱責日夜憂畏豈暇爲文無何太
保公諸子以楨門吏之中恩顧偏厚具狀官閣且計日時願
布有司以旌懿行其間親承講貫子孫不得而聞者徃徃漏
略恐他人纂撰益復脫遺感念曩懷遂書行實其所行事由
荆而下皆所經見由荆而上莫非傳信飾終定謚期在至公
謹狀

元氏長慶集卷第五十五

元氏長慶集卷第五十六

碑銘

故萬州刺史劉君墓誌銘

故工部員外郎杜君墓係銘

唐故使持節萬州諸軍事萬州刺史賜緋魚袋劉

君墓誌銘

歲長慶之癸卯五月日乙亥處士祿汾以予友保極喪計於
予且告保極遺意欲予誌卒癸子哭泣受妻子賓友弔又哭
泣退叙事保極諱頗姓劉氏漢燕王子孫之在其國者皆稱
昌平人後世有清夷軍使拯爲清夷軍使時會侯希逸叛遼
海側近軍郡守將皆奔走拯獨不奔軍軍亂害及拯朝廷忠
之以平州刺史告其第平州生表裏表裏官至深州長史亦
用忠戰死於軍長史生子騫子騫官至銀青光祿大夫唐州

刺史與周增等謀潰李希烈覺皆殺之君實唐州之長子希烈不忍其幼養之麾下凡攻戰必攜去年十四五始讀書希烈死得脫舉進士文詠詞調有古時人氣候不肯學感感近一題者試一不中遂不復試復田於唐唐刺史願得君爲壻君不願爲刺史壻刺史怒暴租其田君乃大集里中諸老曰刺史謂田足以累我耶由是火其居出契書投火中盡畀諸老田弃去汝上讀書賦詩厚自期待刺史陸長源器異之三
十餘試授秘書省校書郎復以協律郎從事於鄜元和初高崇文方下蜀宰相杜黃裳以君爲大理評事畫於軍後爲壽安主簿適烏重胤以懷汝之師來伐蔡請君爲監察御史判懷汝營田事尋改節度判官賜章服是時賊始盛陳許懷汝之衆怯怯未振舉都統韓弘在大梁君乃請於烏曰青陵故城地高要得之可以據賊矣公能使我於韓可以得烏使之

韓一見奇之竟夕與語遂命陳許懷汝大梁之衆據青陵剋日遂據之自是官軍乃大振凡烏之戰陣謀取案牘書奏之事皆咨之嘗爲烏啓事京師憲宗皇帝語及陣法曰卿何以知戰對曰臣固淮西之戰者也讀書餘事耳遭太夫人喪服闋以從來所賦詩投宰相令狐楚楚屢吟賞於有文章者宰相段文昌在蜀時愛君之磊落善呼吸人遂相奏天子以君爲殿中侍御史銀州長史知刺史事先時銀之長不命於朝數十年矣諸將攝理奪其馬牛夷人苦益復叛遠君始受命指羸輸之白四足者謂予曰君爲我識之此馬苟無死不復易矣至所治党項諸羗來會聚君告以忠信廉儉皆出涕無敢違告者歲餘受代酋長拓拔建宗等七百餘衆遮擁不欲去君馳去之建宗等稍稍隨至境果以羸輸之白四足者歸京師自外無餘畜及君之歿諸羗之長不絕聘尋授河西令

侍中弘方在蒲得君喜甚因請自貳朝廷以水部員外郎兼侍御史充河中節度副使又歲餘君所善元稹爲宰相朝謂君曰君將展矣亟薦之稹竟不能用尋除萬州刺史病於汝竟以長慶三年某月日卒所寓年若干以某月日癸某所君五男二女李氏婦洎處子皆女也統明旣明越明坎明總明皆男也處士祿汾始終視其喪始君善交人凡氣志豪健尚功名者多師之報分誓且死爲收長用慈儉閭里皆愛惜少爲陸尚書長源李尚書元素鄭司徒餘慶杜司空黃裳所知群公更處重位君亦不能遂所欲烏之知且委也事以喪廢韓之器且薦也卒不獲用命也已予爲監察御史時始與君更相許與爲將相予果爲相而不能毫髮加於君非命也予罪也抑不能專善善惡惡之柄耶不然何二世死忠之家旣生如是之傑而卒不能成就之嗚呼銘曰

氣成鬱噓必爲風雲有志不洩死當能神神固不昧故吾有
云天子思我朋嫉我思雖我頓感心我不泯誓致堯舜封山
侍巡慟告君墓報君知人

唐故工部員外郎杜君墓係銘并序

叙曰予讀詩至杜子美而知小大之有所總萃焉始堯舜時
君臣以賡歌相和是後詩人繼作歷夏殷周千餘年仲尼緝
拾選練其干預教化之尤者三百其餘無聞焉騷人作而怨
憤之態繁然猶去風雅日近尚相比擬秦漢以還採詩之官
旣廢天下妖謠民謳歌頌諷賦曲度嬉戲之詞亦隨時間作
逮至漢武賦柏梁而七言之體具蘇子卿李少卿之徒尤工
爲五言雖句讀文律各異雅鄭之音亦雜而詞意簡遠指事
言情自非有爲而爲則文不妄作建安之後天下文士遭罹
兵戰曹氏父子鞍馬間爲文往往橫槊賦詩故其抑揚冤哀

存離之作九拯於古晉世風槩稍存宋齊之間教失根本士以簡慢歛習舒徐相尚文章以風容色澤放曠精清爲高蓋吟寫性靈流連光景之文也意義格力無取焉陵遲至於梁陳淫艷刻飾佻巧小碎之詞劇又宋齊之所不取也唐興官學大振歷世之文能者互出而又沈宋之流研練精切穩順聲勢謂之爲律詩由是而後文變之體極焉然而莫不好古者遺近務華者去實効齊梁則不逮於魏晉工樂府則力屈於五言律切則骨格不存閑暇則纖穠莫備至於子美蓋所謂上薄風騷下該沈宋古傍蘇李氣奪曹劉掩顏謝之孤高雜徐庾之流麗盡得古今之體勢而兼人人之所獨專矣使仲尼考鍛其旨要尚不知貴其多乎哉苟以爲能所不能無可不可則詩人以來未有如子美者時山東人李白亦以奇文取稱時人謂之李杜予觀其壯浪縱恣擺去拘束摸寫物

象及樂府歌詩誠亦差肩於子美矣至若鋪陳終始排比聲韻大或千言次猶數百詞氣豪邁而風調清深屬對律切而脫弃凡近則李尚不能歷其藩翰况堂奧乎予嘗欲件拆其文體別相附與來者爲之准特病癩未就適子美之子子嗣業啓子美之柩襄祔事於偃師次于荆雅知予愛言其大父爲文拜予爲誌辭不可絕予因係其官閥而銘其卒莫云係曰晉當陽成侯姓杜氏下世而生依藝令於輩依藝生審言善詩官至膳部員外郎審言生閑閑生甫閑爲奉天令甫字子美天寶中獻三大禮賦明帝奇之命宰相試文文善授甫曹屬京師亂步謁行在拜左拾遺歲餘以直言官出爲華州司功尋遷京兆事旋又弃去扁舟下荆楚間竟以寓卒旋殯岳陽享年五十九夫人弘農楊氏女父曰司農少卿怡四十九年而終嗣子曰宗武病不克葬歿命其子嗣業嗣業貧無

以給喪收拾乞旬焦勞晝夜去子美歿後餘四十年然後卒
先人之志亦足爲難矣銘曰

維元和之癸巳粵某月某日之佳辰合窆我杜子美於首陽
之前山嗚呼千歲而下曰此文先生之古墳

元氏長慶集卷第五十六

元氏長慶集卷第五十七

碑銘

故河陰留後元君墓誌銘

故建州浦城縣尉元君墓誌銘

唐故朝議郎侍御史內供奉鹽鐵轉運河陰留後

河南元君墓誌銘

有魏昭成皇帝十一代而生我隋朝兵部尚書府君諱某後
五代而生我比部郎中舒王府長史府君諱某君即府君之
第二子也諱某字玄度娶清河崔鄰女生四子長曰易簡榮
陽尉次從簡曲沃尉次行簡太樂丞幼弘簡長女適劉中孚
中孚早卒次嬰疾室居次適蘇京舉進士次適李殊殊妻早
夭君始以恒王叅軍附太學治春秋中授左清道府錄事叅
軍歷湖丞秩罷丁比部府君憂服闋調興平長安萬年尉

滎陽太君憂服闋除萬年丞遷監察御史知轉運永豐院事
殿中侍御史留務河陰加侍御史賜緋魚袋元和十四年以
疾去職九月二十六日歿於季弟號州長史積之官舍嗚呼
我尚書府君有大勲烈於周隋氏我比部府君積大學行摺
紳間我諸父法尚嚴家極貧而事事於喪祭賓客雖帚除薪
水不免於吾兄貞元初蝗且儉我先太君白府君貨女奴以
足食君泣曰太夫人專門戶不宜乏使令取新婦氏媵婢以
給貸向是三十年養育八男女始元和中乃復奴婢之籍焉
先府君叢集群言裁成百葉書抄君懼不得授乃日一食以
齋其心者一月先太君憐而請焉由是盡付其書是歲貨
足食之一日也日一粥而課寫千言三歲乃卒業先府君
養之歲前累月而季父侍御史府君捐館予伯兄由官阻於
蔡叔季皆十年而下遺其家唯環堵之宮耳皆曰貨是以襄

二事可也君跪言於先太君曰斯字也尚書府君受賜於隋氏乃今傳七代矣敢有失守以貽太夫人憂死無以見先人於地下由是匍匐乞以終其喪自興平長安萬年尉俸不過三四萬然奉顏色絮杓祀備吉凶來賓客無遺焉均已雖遊千里貿費毫釐未嘗不䟽之於書還啓先太君下示仲叔季且曰尊夫人慈不我責不如是自束陷不義矣其在京邑專捕盜者八年破囊橐掘盤牙不可勝數莫不刑者不懇強者不暴其在河陰也朝廷有事於滹祭累百萬之費一出於是朝令朝具夕發夕至者周五星歲而後功成役罷凡主供饋之百一於君者皆以課遷唯君終不言賞賞亦不及嗚呼君之生六十七年矣四十年事親無一日之怠三十年養下無一詞之倦撫諸弟無正色之訓而亦不至於不恭教諸子無鞭笞之責而亦不至於不令以閑處劇而吏不忍欺以

直立誠而忤不及物沒之曰三子不侍無一言之念知叔季之可以教姪也室空牆壁無一顧之憂知叔季之可以任喪祭也嗚呼愛我者張仲知我者鮑叔子生幾何懼不克報或不忘記之斯文銘曰

唐元和之己亥惟孟年十一月十六日仲月之良辰合葬我元君于咸陽縣之洪瀆川從先太君之後域而共闕于夫人崔之墳

唐故建州蒲城縣尉元君墓誌銘

君諱某字莫之有魏昭成皇帝十七世而生其官某君即其官之次子也少孤母曰渤海封夫人提捧教訓不十四五其心卓然讀書爲文舉進士每歲抵刺史以上求與計去且取衣食之資以供養意義漸聞於朋友間無何宗姪義方觀察福建子幼道遠自孤其行拜言勤求請君俱去太夫人曰吾

有尔兄養足矣尔其遂行旋授建州浦城尉宗姪之心腹耳目之重以至閨門之令盡寄於君上下不怨誠且盡也又無何宗姪觀察鄜坊君亦俱去心腹耳目之寄皆如初宗姪殁子公慶號駭迷謬無所據君自始至卒任持之公慶事公雖及喜愠不敢專元和中丁封夫人喪痛毒哽咽結氣膏肓既喪遂卒不散十五年八月二日終于京城南享年五十八公慶襄其事夫人濮陽吳氏賢善恭幹生一女女亦惠和天君前累月嗚呼吳夫人可謂生人大苦矣予與君伯季之間十歲相得師學然諾出入宴游無不同也及逾三十年予亦竊位偷名官進不已然而終無濡縷之力及於君君何足悲適自悲耳銘曰

維元和庚子十一月之四日禽交加六神没于嗟元君歸此室

元氏長慶集卷第五十八

碑銘

夏陽縣令陸翰妻河南元氏墓誌銘

左千牛韋珮母段氏墓誌銘

葬安氏誌

夏陽縣令陸翰妻河南元氏墓誌銘

陸氏姊事父母以孝聞事姑如事母善伯以悌事兄睦族以惠和煦下以慈愛四者謂之吉德然而不壽也嗚呼享年三十有■歿世於夏陽縣之私第是唐之貞元二十五年十二月之初五日矣冬十月十有四日葬於河南洛陽之清風郡平樂里之北邙原從祖姑兆上永貞之元年歲乙酉朔旦景申辰在巳酉湏時順也始祖有魏昭成皇帝後失國今稱河南洛陽人焉六代祖諱嚴在周爲內史大夫以諫在隋

爲兵部尚書昌平公中君子曰忠之後必復降五世而生
我皇考府君府君諱某以四教垂子孫孝先之儉次之學次
之政成之當軋元廣德之間郡國多事由雲陽昭應尉馮翊
猗氏長遷于殿中侍御史或未環歲或未浹時而五命自天
非夫公不來則人不蘇公不遷則善不聳何是之速也董芳
書奏議者凡八人其在比部郎中也宗人得罪有不察夫玉
與珉類而不雜屈我府君爲號州別駕累遷舒王府長史
至則懸車息宴如也嘗著百葉書要以萃群言秘牒一開
則萬卷皆廢由懼夫百氏之徒一歸於我園所不樂也故
世莫得傳業至矣不峻其位不流其化時哉時哉我外
祖睦陽鄭公諱濟官族甲天下我太夫人聖善六姻
以憫默罰婢僕傭保以莊勵爲鞭笞用至於兒稚不能
而嗃嗃於他門肆我伯姊穆其嚴風柔以慈旨於人楚

矣生十四年遂歸於靈郡陸翰國朝左侍極兼宰相信之
玄孫臨汝令秘之元子魏出也魏之先文貞有匡君之大德
翰少孤事親以至行立釋褐太平主簿我姊由是而歸之逮
陸君之宰夏陽也事姑垂二十年矣姑愛之若慈母婦敬之
若嚴君雖母兄之饋不授於姑則不至而況於私其財乎閨
門之內未嘗以往復之言聞婢僕而況於相色乎及太夫人
之沉痾也夫人亦不利行有年矣然而藥不嘗於口則不進
衣不出於手則不獻冬之夜夏之日環侍其側者二三歲衣
不釋体倦不形色曾不以已之疾爲瘡矣嗚呼閔之養其親
也方於此何如吾不知也至於陸君之在疚也克哀敬以終
之舊疾暴加不數日而臺作陸君縻職他縣至則無及矣
將訣之際子號女泣問其遺訓則曰吾幼也辭報親日短
今則已矣不見吾親親乎親乎西望而絕痛夫孝於親敬於

姑順於夫友於兄弟辭世之日母不獲撫夫不及決兄不得
臨弟不得侍天乎淑善反以爲罪乎二女曰燕曰迎兩男師
道嶠夫人兄沂兄矩弟積弟積或游遠或守官或歸養皆不
克會葬陸君先是職于使又不克董喪從父季以二子襄
事禮也尊夫有命于小子積曰吾太慎夫馨香之行莫熾
于後尔其識之是用銜恤隕涕篆銘于壙銘曰
嗚呼有唐陸氏孝夫人元氏之墓

唐左千牛韋珮母段氏墓誌銘

唐少保贈僕射韋公幼子左千牛珮母曰武威段氏故衢州
司田叅軍岌之弟二女也其四代祖褒國公楊州都督贈輔
國大將軍生曾祖宣州長史諱弘珪生大父鄜州刺史諱懷
本先是僕射裴夫人早世女抱子幼思所以仁之者命主
之始長安令至于都留守持門戶主婚嫁者殆十五歲當貴

大之家處謙謙之勢然而不怨不德禮得其宜信難矣今僕射喪益不失非盛勲列之後其孰能如此哉元和四年九月十九日暴疾終於履信第享年四十定其年十二月二日葬于河南縣龍門鄉之午橋村凡韋氏之族姻聞其喪莫不親者悲踈者嘆不亦善處其身哉故僕射諸子洎諸女皆服兄弟之毋服而哀有加焉始予亡妻生不月而先夫人歿免水火之哉成習柔之性用至於粧櫛針組書誠琴瑟之事無遺訓誠有以賴焉是以予妻之言於予曰離則思思則夢夢則悲疾則泣戀戀然予不知其異所親矣決予之際切以始終於敬爲託焉今日之誌其終乎銘曰
毋以子貴貴必因人人本乎祖祖盛厥勲昔我稚室懷其仁仁莫之報沒沒而有云今復泯矣報之斯文

葬安氏誌

予稚男荆母曰安氏字仙嬪卒於江陵之金隈鄉莊敬坊沙橋外二里嫗樂之地焉始辛卯歲予友致用憫予愁爲予卜姓而授之四年矣供侍吾賓友主視吾巾櫛無違命近歲嬰疾秋方綿痼適予與信友約浙行不敢私廢及還果不克見大都女子由人者也雖妻人之家常自不得舒釋况不得爲人之妻者則又閨衽不得專妬於其夫使令不得專命於其外不得以尊卑長幼之序加於人疑似逼側以居身其常也况予貧性復事外不甚知其家之無苟視其頭面無蓬垢語言不以饑寒告斯已矣今視其篋笥無盈餘之帛無成襲之衣無帛裹之衾予雖貧不使其若是可也彼不言而予察耳以至於其生也不足如此而其死也大哀哉稚子荆方四歲望其能念母亦何時立則不能使不知其卒葬故爲誌且銘銘曰

復土之骨歸天之魂亦既墓矣又何爲文且曰有子異日庸知其無求墓之哀焉

元氏長慶集卷第五十八

Table with 15 vertical columns and 10 horizontal rows. The text is extremely faint and illegible.

元氏長慶集卷第五十九

祭文

告贈皇考皇妣文

告贈皇祖祖妣文

告祀曾祖文

告畬三陽神文

告畬竹山神文

報三陽神文

祈雨九龍神文

報雨九龍神文

告贈皇考皇妣文

嗣子稹等謹以常饌嘉蔬之奠敢昭告于皇考贈右散騎常侍皇妣贈榮陽郡太君今皇帝二月五日制書澤被幽顯小子稹叅奉班榮得用封贈越七月二十八日乃詔先夫人曰榮陽郡太君洎八月之九日復詔先府君曰右散騎常侍祇命隕越哀號不逮追念顧復若亡生次惟積洎積幼遭閔凶積未成童稹生八歲蒙駭孩稚昧然無識遺有清白業無樵

蘇先夫人備極勞苦躬親養育截長補敗以禦寒凍質價市米以給脯旦依倚舅族分張外姻奉祀免喪禮無遺者始兄集得尉興平然後衣服飲食之具粗有准而猶卑薄儉貧給不假足慈訓備至不肖乃立積初一命稹始奉朝供養未遑奄爾遺棄疊罪不死重羅纓裳遷換因循遂階榮位大有車馬豐有俸秩書扇雖存舊老已盡顧是所有將焉用之嗚呼生我者父母享此者妻子勤頓者兄嫂優餘者婢僕追孝不過於一奠薦寵不過於揚名袞袞劬勞亦又何報摧圯殞裂酸傷五情謹於先太君載誕之日祇告贈典并焚黃制以獻號慕及痛肝心伏惟尚饗

告贈皇祖祖妣文

孝孫稹敢昭告于皇祖陳州南頓縣丞贈尚書兵部員外郎府君祖妣贈晉昌縣太君唐氏惟元統運嘗宅區夏選諫賢

善俾公彭城公實能德延于後嗣降及兵部爲隋巨人抑揚
直聲扶衛衰俗戶部續紹傳于魏州蘊鬱懿粹族用繁昌始
兵部賜第於靖安里下及天寶五世其居冕昇駢比羅列省
寺一日秉朝凡十四五叔仲伯季姊妹諸姑洎友婿彌
孫歲時與會集者百有餘人冠冕之盛重於一時燕冠突來
人士駭散蔭籍腴削龜繩用稀我曾我祖仍世不偶先尚書
盛德大業屈於郎署小子稹蒙幸餘福據有方州今皇帝嗣
位之初澤被幽顯尚書府君洎滎陽郡太夫人當進封贈小
子稹伏念先尚書嘗以比部郎乞換追命朝列不許大孝莫
申是用追述先志乞回恩於祖父祖妣是歲八月十八日詔
以兵部員外郎晉昌縣太君來告第摧慕感咽五情傷殞謹
以仲冬日至修奉常荐焚獻制書昭告神几伏惟尚饗

告祀曾祖文

孝魯孫稹謹以清酌庶羞之奠敢昭告于曾祖岐州叅軍府
君禮稱祔禘蒸嘗一歲用是四者而已唐制位五品皆廟祀
廟祀亦以求吉日其餘未廟祀者各奉家傳踈數每異昔我
先府君深惟孝思終已不怠每歲換正至涉佳辰覩兒孫賓
遊相會聚未嘗無悲是用日至暨正旦仲夏之五日季秋之
初九莫不修奉祠祀以達事生之意焉逮小子稹冒華官榮
當立廟以事先人於京師會值譴出未果修構宗子積牧民
於金復不克以上牲陪祀每衣裘葛酸傷五情今謹依約廟
則每歲以二至二分暨正旦與宗稹彼此奉祀於治所始用
變禮不敢不告伏惟尚饗

告畬三陽神文

維元和十三年歲次戊戌十一月辛巳朔十日庚寅通州司
馬稹用着酒爲州人告于畬三陽之神圖籍鐫載耆艾傳述

通之盛時戶四万室耕稼駢緻謳謳湧溢閑珠玉樓稚丹
漆孝順子孫廉能吏卒軒然神功坐受嘉粟政式不虞人用
不謐奪富撓豪軋窮役疾弱者逋播悍者憤怫飢饉因仍盜
賊倉卒間落焚燔城市剽拂人民遂空萬不存一神居毀蕩
神氣蕭颯再完陋宮榻不容膝僅有鷄豕無復芬苾豺虎號
噪麋鹿幽噎厲鬼瘳人貪吏殄物闌闌丘墟門戶蒿草神又
何情受人祈乞嗚呼罔天軸地羅星走日水火炎潤原濕生
出古不獨加今不獨屈化由人與胡不爲率我貳茲邑星歲
三卒熟視民病飽聞政失自喪守候月環其七弊深力薄未
暇纖悉都虛盧持先後排比附防風俗簡用紀律功不甚農
虛不勝實乃勸■人大課芟鉅人人自利若受鞭秩旋六千
里功旬半畢嗚呼教則人功理有陰隲農勸事時賞信罰必
市無欺奪吏不侵軼非神敢煩在我有術雷蟄雨枯蒸頑曝

鬱導百來呵厲四逸非我敢知有神之吉惟我惟神各恤其恤神永是邦我非常秩繼我者誰爲神斯慄尚饗

告畚竹山神文

稹聞天好平施而特累山嶽許其嵩崇聖王亦視之公侯不惜牲幣蓋以其鎮定區宇舒貯風雲毓棟樑礎洎百穀萬貨以資養於人也至於蒙翳蒼羅惡木穴窟蛇蜥虎豺迎礙吞噬以遂其高傲堅頑之勢非天意也按通之載號神爲名山川且邇邑屋而扶道途然而不砢不穫不礎不柱藁集羆獬蔽弊道路將五十年矣實人力之不足於山也非神之過今天子斬三叛之明年通民畢賦用其閑餘夾津而南開山三十里爲來年農種張本自十月季旬周甲癸而功半就郡司馬元稹率屬攸置酒肴以告于神曰通之邑居纔二百室一旦爲神剪翳穢戮豺狼幅員六十里之地亦足爲用力於

神神其戒哉敬用嘉祝祝曰爲山輸力爲民豐食廩以萬億
蠡賊以殛報用黍稷謚用正直播布不殖滛厲不息風雨不
式假麋不比俾民無得將他山是嗇棄神之域爲神之羞永
永無極神其長哉尚饗

報三陽神文

維元和十二年九月十五日文林郎守通州司馬權知州務
元稹謹遣攝錄事參軍元叔則以清酒庶羞之奠以報于三
陽神之靈越九月始踐朔霖雨旣旬式從榮典俾吏拜稽首
祈三辰克霽于神神初饗若不踰祈幽妖靈虵不克負輸
獲熟者賴神之仁仁必報式備報典不敢諉伏惟尚饗

祈雨九龍神文

稹始長慶二年夏六月相天子無狀降居于同愁慙焦勞求
念隱思有以報陛下莫大之恩涉歲于茲理用不效冬不時

雪春不時雨越二月宿麥不滋耒耜不刺大懼茲歲患成于
人以羞陛下之獎寄刻責罪悔罔識攸凡天降疵厲必因
於人豈予心之虛削孤獨依倚氣勢耶將予刑之僭濫失所
寃哀無告耶或予政之抑塞和令開洩閉藏耶舉動云爲罔
不在我神怒天譴降災于我身我不敢讓今夫蠢蠢何罪物
物何知使不肖者長理而災害隨至無乃天之降罰不得其
所耶痛毒惻怛無所赴露惟龍司水于同同人神之謹齋戒
沐浴叩首揮淚願以小子稹爲千萬請命於龍龍其鑒之克
三曰雨我田疇其育以報不然災于予身亦足以謝伏惟尚
饗

報雨九龍神文

同州刺史元稹謹以清酌庶羞之奠敬祭于九龍之神是月
已巳刺史稹以二從事蒙受塵露百里詣龍爲七邑民赴訴

不雨予固慙惻言訖涕下親爲龍言龍意享若是夕而應庚
午而降辛未而洽癸酉而飫甲戌而霽乙亥而報報典不渝
龍祐宜永訖是嘉穀勿旱勿霤歲其有成無忘龍德尚饗

元氏長慶集卷第五十九

元氏長慶集卷第六十

祭文

祭淮瀆文

祭白學士太夫人文

祭庾侍郎太夫人文

祭亡妻韋氏文

祭亡友文

祭淮瀆文

維元和九年歲次甲午十二月朔甲辰某日辰使謹遣某用
少牢醴酒之奠昭禱于淮瀆長源公之靈浩浩靈源滔滔不
息流謙順處潤下表德清輝可鑑浮穢不匿月映澄鮮霞明
煥赭經界區夏左右萬國百川委輸萬靈受職越海貢誠載
舟竭力明哲用興凶戾潛殛恥尔吳頑蔑然蠹賊鴟張蔡郊
蟻聚淮側喪父禮虧于君志愎天子命我滌除妖慝卒乘
戈鋌嶷嶷電淬爪牙雷憤胸臆王心示懷士剪猶抑柔叛

元集卷十
一
裏取順拾逆咨尔有神逮尔有極彼暴我仁彼枉我直歸
我者昌倍我者闢不斬祠祀不湮溝洫不殄渠魁不虐畏逼
不進梯衝不耀矛戟火滅燎原人歸壽域然後潔神牛羊奉
神黍稷告神有成謂神不惑尚饗

祭翰林白學士太夫人文

維元和六年七月某日文林郎守江陵府士曹叅軍元稹謹
遣弟某姪男祗酌捧饌敢昭告于白氏太夫人之靈嗚呼分
同伯仲古則拜親既陪長幼之列遂生骨肉之恩禮由情展
情以義殷情至則爾豈獨古人况稹早歲而孤資性疎愚

不得爲達識者所顧亦不願與順俗者同趨行過二十塊然
無徒及太夫人令子藝成學茂德馨一舉而擧芳蘭署再舉
而振藻彤庭愚亦乘喧濫吹謬列莖英跡由靜合言以心誠
遠定死生之契期於日月可盟 同金石愛等弟兄每均捧

檄之祿迭慶循陔之榮用至於二門之童孺莫不達廣孝之
深情逮殯謫居東洛泣血西歸無天可告無地可依喘息
盡神魂已飛太夫人推濟壑之念憫絕漿之遲問訊殘疾告
諭禮儀減旨甘之直續盥酪之資寒溫必服藥餌必時雖白
日屢化而深仁不衰天乎是感人乎詎知不幸餘生苟活重
戴冠纓再展升堂之拜旋爲去國之行澤畔之云幾奄天
禍之無名朋友計告慰問縱橫猶恍恍而期悞忽浪浪而淚
盈處衆憫默入門屏營移疾於趨府之辰孰知潛慟視惟幼
女在側無處言情行吟倚嘆夢哭魂驚徃徃不寐晨鍾坐聽
豈由禮而當尔盖感深之所縈嗚呼仁之莫報哀不得申
太夫人以猶在感今古之同塵嗚呼哀哉太夫人族茂
仁深聖善勵諸子以學故大被澤鄰示諸子以正故寸莖方
判保參不疑戒歌非淺重則金鑾之英李則蓬山之選豈

因地而德所貴飭躬而顯何昊天之不吊罔終惠於哲人既
生賢與種德何顛顛之相因見聚螢而肄業知織縷之嘗勤
將期於萬石曾不待夫重茵嗚呼哀哉誰非顧復我實
疾有萌漸禍無因緣哀感行路况乃令子之交親雖千詞
之稠疊終萬恨之莫陳嗚呼哀哉伏惟尚饗

祭禮部庾侍郎太夫人文

外孫女甥朝議郎守尚書祠部郎中知制誥元稹謹以清酌
嘉蔬之奠敢昭告于庾氏太夫人扶風郡太君常氏之靈赫
赫韋門祁祁騫騫感蓄峻峙洛澤清源公卿委累賢彥駢繁
金玉不耗芝蘭有根厥生孟母德盛教尊訓下以順睦族以
姻猶子猶女惟弟惟昆至者處者終無間言他族之長豈無
豐溫自我均養人用不怨佛氏有云世火焚燔慧劍斷網摩
尼照惜心獨得深入妙門嗚呼良人早世素業空存

以義爲軻避喧教自髫髻成于冠婚鬱爲重器瑚璉璠璣南
北臺省東西掖垣更踐迭處以慰朝昏孝女視膳令婦執笄
封燔茅社抱弄荃蓀陔蘭始茂隙駟俄奔神不可天何足
論嗚呼哀哉白日入地盡翬羅軒燎宵燼銘旌曉翻望望
踰闕遲遲改轅佳城故兆風樹秋原哀子泣血行人斷魂稭
也幼婦時惟外孫令姓異縣謫任遐藩升堂不及執紼空敦
伏讀哀誄跪薦芳罇辭訣有禮悽愴無垠嗚呼哀哉尚饗

祭亡妻韋氏文

嗚呼叙官閥誌德行具哀詞陳薦奠皆生者之事也於死者
何有哉然而死者爲不知也故聖人有無知嗚呼死而有知
豈夫人而不知予之心乎尚何言哉且曰人必有死死何足
悲死且不悲則壽夭貴賤緣麻哭泣藐爾遺稚蹙然鰥夫
皆死之末也又何悲焉况夫人之生也選甘而味借光而

本順耳而聲便心而使親戚驕其意父兄可其求將二十年
矣非女子之幸耶逮歸于我始知賤貧食亦不飽衣亦不溫
然而不悔于色不戚于言他人以我爲拙夫人以我爲尊置
生涯於濩落夫人以我爲適道捐晝夜於朋宴夫人以我爲
狎賢隱于幸中之言嗚呼成我者朋友恕我者夫人有夫如
此其感也非夫人之仁耶嗚呼歔歔恨亦有之始予爲吏得
祿甚微塊日前之戚戚每相緩以前期縱斯言之可踐柰夫
人之已而况攜手於千里忽分形而獨飛昔慘悽於少別今
永逝與終離將何以解予懷之萬恨故前此而言曰死猶不
悲嗚呼哀哉惟神尚饗

祭云友文

嗚呼英英君子汲汲仁義壽則道亨夭亦德熾滔滔衆人沒
沒名利材不稱官老不識事紫綬榮身黃髮垂穗徒擲天年

竊耀名器石頑慧明亦有何貴君雖促齡實大其志呼吸風
雲擺落塵膩泥濇珠玉糞土名位瞪目凡流傾心俊異譽如
不聞毀亦不忌不求近効直詣殊致圈檻豺狼籠御鵬驥塹
山理海吞呵噴渭嶽立英髦粉碎庸媚德我者煌煌虐我者
惴惴赫赫其門揚揚其氣念昔日之盡言此唯君之大意天
不降年志亦沒地我輩尤在尚可晞冀故曰交本平道道通
平類身沒類存道則不墜信後圖之未忘柰目前之歎歎昔
江濱之送君每重宵而疊醉曾不易其津涯忽莫陳於喪次
孀婦號呼哀胤提稚拜我者曩日之舊童示我者絕時之遺
字埋萬恨於深心泗終天之別淚嗚呼哀哉尚饗

元氏長慶集卷第六十

集外文章

春遊

此一篇乃白樂天所書錢穆父在越模刻于蓬萊閣下今云矣

酒戶年年減山行漸漸難欲終心懶慢轉恐興闌散鏡水波
猶冷稽峯雪尚殘不能辜物色乍可怯春寒遠目傷千里新
年思萬端無人知此意閑凭小欄干

上令狐相公詩啓

時爲膳部郎中此一篇見長慶小集及舊唐書列傳

稹初不好文徒以仕無它岐強由科試及有罪譴弃之後自
以爲廢滯潦倒不復以文字有聞於人矣曾不知好事者挾
摘蕪蕪塵穢尊重竊承相公特於廊廟間道稹詩句昨又面
奉約令獻舊文戰汗悚踊慙忝無地稹目御史府謫官於今
十餘年矣閑誕無事遂專力於詩章日益月滋有詩向千餘
首其間感物寓意可備矇瞽之諷者有之詞直氣麤罪尤是
懼固不敢陳露於人唯杯酒光景間屢爲小碎篇章以自吟

暢然以爲律體卑痺格力不揚苟無姿態則陷流俗常欲得思深語近韻律調新屬對無差而風情宛然而病未能也江湖間多新進小生不知天下文有宗主妄相倣倣而又從而失之遂至於支離褊淺之詞皆目爲元和詩體稹與同門生白居易友善居易雅能爲詩就中愛驅駕文字窮極聲韻或爲千言或爲五百言律詩以相投寄小生自審不能以過之往往戲排舊韻別創新詞名爲次韻相酬蓋欲以難相挑耳江湖間爲詩者復相倣倣力或不足則至於顛倒語言重複首尾韻同意等不異前篇亦自謂爲元和詩體而司文者考變雅之由往往歸咎於稹嘗以爲雕蟲小事不足以自明始聞相公記憶累旬已來實懼糞土之墻庇以大厦便不摧壞冰爲版築之娛輒寫古體詩一百首百韻至兩韻律詩一百首合爲五卷奉啓跪陳或希構厦之餘一賜觀覽知小生

於章句中樂櫃榱桷之材盡曾量度則十餘年之邐迥不爲
無所用矣詞旨瑣劣冒黷尊嚴俯伏刑書不敢逃讓死罪死
罪

右元微之集六十卷微之以長慶癸卯鎮越大和己酉
召還坐嘯是邦閱六寒暑今種山之高木數十百章豈
亦有甘棠存其間乎橫空傑閣蓋一城偉觀扁表所書
則其州宅之卒章也微之以文章鼓行當時謂之元和
體在越則有詩人入幕府故鏡湖秦望之奇益傳所謂
蘭亭絕唱陳迹猶可想唐志著錄有長慶集一百卷小
集十卷傳于今者惟閩蜀刻本為六十卷三館所藏獨
有小集其文蓋已雜之六十卷中矣微之嘗彙其詩為
十體曰旨意可觀詞近古往者為古諷流在樂府者為
樂諷詞雖近古而止於吟寫性情者為古體詞實樂流
而止於模象物色者為新題樂府聲勢公順屬對穩切

者為律詩以七言五言為兩體稍存寄與與諷為係及
為律諷撫存感往者取潘子悼亡為題暈眉約鬢匹配
色澤劇婦人之恠豔者為豔詩今古兩體其自叙如此
今之所編頗又律呂乖次惜矣舊規之不能存也元公
才名相埒樂天守吳財歲餘吳郡屢刊其文微之留郡
許久其書獨關可乎予來踵後塵蓋相去三百三十餘
季矣乃求而刻之略能離正脫誤之一二不暇復為公
次也書成寘之蓬萊閣乾道四年歲在戊子二月二十
四日觀文殿學士左通奉大夫知紹興府兩浙東路安
撫使鄱陽郡公洪适景伯書

嘉靖壬子仲春十日東吳董氏宋本翻雕於葵門別墅

元氏長慶集校文

戊午之秋江安傅沅叔同年得見殘宋建本元微之文集卷一之十四卷五十一之六十凡二十四卷劉序目錄並存知全書六十卷與是本合惟編次微異

卷五之八並爲樂府詩即是本

二十三則通後十六卷四卷是本卷五之目錄亦詳略互見已

出宋人改編非微之十體原第此多集外文章源出越本更在建本後矣原書每半葉十二行行二十一字卷首有翰林國史院長方朱記蓋元代官書也沅叔舊有校明本所據爲錢牧齋鈔校本因併借校殘宋本於其上云異同多出羣書拾補盧校

按盧校馬係以宋越本校明馬係以宋越本校明

外甚珍視之其

尤足重者明刻卷十第五六葉各本皆闕宋本獨存

在十卷

第七葉

此古書之所以可貴也今宋本卷一之十四及序目並已歸於涵芬樓惟卷五十一之六十不知流落何所爰

從鈔補卷十第五六闕葉兩番並借傳本錄其宋本錢鈔
兩校筆增訂卷末盧校亦為采附庶幾讀是書者可與宋

本齊觀云丁卯六月海鹽張元濟校記

元氏長慶集序 元微之文集序 以下均同

目錄 目錄及卷一之十據宋刊本錢牧齋鈔校本參
虛抱經羣書拾補校文不審所據者乃宋本也

○一葉八行 鏤鏤 二十二行 竹部 下有石首縣界四字○

二葉十一行 閤閣 下同 十三行 古詩 古體詩下同○三葉

一行 書懷 下有見寄二字 樂遊園 下有見憶二字 二行 早

夏 下有見懷二字 三行 戶曹 下有言志二字 以上四題卷

六分目均同○四葉五行 樂天葬 樂天同葬○五葉七行 遊

杭越 無越字○六葉二十六行 毬囊○七葉九行 杏杏○八

葉三行 店居 四行 瀝隱○十葉二十二行 郭道士 下有不

遇二字 二十三行 得予詩 下有知通州事四字○十一葉

一行黃草峽無黃字○十二葉十二行上陽白髮人前有和

李校書新題樂府一行二十六行小胡笳下有引字○十

三葉一行去杭州下注送王師範四字五行丁溪館下有

別李景信四字六行望海亭上有酬鄭從事宴五字九

行樂爲御奉制試樂爲御賦以下四首題末均有賦字十

四行體用下有策一道三字十七行侍郎郎中○十四葉

五行芥界○十五葉二十行冊在帝字下末無敕文二字○

十六葉五行制無制字以下各題均同○十七葉六行拭拭

○十八葉五行暖哭十一行永寧永昌渭南渭昌

卷第一○一葉十一行我作山中十二行寄迹山路十三

行不失無失十四行身身形身十六行始對一到十

六七行值江陵廣輿荆十七行肌肥十七八行人生如

長安一十九行餘年來二百年十九二十行欲登斯開

峴山 二十行 析醒折醒 二十一 釀酒開門 二十一

二行 無所求皆委順 二十二行 苟求求苟 二十三行

朝野已 不懼權盧作不畏權 二十三行 至性 二十四行

金埋珠碎 二十五行 □□□ 四為俘 不立不至 二十六

行雖困 誠至○二葉二三行 造物意 化工惠盧校意不作惠

十三行 升昇下同 十八行 長馬 十九行 壯飛 二十

行 □□ 落盛 二十四行 植盧作值 俱但種 使 二十六行

樛樛 ○三葉三行 團圓 盧作團團 十一行 岑峯 二十五

行琛深 ○四葉十四行 攢攢帥師 二十四行 罇蹲 ○五

葉五行 樵狐 十四行 爪介 吠吸 二十六行 烏烏搏搏 ○

六葉二行 况况 二十三行 競盧作竟

卷第二○一葉十一行 并雜 十二行 棲路途 稽攀援 十三

行 歸家塵霧黯 纔及青雲驛 篙妻蒿棲 十四行 來叙別 吏

來謁 十五行 拾捨梨 梨 牂牁牁 牁 十六行 昔游蜀關 會

經蜀門盧校仍作昔遊 二十行 素 錢鈔作景○二葉十一

行聽能盧作德 十三行 數萬 波薦 十四行 天異呈天虬

天驥與天虬錢盧並作不異旱地虬 十五行 云自挺 方伯

夷 十九行 沽 錢作酤 二十行 戚戚 蹙蹙 二十二行 搏

諫如盧作其 二十六行 署者○四葉三行 有 錢作我 十

六行 言信 二十四行 鶴 鶴下同○五葉二行 飽 匏 筌 荃

十行 衆貫哇 盧作蛙下同 十四行 乃有 十五行 璧國充

傳璽 國作固盧作璧充傳國璽 祈 錢作析 木 千 十八行 于

凡陳不 二十二行 舞 酌 十 錢作干 鬪 偶 二十五 六行 逐

奮 錢本校云一作繞身 二十六行 何人爲鑄之干將 我爲

捧之泣此劍 近 盧作董○六葉一行 質 匣 中 邊 錢盧均作底

是用泥稽 錢作稽泥 六行 往 盧作在 九行 寶 盧作局

十行 驚防古君 十四行 鼓轟若隨 十五行 宵夕 十六

行 哇盧作蛙 未 十八行 珍馨焉安 十九行 苦若 二

十一行 劍會 二十二行 震趙頭頭 劍頭

卷第三〇一葉四行 訓訓 五行 竹部 下注石首縣界四字

七行 圖下有詩并序三字 十五行 鳥盧作鳥 寔驚盧作漠

塞 十六行 幸半 十九行 噴錢作噴 二十一 行 以盧作

亦〇二葉一行 黽盧作之 九行 莖莖 十二行 虛靈 十

四行 訓訓 十七行 鼈鼈 十九行 返盧作反 二十一 行

匣盧作柙 二十二行 悲非〇三葉八行 鑠削 二十五 行

籬羅 三十六行 地化〇四葉六行 次與後復 十一行 荆

有泥問有滑案問疑當作聞 十六行 布錢作有 二十四

行 車者車人盧校車下有也字〇五葉五行 輶舟 六行 腕

輓 十五行 又已 十九行 在枉 二十行 遽遂 二十二

行再伏乃代○六葉一行入山樵上山摧 二行雨雲金行

八行 綰盧校疑與綰同 十行 不容易 未容易 十一行

青龍 十五行 惜惜 十七行 款 十八行 願盧校疑願

卷第四○一葉四行巴蛇 下注并序二字以下六題均同○二

葉十一行達盧校疑遣 十二行州川蟲蛇 蟲下空十格盧

校今案無闕文 十五行遭輒錢作遭毒盧作遭毒輒 二

十行被破 二十四行陷錢作隱 二十五行妖妖下同○

三葉十三行邊運 十六行虛靈 二十行祝况 二十五

行注平小○四葉一行嗜嗜 三行分全 十一行妬妬

二十一行仁人盧校疑人人○五葉七行孽盧作孽 十一

行在下君在 十三行復便 十四行生王

卷第五○一葉十三行注作詩 十四行綴細 十八行上馬

馬上○二葉七行藤籐○三葉十二行牛斗牽牛 十三行

稠景

秋夜年作

十四行

中感

中腸今念

十七行

奚所

二十二行

況錢作沉

二十三行

事盧作去

○四葉五行

祗

抵○五葉一行

以似放訪

六行

師錢作帥

十一行

猗狗

封錢作俸

十二行

綿盧校疑錦

二十三行

墊墊○六葉

三行

成錢作或

十三行

嫩嬾

十四行

嬌橋下同

十七

行株林

十八行

遇錢作還

二十四行

學有○七葉三行

兄錢作吳

卷第六

○一葉五行

勸懽

十六行

若在

十七行

借錢本校

云借似惜字

桐錢作樹

十九行

織盧校疑織

二十一

行

能解

二十二行

朋明

二十五行

憂愛○二葉一行

愛憂

六行

洞動

郊郊

七行

知者相知

十八行

行行

爲行○

三葉十一行

勸懽

十三行

加盧作伽

○四葉二十五行

儼

巖○五葉六行

蹄啼

九行

霜霞

十行

並泣

十四行

映

遙依岸 十五行 槐楓 十六行 歸苦復 驟若移 二十四

行 鷺鷥 ○六葉一行 緣猿渴且 鷓旦 三行 生在 十四行

許詐 二十三行 冷冷 盧作冷冷 月 盧作雲

卷第七 ○一葉九行 深聲 十三行 垂碧 委繁 十六行 相胡

二十一 房芳 ○二葉四行 煙花 煙光 盧作棟花 八行

荒黃 十行 委萎 十三行 將誰 十四行 被繡 十五行

今春 合昏 二十二行 樓錢作縷 ○三葉一行 翔鳴 一行

之八行 解秋第二三四五首作第三四五六首九十行第六

首作第二首 四行 三二日 旦 六行 忽絲 十行 家家 盧

作口家 十一行 梔支 十七行 風楓 ○四葉十三行 疾病

二十二行 遣病 錢作續遣病 ○五葉十二行 注痰疾 二

十五行 寶寶 田田 二十六行 若 盧作我 ○六葉八行 分 盧

作身 十七行 爽 盧作陵 十八行 何呵 十九行 病 錢作

沉

卷第八 ○一葉十一行 悼僧 無悼字 二十五六行 不類哉 不

相類哉 ○二葉十一行 增僧 十九行 似以 二十行 驕嬌

○三葉一行 網羅 羅網 六行 岐歧 十一行 闌闌 田田

十二行 嫋嫋 褭褭 二十三行 團圓 團圓 ○四葉二十六行

臨 監盧校別本作漏 ○五葉八行 髀脰 十行 江文 盧校別

本作鵬心 二十行 各賦 錢作各賦詩 二十一 復 盧作

會 二十三行 返 錢作反 ○六葉二十四行 也 非

卷第九 ○一葉十五行 十首 錢鈔首下有翰林學士時作小注

六字 ○二葉十一行 撫稚 無柩 ○三葉二十四行 噎咽下

同 ○四葉一行 誓 警 便覺 便隔 二行 又 錢作久 十四行

生方 二十三行 乃此 ○五葉五行 墜 墮 十三行 細 盧校

別本作鈿 十八行 水梗 二十六行 些些 步步 ○六葉二

行坐座 十四行抵盧作祇 十七行媿盧作媿○七葉一行誘誇○八葉一行夜舊

卷第十○一葉七行先錢作元 九行琅銷瑯鋪 十一行遭

遺 十二行瑜璉珪璋稱難 十三行理措 十四行聽聘

繼黜雄推彪虎羣秀 十五行一同異冠屨盡 精闢奧流品

重 十六行賤職少蠲賦免 十七行諄諄秋 閭閻暇 十

九行寅盈 二十一行鷺露玉石 二十六行畎畝○二葉

三行敞弊 五行顧故 八行錦韉覆 綉贍被 九行坐射

掣肘錢作劈肘 十行倚倚金銀蔬闕 牛倬齏園 十一行

醕醖流觴 閑銷優樓 十二行安盧作之 十三行柄杓盧

作枋貸背歎欺 十四行方纔瞽瞍瞽瞍 二十三行病錢

作腐苦若 二十五行四三又注□意錢作年○三葉一行

朱金 三行燭焰 五行誠盧作城 九行應判 十三行

注 □□ □□ □□ □□ □□ □
本多句有永懋沽藥 十九行 辯辨 ○四葉

三行 又 褒 錢作褒 奴所奔褒 在其左 諸葛所征之路 盧校褒

奴下有之域二字 六行 注 別 錢作剔 七行 凝疑褒 盧作

褒 十行 居信 十一行 □ 別 十二行 書 □ 可謂寔 古韻

耳不足 十五行 翻調 鞞新 暫脫 忽斷 十九行 注 咬彼 咬

咬 以下五六兩葉原闕 今据宋本補入集中

卷第十一

卷十一之二十二 經羣書拾補校文 不据錢牧齋鈔本 兼參盧抱

○一葉十行 雞墀 十一行 張聯路 紙 十二行 清徹 消碎

十六行 疎 盧作疎 十七行 甘 盧作安 ○二葉八行之之

盧校下之字衍 十行 贈貽 十四行 縵 盧作綠 十五行

注 □ 茆 十七行 注 □ 軍 十八行 注 浙浙浙浙 □ 每綱紀

相撓 十九行 注 □□ □□ □□ □ 弄玉樓在鳳翔城北角 二

十一行 漸 盧作暫 ○三葉一行 趨 盧作趣 二行 蜚 髯 五

行立五 十二行肺 肺下同 十三行注盧校疑有誤 二

十行送侍御 送崔侍御○四葉二十五行常 盧作相○五葉

九行同 盧作司 十行淮橋攀 盧作乘 十二行朋儕 因依

量畫 十三行繫泊況是 載酒同泛 十五行龍 盧作瀧

十六行盡憶雄 盧作愁 二十行適 盧作釋 二十一行助

盧作動 二十四行怪 盧校注平聲二字云宋本怪作恢無

音按集中多以怪作乖用此似不當從宋本○六葉一行銀

盧作銀 三行投 盧作杯 十一行圖卷 門卷盧仍作圖卷

注云宋作開巷說但圖字亦可疑 十二行踏馬 盧作贈我

十九行抵 盧疑底

卷第十二○一葉二十行高踈 下注一作鏗鏘四字○二葉十

一行瘡病 盧作病瘡 十五行異畢 二十一行惜 盧作惜

○三葉八行韜輪 十一行惜 盧作昔 十三行亂 盧作刮

十四行 毆 駟軌 盧作軌 二十一 行 枯孤 二十二 行 日

看 二十四 行 注 予召 盧校二字似倒 二十六 行 跋跋 ○

四葉九 行 注 李十 盧校十一 下脫一字 十三 行 椰榆 椰榆

十五 行 徂 徂 十八 行 注 足下 盧校無此二字 二十二

行 凌 盧校浸訛凌 二十三 行 注 鬻鬻 盧校鬻訛鬻不成字

二十五 行 注 既 盧校似當作幾 斂 盧作飲 二十六 行 蛟

蛟 ○五葉六 行 黠 盧作黠 十 行 稹 盧作某 十二 行 怙怙

盧作帖帖 十六 行 力 盧校疑文字或才字 十八 行 愛 盧

校上有慈字 受 盧作愛 ○六葉八 行 沮 盧作怙 九 行 到 盧

作倒 十一 行 成 盧作誠

卷第十三 ○一葉十九 行 纔 盧作亦 二十二 行 注 向 盧校當

作尙 ○二葉十八 行 注 卒 率 ○三葉一 行 衰 衰掾 盧作掾

二 行 椎 錐 三 行 故 盧作收 敝 盧作敝 四 行 □ 材 五 行

鵝蛟盧仍作鵝在坐斗梢斜霄持投 六行 蘿蘿培 盧作培

七行 搬螯 蠟蠶 八行 築 築盧校宋作築疑 十七行 漠

盧作幕 暖暖 十九行 投盧作提篠篠 二十行 沙紗露盧

作霧 二十二行 惺醒書畫 二十三行 藥盧作藥 力志

至聲鐘 二十四行 興盧作欣 歌細細 粧燿燿 麥盧作綠

二十六行 郝赦○四葉八行 公童妍研 九行 裁盧作栽

十四行 涼賸 十六行 思隱 十九行 圻祈 二十三行 鄉

卿新盧作親○六葉二行 地盧作寺 二十行 心盧作方

二十五行 花盧作香

卷第十四○二葉六行 秀盧作笑○三葉二十一行 注化感盧

作感化 二十四行 果杲○四葉十四行 勢盧作分○五葉

二十三行 羈盧作拘

卷第十五○二葉二行 佗那○二葉十二三行 盧校案詩與題

不合疑有脫誤○三葉六行團圓二十行光花二十五

行多盧作夕淚盧作類○四葉五行又亦八行限恨二

十五行庇盧作在○五葉三行重直八行冰盧作水十

四行鼗鳶二十三行注壓盧作壓○六葉一行密盧校宋

本亦訛應作蜜二行癢盧作養十六行茅第

卷第十六○二葉三行注煩無煩字○四葉六行願顧十一

行注歸盧作常客泛盧作客同泛二十四行野禪○五葉

七行竿干十八行提盧作隄

卷第十七○二葉二十四行使川使東川○三葉三行注馬焉

六行川盧作平十三行竿盧作莖十六行吏使○五

葉四行明盧作晴○六葉五行暫盧作望十三行寄樂天

盧作寄杓直樂天十八行鯢鯨鯨鯢二十三行啼蹄

卷第十八○一葉十六行寮僚二十三行姑盧作拈○二葉

二十五行 援枕 ○三葉五行 送盧作重送 八行 提盧作隄

十三行 非裴 二十二行 漫漫 ○四葉二行 綽盧作倬

五行 紗莎 ○五葉十行 衍行 ○六葉二行 注經 十二行 玖

玖 二十三行 喉嚨

卷第十九 ○一葉五行 磯機下同 ○二葉七行 宿石 宿石機

十八行 墻檣 ○六葉七行 澧盧校宋作澧疑非 十二行 思

盧作死

卷第二十 ○二葉十行 牕下有注云一本仍悵望作驚起坐寒

牕作疎牕 十二行 思君君思 ○三葉五行 冰冰盧作沿

二十行 封科 二十四行 未永 ○四葉十六行 別李十一五

絕盧校宋本四絕無次首 十七行 悵悵 ○五葉十行 蛟蛟

哭笑 二十二行 玲鈴

卷第二十一 ○一葉二十行 哭盧作笑 ○二葉十行 注常盧校

當作嘗 ○三葉三行 熱盧作渴 十九行 花盧作行 索盧作

紫

卷第二十二 ○一葉十八行 照盧作點 ○三葉十九行 注 功切

○四葉十九二十行 苦思正旦正旦苦思 ○五葉十六行 注

太液上學上盧作太液池上學士 二十五行 爲盧校宋本

無爲字 ○六葉三行 寐寢

第卷二十三卷二十三之二十六 抱經三書拾補 校宋本錢牧齋鈔本 兼參

○一葉二行 樂府樂府詩以下三卷均同 十二行 古石

十六行 旨言 二十六行之盧作云 ○二葉一行 牘沐錢作

牧犢 四行 咸錢作或 七行 旁錢作傍 樂天盧校上有白

字 八行 昨梁州昨南梁州 十三行 粗明錢作親朋 十

六行 水錢作木 十九行 椎錢作搯音叨 二十四行 縱攢

○三葉十五行 歎曰錢鈔本重一歎字 ○四葉七行 夫婦

九行 絹繻 十行 注目 十一行 嫋嫋 曩曩 十六行 攸

收 二十一 行在 錢作死 二十三 行不識 錢鈔無識字○

五葉 九行 跌跌 十七行 十千 十八行 天道長 人道長

二十一 行帝 盧作皇 二十三 行天人 天人 二十四 行舜

錢作葬○六葉 六行 眼警 聘幣 九行 官宮 輝揮 十七行

客以 二十四 行生王○七葉 二十四 行但少 生產 二十

五行 鄉 錢作鄰 二十六 行村田 必為 錢作錢○八葉 二行

珠 盧作玉 七行 醉酒

卷第二十四 ○一葉 十八行 睡淚 十九行 錄綠 二十一 行

注 闢易 錢鈔下有而字 二十四 行自云 錢鈔下有某字 插

留○二葉 二行 苑 錢鈔作苑 五行 在 錢作存 十八行 用

兵 錢本兵下有雙行小注 五十 字穆宗時 嬪御多誦 稹歌宮

中號為元才子後 荆南監軍 崔峻歸朝 出稹連昌宮詞 百餘

篇進御穆宗大悅卽日拜祠部郎中知制誥○三葉二行 距

下無或作矩三字注 五行 啁錢作卓 六行 橐它 略馳

九行 震宸 十一行 雄雄 英雄 十三行 注馬 副 十五行

飛龍 龍驤 十六行 鄒鄒 ○四葉六行 永 錢作久 十七

行 震令錢作零 二十行 激激 ○五葉十五行 注其就盈故

其實就盈數 二十行 護護歌 盧作過 二十五行 胡騎 錢

鈔上有胡音二字○六葉一行 注苑 錢作宛 六行 羅 性

九行 指 盧作視 十行 注雅樂 錢鈔下有則雅樂三字 盧校

則上有部字 十三行 風雲 十五行 宋晉鄭友 錢作宋音

晉女盧作宋晉鄭女 二十行 元九 又注丞 盧作卿 二

十二行 人入○七葉九行 王皇 十行 到至 十一行 虹下

無音降二字注 十五行 言心 二十一 行 注 曾首○八葉

二十六行 托耗○九葉七行 素半親清 九行 博博

卷第二十五○一葉十行著下無一作把三字注 十三行池

地 十六行上盧作向 二十六行為爾羽毛 盧作謂爾毛

羽○二葉二行偏盧作偏 九行嬌驕 十二行雲雪 二

十二行簌簌○三葉十六行鷄鷄 十七行挾盧作拔 二

十四行無名盧校當重二字成盧作歲○四葉二行胡山盧

作胡為山 五行淥綠 二十一行忽閃○五葉二行人盧

作今颺颺 七行以有 十二行無復 二十五行大天○

六葉三行何欲欲何所欲 十四行祐祐

卷第二十六○一葉十行何河下同 十四行敲敲 二十二

行向歸○二葉四五行時一詩人 十六行頤頤 二十二

行六么綠腰下同 二十四行冰水○三葉十六行指拍○

四葉九行筭筭 十三行拍指 二十一行破舊 ○五葉

十六行注熊態下同 二十二行歌歌 二十六行頗爭盧

作事○六葉十五行注□毗 二十行趣尙趁向

卷第二十七

卷二十七之五十七據錢牧齋乃錢鈔本盧抱經

○二葉二行以相盧作而相○三葉五行瑑緣 二十行末

末○四葉五行場揚 九行埒盧作俘

卷第二十八

○一葉八行杞相 二十行求采 二十二行憂

優○二葉二十一行民人○四葉十四行悠悠盧校無此二

字 十九行尙學盧作尙儒學 二十六行植盧作殖

卷第二十九

○一葉九行邵召下同 十八行諭論○二葉三

行胡亥已盧校亥下補一固字注云宋本亦闕以史補 四

行以盧作所 六行資盧作質 十四行僚寮下同 十五

行至於武盧作用至於母 十七行近盧作匠 十九行眊

瞶眊瞶 二十一行夫盧作士 二十三行足反居上原校

云文粹作反上古 二十四行侍書原校云文粹作直講○

三葉一行 繼舜生舜 九行 洎諸王 原校云文粹作聚諸生

十一行 有人 十九行 侍郎 盧作郎中二十行同

卷第三十 一葉十六行之盧作是朴科 二葉八行之盧校

之字衍 三葉十七行 自盧作皇 四葉二行 吟 盧作研

十六行 便 盧作使

卷第三十一 一葉二十五行 受盧作授 二十六行 卿 盧

作鄉 不 三葉二十六行 家 盧作冢 四葉六行 伐 戈 盧

作成按當作弋 十行 初 盧作勅 十八行 政 盧作國 二

十行 建 盧作津 五葉一行 號名卿 盧作公卿 四行 王 盧

作至 十四行 髓 盧作肝 十九行 縣 掾 六葉二行 常 盧

作賞

卷第三十二 一葉八行 讓 盧校疑攘 十九行 外 盧作分 〇

二葉三行 銜 盧作疑 三葉七行 竦 盧作擇 十五行 言 曰

盧作喜曰

卷第三十三○一葉七行必行於下盧作必於行○二葉一行

善盧作詳○五葉三行聖朝盧作聖明四行宜盧作謂

八行登乙盧作登吏部乙十行十一行成性盧作性成

二十五行亦盧作未

卷第三十四○一葉二十六行無任盧校下有懇款屏營之至

六字○六葉十六行榮盧作萊二十二行面盧作回

卷第三十五○二葉三行宜盧作宣○四葉四行候盧作聽

十四行悲歡盧作悲傷○五葉七行尺寸盧作咫尺八行

可盧作合十行其盧校其疑共十一行極盧作北十

二行自陳盧作自陳論十七行二十年盧作二十年前

二十行狐狡

卷第三十六○三葉十三行聲盧作呼十六行酒盧作酤○

四葉七行取盧作斂

卷第三十七○一葉二十二行職盧作賊○二葉四行今被盧

作今見被十九行使盧作為二十四行之盧作志○四

葉十七八九行榮州刺史下三行盧校宋本此三行在邵膺

三行之後○五葉十七行競競二十三行分付盧作分耕

分付二十四行膀曉二十六行情刑○六葉四行釋放

放釋十九行摧摧二十一行率率者二十三行

□□加禁斷其分今

卷第三十八○一葉六行事盧校下有狀字以下四首題末均

有狀字二十一行有盧作行二十四行傳盧作轉○二

葉二十一行右件盧作以前○三葉七行百下有已來二字

十四行緣盧作沿十八行敝弊

卷第三十九○一葉八行三合盧作九合○二葉一行在盧作

以

卷第四十

○一葉九行 剗盧作文 十三行 約束盧作束束 ○

二葉六行 勗盧作勤 七行 又盧作夫 ○三葉六行 悽盧作

懽 十二行 抑盧作亦 二十行 能盧作以 二十一 行 慝

盧校疑匿 二十三行 有盧作當 ○四葉十二行 底盧作安

卷第四十一

○二葉二十二行 誠盧作式 ○三葉一行 也盧作

耶 十八行 滌盧作掃清 ○四葉一行 纘盧作不纘

五行 竊盧作切 ○五葉五行 霆盧作電 八行 逆命盧作懸

疣 十行 一室盧校一字疑衍 十三行 李盧作丁

卷第四十二

○一葉三行 制盧校宋本題下俱無制字 十三

行 子盧校疑予 十七行 聞所未聞盧作開吾所開 十九

行 其西備盧作則西被 二十六行 爲之盧作爲人之 ○二

葉八行 夜盧作夕 國有元老盧作國老尙在 二十行 俟候

○三葉二十行 徇 盧作修 二十四行 門下朕 盧作勅朕 ○

四葉五行 願 盧作念

卷第四十三 ○一葉十三行 客 盧作憚 ○二葉一行 棧 祿 三

行 聘 盧作聘 五行 右 盧作左 二十一行 方 盧作和 ○三

葉八行 ☐ 夫 ○四葉十五行 ☐ 元

卷第四十四 ○一葉十行之 盧作所 ○二葉二十一 行 靡 盧作

飛 ○三葉十三行 延 盧作近 二十一 行 可用是北 盧作用

是比類 二十二行 朕 盧作予 ○四葉十五行 ☐ ☐ 遇 朕

亦 十六行 ☐ ☐ ☐ 其職又 十七行 ☐ ☐ 足求免 十

八行 ☐ ☐ 理不 十九行 ☐ ☐ 持平

卷第四十五 ○二葉八行 傳 傳十二行同 十三行 俱 自 十

四行 發為辭誥 務為詞誥 十八行 授崔稜尚書盧校宋本

俱姓名在授字前 二十行 疾戾 二十一 行 括 亂 二十

二行傳盧作傳 二十三行善於其職口 稜亦善於其職○

四葉七行敢盧作可 九行十行可盧校宋本可皆作授

卷第四十六○一葉二十行既盧作極○二葉五行諸卿盧校

無諸字十盧作有 十行知盧作加 十二行厥闕 二十

一行吐蕃和好使盧作蕃使使下有制字○三葉七行少尹

制盧校制上或當加等字餘做此 十四行授右司盧校按

授下當有尙書字 二十一行郎中盧作郎中制○四葉四

行涵盧作鄭涵宿 盧作馮宿 五行敬矜 二十一行御史

盧校無此二字 二十四行俾他

卷第四十七○一葉十三行起居郎盧校下有制字以下三題

並同○二葉十七行羸羸 二十六行爾盧作乃悔 盧作害

○三葉二十六行宗正丞盧作宗正寺丞○四葉二十五行

可盧校宋無可字似當作可依前件

卷第四十八○一葉二十五行潛盧作自○二葉十二行望盧

作虞 十五行國盧作山貫書○三葉三行冀盧作與下同

七行牙盧作牙 十二行刺史等無等字 十三行黎民

保乎混兆人懷乎懼 十五行昔或□條郊盧作甸 十六

行天夫鵲儒 十七行泄津○四葉九行美能吏姚任功

十一行□□其故復便 十四行□□都虞候 十五行

爾能當事內附諸夷擾養 十六行削難剥藉踣盧作蹄○

七葉二行蓋一專於令長矣盧作盡專之於令長也 八行

獨不在數盧校無此四字○八葉五行坑盧作掠 九行于

盧校當作予 十行度亦盧校無亦字慎簡盧校慎上有乃

字

卷第四十九○二葉一行以前□盧作改前奏 六行□衆

七行□□盧作庸以 十行□盧作典 十一行時盧作宜

十二行聽盧作竭 十六行盧作遷 十九行盧作

可 二十行盧作軍 二十二行邊盧作邑 二十五行

事○三葉一行議遷盧作儀同 五行觸盧作玉 六行

奉學 十行誨盧校疑悔 十四行愿盧作厚 十五行疾

疾 十六行而盧作亦 二十二行介盧作謹○四葉十三

行約納○六葉九行膺盧作加○七葉十五行政盧作仕○

八葉十六行古故

卷第五十○二葉二行所盧校宋作祈疑 十八行盧作光

十九行侍郎盧校郎下當有等字○五葉十行榮盧作名

○六葉十七行是盧作晏具上其功伐盧作具代無上其

功伐四字言念盧作晏亦 十八行盧作竝 二十三行

抵盧校當作祇○七葉十五行將盧校下有制字

卷第五十一卷五十一之六十校宋本錢牧齋鈔校本筆也參

○一葉七八行始言盧依文粹作始未言十行競競十

一行擢上擢秀上十五行同校祕書之名盧校文粹作同

祕書前後二十二行注書無書字二十三行是自二

十四行競習競相習○二葉五行夫是十九行成錢作立

二十六行□鮮○三葉一行聲名名聲三行白自十

五行言不盧作言予不十七行櫓督二十行次決○四

葉七行措錯

卷第五十二○一葉三行碑下有文銘二字五行同四行南

陽上載全銜如本文以下各卷目同碑文銘碑記十二行

傳兄傳其兄十七行服伏二十行汝此二十四行史

盧校宋本無吏字按馬元調本作吏不作史○二葉一行褒

殛誅盧校似當作誅褒殛八行以爲密無爲字十一行

壤壤十五行谷盧校當作穀十六行加司徒無加字

十九行註註○三葉十行承悉○四葉二行第第十一行

嘉加十八行業第二十行弃奔二十四行便庚南韓

盧校南下當有陽字○五葉三行二錢作一四行壞潰

八行帛泉十行究完十二行師盧作帥□渦十四行

盡童□□□□□猖猖甚則蹶十五行假俱十六行□

□□誕肆其十七行示不失克

卷第五十三○二葉十行捲捲十六行歿于無于字十七

行□隨二十二行政根二十三行亦莫能盡莫作不盧

校無盡字○三葉五行汾邪八行季貴二十二行叫鼓

二十五行殺人者死無死字○四葉一行支度度支六

行封無盧校封下似脫一字二十行物下二不下三二

十六行泊泊○五葉十三行敬教十八行天天

卷第五十四○一葉十一行壽至無至字十五行以見十

六行某衍 十七行級度 十八行遽禁 十九行檐檐三

四人三四口人 二十三行筆傳盧校疑傳 二十四行凡

不 廿五行至降 廿六行隱匿有語○二葉二行使判

四行務於無於字 十二行往返往往 廿一行讒乃盧作

讒言乃 廿四行府 廿五行一盧校疑二 就其

廿六行請於○三葉一行庫軍府 二行仍

三行訖 四行過 五行言云 六行志之 八行方

之 十一行散五 十二行僚朋 十三行起是 十六行

勇讐抑抑 十七行以用 二十五行罪鄭 二十六行書

則七皆○四葉二行時語 三行給詹 四行乃乞舍會

七行可果 八行部課凡九盧校宋凡作九疑 十一行白

之 十二行選不 十三行郎官 二十一二行昔進并容

二十二行考老 二十三行肯始 二十四行沒薨 二

十六行 積與白 積下空六格白作自○五葉一行 焦燠

卷第五十五○一葉十二行 於於其 十六行 歲代 二十一

行卒 平盧校宋本平疑 二十二行 初仍 二十五行 粟芻

芻粟 ○二葉五行 姻因○三葉五行 支度 度支 十四行

謹謙 十七行 糧梁 二十五行 悔梅不任 金鼓 鼓鼙 二

十六行 伏其在江陵也 伏作動無以下五字○四葉十行 □

全 十一行 □略 十七行 矣也 二十六行 矣者○五葉

六行 我武 八行 付府

卷第五十六○一葉四行 銘下有并序二字 十行 拯爲 拯口

爲○二葉九行 羸羸十一行同 十三行 長會 十六行 尋

除 無除字 十九行 皆男 皆五男○三葉三行人之 四行

係誌 七行 其干預 上有取字 九行 諷賦 賦諷 二十二

行 古傍 盧校別本作言奪 奪 盧校別本作吞○四葉三行 拆

盧校析訛析

卷第五十七○一葉九行榮榮十四行同 十三行□遭十

八行帶盧校疑掃 二十三行□婢 二十四行足食二字

無盧校仍有之□違 二十六行皆曰貨 無曰字按曰字不

可闕○二葉一行君跪君乃跪 四行杓杓 七行掘握

二十一行蒲浦○三葉一行養足 養吾足 三行姪族 四

行子嗣 六行喪遂免喪 七行慶襄慶盡襄天君 天於君

十二行 四日禽 四日四禽

卷第五十八○一葉七行陸氏 盧作余陸氏 以悌□□事兄仲

以悌達事夫如事兄 八行然而不壽也 然而不貴不壽天

也 九行□五是唐是歲唐 十行葬於歸窆於洛陽 盧作

洛口縣 十一行郡鄉 十二行始祖我繫祖後失 後嗣失

十三行諫在諫廢在 十四行公中□公以忠進 十六

行廣至 十八行 芳方 十九行人轉 二十行 屈 用屈

二十一 行 宴 宴浩 二十二行 是 二十三行 世莫

得傳 業 世不得傳 嗚呼盛德大業 二十四行 睦陽 睦

州刺史榮陽 六姻 儀六姻諸子婦 二十五行 勵 厲

楚 名 檟 機 二十六行 有 加 二葉一行 靈 吳 宰

相信 右相敦信 二行 祕 沁 三行 少 小 六行 太 魏 七

行 有 行 作 有 八行者 二者 周二 九行 閱 上有曾字

十行 十一行 終 之 終之 十一行 亶 豐 十二行 家

十三行 親乎 親乎 無下乎字 十六行 沂 沂 十七行 廩

十八行 尊夫 我尊夫人 二十五行 視 三葉一行

德 偏 二行 非 盛勳列 非夫盛勳烈 盧校列不作烈 八行

誠 誠 九行 切 盧作且 十行 終 將盧校將終俱可疑 十

一行 必 因 人人 必有 因 人 懷 其 仁 盧校此句作中脫一字

十二行 沒沒 盧校沒沒疑衍其一 十七行 約浙 盧作約爲

浙 十八行 家常 無常字 十九二十行 其外 其下外

已子 其 二十二行 餘丈 二十三行 帛完 二十四行

予察 余不察 二十五行 幸而

卷第五十九 一葉二行 祭文 告贈文 九行 榮榮下同 十

行 二十八日 十八日 十二行 泊泊 十五行 脯 盧校舖訛

脯 亡 十六行 集某有准有准常 十七行 假暇 十八

行 爾忽 疊 羅羅 二十三行 及痛 罔及痛毒 二十六行

諫建 二葉二行 續續 三行 昇弁 四行 燭吉 五

行 集聚 九行 列例 十行 回迴 十五行 禘祀 十六行

求吉 四時求吉 十九行 華幸 二十二行 則 盧校疑制 暨

泊 二十六行 稹用 稹謹用 三葉二行 式失 六行 噪 譟

噓 壹革畢 七行 罔綱 羅羅 溼 九行 力收 十行 防旁

十一行 ☐ 居秩扶千十 十三行 曝暴 十四行 ☐ 導導

祥之斯 十九行 資滋 翳齏 羅羅 蛇蛇 豺豹 二十一行 扶

挾砢斫 二十五行 屬攸攸 屬告于神 告于畚神 〇四葉二

行 厲癘 六行 二三 七行 叔淑以昭 九行 初効虵虵 ☐

亂 十二行 始長 始以長 十三行 念隱 念人隱 十五行

☐ 凡 咎大凡 十六行 虛虐 二十二行 日日育 育有 〇五葉

二行 渝踰

卷第六十 〇一葉八行 禱告 十二行 ☐ 桓十三行同 十四

行 ☐ 降盧作誘 拾盧校疑徐 十五行 湮堙 殄赦 二十行

男祗 男某祗 二十二行 殷敦 歲而孤 無而字 愚 ☐ 愚下不

空 二十六行 遠遂 ☐ 堅 〇二葉二行 ☐ 未 三行 濟擠疾

疾 六行 ☐ 何 九行 聽鳴 十行 之莫 盧作莫之 ☐ 是

十一行 ☐ ☐ 姬姜 十二行 澤擇 十三行 判割 歌歌 重仲

□無 十四行 德盧校疑得 十五行 顛摧 縷履 十六行

□方□艱 十七行 □疾有萌漸辛亦有萌陷 十八行 尙

上 二十行 甥聲 二十二行 騫騫盧校騫當從鳥 二十

六行 □心心焉□戒歌○三葉二行 筭盧校筭訛筭 三


行 燔崇□特 四行 □燎燎火 七行 尙饗上有伏維二字


十行 □□不空格 二十行 塊日塊作愧日盧校疑目


二十六行 榮榮○四葉一行有又 二行 灋灋 三行 圈檻

檻束漸塹塹 五行 唯爲 六行 晞係 八行 莫莫 十行 泗

盧作灑







895.108

Ss7s2

v. 709

719

李文饒文集



李文饒外集卷第一

窮愁志并序

予頃歲吏道所拘沈迷簿領今則幽獨不樂誰與晤
言偶思當世之所疑惑前賢之所未及各爲一論庶
乎箴而體要謂之窮愁志凡三卷篇論四十九晉銷
此永日聊以解憂地僻無書心力久廢每懷多聞之
益頗有闕疑之恨貽於朋友以俟箴規

評史

夷齊論

三良論

張辟疆論

爰盎以周勃爲功臣論

漢昭論

漢元論

荀悅論高祖武宣論荀悅哀王商論

張禹論

三國論

牟祜留賈充論

宋齊論

夷齊論

昔夷齊不食周粟餓于首陽之下仲尼稱其仁孟軻

美其德

孟子稱伯夷聖人之清者

蓋以取其節而激貪也所謂周

粟者周王所賦之祿是也諫而不從不食其祿可矣

至於聞淑媛之言輟殮薇蕨斯可謂不智矣夫薇蕨

者元氣之所發生四時之所順成日月之所燭風雨

之所育周焉得而有之哉若以粟者周人之播殖則

夷齊得非周人乎反覆其道盡未當理然夷齊之行實誤後人於陵仲子慕夷齊者也乃至不義其兄之祿潔則潔矣仁豈然哉厥後商洛四友畏秦之酷避秦之禍豈止潔其身而已然餐紫芝以爲糧飲清泉以爲漿終老南山以養其壽斯可謂仁智兼矣

三良論

秦穆之殺三良詩人刺之矣春秋譏之矣今不復議唯三良許之以死而前代無譏何也且臣道莫顯於咎繇孝友莫盛於周公咎繇尚不殉於舜禹二后周公尚不殉於文武二王三良詎可許之死乎如三良

李德公文集 卷之一
者所謂殉榮樂也非所謂殉仁義也可與梁丘據安
陵君同譏矣焉得謂之有夫特哉昔荀息許晉獻以
言繼之以死君子猶歎斯言之玷不可磨也豈得以
生同榮樂歿共埃塵以爲忠乎晏平仲言君爲社稷
死則死之斯言得之矣自周漢迄於巨唐殺身成仁
代有髦傑莫不顯一身之義烈未有繫一國之存亡
唯紀信乘黃屋以誑楚赴丹焰而存漢數千年間一
人而已漢祚四百繇此而與余謂漢祖封建紀氏宜
在蕭曹之上報德木稱良可悲也

張辟疆論

楊子矣辟強之覺陳平非也若以童子庸敏善揣呂氏之情竒之可也若以反道合權以安社稷不其悖哉授兵產祿幾危劉氏皆因辟強啓之向使留侯尚存必執戈逐之將爲戮矣觀高祖遺言呂后制其大事可謂謀無遺策矣以王陵有廷諍之節置以爲相謂周勃堪寄託之任令本兵柄況外有齊楚淮南磐石之固內有朱虛東牟肺腑之親是時產祿皆匹夫耳呂后雖心不在哀將相何至危惧必當憂傷不食自促其壽豈能爲將相之害哉高祖曰非劉氏而王者天下共擊之此慮屬呂宗矣何可背之厥後稱制

八年產祿之封殖固矣若平勃二人溘先朝露則劉氏之業必歸呂宗及呂后之歿劫酈商以給呂祿計亦寔矣周勃雖入北軍尚不敢公言誅諸呂豈不艱哉賴產祿皆徒隸之人非英傑之士儻才出於世豈受其給說哉嗟乎與其圖之於難豈若制之於易由是而言平勃用辟強之計斯爲謬矣留侯破產以報韓結客以徂秦招四皓以安太子所謂必伏羲居正由此知不尚權譎明矣

爰盎以周勃爲功臣論

爰盎對文帝曰絳侯所謂功臣非社稷臣夫社稷臣

者主在與在主亡與亡益見勅自德其功有以激之
也非至理篤論此言足以惑文帝聰明傷仁厚之政
俾其君有薄宗臣之意竟使周勃大功皆棄非罪見
疑可爲長歎息也當呂后之世惠帝已殂少帝非劉
氏陳平用辟強之計權王產祿絳侯若不與之同心
而制其兵柄必由此而階亂矣劉氏安危未可知也
益甘諸呂用事檀相王
大尉本兵柄弗能王也然磨而不磷涅而不淄未常
不心存社稷志在劉氏外雖順遜內守忠貞得不謂
之社稷臣乎其後絳侯繫獄室益雖明其無罪所謂
陷之死地而後生之徒有救焚之力且非曲突之義

李德公集卷之一
楊子偁盡忠不足而談有餘斯言當矣善哉賈生之
說喻堂陛之峻高者難攀卑者易陵文帝感悟養臣
下有節有以見賢人用心致君精識若袁公者難與
並爲仁矣盡唯有正慎夫人席塞梁王求嗣此二事
守正不撓忠於守奉害錯之罪虐貫神明安陵之禍
知天道不昧矣

漢昭論

人君之德莫大於至明明以照奸則百邪不能蔽矣
漢昭帝是也年十四而知燕王書詐後有譖霍光者
上輒怒者敢有僭毀者坐之周成王有慙德矣高祖

文景俱不如也成王聞管蔡流言覩召公不說遂使
周公狼跋而東鷓鴣之詩作矣漢高聞陳平去魏背
楚欲捨腹心臣漢文惑季布使酒難近罷歸股肱郡
疑賈生擅權紛亂欲踈賢士景帝信諛誅鼂錯兵解
遂戮三公所謂執抵疑之心來諛賊之口使昭帝得
伊呂之佐則成康不足侔矣惜哉霍光不學亡術未
稱其德然輕徭薄賦與人休息匈奴和親百姓克實
議鹽鐵而罷權酷任忠臣之效也終弱冠而殂功德
未盡良可痛矣

漢元論

漢元帝習武帝游宴後庭又隆好音樂與弘恭石顯
圖議帷幄之中進退天下之士史臣贊曰優游不斷
漢宣之業衰焉余以班固之言未盡其癖益懦而不
才權移所嬖非不斷也夫帝王者天也天以剛健爲
氣粹精爲體氣剛而健則三光不昏體粹而精則四
氣不亂剛也者不息之謂也故權衡獨運四時不忒
粹也者不雜之謂也故乖氣消散陰陽不謬若運動
不在於權軸鎔鑄不由於太冶蕩蕩上帝復何爲哉
書曰天聰明自我民聰明又曰天視自我民視天聽
自我民聽豈堯舜之時上下皆公謏說不行人與其

其聰明哉豈幽厲之君上下盡和諛言相蔽人不與其聰明哉元帝自稱淫亂之君各賢其臣令皆覺悟天下安得危亡之君元帝蓋自以恭顯爲賢而任之不疑也

荀悅論高祖武宣論

荀悅論畧曰高帝天下初起庶事草創文帝躬行玄默遂至昇平而古典未備制度多闕武帝內修文學外耀武威而不盡其術不克其終宣帝任濫審刑採數名實而不用儒術理化不成歷數三代以及元帝曰崇尚儒業從諫如流引班固替賓禮故老優游亮

直又曰貢薛韋匡迭爲宰相其旨以爲專用儒術莫
盛於此班固荀悅皆文雅之士以元帝好儒徵用儒
生故以玆爲美而深罪石顯痛心泣血稱詩人投畀
豺虎嫉之甚也異乎余之所聞也任恭顯始於宣帝
當宣帝之世石顯豈能隳其大業哉則知惡不在於
顯矣蕭望之周堪皆廊廟之器有師傳之恩石顯所
忌廢而不用朋龍上書遂致于理其後劉向廢錮張
猛自殺豈得謂之優游亮直乎賈捐之京房雖不終
其身亦皆英特雋才道術奇士於元帝可謂忠矣亦
因諧而死惑於讒邪豈得謂之牽於文義乎於讒邪

則不斷於髦俊則用瀟亦不得謂之優游矣貢薛雖
能忠諫止於諷諭恭儉未嘗禦姦觸邪矣常序從容
守位未嘗犯顏干色矣所以得乘時而進久安其位
昔桀紂殺一龍逢比干而得天下之惡歸焉桀紂以
拒諫而殺之其悖已甚元帝以信讒而殺仲又甚焉
王業既衰至成哀陵替繼三世而王莽篡奪而宣帝
稱亂吾家者太子也知子莫若父信哉是言

荀悅哀王商論

荀悅論曰夫獨智不用於世獨行不畜於時昔人所
以自退猶不得自免是以離世深藏又曰以六合之

大一身之微而匹夫無所容焉豈不哀哉余三復斯論潛然出涕仲尼聖人也猶美顏子之行藏與我同志稱竊武愚不可及歎蘧瑗卷而懷之則聖人遵養時晦可謂至矣以仲尼之德足以塞叔孫之毀以仲尼之仁足以免陳蔡之困以仲尼之智足以避斥人之辱以仲尼之道足以容魯哀之世而逼迫多惧殆於危亡由是思之無非命也况王商者哉世人皆以貌寢質薄為數竒敦厚碩大為多福樂昌威重真漢相容貌懾單于而違愍於時遇讒而殞豈命之否也龍虎不能免於患及命之泰也蛭蟻皆得保其生余

又聞之國之衰也忠賢先去故管仲知隰朋不久而
齊國亂范燹令祝宗析死而晉主憂伍胥戮而夫差
亡汲黯出而劉安悖徒歎新都之奪孰救樂昌之禍
昔秦繆以三良爲殉君子曰秦繆之不爲盟主也宜
哉棄善人之謂也

張禹論

夫社稷之計安危之機人君不能獨斷者必啓於所
敬之臣然臣有忠和時有險易交有淺深義有厚薄
范曄山東之匹夫也入虎狼之秦履不測之險可謂
交踈義薄矣而能尊昭王去穰侯開秦霸業之基以

安固後嗣可謂忠於昭王矣夫能獨斷者英主也古人言謀之欲多斷之在獨蓋爲此矣天有震雷之怒龍有逆麟之恨所以人君在於能斷耳然親戚之際恩義之重斷之於已可也張敞所謂明詔以恩不聽群臣以義固爭而後許而令明詔自親其文非策之得也漢文帝誅薄昭斷則明矣於義則未安也周宣餞申伯有孔碩之詩晉康送文公興如存之感況太后尚存唯一第薄昭斷之不疑非所以慰母氏之心也漢成帝車馬至張禹第辟左右親問禹以天變禹以年老子弱興曲陽有隙乃言新學小生亂道誤人

主宜無信用帝雅信愛禹山此不疑王氏致漢室之
亡成王莽之篡皆因禹而發可謂漢之賊也國之妖
也雖虵聞於鄭鷁退於宋妖不甚於禹矣朱雲欲以
上方斬馬劍斷佞臣頭斯言當矣後代有類於此者
其臣可以范曄爲師表張禹爲鑒戒

三國論

魏蜀吳三分天下而亡有先後非形勢有輕重積累
有厚薄察其政柄所歸則亡之先後可知也蜀政在
於黃皓皓隸人也內不能修武侯之舊典外不能制
姜維之黷武紀綱日壞君子不服所以先亡也魏自

明帝之後政歸仲達齊王已降唯守空宮亡之淹速
繫於師昭之志將移神器之重須服天下之心未立
大功亦不敢取所以蜀滅而魏亡也孫皓雖驕奢極
欲殘虐用刑而自專生殺之柄不牽帷牆之制運盡
天亡而後夷滅由是而知人君不可一日失其柄也
如神龍之脫深泉震雷之無烟氣威靈既露人得制
之蔣濟觀魏文帝與夏侯尚詔曰作福作威爲亡國
之言所謂柄者威福是也豈可假於臣下哉後代觀
三國之事可不戒惧哉

羊祜留賈充論

任愷庾尹

庾爲河南尹名祀廟諱字又非使所以不書山

以賈克和僻欲其

踈遠勸晉武令西鎮長安唯牟祐密表留之祐豈悅
賈克者哉良以愛君體國發於至誠耳晉氏傾奪魏
國初有天下其將相大臣非魏之舊臣卽其子孫所
寄心腹唯賈克而已克亦非忠於君者自以成濟之
事興晉室當同休戚此牟祐所以願留也昔漢高不
去呂后亦近於此漢高嬖戚姬愛如意思其久安之
計至於悲歌不樂豈不知除去呂后必無後禍況呂
后年長有過稀復進見漢高棄之如去塵垢實以惠
帝闇弱必不能自攬權綱其將相皆平生故人俱起


豐沛非呂后劉強不能臨制所以存之爲社稷也後
世翼戴其君者得不念於此哉

宋齊論

宋齊以降繼體承祧者君德寢微王道陵替纘緒之
初如革大運降宥解網以悅衆心仁義之風薄骨肉
之情廢前史評之許矣然政未得中改之可也如弓
之高下者抻舉琴瑟之不調者更張此亦天之道也
豈獨人事哉唯用其罪人不可甚矣天下之惡一也
古人言一心可以事百君百心不可事一君豈有不
忠於前朝而能忠於後王者毀泉臺春秋之所譏先

儒之所惡宋齊之君有一于此必爲美政泉臺見妖
尚不可斃况無妖者乎燕人之思召伯甘棠勿翦楚
人之懷叔子望碑墮淚彼人臣也猶見思若此雖時
移政改莫匪舊臣若伯益贊禹稱大舜之德曹參事
惠帝守蕭何之灋魏文帝初受漢禪群臣皆贊魏德
唯衛臻獨稱漢美文帝曰天下之珍當與山陽共之
爲人臣者罔念於此可謂有百心矣

李文饒外集卷第一



李文饒外集卷第二

窮愁志

論

舊臣論

陰德論

臣子論

忠諫論

管仲害霸論

慎獨論

王言論

退身論

豪俠論

英傑論

臣友論

天性論

舊臣論

或問先王論道之臣事後王乎曰不改先王之道則

事之改先王之道則去之以事堯之心事舜禹者其
臯陶益稷乎以事武王之心事成王者其周召乎以
事漢高之心事惠帝者其蕭曹乎曹參尚不易蕭何
之規况高祖之道昔區區楚國醴酒不設穆生先去
且穆生豈爲已也益傷廢先王之道不忍見後王之
面其不去者焉得免胥靡之恨哉魏晉以降居相位
者皆覲面愧心而已又有攘臂於其間者摘摭先王
之道以譆舊過改張先王之道以媚新君棄先王之
故老以掩其羞用先王之罪人以協其志若天地間
無神明則已儻有神明鬼得而誅之矣

陰德論

陳平稱吾多陰謀道家之所禁吾世即廢亦已矣不能復起以吾多陰禍也至曾孫何國絕班生著陳平之言以爲世戒理當然矣而丙丞相終及子顯黜爲關內侯至孫昌乃絕國絕三十二歲復續而張湯杜周子孫世有令名皆在顯位其故何哉丙丞相於漢宣之德可謂至矣晉荀息以忠貞之故不敢負獻公程嬰以託孤之義不忍欺趙氏所以繼之以死終不食言丙丞相於史皇孫敬君臣之分無親戚之情而保養曾孫仁心惻隱置於間燥給以私財介然拒天

子之使因是全四海之命

漢書稱因赦天下郡卿又獄繫者是恩及四海也

奏記霍光決定大策旣而顯徵卿之美削士伍之辭其深厚不伐古所未有夏侯勝以爲有陰德者必饗其樂以及子孫是宜篤生賢人世濟其美古所謂有後者良謂是矣焉在傳爵邑而已哉張杜有後豈用濃雖深而治者或能去天下之惡除生人之害所以然也

臣子論

士之有氣志而思富貴者必能建功業有志氣而輕爵祿者必能立名節二者雖其志不同然時危世亂

皆人君之所急也何者非好功業不能以戡亂非重
名節不能以死難此其梗槩也好功業者當理平之
世或能思亂唯重名節者理亂皆可以大任平澹和
雅世所謂君子者居平必不能急理煩遭難亦不
能捐軀濟危可以羽儀朝廷潤色名教如宗廟瑚璉
園林鴻鵠雖不常爲人用而自然可貴也世謂三劉之傳
也然世亦有不拘小疵而能全大節者如陳平背楚
歸漢漢王疑其多心令護諸將又疑其受金可謂不
能以名節自固矣及功成封侯辭曰非魏無知臣安
得進漢高曰若子可謂不背本矣其後竟誅諸呂以

李德公集卷之二
安劉氏近日宰相上官儀詩多浮醯時人稱爲上官
體實爲正人所病及高宗之初竟以謀廢武后心存
王室至於宗族受禍郭代公倜儻不羈之士也少不
以名節自檢當蕭岑內難保護睿宗雖履危機竟全
臣節則名節之間不可以一槩論也陳平能不背魏
無知所以必不負漢王矣今士之背本者人君豈可
保之哉

忠諫論

人臣拒諫有二一曰生於愛名二曰不能去欲雖桀
紂桓靈之君未能忘名自知爲惡多矣畏天下之人

知之將謂諫則惡不可掩故不欲人之諫已如晉獻
非驪姬寢不安齊桓非易牙食不美必不能去之亦
不欲人諫已人臣忠諫亦有二欲道行於君可使身
安國理者其辭婉欲名高後世不顧身危國傾者其
辭訐若考叔啓大遂以成莊公之孝倉唐獻犬鴈以
復文侯之愛留侯封雍齒以安群臣招四皓以定惠
帝此所謂婉也諫大夫言婢不爲王白馬令言帝欲
不諱劉李二人名各激主之怒自有其名望其聽從不便故書
固不可得此所謂訐也漢元帝欲御樓舩薛廣德當
乘輿諫曰臣自刎以血汚車輪則陛下不入廟矣張

猛曰乘船危就橋安聖主不乘危元帝曰曉人不當如是耶則知諫之道在於婉矣唯英主必能從諫何者自知功德及生人者大矣雖有小惡不諱人言如漢高祖繫蕭相國及聞王衛尉之言乃曰我不過爲桀紂主而相國爲賢相此所謂不諱也近日名臣王石泉居相時予爲眉州司士天后嘗問曰卿在相位子何遠乎對曰廬陵是陛下愛子今猶在遠臣之子焉敢相近有以見君子之心亦倉唐之比也

管仲害霸論

昔管仲對桓公曰宮中之樂無所禁禦不害霸也舉

賢而不能任此害霸也余竊窺敬仲此對是欲一齊
國之政滿桓公之志然則非專任亦不能致霸一
則仲父二則仲父桓公所以能九合諸侯爲五霸之
晉中代蜀主之任孔明符堅之用景畧雖閔羽不能
移樊世不能惑蜀與秦皆君安國理非專任之效歟
桓公得敬仲則興隆霸業漢元信石顯而反穢明德
信任同而理亂異者何也所任用非其人也近世有
以宮中之樂餌其君者而苞苴日行紀綱日壞朋黨
益熾諛言益昌得非竊管仲之術遠管仲之道莊周
僞所謂至智也者有不爲大道積者乎又曰跖不得

本傳公夕集 卷之二
聖人之道不行豈斯之謂也

慎獨論

士君子愛身防患無踰於慎獨矣能惧顯觀時不顯
云觀不爲暗欺忠信參於外雖有盜賊不能爲患矣
易曰無有師保如臨父母斯之謂也賊入趙孟之門
者覩其盛服將朝不忘恭敬悔受君命至於觸槐所
以知其不爲患也向使趙孟未闢寢門尚安祗席思
變詐之數無肅敬之容爲盜者必激其怒心增其勇
氣焉得保其首領哉推是而言人不可以不誠矣若
乃懷詐飾智意思貌親人已見其肺肝而自謂無迹

天已奪其魂魄而不寤將亡此汲黯所以面折孫弘
留言李息莊周偁賊莫大於德爲一本無有心以有
眼爲德者尚不可以有心眼况爲惡者乎

王言論

夫帝王與群臣言不在援引古今以飾雄辯唯在簡
而當理雄辯不足以服姦臣之心唯能塞諍臣之口
昔田蚡請考功地益宅武帝曰遂取武庫衛將軍言
郭解家貧父曰布衣權至使將軍知此其家不貧殷
仲文言音樂好之自解宋祖曰吾祗恐解此謂簡而
當理足使姦臣奪心和人破膽矣余歷事六朝弼諧

二王文宗辭皆文雅而未嘗騁辯武宗言必簡要而不爲文飾皆得君人之量能盡臣下之詞豈唯王言如是人臣亦當然也其有辯若波瀾辭多枝葉文經意而飾詐矯聖言以蔽聰此乃姦人之雄游說之士焉得謂之獻替哉爲臣者當戒於斯慎於斯必不獲罪於天矣

退身論

老子曰功成名遂身退天之道也昔余常感焉自前朝李右相元中書皆宴安厚味終嬰大戮所以文種有藏弓之恨李斯有稅駕之歎張華顧優游而不獲

裴頠勸嚴賈后華咎
以庶可優游卒歲

傳亮贊識微而不免北四子者

皆神敏知幾聰明志古圖國致霸動必成功而自謀
其身猶有所恨况常人哉其難於退者以余忖度頗
得古人微旨天下善人少惡人多一旦去權機不測
操政柄以禦怨誹者如荷戟以當狡獸閉關以待暴
客若捨戟開關則寇難立至遲遲不去者以延一日
之命庶免終身之禍亦猶奔馬者不可以委轡乘流
者不可以去楫是以惧禍而不斷未必皆耽祿而患
失矣何以知之余之前在鼎司謝病辭免尋即遠就
澤國自謂在外而安豈知以天高不聞身遠受害近

者自三公鎮于舊楚懇辭將相歸守丘園而行險之人乘隙構患竟以失巨浪而懸肆去灌木而嬰羅余豈不知身退罹殃益耻同種斯之不去也則知勇退者豈容易哉如陸士衡稱不知去勢以求安辭寵以招福斯言過矣唯有遭逢善人則庶可無患故范曄得蔡澤退而不辱虞丘得叔孫去而不困其次劉毅者有心者亦可矣子文舉子玉以靖國隨會避郗子以紓亂皆保其後矣若小人則禍必及之無所逃也終不及扁舟變姓名浩然五湖之外不在人間之世斯可以免矣

豪俠論

爰盎汲黯皆豪俠者也若非氣蓋當世義動明主豈有是名哉爰盎曰緩急人所有故善劇孟匿季心汲黯好遊俠任氣節善灌夫所以知其然也余斯言豈徒望發楊子所謂孟軻之勇類於是夫俠者蓋非常之人也雖以然諾許人必以節義爲本義非俠不立俠非義不成難兼之矣所謂不知義者感匹夫之交校君父之命爲貫高危漢祖者是也所利者和所害者正爲梁王殺爰盎者是也此乃盜賊耳焉得謂之俠哉唯鋤麀不賊趙孟承基不忍志寧

統于承基爲承乾賊于志

寧見其執喪盡哀不忍害之也斯爲真依矣淮南王憚汲黯以其守節死義所以易公孫弘如蒺藜耳黯實氣義之兼者士之任氣而不知義皆可謂之盜矣然士無氣義者爲臣必不能死難求道必不能出世近代房儒復問徑山大師欲習道可得至乎徑山對曰學道者唯猛將可也身首分裂無所顧惜由是而知士之無氣義者雖爲桑門亦不足觀矣

英傑論

帝王之於英傑當須御之以氣結之以恩然後可使也若不以英氣折之而寵以姑息則驕不可任若不

以恩愛結之而肅以體貌則怨不爲周駕馭之術唯
漢高祖盡之黥布歸漢高祖方踞床洗音洗而召布入
見布大怒悔來欲自殺出就舍帳音張服御飲食從官
如漢王居布又大喜過望武帝踞廁見衛青青以大
將軍之貴而隸人蓄之此不得不絕大漠而盪暈粥
撿抗也蜀先主與閔羽張飛同卧起而稠人廣坐侍
立終日皆用此道故能成功夫御英傑使猛將與見
道德之人接方正之士不同也不可以繁禮飾貌以
浮辭足予句反言宜洞開胷懷令見肝肺氣懾其勇恩
結其心雖踞洗召之不爲薄矣祿山夷狄之譎詐者

也非將門英豪草萊竒傑其戰聞之氣擊刺之才去
關張遠矣天寶末受專征之任託不御之權入朝賜
宴坐內殿西序雞障之下非其所據果蓄異圖幽陵
厲階至今爲梗蓋恩甚驕盈以至於此儻以徒隸蓄
之豈有斯恨

臣友論

君之擇臣士之求友當以志氣爲先患難爲急漢高
以周勃可屬大事又曰安劉氏者必勃也文帝戒太
子曰卽有緩急亞夫真可任將兵此皆得於氣志之
間而後知可以託孤寄命矣何者人君不能無緩急

士君子未嘗免憂患故漢高知周勃可託文帝識亞
夫可任信陵降志於朱亥爰盎不距於劇孟且夫周
文有閔天而禦侮孟宣以彌明而免難孔聖得仲由
而不聞惡言宋祖失穆之而謂人輕我則擇臣求友
得不先於此乎太倉令淳于公歎生女不生男緩急
非有益也緹縈自傷乃上書贖父罪詩曰鵲鳩在原
兄弟急難父子兄弟未嘗不以赴急爲仁孝況朋友
之際本以義合貴盛則相望以力憂患而不拯其危
自保榮華坐觀顛覆可不痛哉昔衛青之衰也故人
多事冠軍而任安不去吳章之敗也門人更名他師

而幼孺自效

幼孺名故姓非便故不書

此所以可貴也善人良士

稊可以淡水相成虛舟相值聞其患也則策足先去
曰見幾而作不俟終日知其危也則奉身而退曰既
訥且哲以保其身良士之於人如是曷若識劇孟朱
亥哉

天性論

余開成中作鎮淮服聞東宮爲人所構天子赫然大
怒召宰臣及公卿大僚議於內殿其時諫者僉曰太
子幼年思慮未至亦曰太子之年足以改過往復移
時大畧不出於此夫訥主可以理奪其要在於聞所

未聞昔千秋上書言子弄父兵罪當答耳武帝一言而寤蓋以簡而當理魏太祖嘗謂諸子曰吾必不用左右之言以理汝曹何者使左右君子也必不離人父子之間使左右小人也小人之言必不可用其時無人以此言寤主因問主上太子之過得於何人言之者與太子恩愛厚薄何如哉文宗聰明睿智聞之必寤寤之後太子必安以余揣之不三數月則父子如初矣蓋以父子之愛發於天性言之者必當易寤况一子乎是以漢高覲四皓上壽悲歌鴻鵠宣帝以玄成退讓令傳淮陽元帝聞史丹稱噐人於絲竹默

然而笑皆外感中悟屈已捨愛可不謂之天性哉文
宗竟不得一聞是言豈太子之命也歟

李文饒外集卷第二

李文饒外集卷第三

窮愁志

論

賓客論

謀議論

代國論

文章論

任臣論

人物志論

朋黨論

虛名論

食貨論

近倖論

奇才論

方士論

小人論

賓客論

古人稱周公吐握下士而天下歸心唯周公則可何也文王之子武王之叔父於天下無嫌矣故唯周公則可

深知他人言不可故再之

稟上聖之姿和不得入是以好士

不爲累也漢武爲

太子立博望苑使通賓客多以

異端進者始皆欲招賢人而天下賢人少小人多賢人難進小人易合難進者鴻冥易合者膠固矣何以知之劉渾有枚乘鄒陽不周其言而應高田祿伯爲其羽翼劉武有鄒陽韓安國不用其謀而羊勝公孫詭爲其腹心劉安行陰德好文辭雖愛神僊黃白未害爲箬終以左吳被敗以是而知雖骨肉之親非周

公聖德皆不可也班固稱四豪者六國之罪人也今
不復論矣呂不韋習戰國之餘風陳稀值漢網之踈
闊逮乎魏其武安終以權勢相傾自武安之後天子
切齒衛霍改節則賓客之爲害固可知矣公孫弘起
客館開東閣以延賓客賢人與叅謀議非也然謂之
賢人必非黨附朝宰交亂將相者矣其時武帝躬親
萬機嚴明御下人自中瀆不敢爲非宰相唯有平津
政出一空音孔出自然無傾奪之勢其賓客故人不
居顯位未足爲朝廷患也然主父偃言朔方地肥饒
阻河蒙恬城以逐匈奴滅胡之本公孫弘以爲不可

朱買臣幾十難弘不能得其一又奏人不得挾弓弩
吾丘壽王以爲不便上以難丞相丞相詘服則知平
津之賓客不及天子之近臣明矣雖有賓客何益於
謀議哉況世秉大政者常不下三四人而輕薄遊相
門與柳槐齊列所謀以傾奪爲晉所議以勢利爲先
是以魏其武安之徒共成禍敗劉班殷鐵之客不相
往來又後姦智獻奇計者導其邪徑苟合匪人世道
險巇無不由此昔漢武謂田蚡曰君除吏盡未吾亦
欲除吏哀帝責鄭崇曰君門如市人何以欲禁切主
上皆賓客之害也余謂丞相閉關謝絕賓客則朝廷

靜矣

謀議論

欲知謀議之用捨身名之榮辱觀其立論可知也切
於時機明於利害人主易曉當世可行其謀必用而
終有後咎鼂錯主父偃是也何者切時機明利害皆
怨誹所由生享其利而自罹其害謀闊意中言高旨
遠其道可濃其術則踈必有高名而不用於世賈山
王陽是也謀議不行故能無患智足應變道可與權
言雖切於人情意常蕙於禮義謀不盡用而身無近
憂賈誼是也故當漢文之世亦無高位余門客崔世

叔即宋廣平之維私也

崔世叔名
把廟諱

又常預燕公代公

之戎幕故知三丞相才業其備曰廣平好言政事燕
公好言文學至於經國遠慮意鮮及之與代公言初
若涉川未知其止寥郭廣大莫見津涯味之既深思
意逾密代公常爲西北邊將帥論四夷事慮必精遠
則崔之言信有徵矣凡侍坐於君子聞其言可以知
其才術遠近用此道也

代國論

自古得代國之女以爲妃未嘗不致危亡之患者何
也亡國之餘焉能無怨氣其立基創業之祖宗必皆

一時之美傑其社稷山川之鬼神嘗爲一國之所奉
受其血食忿其滅亡故能爲厲矣必生妖孽之色蠱
惑當世之君使其骨肉相殘以壞於內君臣相疑以
敗於外危亡之兆鮮不由此史蘇所謂必有女戎姝
喜妲己褒姒是也史蘇言之詳矣今不復論是以晉
獻得驪戎佚女太子有雉經之酷禍及三世符堅納
慕容娣弟秦宮有鳳弓之謠敗於五將符堅於五將山破滅梁
武取東昏所幸幾至危國隨文嬖陳主之妹終以殞
身此皆禍敗之著明者也又夏姬入荊子反疲於奔
命吳人始叛楚矣吳嬪至晉世祖怠於爲政戎狄乃

亂華矣所以王珪者可謂識微之士明於禍福矣

文章論

魏文典論稱文以氣爲主氣之清濁有體斯言盡之矣然氣不可以不貫不貫則雖有英辭麗藻如編珠綴玉不得爲全璞之寶矣鼓氣以勢壯爲美勢不可以不息不息則流宕而忘返亦猶絲竹繁奏必有希聲窈眇聽之者悅聞如川流迅激必有洄洑逶迤觀之者不厭從兄翰常言文章如千兵萬馬風恬雨霽寂無人聲蓋謂是矣近世誥命唯蘇庭碩叙事之外自爲文章才實有餘用之不竭沈休文獨以音韻爲

切重輕爲難語雖甚工旨則未遠夫荆璧不能無瑕
隋珠不能無額文旨旣妙豈以音韻爲病哉此可以
言規矩之內不可以言文章外意也較其師友則魏
文與王陳應劉討論之矣江南唯於五言爲妙故休
文長於音韻而謂靈均以來此秘未覩不亦誣人甚
矣古人辭高者益以言妙而適情不取於音韻曹植七言
話有回泥諧於四韻三案詩有攀原安三觀班固漢書贊及當時辭賦多用協韻持於元勛包田舉信是
也意盡而止或篇不拘於隻耦文選詩有五韻七韻十一韻十二韻二十
一韻者今之文字四韻六韻以至百韻無有隻故篇無定曲辭寡累句譬諸
音樂古詞如金石琴瑟尚於至音今文如絲竹鞀鼓

迫於促節則知聲律之爲弊也甚矣世有非文章者
曰辭不出於風雅思不越於離騷模寫古人何足貴
也余曰譬諸日月雖終古常見而光景常新此所以
爲靈物也余嘗爲文歲今載於此曰文之爲物自然
靈氣惚恍而來不思而至杼軸得之淡而無味琢刻
藻繪珍不足貴如彼璞玉磨礱成器奢者爲之錯以
金翠美質旣雕良寶所棄此爲文之大旨也

任臣論

欲知國之隆替時之盛衰察其任臣而已非常之才
固不常有齷齪廉謹足以從政矣其次愚魯樸鄙之

人亦不害國唯異於人者可以懼矣

世所謂差人也

何者陳

侯愛郭紹以興侮楚之怒伯陽任公孫以成謀杜之

夢屠黍偁國之興也天遺之以賢人國之衰也天興

之以亂人是也然此人將至必有異物爲此先兆故

知遠君子近小人汙澤所以興利也鷄鷩止於魯郊

下展禽之故也鷦鷯集于魏沼不用管寧之應也是

以鸛鵒來而師乙歎鵬鳥至而賈生懼戴鷩

一本集作

張臻

一本作

悲微禽尚能爲害况異於此者昔殷宗惧

而修德以消雉雉之變魏明樂以酣身不免鷹揚之

恨可以儆戒哉

人物志論

余嘗覽人物志觀其索隱精微研幾玄妙實天下奇才然品其人物往往不倫以管仲商鞅俱爲瀟家是

不究其成敗之術也

僧一行傳調盈虛御輕重唯太公管仲雖霸者之佐不及太公

亦不宜比商鞅耳

與吳起同頗耳以子產西門豹俱爲器能是不

辯其精麗之迹也子產多識博聞叔向且猶不及故

仲尼敬事之西門豹非其匹也其甚者曰辨不入道

而應對資給是謂口辯樂毅曹丘生是也樂毅中代

之賢人潔去就之分明君臣之義自得卷舒之道深

識存亡之機曹丘生招權傾金毀譽在口季布以爲

非長者焉可以比君子哉又曰一人之身兼有英雄
高祖項羽是也其下雖曰項羽英分少有范增不能
用陳平去之然偁明能合變斯言謬矣項羽坑秦卒
以結怨關中棄咸陽而眷懷舊土所謂倒持太阿授
人以柄豈得謂之合變乎又顧與漢王挑戰漢王笑
曰吾寧鬪智不能鬪力及將敗也自爲歌曰力拔山
兮氣蓋世其所恃者氣力而已矣可爲雄於韓信氣
又過之所以能爲漢王敵聰明睿智不足偁也

朋黨論

治平之世教化興行群臣和於朝百姓和於野人有

砥礪無所是非天下焉有朋黨哉仲長統所謂同異
生是非愛憎生朋黨朋黨致怨讐是也東漢桓靈之
朝政在閹寺綱紀以亂風教寢衰黨錮之士始以議
論疵物於是危言危行刺譏當世其志在於維持名
教斥遠佞邪雖乖大道猶不失正今之朋黨者皆依
倚倖臣誣陷君子鼓天下之動以養交游竊儒家之
術以資大盜大盜謂倖臣也所謂教採升木噬犬害人亢居
城社不可薰鑿漢之黨錮爲理世之罪人矣今之朋
邪又黨錮之罪人矣仲長統曰才智者亦姦兇之羽
翼勇氣者亦盜賊之爪牙誠如是言然辨之未盡如

是者皆小才小勇祇能用詭道入邪徑鼠牙穿屋虺
毒螫人如巨海陰夜百色妖露焉能自百焉恠哉大
道之行當塗粉矣

虛名論

夫與膏肓同病者不可治也與衰亂同風者不可理
也劉向書曰幽厲之際朝廷不和轉相非怨君子
獨處守正不撓衆枉勉強以從王事則反見憎毒謔
愬故其詩曰密勿從事不敢告勞無罪無辜諛口謖
謖又曰分曹爲黨往往群朋將同心以陷忠臣正臣
進者治之表也正臣陷者亂之機也漢與幽厲之世

同風矣于寶晉總論曰朝寡全德之士鄉乏不貳之
老進仕者以苟得爲貴而鄙居正當官者以望空爲
高而笑勤恪其倚杖虛曠依阿無心者皆名重海內
晉文與元成之際同風矣所謂虛曠名重者蓋譏山
濤魏野之傳耳後之竊虛名者曾不得與山魏徒隸
齒而覲貌於世未嘗自愧趨之者如飛蛾赴火唯耻
不及豈蛩蛩負蟹之謂哉虛名者以衆多爲其羽翼
時不敢害後來者以聲價出其口吻人不取議以此
相死自謂保太山之安可以痛心矣

食貨論

人君不以聚貨制用之臣處將相弼諧之任則奸和
無所容矣左右貴倖知所愛之人非宰相之器以此
職爲發身之捷徑取位之要津皆由此汲引以塞訕
論頌此職者竊天子之財以爲之賂聚貨者所以得
升矣貴操其奇贏乘上之急售於有司以取倍利制
用者所以得進矣三司皆有官屬分部以主郡國貴
倖得其寶賂多託賈人汚吏處之頗類牧羊而蓄豕
養無而縱櫬欲其不侵不暴焉可得也故盜用貨泉
多張空簿國用日蹙生人日困楊雄上書言漢武運
帑藏之財填廬山之壑今貨入權門甚於是矣孟獻

予有言與其有聚斂之臣寧有盜臣予與以利國焉
非楊雄以權酤與歎稱其職者必皆挾工商之術有
良賈之才壽昌習分誅之事弘元致理之要雖有倖
臣亦何害於理哉

奇才論

開成初余作鎮淮甸會有朝之英彥廉問剖符于東
南者相繼而至余與之讌言皆曰聖上謂丞相鄭公
覃李公固言李公石曰李訓稟五常之性服人倫之
教則不及卿等然天下之才卿等皆不如也三丞相
默然而退余曰李訓甚狂而愚曾不及於徒隸焉得

謂之奇才也自古天不有常勢不可變也昔陳平之
患呂宗而計無所出嘗間居深念陸賈由戶而進不
之覺也賈揣知其情言曰將相和則社稷安矣因爲
畫策陳平乃寤由是以黃金爲絳侯壽將相交歡以
敗產祿近世五王之誅二張也漢陽王召大將軍李
多祚謂曰將軍爵服隆貴誰人與之曰太一本皆帝
與之將軍貲產富侈誰人與之曰太帝與之將軍子
弟榮祿誰人與之曰太帝與之因謂曰感太帝恩乎
多祚漼然泣下又謂曰今太帝之子深居鶴禁危若
綴旒將軍豈有意乎多祚遂感慨受命與之定策元

載之圖魚朝恩也以崔昭尹神州裨昭日請苑中牢醴以爲朝恩羊析秋毫之數小人以爲能君子所以不忍爲也卜式言天久不雨擲烹弘羊天乃雨焉有仲尼之鳴鼓將攻卜式之欲烹致位而反居相位可爲之甚痛哉

近倖論

自古中主以降皆安於近習踈遠忠良其主非不知君子可親小人可去而不改者其敵有二一曰性相近二曰嗜慾深相靈之主與小人氣合如水之走下火之就燥皆自然而親結不可解也俟覽張讓所以

得蔽君矣元成二后皆有所嗜吹簫撾鼓之娛微行
沉酒之樂非倖臣無以承意非近習無以近歡弘恭
石顯所以得蠹政矣唯人君少欲英明者則能反是
如文帝雖有鄧通趙談所信者賈誼張釋之爰盎此
所謂少欲也武帝雖有韓嫣李延年而所貴者公孫
弘倪寬卜式此所謂英明也故君聽不惑政無頗類
近則開元初內有姜皎崔滌以極宮中之樂外有姚
廬蘇宋以修天下之政得元成之欲享舜禹之名六
合晏然千古莫及其故何也倖臣不得干政事也後
代能知漢之文武及開饌因興北門大將軍王駕鶴

等結歡共籌陰計而朝恩竟敗大舉大事非北門魚以成功此所謂天下之常勢也李訓因守澄得幸雖職在近密而日夕遊於禁中出入無礙此時拔守澄之勢與天子契若魚水北軍諸將望其顧盼與目覩天顏無異若以中旨諭之購以爵賞即諸將從之勢如風靡矣訓捨此不用而欲以神州靈臺游徼搏擊之吏抱閔擁篲之徒以當精甲利兵示猶霜蓬之禦烈火矣賴中人覺其變未及其亂向使訓計畫行所誅者不過侍從數百人而已其徒尚數千人與北門協力報怨則天下橫流矣何以知之昔竇武之舉事

也以五校士數千人屯都亭下中官矯詔令張奐率
營士與陣對陣乃大呼武軍曰竇武反汝皆禁兵當
宿衛宮省何故隨反者乎自旦至食時兵降畧盡由
是知自前代以來禁軍唯畏伏中官宰臣焉能使其
效死嗟乎焚林而畋明年無獸竭澤而漁明年無魚
既經李訓猖獗則天下大勢亦不可用也

方士論

秦皇漢武非好道者也始皇擒滅六國兼羲唐之帝
號漢武剪伐匈奴恢殷周之疆宇皆開闢所未有也
雖不能尊周孔之道以爲教化用湯武之師以行吊

伐而英才遠畧自湯武以降鮮能及矣豈不悟方士
之詐哉盖以享國既久歡樂已極馳騁弋獵之力疲
矣天馬碧雞之求息矣魚龍角觝之戲倦矣絲竹鞀
鼓之音厭矣以神仙爲竒以方士爲玩亦庶幾黃金
可成青霄可上固不在於嗇神鍊形矣何以知之苟
卿稱千萬人之情一人之情是也百王之道後王是
也余聞武宗之言是以知耳嘗於便殿言及方士皆
謫詐多不可信也上曰吾知之矣宮中無事以此
遣悶耳余嘗覽曹植論言左慈封君達之類家王及
植兄弟以優笑蓄之耳斯言信矣大抵方士皆習靜

者爲之隱身巖穴不求聞達如山鹿野麋是其志也
豈樂翹車之召哉敢自衒其術而欺明主者亦鮮矣
時旣不用逐之可也殺之非也若以共詐而可知則
公孫卿藥大魚非行詐殺其干勢利以自衒者足以
大戒蘭艾同焚斯爲甚矣貞觀末高宗不誅天竺方
士那羅邇婆娑寐逐之歸國斯可爲後王灋矣

小人論

世所謂小人者便僻巧佞翻覆難信此小人常態不
足懼也以怨報德此其甚者也背本忘義抑又次之
便僻者踈遠之則無患矣翻覆者不信之則無尤矣

唯以怨報德者不可預防此所謂小人之甚者皆本
者雖不害人亦不知感昔傷蛇傳藥而能報飛鶚食
堪而懷恩以怨報德者不及傷蛇遠矣皆本忘義者
不及飛鶚遠矣至於白公負刖翼之德宰嚭遺霍澆
之恩陳餘弃父子之交田蚡忘跪起之禮此可與叛
臣賊子同誅豈止於知己之義也世以小人比穿窬
之盜殊不然矣夫穿窬之盜迫於飢寒莫保性命於
高貴者有何恩義於多藏者有何仁愛旣無恩義仁
愛則是取資於道拾金於野若能識廉耻而不爲是
有償金者之行矣若能忍飢饉而不食是有蒙袂者

之操矣所以陳仲弓觀梁上之盜察非惡人以是而
言盜賊未爲害矣然操戈鋌挾弓矢以衆暴寡殺人
取財者則謂之盜比於以怨報德者亦未甚焉何者
人之父子兄弟有不相知者有德於人者是已知之
矣焉得負之哉

李文饒外集卷第三



李文饒外集卷第四

窮愁志

論

貨殖論

近世良相論

近世節士論

折群疑相論

禱祀論

黃冶論

祥瑞論

冥數有報論

周秦行紀論

牛僧孺周
秦行紀附

梁武論

喜徵論

貨殖論

欲知將相之賢不肖視其貨殖之厚薄彼貨殖厚者

可以曰天機幹河嶽使左右貴倖後當世奸人若孝
子之養父母矣陰陽不能為其寇寒暑不能成其疾
鬼神不能促其數雷霆不能震其邪是以危而不困
老而不死縱人生之大欲處將相之極休兄弟光華
子孫安樂昔公孫朝穆好酒及色而不慕榮祿鄧析
猶謂之真人况兼有榮樂乎後世雖有貶之者如用
斧鉞於糞上施桎梏於朽株無害於身矣則大易之
害盈福謙老氏之多藏厚亡不足信矣昔秦時金策
謂之天醉豈天之常醉哉故晉世唯貴於錢神漢台
不慙於銅臭謂子文無兼日之積顏氏樂一瓢之飲

晏平仲祀不掩豆儀休相以拔葵皆爲薄命之人矣
如嚮者四賢天與之生則生天與之壽則壽窮達夭
壽皆在彼蒼而望貴倖之知奸人之譽終身不可得
矣余有力命賦以致其意庶後之知我者興歎而已

近世良相論

客謂余曰楊子灋言有重黎顏騫二篇

顏子名犯廟諱不書

品藻漢之將相敢問近代良相可得聞乎余曰唯唯
夫股肱與若同體四海之所瞻也恩義至重實先於
愛敬非社稷大計不可以強諫亦猶父有誣子不獲
已而誣豈可以爲常也唯宜將明獻替致其主於三

代之隆孝經曰天子有諍臣七人非宰相之職也必
求端士正人以當言責導其謬諤救其患難而已唯
聖人言危而不持顛而不扶則焉用彼相此亦將明
獻替之謂也使其君昭明令德不至於顛危也漢之
良相十數人矣公孫弘開陳其端而不肯廷辯固未
可也蕭望之剛不護闕王嘉訐而犯上致元哀二后
有信讒邪之惡戮忠直之名此其失者也魏相薛廣
德持重守正弼諧盡忠可謂得宰相體矣近世貞以
制動思在無邪松栢所以後凋藜藿由是不採貴不
患失言必匪躬似薛廣德者鄭丞相陳丞相有之矣

此謂故右僕射鄭司徒麟之爲瑞也仁而不觸王之爲

寶也廉而不劓恕以及物善不近名高朗令終天下

無怨似丙博陽者王丞相鄭丞相有之矣此謂故中書王丞相

故鄭相好古洽聞應變膚敏幾可以成務智足以取捨

仁愛樂善勤瘁奉公逢時得君不失其正似倪寬者

韋丞相李丞相有之矣此謂故中書韋司空困於艱阨

以盡天涯雖劍光不沉而鸞翮長鏃靈均之九死無

悔柳惠之三黜非辜既沒不瞑號于上帝似蕭望之

者所謂李丞相矣此謂故淮李司空也余亦同病莫保其主知

我者以爲忠亦已鮮矣庶乎數世之後朋黨稍息以

李德公文集 卷之四
三
侯知音耳

近世節士論

客又謂余曰近世將相既已聞之矣敢問士君子身在下位而義激衰世者有其人乎余曰焉得無之丁生魏生是也昔蓋寬饒多仇少與在位及貴戚人與爲怨唯諫議大夫鄭昌愍傷寬饒忠直憂國爲文吏所詆挫上書曰山有猛獸藜藿爲之不採國有忠臣姦邪爲之不起寬饒上無許史之屬下無金張之託職在司察直道而行鄭昌可謂好是正直矣梅福南昌一尉耳與王章無薦寵之私無遊宴之好當王鳳

之世權歸外戚上書曰戴鵲遭害則仁鳥增逝愚者
蒙戮則智士深退折直士之節結諫臣之舌群臣皆
知其非然不敢爭天下以言爲戒最國家之大患也
梅福可謂不畏強禦矣余頃歲待罪廟堂六年竊位
而言責之官執憲之臣屬薦丁生稱其有清直之操
亦有毀之者曰體羸多病必不能舉職余惑是說未
及升之於朝而一旦觸群邪犯衆怒爲一孤臣獨夫
正言無避亦鄭昌梅福之比也昔貫高竟能以不生
白王而高祖賢其然諾戴就不忍以臣謗其君而薛
安感其壯節周燕寧恨於不食陸績豈辭於禁錮世

歷千祀有此幾人魏生爲酷吏所逼終不詘服詞義
雅正有古人之風亦貫高戴就之傳也嗚呼田叔孟
舒皆位顯於朝而魏生亦興疾遠竄溘盡道途疑其
幽魂必上訴於天矣或曰自古名節之士鮮受厚福
豈天意於善人薄耶余曰非也夫名節者非危亂不
顯非險難不彰免鈇鑕全性命者尚十無二三况福
祿乎若使不受困辱不嬰楚毒父母妻子恬然安樂
則天下之人盡爲之矣又何貴於名節者哉

折辟疑相論

夫相之相在乎清明將之相在乎雄傑清明者珠玉

是也爲天下斯寶雄傑者虎兇是也爲百獸所伏然
清者必得大權不能享豐富雄者必當昌後不能爲
大柄兼而有之者在乎粹美而已余頃歲蒞淮海屬
縣有盱眙而山多珉玉剖而爲噐清明洞澈雖水精
明水不如也而價不及凡玉終不得爲至寶以其不
粹也清而粹者天也故高不可測清而澈者泉也故
深亦可察此其大畧也余嘗精而求之多士以才爲
命婦人以色爲命天賦是美者必將有以貴之才高
者雖孟嘗眇小蔡澤折額亦居萬人之上色美者雖
鉤弋之拳李夫人之賤亦爲萬乘之偶然不如而粹

者必身名俱榮福祿終泰張良是也擇士能用此術
可以拔十得九無所疑也

禱祝論

語曰丘之禱久矣又曰祭則受福豈非聖人與天地
合德與日月合明與鬼神合契無所請禱而禱必感
通唯牧伯之任不可廢也失時不雨稼穡將枯閉閣
責躬百姓不見若非避群望則皆謂太守無憂人之
意雖在畎畝不絕歎音余前在江南數淫祠一千一
十五所可謂不誦神贖祭矣然歲或大旱必先令掾
屬祈禱積旬無效乃自躬行未嘗不零雨隨車或當

膏而應其術無他唯至誠而已將興祭必間居三日
清心齋戒雖禮未申於洞酌而意已接於神明所以
治颶八年歲皆大稔江左黎庶謳歌至今古人乃有
剪爪致詞積薪自誓精意上達雨必滂沱此亦至誠
也苟誠能達天性能及物焉用以肌膚自善焦爛焉
期動天地感鬼神莫尚於至誠故備物不足報功禴
祭所以受福余以爲人患不誠天之去人不相遠矣

黃冶論

或問黃冶變化余曰未之學也焉却無有然天地萬
物皆可以至理索之夫光黜砂者天地自然之寶在

石室之間生雪床之上如初生芙蓉紅苞未拆細者
環拱大者處中有辰居之象有君臣之位光暉外澈
採之者尋石脉而求此造化之所鑄也倘至人道與
者用天地之精合陰陽之粹濟以神術或能成之若
以藥石鎔鑄術則踈矣昔人問楊子鑄金而得鑄人
以孔聖鎔冶顏子至於殆庶幾亦恭造化之鑄丹砂
矣方士固不足恃劉向葛洪皆下學上達極天地之
際謂之可就必有精理劉向鑄作不成得非天意密
此神機不欲世人皆知之矣

祥瑞論

夫天地萬物異於常者雖至矣至麗無不爲妖覩之
宜先戒懼不可以爲禎祲何以言之栢靈之世多鸞
鳳丘墳之上生芝草神僊之物食之上可以凌倒景
次可以保永年生於丘墳豈得爲瑞若以孝思所致
則瞽瞍之墓曾皙之墳宜生萬株矣何者爲仁孝之
瑞唯甘露降於松栢縞鹿素鳥馴擾不去皆有縞素
之色足表幽明之感貞元中余在甌越有隱者王遇
好黃冶之術暮年有芝草數十莖產於丹竈之前遇
自以爲名在金格暢然滿志逾月而遇病卒齊中書
抗有別業在若耶溪忽生芝草百餘莖數月而中書

去世文餘姚守盧君在艸時

盧君名從

有芝草生於督郵

屋梁上五綵相鮮若樓臺之狀其歲盧君爲叛將栗
鎰所害置遺骸於屋梁之下並耳自所驗非自傳聞
由是而言則褒姒驪姬皆爲國妖以禍周晉綠珠竊
娘皆爲家妖以災喬石不可不察也又黃河清而聖
人生徵應不在於當世明矣柳谷玄石爲魏室之妖
啓將來之端亦不可不察也是以宜先戒懼以消桑
穀雉雉之變耳

冥數有報論

宣尼罕言性命不語怪神非謂無也欲人嚴三綱之

道奉五常之教修天爵以致人爵不欲言富貴出於
天命福祿由於冥數昔衛卜協於沙丘焉謚已久秦
塞屬於臨洮名子不寤朝歌未滅而周流丹鳥矣白
帝尚在而漢斷素蛇矣皆兆發於先而符應於後不
可以智測也周孔與天地合德與鬼神合契將來之
數無所遁情而狼跋於周鳳衰於楚豈親戚之義不
可去也人倫之教不可廢也條侯之貴鄧通之富死
於兵革可也死於女室可也唯不宜以綏終此又不
可以理得也而命偶時來盜有名器者謂禍福出於
宵懷榮枯生於口吻沛然而安溘然而笑曾不知黃

崔遊於茂林而挾彈者在其後也余乙丑歲自荆楚
保釐東周路出方城聞有隱者困於泥塗不知其所
如也姓姜不知其名往謂方城長曰居守後二年南行萬里
則知憾余者必因天譴譖余者必自鬼謀雖抱至冤
不以爲恨也余嘗三遇異人非卜祝之流皆遁世者
也初掌記北門有管涔山隱者詣余曰君明年當在
人君左右爲文翰之職然湏值少主余聞之愕眙酒
然變色隱者亦悔失言避席求去余徐問曰何爲而
事少主對曰君與少主已有累世緣業是以言之余
其年秋登朝至明年正月穆宗續緒召入禁苑及右

丞御史有閩中隱者叩門請見余因下榻與語曰時
事非人公不早去冬必作相禍將至矣若亟請居外
代公者受惠後十年終當作相自西南而入是秋出
鎮吳門歲經八稔尋又杖鉞南燕秋暮有邑子王生
引艸艸道士至繼升賓階未及命席謂余曰公當爲
西南節制孟冬望舒前節符至矣三者皆與言協不
差歲月自憲闇竟十年居相由西蜀而入代余執憲
俄亦竄逐唯再謫南服未嘗有前知者爲余言之豈
禍患不可移者神道所秘莫得預聞自古銜冤歿世
者多矣冥報之事或有或無遂使好亂樂禍者以神

道爲茫昧余嘗論之仁人上哲必達生知命如顏氏
之子杞而不校釋門達磨了空喻幻必不思報矣其
下柔弱無心者力不能報所能報者乃中人耳悍強
任氣如伯有灌夫之流亦其在臨歿之際方寸不撓
魂魄不散唯結念於此是以能報夫人之捨生也如
薪盡火滅溘然則魚能爲矣達於理者使心不亂則
精爽常存不生不滅自可以超然出世升躋神明其
次精多魄強則能爲厲冥報之事或有或無理在此
也

周秦行紀論

牛僧孺周
秦行紀附

言發于中情見乎辭則言辭者志氣之來也故察其

言而知其內翫其辭而見其意矣余嘗聞太牢氏涼國

李公嘗呼牛僧孺曰太牢梁公名不便故不書好奇怪其身險易其行以其

姓應國家受命之識曰管尾三麟六十年兩角犢子

恣狂顛龍蛇相闔血成川及見著玄怪錄多造隱語

人不可解其或能曉一二者必附會焉縱司馬取魏

之漸用田常有齊之由故自卑秩至于宰相而朋黨

若山不可動搖欲有意擺憾者皆遭誣坐莫不測目

結舌事具史官劉軻曰曆余得太牢周秦行紀周秦行紀

附於反覆觀其太牢以身與帝王后妃冥遇欲證其

身非人臣相也將有意於狂顛及至戲德宗為沈淩
兒以代宗皇后為沈淩令人骨戰可謂無禮於其君
甚矣懷異志於圖讖明矣余少服臧文仲之言曰見
無禮於其君者如鷹鷂之逐鳥雀也故貯一作太牢

已久前知政事欲正刑書力未勝而罷余讀國史見

開元中御史汝南一作周子諒彈奏牛僊客以其姓符

圖讖雖似是而未合三麟六十之數自裴晉國興余

涼國名不彭原程趙郡紳諸從兄嫉太牢如讎頗類

余志非懷私忿益惡其應讖也太牢作鎮襄州日判

復州刺史樂坤賀武宗監國狀曰閑事不足為賀則

恃姓敢如此耶會余復知政事將欲發覺未有由值
平昭義得與劉從諫交結書因竄逐之嗟乎爲人臣
陰懷逆節不獨人得誅之鬼得誅矣凡與太牢膠固
未嘗不是薄流無賴輩以相表裏意太牢有非望而
就佐命焉斯亦信符命之致或以中外罪余於太牢
愛憎故明此論庶乎知余志所恨未暇族之而余又
罷豈非王者不死乎遺禍胎於國亦余大罪也倘同
余志繼而爲政宜爲君除患曆既有數意非偶然若
不在當代其必在於子孫湏以太牢少長咸寘於灋
則刑罰中而社稷安無患於二百四十年後嘻余致

君之道分隔於明時嫉惡之心敢辜於早歲因援毫而攄宿債亦書行紀之跡于後

周秦行紀

牛僧孺撰

余真元中舉進士落第歸

宛葉間至伊闕南道鳴皋山下將宿大安

民舍會暮不至更十餘里

一道甚易夜月始出忽聞有異香

氣因趨進行不知狀遠見火明意謂莊家更前

驅至一大宅門庭若富豪家黃衣闍人曰卽君

何至余荅曰僧孺姓牛應進士落第往家本往

大安民舍誤道來此直乞宿無他中有小髻書

衣出責黃衣曰門外誰何

一作門外爲誰黃衣曰有客

黃衣入告少時出曰請卽尹入余問誰氏宅黃
衣曰第進無須問入十餘門至大殿殿蔽以珠
簾有朱衣紫衣人百數立階下間左右曰拜有
遂拜殿下簾中語曰妾漢文帝母薄太后此是
廟卽不當來何辱至余曰巨業寃下將歸失道
恐死豺虎敢託命乞宿太后幸聽受太后遣軸
簾起席曰妾故漢文君母君子唐朝名士不相
君臣幸無簡敬便一作上殿來見太后着練衣
狀貌瑰偉不甚粧飾慰余曰行役無苦乎召坐
食頃聞殿內庖厨聲太后曰今夜風月甚善一作

佳偶有二女侍

一作伴

相尋况又遇佳賓不可不

成一會呼左右屈兩箇娘子出見牛秀才良久
有二女子從中至從者數百前立者一人挾腰
長面多髮不粧衣青衣僅可二十餘太后顧指
曰此高祖戚夫人余下拜夫人亦拜更有一人
圓題柔臉穩身貌舒光彩射遠近時時好曠多
服花繡年低薄后后指顧曰此元帝王嬙余拜
如戚夫人王嬙復拜各就坐坐定太后使紫衣
中貴人曰迎楊家潘家來久之空中有五色雲
下聞笑語聲寢近

一有太字

后曰楊潘至矣忽車音

馬跡相雜羅錦綺繡列旁視不給有二女子從
雲中下余超侍前立者一人纖腰身修眸容甚
閒暇衣黃衣戴黃冠年二十以來太后顧指曰
此是唐朝太真妃余即伏謁肅拜如臣禮太真
曰妾得罪先帝皇朝不然妾在后妃數中此禮
豈不虛乎不敢受却答拜更一人厚肌敏視身
小材質潔白齒極卑被寬博衣太后顧而指曰
此齊帝潘淑妃余拜如王昭君妃復拜

太后命進饌少焉食至芳潔萬品皆不得名字
粗欲之腹不能足食已更置酒其器盡寶玉語

太真曰何久不相看太真謹容對曰三節數幸
華清扈從不暇至太后又謂潘妃曰子亦不來
何也潘妃匿笑不禁不成對太真視潘妃而有
對曰潘妃向玉奴說懊惱東昏侯字二有疎狂終

日出獵故不得時謁太后問余曰今天子爲一有

誰余對曰今皇帝名适代宗皇帝長子太真笑

曰沈淩兒作天子也太奇太后曰何如主余對

曰小臣不足以知君德太后曰然無謙第言之

余曰民間傳英明聖武太后首肯三四太后命
進酒加樂樂皆少年女子酒環行數周樂亦隨

輟太后請戚夫人鼓琴夫人約指以玉環光照

手

西京雜記云高祖與夫人石鍊金環照見指骨引琴而

鼓字一有聲甚怨

太后曰牛秀才邂逅逆旅到此又諸娘子偶相

訪今無以盡平生歡牛秀才盍各賦詩言志不

亦善乎遂各授以牋筆逡巡詩成薄后詩曰月

寢花宮得奉君至今猶愧管夫人漢家舊日笙

歌地煙草幾經秋又春王嬙詩曰雪裏穹廬不

見春漢衣雖舊淚長新如今猶恨毛延壽愛把

丹青錯畫人戚夫人詩曰自別漢宮休楚舞不

能粧粉恨君王無金豈得迎商叟呂氏何曾畏

木強太真詩曰金釵墮地別君王紅淚流珠滿
御床雲雨馬嵬分散後驪宮無復聽霓裳潘妃
詩曰秋月春風幾度歸江山猶是鄴宮非東昏
舊作蓮花地空想曾拖金縷衣再三趣余作詩
余不得辭遂應教作詩曰香風引到大羅天月
地雲階拜洞仙共道人間惆悵事不知今夕是
何年別有箬笛女子短鬟衫吳帶貌甚笑多媚
與潘氏偕來太后以接坐居之時令吹笛往往
亦及酒太后顧而謂曰識此否石家綠珠也潘
妃養作妹故潘妃與俱來太后因曰綠珠豈能

無詩乎綠珠拜謝作詩曰此地元非昔日人笛

聲空起

一作怨

趙王倫紅牋鈿碎

一作紅殘綠碎

花枝下

金谷千年更不春太后曰牛秀才遠來今夕誰

人與伴戚夫人先起辭曰如意成長固不可且

不宜如此况實爲非乎潘妃辭曰東昏侯以王

兒

妃名

身死國除不擬負他綠珠辭曰石衛尉性

嚴忌今有死不可及亂太后曰太真今朝先帝

貴妃固勿言他乃謂王嬙曰昭君始嫁呼韓單

于

後字

復爲姝參效追

一本作爲株

紫若靄

單于婦固

自用宜苦寒地胡鬼何能爲昭君幸無辭昭君

不對低眉羞恨俄各歸休余爲左右送入昭君
院會將旦侍人告起得也昭君泣以特別忽聞
外有太后命余遂見太后太后曰此非節久留
地宜亟還便別矣幸無忘向采歡更索酒酒再
行戚夫人潘妃綠珠皆泣下竟辭去太后使朱
衣人送往大安邸西道旋失使人行往一本作所在字
時始聞余就大安里問其人人曰去此十數里
有薄后廟余却望廟荒毀不可入非向見者余
衣上香經年不歇竟不知其一作何

梁武論

所論出於釋氏故全以釋典明之

世人疑梁武建佛刹三百餘所而國破家亡其禍甚酷以爲釋氏之力不能拯其顛危余以爲不然也釋氏有六波羅密檀波羅密是其一也又曰難捨能捨大者頭目支體其次國城妻子此所謂難捨也余嘗深求此理本不戒其不貪能自微不有其寶必不慄人所寶與老氏之無欲知足司城之不貪爲寶其義一也庸夫謂之作福斯爲妄矣而梁武所建佛刹未嘗自損一毫或出自有司或厚斂氓俗竭經國之費破生人之產勞後不止杼柚其空閭閻偏方不堪其弊以徼身福不其悖哉此梁武所以不免也

喜徵論

陸賈稱蟾子垂而百事禁不徵其故何也凡人將有喜兆必垂於冠冕余常思之蓋以人肖圓方之形稟五行之氣有生之最靈者也如景如火忽有歆然感氣發於圓晉之上其榮盛也如陽氣發生烟涵熅煦其變衰也如秋氣索然寂寞沉悴雖不能自覩其鑒明者必可察之唐舉許負疑用此術所以望表而知窮達何以明之淑春愛景必有蟾子垂於簷楹之間室有明燭膏爐必垂於屏幃之際喜氣將盛故集於冠冕之上以此推之無所逃也

卷終

後序

唐有天下幾三百年賢相名儒接武而出固未易歷數也然考其功烈文章光明偉大卓然足以垂不腐者蓋亦無幾自房杜姚宋之後相之有聲者衛公李文饒而王楊燕許之後儒之可宗者文公韓退之而已故世之論衛公者必以功烈言而鮮及於文章論文公者必以文章稱而或畧於功烈殊不知衛公之文章常出乎功烈之外而文公之功烈不在乎文章之下惜令衛公當文公時則必以文章顯矣文公得衛公位則必以功烈著矣觀幽州紀聖功碑異域歸

忠傳序會昌功烈非衛公孰能形容之文公論淮蔡之敗可立而待折王庭湊之兇焰而奪之氣胷中所蘊固不止於文章也夫道之在天下操之則爲心盡之則爲性持之則爲志養之則爲氣存之則爲神是道也見之設施則爲功烈寓之言語則爲文章易地皆然豈有彼此之異哉元和十五年文公嘗爲袁州刺史大和八年衛公亦嘗爲袁之長史文公之去袁也崇廟貌以祀之列豐碑以記之其文集之行於世者又鋟木於黟庠至於衛公則不然祠堂數椽地石刻數尺許蕭然岑壑之上佛屋之側文之流傳者僅

有十五賦其全集則未之見豈世之知衛公者一於
功烈鮮及於文章歟紹興己卯冬建安

邵公來守是邦下車之初晉訪韓李遺集而衛公文
集獨未有表而出之

華陽志序

昭公著書與時下事之關係特微筆推其而論公之
如無他文結文章無點與此則冬與矣

不才正知其全集四未之真豈也又昭公著一

李衛公集訂正 明本錯簡六首据全唐文訂正

文集卷十五

請賜仲武詔第十葉前三行入觀之初 下應接第十一葉前一行 與鄭注交

結 至末

論石雄請添兵狀第十一葉前一行仍望約陳許長行制 下應接第十一

葉後九行度支權給衣糧 至末

請授王宰兼行營諸軍攻討使狀第十一葉後九行尙未安定茂 下應

接第十葉前三行茂元縱得痊復 至末 案明本衍一茂字

外集卷三

食貨論第九葉後三行壽昌習分誅之事弘 下應接第十葉後二行 羊析秋

毫之數 至末

奇才論第十葉後二行以爲朝恩 下應接第十一葉前十行 饌因與北門大

將軍王駕鶴等結歡 至末

近倖論第十一葉前十行及開下應接第九葉後三行元致理之要至末

李衛公集補

文

賜新授太子太師杜衍制

以下九首明本原缺据全唐文錄補

卿道崇德茂體方行正業成廊廟心存邱壑往以時事來還宰
旅秉此難進確然莫奪雖違又辟之望實有鎮浮之益深惟元
老想見高風師範之尊東宮莫二舉茲崇秩明昭有德公器斯
在雅道有光宜略常謙卽膺成制

與黠憂王書

皇帝敬問黠憂王時及陽和想比佳適注吾合素等至省表并
進馬事具悉國王陰山雄勁朔野英雄包智略以周身推誠明
而有衆聲高夷落威重藩疆專遣使臣遠獻名馬嚮化之誠旣
展輸忠之効頗明臨軒省章輟食嘉歎眷言忠藎寧忘寢興頃
於貞觀中彼國常奉朝貢亦授官爵寵賜而還爾後但訝音耗

久乖不知中爲回鶻所隔及覽來表方嘉壯圖蓄銳多年乘機
大舉快雪冤憤豁開心懷回鶻之營壘旣平國家之山河不間
旣爲鄰境遂閱貢章又知破回鶻之時取得太和公主特遣專
使送歸闕庭雖聞行至中途却爲回鶻所奪在國王遵以禮義
推之和寧遠同族之譏嫌厚親鄰之恩信賢明如此愧慰難名
回鶻頃以失國爲詞款塞相託朕以勳親是念拯卹屢加曾不
知恩漸開稔惡賤棄公主侵暴平人日尋干戈時竊牛馬朕爲
全舊好不下明誅歲月滋深邊防將倦各用長策繼彰殊勳焚
帳幕而公主歸還透網羅而元惡逃遁顧其餘類何所寄生國
王遠聞想同深慰然猶恐奔竄尙有凶姦又慮侵彼封疆將復
讐怨國王亦須嚴爲備擬善設機謀同務討除盡其根本無貽
後患勉繼前修親仁善鄰惟彼與此勿謂遐遠常存寤思因注
吾合素回且先詔示其他禮命續專遣使宣慰想宜知悉

薦處士李源表

臣伏見賈誼云守圉捍敵之臣誠死城郭封疆故曰聖人有金城者此物此志也自天寶之後俗尚浮華士罕仗義人懷苟免至有棄城郭委符節者其身不以爲恥當代不以爲非臣恐風俗旣成紀綱皆廢此當今之急務教化所宜先也臣訪聞處士李源卽故禮部尙書東都留守贈司徒忠烈公愷之少子天與貞孝嗣茲忠烈以父死國難哀纏終身自司農寺主簿絕心祿仕垂五十年放懷山澤罕至人落暨於衰暮多依慧林佛寺以其本愷別業就寓殘生從僧住持不舉烟爨隨僧一食以至五十餘年嗜欲靡窺精麤同衆寺之舊殿則愷之寢堂源過必敬趨未嘗登踐其端心執孝無有不至忘形患苦絕意貪緣迎斥浮虛就專志節則孰能挺操不易沈身無聲處薄自顧終老彌篤且愷之忠烈實冠古今當逆羯屠陷颺驅響從而愷抗節誓

心約義同列居朝守位抵刃就終臣節之光絲愷益勸而源名
銷迹滅徵訪不加實主於居方之臣歷政之闕也况源嘗守沈
默不語是非或心交靜求理契深要一言開析百慮洗然致君
阜時指象如見抱此貞用棄於清朝臣竊爲陛下深惜伏乞就
授一官召赴京闕仍以事迹宣付史館則聖代有求賢之盛朝
廷美得材之難愷之貞烈如存源之承荷不墜忠孝之美并集
愷門光嗣德於一時激爲臣於千古

請宣賜鶴林寺僧諡號奏

潤州鶴林寺故禪師元素傳牛頭山第五祖智威心法是徑山
大覺之師伏請依釋門例賜諡號大額

請罷呈榜奏

舊例進士未放榜前禮部侍郎遍到宰相私第先呈及第人名
謂之呈榜比聞多有改換頗致流言宰相稍有寄情有司固無

畏忌取士之濫莫不繇斯將務責成在於不撓既無取舍豈必預知臣等商量今年便任有司放榜更不得先呈臣等仍向後便爲定例如有固違御史糾舉

停進士宴會題名疏

奉宣旨不欲令及第進士呼有司爲座主趨附其門兼題名局席等條疏進來者伏以國家設文學之科求貞正之士所宜行敦風俗義本君親然後升於朝廷必爲國器豈可懷賞拔之私惠忘教化之根源自謂門生遂成膠固所以時風寢薄臣節何施樹黨背公靡不由此臣等商量今日已後進士及第任一度參見有司向後不得聚集參謁及於有司宅置宴其曲江大會朝官及題名局席並望勒停緣初獲美名實皆少雋既遇春節難阻良遊三五人自爲宴樂並無所禁惟不得聚集同年進士廣爲宴會仍委御史臺察訪聞奏謹具如前

論喪葬踰制疏

應百姓厚葬及於道途盛陳祭奠兼設音樂等閭里編氓罕知教義生無孝養可紀沒以厚葬相矜器仗僭差祭奠奢靡仍以音樂榮其送終或結社相資或息利自辦生產儲蓄爲之皆空習以爲常不敢自廢人戶貧破抑此之由今百姓等喪葬祭奠並請不許以金銀錦繡爲飾其陳設樂音者及葬物稍涉僭越者並勒毀除結社之類任充死亡喪服糧食等用使如有人犯者並準法律科罪其官吏已上不能糾察請加懲責仍請委出使郎官御史察訪臺司伏請令文及故實不載者令更條檢校官令文不載令請檢校官一品二品請同五品五品已下並請同九品如有曾任正官依本官品第儀則其准敕試官亦全九品儀如升朝官者請據本官品第升降闕例凡喪皆有品第恐或無知之人妄稱官秩自今以後除升朝官見任官亡歿外餘

官去事前五日須除將告語或敕牒於本巡使呈過判押文狀
行人方可供應佐命殊功當朝立功名傳遐邇特敕優旨准會
典例本品數十分加三分不得別爲華飾右具本朝舊本例如
前今後令兩巡使祇據官秩品級與判狀其餘一物已上不得
增加兼勒驅使官與金吾司并門司同力轄鈴如有大段踰越
卽請據罪科斷行人兼不得追領喪葬之家別有勘責奉敕如
過制度不許尺寸事數其假賃行人徒二年喪葬之家卽不問
罪仍付所司

次柳氏舊聞序

太和八年秋八月乙酉上於紫宸殿聽政宰臣涯以下奉職事
上顧謂宰臣曰故內臣高力士終始事迹試爲言之臣涯謹奏
云上元中使臣柳芳得罪竄黔中時力士亦從事巫州因與周
旋力士以舊嘗司史爲芳言先時禁中事皆芳所不能知而芳

亦有質疑者芳默識之及還編次其口語號曰問高力士說上曰令訪史氏取其事書之臣涯等既奉詔乃詣芳孫度支員外璟詢事璟曰某祖芳前從力士問覲縷未竟復著唐歷採摭義數尤相近者以傳之其錄或秘不敢宣或怪奇非編錄所宜及者不以傳今按求其書甚實臣德裕亡父先臣與芳子吏部郎冕開元初俱爲尙書郎後官亦俱東出道相與語遂及高力士說且曰彼皆目覩非出傳聞信而有徵可爲實錄先臣每爲臣言之臣伏念所臆授凡有十七事歲祀久更遺稿不傳臣德裕非黃瓊之練習愧史遷之該博唯次舊聞懼失其傳不足以備大君之問謹錄如左以補史官之缺云

太和新修辨謗略序

臣聞行險而言闕上者非謂謗也是實之所招也蹈仁而被誣者非已所召是盜之所憎也夫理身絕嫌人臣止謗之術膚受

不納人君辨謗之明然則正者邪之所仇直者曲之所矯有能
爲不才所忌有功爲無庸所嫉四者苟立四謗必隨况僞必亂
眞佞實似智鑠金之口不謀而同唱成雷之蚊未響而先合以
羣陰而蔽孤陽以衆比而排獨立結其禍患咸本謗言莫不巧
中於隱伏之微善成於疑似之際忠賢被之無以自辨亦良可
哀哉伏維皇帝陛下體乾坤簡易之德合日月無私之照視聽
自天神明其化惡淫哇之亂聽疾紫色之眩目聖其讒說常詠
格言臣等將順天聰綴緝舊典發東觀藏書之室得元和辨謗
之文辭過萬言書成十卷以其廣而寡要繁則易蕪方鏡情僞
之源尤資詳略之當遂再加研考所以理昔賢被誣之狀表前
王善鑒之明實願視則倚衡居則宥坐絕其根柢永杜其來必
也視之於未形鑒之於無象方夏后盤盂之誠比周王玉几之
銘測深慮遠取爲殷鑒使播揚有所消其象萎菲無以成其文

忠臣得納其誠武臣得盡其力矣於是徵之周秦覃及聖代必極精簡有合箴規特立新編裁成三卷謹繕寫封進臣等上奉宸謀竭其鑽仰敢不虔序聖旨冠于篇首云

奏回鶻事宜狀

以下二首明本有目無文据陸心源唐文拾遺錄補

右臣等見楊觀說緣回鶻赤心下兵馬多散在山北恐與奚契丹室韋同邀截可汗所以未敢遠去今因華封迴輿望賜仲武詔令差明辨識事宜軍將至奚契丹等部落諭以朝旨緣回鶻曾忠效又因殘破歸附國家朝廷事體須有存恤令奚契丹等與其同力討除赤心下散卒遣可汗漸出漢界免有滯留如蒙允許望付翰林約此意撰詔兼詔克恭未審

影宋本會昌一品集

請發陳許軍馬狀

右臣等商量賊中人心久合自變猶恐顧望河朔旬月偷安陳許累有戰功軍聲甚振王宰年力方壯才略可稱委之征行必

有殊效非惟破賊積之膽足以堅鎮魏之心倘有先聲必當自潰望詔王宰自揀當軍馬步精兵除合留在鎮外並取河陽相衛路直抵磁州其在鎮兵馬委行敏權知仍差幹事判官一人留務未審會昌三年八月十一日

同上

賜王宰詔意

明本原缺据陸心源唐文拾遺錄補

用兵之難在於過險既收要害便合成功故出井陘而趙師虜過成臯而吳寇殄得略陽而隴坻服入大峴而廣固平近則破鹿頭而剪蜀克郾城而定蔡卿初取天井大振威聲皆謂計日而取澤州指期而擒劉稹頓兵危坂已涉二時日費殆過於千金途隘有逾於九折士不宿飽人已告勞在朝公卿繼陳讜論皆云卿之血屬實在賊中此一人之常情固當無隱昔樂羊食子文侯見疑愛既及於懿親義豈後於君上若慮危害晏實未忍急攻但卿披誠朕必深恕卽當與卿移鎮必使兩全如能大

義滅親至誠體國捨爾所愛建茲殊勳繼先王鐘鼎之榮傳子
孫帶礪之慶卽須厭塞公議早覆妖梟朕之報卿必異羣帥暑
潦將至農事已興偃武息人固難淹久深思朕意勿更食言又
知卿比留支兵守備萬善旣分武力尤費機謀今授劉沔河陽
日臨寇境俾爲聲援常據要衝卿旣進攻必無後慮勉當協力
副朕至懷

同上

詩

鴛鴦篇

明本有目無詩据全唐詩錄補

君不見昔時同心人化作鴛鴦鳥和鳴一夕不暫離交頸千年
尙爲少二月草菲菲山櫻花未稀金塘風日好何處不相依旣
逢解佩游女更值凌波宓妃精光搖翠蓋麗色映珠璣雙影相
伴雙心莫違淹留碧沙上蕩漾洗紅衣春光兮宛轉嬉遊兮未
反宿莫近天泉池飛莫近長洲苑爾願歡愛不相忘須去人間

羅網遠南有瀟湘洲且爲千里遊洞庭無苦寒沅江多碧流昔
爲薄命妾無日不含愁今爲水中鳥頡頏自相求洛陽女兒在
青閣二月羅衣輕更薄金泥文彩未足珍畫作鴛鴦始堪著亦
有少婦破瓜年春閨無伴獨嬋娟夜夜學織連枝錦織作鴛鴦
人共憐悠悠湘水濱清淺漾初蘋菖花發艷無人識江柳逶迤
空自春唯憐獨鶴依琴曲更念孤鸞隱鏡塵願作鴛鴦被長覆
有情人

上巳憶江南禊事

以下七首明本原缺据全唐詩錄補

黃河西繞郡城流上巳應無祓禊遊爲憶淶江春水色更無宵
夢向吳州

北固懷古

自有此山川於今幾太守近世二千石畢公宣化厚丞相量納
川平陽氣衝斗三賢若時雨所至躋仁壽

畢構政事爲開元第一陸丞相象先平陽齊幹三賢

此皆爲郡

汨羅

遠謫南荒一病身
停舟暫弔汨羅人
都緣靳尚圖專國
豈是懷王厭直臣
萬里碧潭秋景靜
四時愁色野花新
不勞漁父重相問
自有招魂拭淚巾

嶺外守歲

一作李福業詩

冬逐更籌盡
春隨斗柄回
寒暄一夜隔
客鬢兩年催

訪韋楚老不遇

昔日徵黃綺
余慚在鳳池
今來招隱士
恨不見瓊枝

題柳郎中故居

下馬荒堦日欲曛
潺潺石溜靜中聞
鳥啼花發人聲絕
寂寞山窗掩白雲

盤陀嶺驛樓

嵩少心期杳莫攀
好山聊復一開顏
明朝便是南荒路
更上層樓望故關

失題

明本原缺据席刻唐詩百家全集錄補

肉視具寮忘七箸
氣吞同列削寒溫
當時誰是承恩者
肯有餘波達鬼村
畫閣不開梁燕去
朱門罷掃乳烏歸
千巖萬壑應惆悵
流水斜傾出武威

句

明本原缺据全唐詩錄補

檢經求綠字
憑酒借紅顏
君不見秋山寂歷風
颼歇半夜青崖吐
明月寒光乍出松
篠間萬籟蕭蕭從此發
忽聞歌管吟朔風
精魂想在幽巖中
霜夜聽小童薛陽陶吹笛
銀花懸院榜神撼
引鈴絳題學士院
歲麤輕風裏
若銜若垂何可擬
以上並事文類聚
自從一夢高唐後

可是無人勝楚王

賦巫山神女見雲溪友議

牛羊具特俎

武昌詩見東觀餘論

心悟覺

身勞雲中棄寶刀久閑生脰肉多壽長眉毫

有懷甘露寺自
省上人京口志

書空

蹀足睡路險側身行

德裕嘗吟此句云是先
達詩附記見桂苑叢談

誰家幼女敲筇歌何處

丁妻點燈織

魚蝦集橘市

以下並海
錄碎事

休咎占人甲挨持見天

丁洛下推年少山東許地高


世上文章士誰爲第一人老


生誇隱拙時輩毀尖新


漏瀝寒泉深百尺

奇觚率爾操諷

諫欣然納







白氏長慶集

—

LIBRARY
OF THE
UNIVERSITY OF ILLINOIS



CHINA

卷之七

白虎集

七十一

白氏長慶集
七十一卷

四部叢刊集部

上海涵芬樓借江南
圖書館藏日本翻宋
大字本景印原書版
匡高營造尺七寸三
分半寬五寸三分半

白氏長慶集序

浙東觀察使元稹字微之述

白氏長慶集者太原人白居易之所作居易字樂天樂天始言試指之無二字能不誤始旣言讀書勤敏與他兒異五六歲識聲韻十五志詩賦二十七舉進士貞元末進士尚馳競不尚文就中六籍尤擯落禮部侍郎高郢始用經藝爲進退樂天一舉擢上第明年拔萃甲科由是性習相近遠

求玄珠斬白蛇等賦及百道判新進士競
相傳於京師矣會憲宗皇帝冊召天下士
樂天對詔稱旨又登甲科未幾入翰林掌
制誥比比上書言得失因爲賀雨秦中吟
等數十章指言天下事時人比之風騷焉
予始與樂天同校祕書之名多以詩章相
贈答會予譴掾江陵樂天猶在翰林寄予
百韻律詩及雜體前後數十章是後各佐
江通復相誚寄巴蜀江楚間泊長安中少

年逆相倣効競作新詞自謂爲元和詩而
樂天秦中吟賀雨諷諭等篇時人罕能知
者然而二十年間禁省觀寺郵候牆壁之
上無不書王公妾婦牛童馬走之口無不
道至於繕寫模勒街賣於市井或持之以
交酒茗者處處皆是其甚者有至於盜竊
名姓苟求自售雜亂間廁無可柰何予嘗
於平水市中見村校諸童競習詩召而問
之皆對曰先生教我樂天微之詩固亦不

知予之爲微之也又云雞林賈人求市頗切自云本國宰相每以百金換一篇其甚僞者宰相輒能辨別之自篇章已來未有如是流傳之廣者長慶四年樂天自杭州刺史以右庶子詔還予時刺會稽因得盡徵其文手自排纘成五十卷凡二千一百九十一首前輩多以前集中集爲名予以爲陛下明年秋當改元長慶訖於是因號曰白氏長慶集大凡人之文各有所長樂

天之長可以爲多矣夫以諷諭之詩長於
激閑適之詩長於遣感傷之詩長於切五
字律詩百言而上長於贍五字七字百言
而下長於情賦贊箴戒之類長於當碑記
叙事制詔長於實啓奏表狀長於直書檄
詞策剖判長於盡摠而言之不亦多乎哉
至於樂天之官族景行與予之交分淺深
非叙文之要也故不書長慶四年冬十二
月十日微之序

白氏長慶集 五帙都五十卷

凡二千一百九十一首

第一帙詩七卷摠三百三十首

第一卷 諷諭一 古調詩

第二卷 諷諭二 古調詩

第三卷 諷諭三 新樂府

第四卷 諷諭四 新樂府

第五卷 閑適一 古調詩

第六卷 閑適二 古調詩

第七卷

閑適三

古調詩

第二帙七卷摠四百七十二首

第八卷

閑適四

古調詩

第九卷

感傷一

古調詩

第十卷

感傷二

古調詩

第十一卷

感傷三

古調詩

第十二卷

感傷四

謠行曲引

第十三卷

律詩一

第十四卷

律詩二

第三帙七卷摠六百十五首

第十五卷 律詩三

第十六卷 律詩四

第十七卷 律詩五

第十八卷 律詩六

第十九卷 律詩七

第二十卷 律詩八

第二十一卷 詩賦十二首

第四帙七卷摠七十九首

第二十二卷 銘讚箴謠偈

第二十三卷 哀祭文

第二十四卷 碑碣

第二十五卷 墓誌銘

第二十六卷 記序

第二十七卷 書

第二十八卷 書序

第五帙七卷摠二百十三首

第二十九卷 書頌議論狀

第三十卷

試策問制誥

第三十一卷

中書制誥一

舊體

第三十二卷

中書制誥二

舊體

第三十三卷

中書制誥三

舊體

第三十四卷

中書制誥四

新體祭

文冊文附

第三十五卷

中書制誥五

新體

第六帙七卷摠二百五十八首

第三十六卷

中書制誥六

新體

第三十七卷

翰林制誥一

擬制附

第三十八卷

翰林制誥二

擬制附

第三十九卷

翰林制詔三

勅書批

答祭文贊文附

第四十卷

翰林制詔四

勅書批

答祭文贊文附

第四十一卷

奏狀一

第四十二卷

奏狀二

第七帙七卷摠一百五十六首

第四十三卷

奏狀三

第四十四卷

奏狀四

第四十五卷

策林一

第四十六卷

策林二

第四十七卷

策林三

第四十八卷

策林四

第四十九卷

甲乙判一

第五十卷

甲乙判二

第八帙七卷共五百五十四首

後集

第五十一卷

雜體

格詩

謠行

第五十二卷

格詩

雜體

第五十三卷

律詩一

第五十四卷

律詩二

第五十五卷

律詩三

第五十六卷

律詩四

第九帙七卷共三百二十八首

第五十七卷

律詩五

第五十八卷

律詩六

第五十九卷

碑誌序記表

第六十卷

碑記序解祭文

第六十一卷

銘誌序贊祭

第六十二卷

律詩

第六十三卷

格詩

雜體

第十帙七卷共五百七十八首

第六十四卷

律詩

第六十五卷

律詩

第六十六卷 律詩

第六十七卷 律詩 雜體附

第六十八卷 律詩

第六十九卷 半格詩 律詩附

第七十卷 碑記銘吟偈

已上十冊共七十卷摠三千五百九

十四首

卷之四

山王十世共出千佛殿二字及寶光

庵山王寺 經書地志

卷六下 出卷 寺經書地志

卷六下 出卷 寺經書地志

卷六下 出卷 寺經書地志

卷六下 出卷 寺經書地志

白氏文集卷第一

諷諭一 古調詩五言 凡六十五首

賀雨詩

皇帝嗣寶曆元和三年冬自冬及春暮不
雨旱熾熾上心念下民懼歲成災凶遂下
罪已詔殷勤告萬邦帝曰予一人繼天承
祖宗憂勤不遑寧夙夜心忡忡元年誅劉
闢一舉靖巴邛二年戮李錡不戰安江東
顧惟眇眇德遽有巍巍功或者天降沴無

乃敬予躬上思答天戒下思致時邕莫如
率其身慈和與儉恭乃命罷進獻乃命賑
饑窮宥死降五刑責已寬三農宮女出宣
徽旤馬減飛龍庶政靡不舉皆出自宸衷
奔騰道路人偃僂田野翁歡呼相告報感
泣涕沾膺順人人心悅先天天意從詔下
纔七日和氣生冲融疑爲悠悠雲散作習
習風晝夜三日雨淒淒復濛濛萬心春熙
熙百穀青芄芃人變愁爲喜歲易儉爲豐

乃知王者心憂樂與衆同皇天與后土所
感無不通冠珮何鏘鏘將相及王公蹈舞
呼萬歲列賀明庭中小臣誠愚陋職忝金
鑾宮稽首再三拜一言獻天聰君以明爲
聖臣以直爲忠敢賀有其始亦願有其終

讀張籍古樂府詩

張君何爲者業文三十春尤工樂府詩舉
代少其倫爲詩意如何六義互鋪陳風雅
比興外未嘗著空文讀君學仙詩可諷放

佚君讀君董公詩可誨貪暴臣讀君商女
詩可感悍婦仁讀君勤齊詩可勸薄夫淳
上可裨教化舒之濟萬民下可理情性卷
之善一身始從青衿歲迨此白髮新日夜
秉筆吟心苦力亦勤時無采詩官委弃如
泥塵恐君百歲後滅没人不聞願藏中祕
書百代不湮淪願播內樂府時得聞至尊
言者志之苗行者文之根所以讀君詩亦
知君爲人如何欲五十官小身賤貧病眼

街西住無人行到門

孔戡詩

洛陽誰不死戡死聞長安我是知戡者聞
之涕洟然戡佐山東軍非義不可干拂衣
向西來其道直如絃從事得如此人人以
爲難人言明明代合置在朝端或望居諫
司有事戡必言或望居憲府有邪戡必彈
惜哉兩不諧沒齒爲閑官竟不得一日謫
謫立君前形骸隨衆人歛葬北邙山平生

剛腸內直氣歸其間賢者爲生民生死懸
在天謂天不愛人胡爲生其賢爲天果愛
民胡爲奪其年茫茫元化中誰執如此權

凶宅詩

長安多大宅列在街西東往往朱門內房
廊相對空梟鳴松桂枝孤藏蘭菊叢蒼苔
黃葉地日暮多旋風前主爲將相得罪竄
巴庸後主爲公卿寢疾歿其中連延四五
主殃禍繼相鍾自從十年來不利主人翁

風雨壞簷隙蛇鼠穿牆墉人疑不敢買日
毀土木功嗟嗟俗人心甚矣其愚蒙但恐
災將至不思禍所從我今題此詩欲悟迷
者曾凡爲大官人年祿多高崇權重持難
久位高勢易窮驕者物之盈老者數之終
四者如寇盜日夜來相攻假使居吉土孰
能保其躬因小以明大借家可諭邦周秦
宅峭函其宅非不同一興八百年一死望
夷宮寄語家與國人凶非宅凶

夢仙詩

人有夢仙者夢身升上清坐乘一白鶴前
引雙紅旌羽衣忽飄飄玉鸞俄錚錚半空
直下視人世塵冥冥漸失鄉國處纔分山
水形東海一片白列岳五點青須臾群仙
來相引朝玉京安期羨門輩列侍如公卿
仰謁玉皇帝稽首前致誠帝言汝仙才努
力勿自輕却後十五年期汝不死庭再拜
受斯言既寤喜且驚祕之不敢泄誓志居

巖扃恩愛捨骨肉飲食斷羶腥朝食雲母
散夜吸沆瀣精空山三十載日望輜輶迎
前期過已久鸞鶴無來聲齒髮日衰白耳
目減聰明一朝同物化身與糞壤并神仙
信有之俗力非可營苟無金骨相不列丹
臺名徒傳辟穀法虛受燒丹經只自取勤
苦百年終不成悲哉夢仙人一夢誤一生

觀刈麥詩 時爲鰲屋縣

田家少閑月五月人倍忙夜來南風起小

麥覆隴黃婦姑荷蕈食童稚攜壺漿相隨
餉田去丁壯在南岡足蒸暑土氣背灼炎
天光力盡不知熱但惜夏日長復有貧婦
人抱子在其傍右手秉遺穗左臂懸弊筐
聽其相顧言聞者爲悲傷家田輸稅盡拾
此充飢腸今我何功德曾不事農桑吏祿
三百石歲晏有餘糧念此私自愧盡日不
能忘

題海圖屏風詩

元和己丑年作

海水無風時波濤安悠悠鱗介無小大遂
性各沉浮突兀海底鼇首冠三神立鉤網
不能制其來非一秋或者不量力謂茲鼇
可求負鼇牽不動綸絕沉其鉤一鼇旣頓
頷諸鼇齊掉頭白濤與黑浪呼吸繞咽喉
噴風激飛廉鼓波怒陽候鯨鯢得其便張
口欲吞舟萬里無活鱗百川多倒流遂使
江漢水潮宗意亦休蒼然屏風上此畫良
有由

羸駿詩

驛騶失其主羸餓無人牧向風嘶一聲莽
蒼黃河曲踏水水畔立卧雪塚間宿歲暮
田野空寒草不滿腹豈無市駿者盡是凡
人目相馬失於瘦遂遺千里足村中何擾
擾有更徵藟粟輸彼軍厩中化作駑駘肉

廢琴詩

絃桐合爲琴中有太古聲古聲淡無味不
稱今人情玉徽光彩滅朱絃塵土生廢弃

來已久遺音尚泠泠不辭爲君彈縱彈人
不聽何物使之然羗笛與秦箏

李都尉古劍詩

古劍寒黯黯鑄來幾千秋白光納日月紫
氣排斗牛有客借一觀愛之不敢求湛然
玉匣中秋水澄不流至寶有本性精剛無
與儔可使寸寸折不能繞指柔願快直士
心將斷佞臣頭不願報小怨夜半刺私讎
勸君慎所用無作神兵羞

雲居寺孤桐詩

一株青玉立千葉綠雲委亭亭五丈餘高
意猶未已山僧年九十清淨老不死自云
手種時一顆青桐子直從萌芽拔高自毫
末始四面無附枝中心有通理寄言立身
者孤直當如此

京兆府新栽蓮詩

時爲鰲屋尉趨

府作

污溝貯濁水水上葉田田我來一長歎知

是東溪蓮下有清泥污馨香無復全上有
紅塵撲顏色不得鮮物性猶如此人事亦
宜然託根非其所不如遭棄捐昔在溪中
日花葉媚青漣今來不得地顛顚府門前

月夜登閣避暑詩

早以炎氣甚中人若燔燒清風隱何處草
樹不動搖何以避暑氣無如出塵囂行行
都門外佛閣正岿嶢清涼近高生煩熱委
靜銷開襟當軒坐意泰神飄飄迴看歸路

傍禾黍盡枯焦獨善誠有計將何救旱苗

初授拾遺詩

奉詔登左掖束帶參朝議何言初命卑且
脫風塵吏杜甫陳子昂才名括天地當時
非不遇尚無過斯位況予蹇薄者寵至不
自意驚近白日光慙非青雲器天子方從
諫朝廷無忌諱豈不思匪躬適遇時無事
受命已旬月飽食隨班次諫紙忽盈箱對
之終自愧

贈元稹詩

自我從宦遊七年在長安所得唯元君乃
知定交難豈無山上苗徑寸無歲寒豈無
要津水咫尺有波瀾之子異於是久處誓
不讓無波古井水有節秋竹竿一爲同心
友三及芳歲蘭花下鞍馬遊雪中盃酒歡
衡門相逢迎不具帶與冠春風日高睡秋
月夜深看不爲同登科不爲同署官所合
在方寸心源無異端

哭劉敦質詩

小樹兩株栢新土三尺墳蒼蒼白露草此
地哭劉君哭君豈無辭辭云君子人如何
天不弔窮悴至終身愚者多貴壽賢者獨
賤迤龍亢彼無悔蠖屈此不伸哭罷持此
辭吾將詰藝文

答友問詩

大圭廣不割利劍用不缺當其斬馬時良
玉不如鐵置鐵在洪鑪鐵消易如雪良玉

同其中三日燒不熱君疑才與德詠此知
優劣

雜興三首

楚王多內寵傾國選嬪妃又愛從禽樂馳
騁每相隨錦韝臂花隼羅袂控金羈遂習
宮中女皆如馬上兒色禽合爲荒刑政兩
已衰雲夢春仍獵章華夜不歸東風二月
天春鴈正離離美人挾銀鐫一發疊雙飛
飛鴻驚斷行欽翅避蛾眉君王顧之笑弓

箭生光輝迴眸語君日昔聞莊王時有一
愚夫人其名曰樊姬不有此遊樂三載斷
鮮肥

越國政初荒越天旱不已風日燥水田水
涸塵飛起國中新下令官渠禁流水流水
不入田壅入王宮裏餘波養魚鳥倒影浮
樓雉澹灩九折池縈迴十餘里四月芰荷
發越王日遊嬉左右好風來香動芙蓉蘂
但愛芙蓉香又種芙蓉子不念閭門外千

里稻苗死

吳王心日侈服翫盡奇瓌身卧翠羽帳手
持紅玉盃冠垂明月珠帶束通天犀行動
自矜顧數步一徘徊小人知所好懷寶四
方來奸邪得藉手從此倖門開古稱國之
寶穀米與賢才今看君王眼視之如塵灰
伍員諫已死浮屍去不迴姑蘇臺下草麋
鹿暗生麇

宿紫閣山北村詩

晨遊紫閣峯暮宿山下村村老見予喜爲
予開一罇舉盃未及飲暴卒來入門紫衣
挾刀斧草草十餘人奪我蓆上酒掣我盤
中食主人退後立歛手反如賓庭中有奇
樹種來三十春主人惜不得持斧斷其根
口稱采造家身屬神策軍主人慎勿語中
尉正承恩

讀漢書詩

禾黍與稂莠雨來同日滋桃李與荊棘霜

降同夜萎草木旣區別榮枯那等夷茫茫
天地意無乃太無私小人與君子用置各
有宜奈何西漢末忠邪並信之不然盡信
忠早絕邪臣窺不然盡信邪早使忠臣知
優游兩不斷盛業日已衰痛矣蕭京輩終
令陷禍機每讀元成紀憤憤令人悲寄言
爲國者不得學天時寄言爲臣者可以鑑
於斯

贈樊著作詩

陽城爲諫議以正事其君其手如屈軼舉
必指佞臣卒使不仁者不得秉國鈞元稹
爲御史以直立其身其心如肺石動必達
窮民東川八十家冤憤一言伸劉闢肆亂
心殺人正紛紛其婢曰庾氏棄絕不爲親
從使萌逆節隱心潛負恩其佐曰孔戡捨
去不爲賓凡此士與女其道天下聞常恐
國史上但記鳳與麟賢者不爲名名彰教
乃敦每惜若人輩身死名亦淪君爲著作

郎職廢志空存雖有良史才直筆無所申
何不自著書實錄彼善人編爲一家言以
備史闕文

蜀路石婦詩

道傍一石婦無記復無銘傳是此鄉女爲
婦孝且貞十五嫁邑人十六夫征行夫行
一十載婦獨守孤螢其夫有父母老病不
安寧其婦執婦道一一如禮經晨昏問起
居恭順發心誠藥餌自調節膳羞必甘馨

夫行竟不歸婦德轉光明後人高其節刻
石像婦形儼然整衣巾若立在閨庭似見
舅姑禮如聞環珮聲至今爲婦者見此孝
心生不比山頭石空有望夫名

折劍頭詩

拾得折劍頭不知折之由一握青蛇尾數
寸碧峯頭疑是斬鯨鯢不然刺蛟虬缺落
泥土中委棄無人收我有鄙介性好剛不
好柔勿輕直折劍猶勝曲金鉤

登樂遊園望詩

獨上樂遊園四望天日曛東北何靄靄宮
闕入烟雲愛此高處立忽如遺垢氛耳目
暫清曠懷抱鬱不伸下視十二街綠樹間
紅塵車馬徒滿眼不見心所親孔生死洛
陽元九謫荊門可憐南北路高蓋者何人
酬元九對新栽竹有懷見寄

昔我十年前與君始相識曾將秋竹竿比
君孤且直中心一以合外事紛無極共保

秋竹心風霜侵不得始嫌梧桐樹秋至先
改色不愛楊柳枝春來軟無力憐君別我
後見竹長相憶常欲在眼前故栽庭戶側
分首今何處君南我在北吟我贈君詩對
之心惻惻

感鶴詩

鶴有不群者飛飛在野田飢不啄腐鼠渴
不飲盜泉貞姿自耿介雜鳥何翩翩同遊
不同志如此十餘年一興嗜欲念遂爲矰

鰾牽委質小池內爭食群雞前不惟懷稻
梁兼亦競腥羶不唯戀主人兼亦狎烏鳶
物心不可知天性有時遷一飽尚如此况
乘大夫軒

春雪

元和歲在卯六年春二月月晦寒食天天
陰夜飛雪連宵復竟日浩浩殊未歇大似
落鵝毛密如飄玉屑寒銷春茫蒼氣變風
凜冽上林草盡沒曲江水復結紅乾杏花

死綠凍楊枝折所憐物性傷非惜年芳絕
上天有時令四序平分別寒燠苟反常物
生皆天闕我觀聖人意魯史有其說或記
水不冰或書霜不殺上將儆正教下以防
災孽茲雪今如何信美非時節

高僕射詩

富貴人所愛聖人去其泰所以致仕年著
在禮經內玄元亦有訓知止則不殆二疏
獨能行遺跡東門外清風久銷歇迨此尚

千載斯人古亦稀何況今之世遑遑名利
客白首千百輩唯有高僕射七十懸車蓋
我年雖未老歲月亦云邁預恐老及時貪
榮不能退中心私自傲何以爲我戒故作
僕射詩書之於大帶

白牡丹詩 和錢學士作

城中看花客旦暮走營營素華人不顧亦
占牡丹名閉在深寺中車馬無來聲唯有
錢學士盡日遶叢行怜此皓然質無人自

芳馨衆嫌我獨賞移植在中庭留光夜不
暝迎光曙先明對之心亦靜虛白相向生
唐昌玉蘂花攀翫衆所爭折來比顏色一
種如瑤瓊彼因稀見貴此以多爲輕始知
無正色愛惡隨人情豈惟花獨爾理與人
事并君看入時者紫艷與紅英

贈內詩

生爲同室親死爲同穴塵他人尚相勉而
况我與君黔婁固窮士妻賢忘其貧冀缺

一農夫妻敬儼如賓陶潛不營生翟氏自
爨薪梁鴻不肯仕孟光甘布裙君雖不讀
書此事耳亦聞至此千載後傳是何如人
人生未死間不能忘其身所須者衣食不
過飽興溫蔬食足充飢何必膏粱珍繒絮
足禦寒何必錦繡文君家有貽訓清白遺
子孫我亦貞苦士與君新結婚庶保貧與
素偕老同欣欣

寄唐生詩

賈誼哭時事阮籍哭路岐唐生今亦哭異
代同其悲唐生者何人五十寒且飢不悲
口無食不悲身無衣所悲忠與義悲甚則
哭之太尉擊賊日尚書叱盜時大夫死兇
寇諫議謫蠻夷每見如此事聲發涕輒隨
往往聞其風俗士猶或非怜君頭半白其
志竟不衰我亦君之徒鬱鬱何所爲不能
發聲哭轉作樂府詩篇篇無空文句句必
盡規功高虞人箴痛甚騷人辭非求宮律

高不務文字奇惟歌生民病願得天子知
未得天子知甘受時人嗤藥良氣味苦瑟
淡音聲稀不懼權豪怒亦任親朋譏人竟
無奈何呼作狂男兒每逢群盜息或遇雲
霧披但自高聲歌庶幾天聽卑歌哭雖異
名所感則同歸寄君三十章與君爲哭詞

傷唐衢二首

自我心存道外物少能逼常排傷心事不
爲長歎息忽聞唐衢死不覺動顏色悲端

從東來觸我心惻惻伊昔未相知偶遊滑
臺側同宿李翱家一言如舊識酒酣出送
我風雪黃河北日西並馬頭語別至昏黑
君歸向東鄭我來遊上國交心不交面從
此重相憶憐君儒家子不得詩書力五十
著青衫試官無祿食遺文僅千首六義無
差忒散在京華間何人爲收得

二

憶昨元和初忝備諫官位是時兵革後生

民正憔悴但傷民病痛不識時忌諱遂作
秦中吟一吟悲一事貴人皆恠怒閑人亦
非訾天高未及聞荊棘生滿地唯有唐衢
見知我平生志一讀興歎嗟再吟垂涕泗
因和三十韻手題遠緘寄致吾陳杜間賞
愛非常意此人無復見此詩尤可貴今日
開篋看蠹魚損文字不知何處葬欲問先
歔歔終去哭墳前還君一掬淚

問友詩

種蘭不種艾蘭生艾亦生根
艾相交長莖葉相附榮香莖與臭葉日夜俱長大鋤艾恐傷蘭溉蘭恐滋艾蘭亦未能溉艾亦未能除沈吟意不決問君合何如

悲哉行

悲哉爲儒者力學不知疲讀書眼欲暗秉筆手生胝十上方一第成名常苦遲縱有宦達者兩鬢已成絲可憐少壯日適在窮賤時丈夫老且病焉用富貴爲沉沉朱門

宅中有乳臭兒狀貌如婦人光明膏粱肌
手不把書卷身不擇戎衣二十襲封爵門
承勲戚資春來日日出服御何輕肥朝從
薄徒飲暮有倡樓期封錢還酒債堆金選
娥眉聲色狗馬外其餘一無知山苗與澗
松地勢隨高卑古來無奈何非君獨傷悲

紫藤詩

藤花紫蒙茸藤葉青扶疏誰謂好顏色而
爲害有餘下如蛇屈盤上若繩縈紆可憐

中間樹束縛成枯株柔蔓不自勝嫋嫋挂
空虛豈知纏樹木千夫力不如先柔後爲
害有似諛佞徒附著君權勢君迷不肯誅
又如妖婦人綢繆蠱其夫可憐壞人室夫
惑不能除寄言邦與家所慎在其初毫末
不早辯滋蔓信難圖願以藤爲誡銘之於
座隅

放鷹詩

十月鷹出籠草枯雉兔肥下韝隨指顧百

擲無一遺鷹翅疾如風鷹爪利如錐本爲
鳥所設今爲人所資孰能使之然有術甚
易知取其向背性制在飢飽時不可使長
飽不可使長飢飢則力不足飽則背人飛
乘飢縱搏擊未飽須繫維所以爪翅功而
人坐收之聖明馭英雄其術亦如斯鄙語
不可棄吾聞諸獵師

慈烏夜啼詩

慈烏失其母啞啞吐哀音晝夜不飛去經

年守故林夜夜半啼聞者爲沾襟聲中
如告訴未盡反哺心百鳥豈無母爾獨哀
怨深應是母慈重使爾悲不任昔有吳起
者母歿喪不臨嗟哉斯徒輩其心不如禽
慈烏復慈烏鳥中之曾參

鷺詩示劉叟

梁上有雙鷺翩翩雄與雌銜泥兩椽間一
巢生四兒四兒日夜長索食聲孜孜青蟲
不易捕黃口無飽期觜爪雖欲弊心力不

知疲須臾十來往猶恐巢中飢辛勤三十
日母瘦雛漸肥喃喃教言語一一刷毛衣
一旦羽翼成引上庭樹枝舉翅不迴顧隨
風四散飛雌雄空中鳴聲盡呼不歸却入
空巢裏啁啾終夜悲鸞鸞爾勿悲爾當返
自思思爾爲雛日高飛背母時當時父母
念今日爾應知

采地黃者詩

麥死春不雨禾損秋早霜歲晏無口食田

中采地黃采之將何用持以易糶糧凌晨
荷鋤去薄暮不盈筐攜來朱門家賣與白
面郎與君啖肥馬可使照地光願易馬殘
粟救此苦飢腸

初入太行路詩

天冷日不光太行峯蒼莽嘗聞此中險今
我方獨往馬蹄凍且滑羊腸不可上若比
世路難猶自平於掌

鄧魴張徹落第詩

古琴無俗韻奏罷無人聽
寒松無妖花枝下無人行
春風十二街軒騎不暫停
奔車看牡丹走馬聽秦箏
衆目悅芳艷松獨守其貞
衆耳喜鄭衛琴亦不改聲
懷哉二夫子念此無自輕

送王處士詩

王門豈無酒侯門豈無肉
主人貴且驕待客禮不足
望塵而拜者朝夕走碌碌
王生獨拂衣遐舉如雲鵠
寧歸白雲外飲水卧

空谷不能隨衆人歛手低眉目扣門與我
別沽酒留君宿好去采薇人終南山正綠

村居苦寒詩

八年十二月五日雪紛紛竹栢皆凍死況
彼無衣民廻觀村閭間十室八九貧北風
利如劒布絮不蔽身唯燒蒿棘火愁坐夜
待晨乃知大寒歲農者尤苦辛願我當此
日草堂深掩門褐裘覆絕被坐卧有餘溫
幸免飢凍苦又無壠畝勤念彼深可愧自

問是何人

納粟詩

有吏夜扣門高聲催納粟
家人不待曉場上張燈燭
揚簸淨如珠一車三十斛
猶憂納不中鞭責及僮僕
背余謬從事內愧才不足
連授四命官坐尸十年祿
常聞古人語損益周必復
今日諒甘心還他太倉穀

薛中丞詩

百人無一直百直無一遇
借問遇者誰正

人行得路中丞薛存誠守直心甚固皇明
燭如日再使秉王度奸豪與倭巧非不憎
且懼直道漸光明邪謀難蓋覆每因匪躬
節知有匡時具張爲墜網網倚作頽簷柱
悠哉上天意報施紛迴互自古已冥茫從
今尤不諭豈與小人意昏然同好惡不然
君子人何反如朝露裴相昨已失薛君今
又去以我惜賢心五年如旦暮况聞善人
命長短繫運數今我一涕零豈爲中丞故

秋池二首

前池秋始半卉物多摧壞欲暮槿先萎未
霜荷已敗默然有所感可以從茲誠本不
種松筠早凋何足恠

鑿池貯秋水中
有蘋與芰天旱水暗銷塌
然委空地有似汎汎者附麗權與貴一旦
恩勢移相隨共憔悴

夏旱詩

太陰不離畢太歲仍在午旱日與炎風枯

焦我田畝金石欲銷鑠況茲禾與黍嗷嗷
萬族中唯農最辛苦憫然望歲者出門何
所覩但見棘與茨羅生徧場圃惡苗承沴
氣欣然得其所感此因問天可能長不雨

諭友詩

昨夜霜一降殺君庭中槐乾葉不待黃索
索飛下來怜君感節物晨起步前階臨風
踏葉立半日顏色衰西望長安城歌鍾十
二街何人不歡樂君獨心悠哉白日頭上

走朱顏鏡中顏平生青雲心銷化成死灰
我今贈一言勝飲酒千盃其言雖甚鄙可
破悵悵懷朱門有勲賢陋巷有顏回窮通
各問命不繫才不才推此自豁豁不必待
安排

丘中有一士 命首句爲題二首

丘中有一士不知其姓名面色不憂苦血
氣常和平每選隙地居不踏要路行舉動
無尤悔物莫與之爭藜藿不充腸布褐不

蔽形終歲守窮餓而無嗟嘆聲豈是愛貧
賤深知時俗情勿矜羅弋巧鸞鶴在冥冥
丘中有一士守道歲月深行披帶索衣坐
拍無絃琴不飲濁泉水不息曲木陰雨逢
苟非義糞土千黃金鄉人化其風薰如蘭
在林智愚與強弱不忍相欺侵我欲訪其
人將行復沈吟何必見其面但在學其心

新製布裘詩

桂布白似雪吳絛軟於雲布重絛且厚爲

裘有餘溫朝擁坐至暮夜覆眠達晨誰知
嚴冬月支體暖如春中夕忽有念撫裘起
逡巡丈夫貴兼濟豈獨善一身安得萬里
裘蓋裏周四垠穩暖皆如我天下無寒人

杏園中棗樹詩

人言百果中唯棗凡且鄙皮皴似龜手葉
小如鼠耳胡爲不自知生花此園裏豈宜
遇攀翫幸免遭傷毀二月曲江頭雜英紅
旖旎棗亦在其間如嫫對西子東風不擇

木吹煦長未已眼看欲合抱得盡生生理
寄言遊春客乞君一迴視君愛繞指柔從
君怜柳杞君求悅目艷不敢爭桃李君若
作大車輪軸材須此

蝦蟇詩 和張十六

嘉魚薦宗廟靈龜貢邦家應龍能致雨潤
我百穀牙蠹蠹水族中無用者蝦蟇形穢
肌肉腥出沒于泥沙六月七月交時雨正
霽沲蝦蟇得其志快樂無以加地旣蕃其

生使之族類多天又與其聲得以相誼譁
豈唯玉池上汚君清泠波可獨瑤瑟前亂
君鹿鳴歌常恐飛上天跳躍隨姮娥往往
蝕明月遣君無柰何

寄隱者

賣藥向都城行憇青門樹道逢馳驛者色
有非常懼親族走相送欲別不敢住私恠
問道旁何人復何故云是右丞相當國握
樞務祿厚食萬錢恩深目三顧昨日延英

對今日崖州去由來君臣間寵辱在朝暮
青青東郊草中有歸山路歸去卧雲人謀
身計非誤

放魚 自此後詩到江州作

曉日提竹籃家童買春蔬青青芹蕨下疊
卧雙白魚無聲但呀呀以氣相煦孺傾籃
寫地上拔刺長尺餘豈唯刀机憂坐見螻
蟻圖脫泉雖已久得水猶可蘇放之小池
中且用救乾枯小池窄狹動尾觸四隅

一時幸苟活久遠將何如
其不得所移放於南湖南湖連西江
好去勿踟躕施恩即望報吾非斯人
徒不須泥沙底辛苦覓明珠

文栢牀

陵上有老栢柯葉寒蒼蒼
朝爲風烟樹暮爲宴寢床
以其多奇文宜升君子堂
刮削露節目拂拭生輝光
玄班狀狸首素質如截肪
雖充悅目翫終乏周身防
華彩誠可

愛生理苦已傷方知自殘者爲有好文章

潯陽三題 并序

廬山多桂樹湓浦多脩竹東林寺有白蓮
華皆植物之貞勁秀異者雖宮園省寺中
未必能盡有夫物以多爲賤故南方人不
貴重之至有蒸爨其桂剪棄其竹白眼於
蓮花者予惜其不生於北土也因賦三題
以唁之

廬山桂

偃蹇月中桂結根依青天
天風繞月起吹子下人間
飄零委何處乃落匡廬山
生爲石上桂葉如剪碧鮮
枝幹日長大根發日牢堅
不歸天上月空老山中年
廬山去咸陽道里三四十
無人爲移植得入上林園
不及紅花樹長栽溫室前

湓浦竹

潯陽十月天天氣仍溫燠
有霜不殺草有風不落木
玄冥氣力薄草木冬猶綠
誰肯

白集一
三
湓浦頭迴眼看脩竹其有願丐者持刀斬
且東剖劈青琅玕家家蓋牆屋吾聞汾晉
間竹少重如玉胡爲取輕賤生此西江曲

東林寺白蓮

東林北塘水湛湛見底清中生白芙蓉菡
萏三百莖白日發光彩清飆散芳馨洩香
銀囊破瀉露玉盤傾我慙塵垢眼見此瓊
瑤英乃知紅蓮華虛得清淨名夏萼數未
歇秋房結纔成夜深衆僧寢獨起繞池行

欲收一顆子寄向長安城但恐出山去人
間種不生

大水

潯陽郊郭間大水歲一至閭閻半漂蕩城
堞多傾墜蒼茫生海色渺漫連空翠風卷
白波翻日煎紅浪沸工商徹屋去牛馬登
山避况當率稅時頗害農桑事獨有傭舟
子鼓枻生意氣不知萬人災自覓錐刀利
吾無奈爾何爾非久得志九月霜降後水

涸爲平地

涸爲平地

白氏文集卷第二

諷諭二 古調詩五言 凡五十八首

續古詩十首

戚戚復戚戚送君遠行役行役非中原海
外黃沙磧伶俜獨居妾迢遞長征客君望
功名歸妾憂生死隔誰家無夫婦何人不
離析所恨薄命身嫁遲別日迫妾身有存
歿妾心無改易生作閨中婦死作山頭石
掩淚別鄉里飄飄將遠行茫茫綠野中春

盡孤客情驅馬上丘壠高低路不平風吹
棠梨花啼鳥時一聲古墓何代人不知姓
與名化作路傍土年年春草生感彼忽自
悟今我何營營

朝采山上薇暮采山上薇歲晏薇亦盡飢
來何所爲坐飲白石水手把青松枝擊節
獨長謠其聲清且悲櫪馬非不肥所苦長
繫維豢豕非不飽所憂竟爲犧行行歌此
曲以慰常苦飢

雨露長纖草山苗高入雲風雪折勁木澗
松摧爲薪風摧此何意雨長彼何因百丈
澗底死寸莖山上春可憐苦節士感此涕
盈巾

窈窕雙鬟女容德俱如玉晝居不踰閫夜
行常秉燭氣如含露蘭心如貫霜竹宜當
備嬪御胡爲守幽獨無媒不得選年忽過
三六歲暮望漢宮誰在黃金屋邯鄲進倡
女能唱黃花曲一曲稱君心恩榮連九族

栖栖遠方士讀書三十年業成無知己後
步來入關長安多王侯英俊競攀援幸隨
衆賓末得廁門館間東閣有旨酒中堂有
管絃何爲向隅客對此不開顏富貴無是
非主人終日歡貧賤多悔尤客子中夜嘆
歸去復歸去故鄉貧亦安

涼風飄嘉樹日夜減芳華下有感秋婦攀
條苦悲嗟我本幽閑女結髮事豪家豪家
多婢僕門內頗驕奢良人近封侯出入鳴

王珂自從富貴來恩薄讒言多冢婦獨守
禮群妾互奇衮但信言有玷不察心無瑕
容光未銷歇歡愛忽蹉跎何意掌上玉化
爲眼中砂盈盈一尺水浩浩千丈河勿言
小大異隨分有風波閨房猶復爾邦國當
如何

心亦無所迫身亦無所拘何爲腸中氣鬱
鬱不得舒不舒良有以同心久離居五年
不見面三年不得書念此今人老抱膝坐

長吁豈無盈罇酒非君誰與娛

攬衣出門行遊觀遶林渠澹澹春水暖東
風生綠蒲上有和鳴鴈下有掉尾魚飛沉
一何樂鱗羽各有徒而我方獨處不與之
子俱願彼自傷已禽魚之不如出遊欲遣
憂孰知憂有餘

春旦日初出瞳瞳耀晨輝草木照未遠浮
雲已蔽之天地黯以晦當午如昏時雖有
東南風力微不能吹中園何所有滿地青

青葵陽光委雲上傾心欲何依

秦中吟十首 并序

貞元元和之際予在長安聞見之間有足
悲者因直歌其事命爲秦中吟

議婚

天下無正聲悅耳即爲娛人間無正色悅
目即爲姝顏色非相遠貧富則有殊貧爲
時所棄富爲時所趨紅樓富家女金縷繡
羅襦見人不斂手嬌癡二八初母兄未開

口已嫁不須更綠窻貧家女寂寞二十餘
荆釵不直錢衣上無真珠幾迴人欲聘臨
日又踟躕主人會良媒置酒滿玉壺四座
且勿飲聽我歌兩途富家女易嫁嫁早輕
其夫貧家女難嫁嫁晚孝於姑聞君欲娶
婦娶婦意何如

重賦

厚地植桑麻所要濟生民生民理布帛所
求活一身身外充征賦上以奉君親國家

定兩稅本意在憂人厥初防其滯明勅內
外臣稅外加一物皆以枉法論奈何歲月
久貪吏得因循浚我以求寵歛索無冬春
織綃未成疋繅絲未盈斤里胥迫我納不
許暫逡巡歲暮天地閉陰風生破村夜深
烟火盡霰雪白紛紛幼者形不蔽老者體
無溫悲端與寒氣併入鼻中辛昨日輪殘
稅因窺官庫門繒帛如山積絲絮似雲屯
號爲羨餘物隨月獻至尊奪我身上煖買

爾眼前恩進入瓊林庫歲久化爲塵

傷宅

誰家起甲第朱門大道邊豐屋中櫛比高
牆外廻環累累六七堂棟宇相連延一堂
費百萬鬱鬱起青烟洞房溫且清寒暑不
能忤高堂虛且迫坐卧見南山繞廊紫藤
架夾砌紅藥欄攀枝摘櫻桃帶花移牡丹
主人此中坐十載爲大官厨有臭敗肉庫
有貫朽錢誰能將我語問爾骨肉間豈無

窮賤者忍不救飢寒如何奉一身直欲保
千年不見馬家宅今作奉誠園

傷友

陋巷孤寒士出門苦恓恓雖云志氣在豈
免顏色低平生同門友通籍在金閨曩者
膠漆契邇來雲雨睽正逢下朝歸軒騎五
門西是時天久陰三日雨淒淒蹇驢避路
立肥馬當風嘶迴頭忘相識占道上沙堤
昔年洛陽社貧賤相提携今日長安道對

面隔雲泥近日多如此非君獨慘悽死生
不變者唯聞任與黎

不致仕

七十而致仕禮法有明文何乃貪榮者斯
言如不聞可憐八九十齒墮雙眸昏朝露
貪名利夕陽憂子孫挂冠願翠綏懸車惜
朱輪金章畱不勝偃僂入君門誰不愛富
貴誰不戀君恩年高須請老名遂合退身
少時共嗤諂晚歲多因循賢哉漢二疏彼

獨是何人寂寞東門路無人繼去塵

立碑

勲德旣下衰文章亦陵夷但見山中石立
作路傍碑銘勲悉太公叙德皆仲尼復以
多爲貴千言直萬貲爲文彼何人想見筆
下時但欲愚者悅不思賢者嗤豈獨賢者
嗤仍傳後代疑古石蒼苔字安知是愧詞
我聞望江縣麴令撫惇嫠在官有仁政名
不聞京師身歿欲歸葬百姓遮路岐攀轅

不得歸留葬此江湄至今道其名男女涕
皆垂無人立碑碣唯有邑人知

輕肥

意氣驕滿路鞍馬光照塵借問何爲者人
稱是內臣朱紱皆大夫紫綬或將軍誇赴
軍中宴走馬去如雲罇壘溢九醞水陸羅
八珍果擘洞庭橘鱠切天池鱗食飽心自
若酒酣氣益振是歲江南旱衢州人食人

五絃

清歌且罷唱紅袂亦停舞趙叟抱五絃宛
轉當宵撫大聲粗若散颼颼風和雨小聲
細欲絕切切鬼神語又如鵲報喜轉作援
啼苦十指無定音顛倒宮徵羽坐客聞此
聲形神若無主行客聞此聲駐足不能舉
嗟嗟俗人耳好今不好古所以綠窻琴日
日生塵土

歌舞

秦中歲云暮大雪滿皇州雪中退朝者朱

紫盡公侯貴有風雲興富無飢寒憂所營
唯第宅所務在追遊朱輪車馬客紅燭歌
舞樓歡酣促密坐醉暖脫重裘秋官爲主
人庭尉居上頭日中一爲樂夜半不能休
豈知閹鄉獄中有凍死囚

買花

帝城春欲暮喧喧車馬度共道牡丹時相
隨買花去貴賤無常價酬直看花數灼灼
百朶紅錢錢五束素上張幄幕庇傍織巴

籬護水洒復泥封移來色如故家家習爲
俗人人迷不悟有一田舍翁偶來買花處
佢頭獨長歎此歎無人諭一藪深花色十
戶中人賦

贈友詩五首 并序

吾友有王佐之才者以致君濟人爲已任
識者深許之因贈是詩以廣其志云

一年十二月每月有常令君出臣奉行謂
之握金鏡由茲六氣順以遂萬物性時令

一反常生靈受其病周漢德下衰王風始
不競又從斬晁錯諸侯益強盛百里不同
禁四時自爲政盛夏興土功方春勦人命
誰能救其失待君佐邦柄戕戕象魏門懸
法彝倫正

銀生楚山曲金生鄱溪濱南人棄農業求
之多苦辛披砂復鑿石矻矻無冬春手足
盡皴胝愛利不愛身畬田旣慵斫稻田亦
懶耘相携作游手皆道求金銀畢竟金與

銀何殊泥與塵且非衣食物不濟飢寒人
棄本以趨末日富而歲貧所以先聖王棄
藏不爲珍誰能反古風待君秉國鈞捐金
復抵璧勿使勞生民

私家無錢鑪平地無銅山胡爲秋夏稅歲
歲輸銅錢錢力日已重農力日已殫賤粟
粟與麥賤貿絲與繇歲暮衣食盡焉得無
飢寒吾聞國之初有制垂不刊傭必筭丁
口租必計桑田不求土所無不強人所難

量入以爲出上足下亦安兵興一變法兵
息遂不還使我農桑人顛顚畎畝間誰能
革此弊待君秉利權復彼租傭法令如貞
觀年

京師四方則王化之本根長吏又於政然
後風教敦如何尹京者選次不逡巡請君
屈指數十年十五人科條日相矯吏力亦
以勤寬猛政不一民心安得淳九州雍爲
首群牧之所遵天下率如此何以安吾民

誰能變此法待君贊彌綸慎擇循良吏令
其長子孫

三十男有室二十女有歸近代多離亂婚
姻多過期嫁娶既不早生育常苦遲兒女
未成人父母已衰羸凡人貴達日多在長
大時欲報親不待孝心無所施哀哉三牲
養少得及庭闈惜哉萬鍾粟多用飽妻兒
誰能正婚禮待君張國維庶使孝子心皆
無風樹悲

寓意詩五首

豫樟生深山七年而後知挺高二百尺本
末皆十圍天子建明堂此材獨中規匠人
執斤墨采度將有期孟冬草木枯烈火燎
山陂疾風吹猛焰從根燒到枝養材三十
年方成棟梁姿一朝爲灰燼柯葉無孑遺
地雖生爾材天不與爾時不如糞上英猶
有人掇之已矣勿重陳重陳令人悲不悲
焚燒苦但悲采用遲

赫赫京內史炎炎中書郎昨傳徵拜日恩
賜頗殊常貂冠水蒼玉紫綬黃金章佩服
身未暖已聞竄遐荒親戚不得別吞聲泣
路傍賓客亦已散門前雀羅張富貴來不
久倏如瓦溝霜權勢去尤速瞥若石火光
不如守貧賤貧賤可久長傳語宦遊子且
來歸故鄉

促織不成章提壺但聞聲嗟哉蟲與鳥無
實有虛名與君定交日久要如弟兄何以

示誠信白水指爲盟雲雨一爲別飛沉兩
難并君爲得風鵬我爲失水鯨音信日已
踈恩分日已輕窮通尚如此何況死與生
乃知擇交難須有知人明莫將山下松結
託水上萍

翩翩兩玄鳥本是同巢鷺分飛來幾時秋
夏炎涼變一宿蓬華廬一栖明光殿偶因
銜泥處復得重相見彼矜杏梁貴此嗟茅
棟賤眼看秋社至兩處俱難戀所託各暫

時胡爲相歎羨

娑娑園中樹根株大合圍蠢爾樹間蟲形
質一何微誰謂蟲至微蠱蠹無已期孰謂
樹至大花葉有衰時花衰夏未實葉病秋
先萎樹心半爲土觀者安得知借問蟲何
在在身不在枝借問蟲何食食心不食皮
豈無啄木鳥觜長將何爲

讀史詩五首

楚懷放靈均國政亦荒淫彷徨未忍決遶

澤行悲吟漢文疑賈生謫置湘之陰是時
刑方措此去難爲心士生一代間誰不有
浮沈良時眞可惜亂世何足欽乃知汨羅
恨未抵長沙深

禍患如棼絲其來無端緒馬遷下蠶室嵇
康就囹圄抱冤志氣屈忍耻形神沮當彼
戮辱時奮飛無翅羽商山有黃綺潁川有
巢許何不從之遊超然離網罟山林少羈
鞅世路多艱阻寄謝伐檀人慎勿嗟窮處

漢日大將軍少爲乞食子秦時故列侯老
作鋤瓜士春華何曄曄園中發桃李秋風
忽蕭條堂上生荆枳深谷變爲岸桑田成
海水勢去未須悲時來何足喜寄言榮枯
者反覆殊未已

舍沙射人影雖病人不知巧言構人罪至
死人不疑掇蜂殺愛子掩鼻戮寵姬弘恭
陷蕭望趙高謀李斯陰德旣必報陰禍豈
虛施人事雖可罔天道終難欺明則有刑

辟幽則有神祇苟免勿私喜鬼得而誅之
季子憔悴時婦見不下機買臣負薪日妻
亦棄如遺一朝黃金多佩印衣錦歸去妻
不敢視婦嫂強依依富貴家人重貧賤妻
子欺奈何貧富間可移親愛志遂使中人
心汲汲求富貴又令下人力各競錐刀利
隨分歸舍來一取妻孥意

和答詩十首 并序

五年春微之從東臺來不數日又左轉爲

江陵士曹掾詔下日會予下內直歸而微
之已即路邂逅相遇於街衢中自永壽寺
南抵新昌里北得馬上語別語不過相勉
保方寸外形骸而已因不暇及他是夕足
下次于山北寺僕職役不得去命季弟送
行且奉新詩一軸致於執事凡二十章率
有興比滌文艷韻無一字焉意者欲足下
在途諷讀且以遣日時銷憂懣又有以張
直氣而扶壯心也及足下到江陵寄在路

所爲詩十七章凡五六千言言有爲章有
旨迨于宮律體裁皆得作者風發緘開卷
且喜且恠僕思牛僧孺戒不能示他人唯
與杓直拒非及樊宗師輩三四人時一吟
讀心甚貴重然竊思之豈僕所奉者二十
章遽能開足下聰明使之然耶抑又不知
足下是行也天將屈足下之道激足下之
心使感時發憤而臻於此耶若兩不然者
何立意措辭與足下前時詩如此之相遠

也僕既羨足下詩又憐足下心盡欲引狂
簡而和之屬直宿拘牽居無暇日故不即
時如意旬月來多乞病假假中稍閑且摘
卷中尤者繼成十章亦不下三千言其間
所見同者固不能自異異者亦不能強同
同者謂之和異者謂之答并別錄和夢遊
春詩一章各附于本篇之末餘未和者亦
續致之頃者在科試間常與足下同筆硯
每下筆時輒相顧語患其意太切而理太

周故理太周則辭繁意太切則言激然與
足下爲文所長在於此所病亦在於此足
下來序果有詞犯文繁之說今僕所和者
猶前病也待與足下相見日各引所作稍
刪其煩而晦其義焉餘具書白

和思歸樂詩

山中獨栖鳥夜半聲嚶嚶似道思歸樂行
人掩泣聽皆疑此山路遷客多南征憂憤
氣不散結化爲精靈我謂此山鳥本不因

人生人心自懷土想作思歸鳴孟嘗平居
時娛耳琴泠泠雍門一言感未奏淚沾纓
魏武銅雀妓日與歡樂并一旦西陵望欲
歌先涕零峽猿亦無意隴水復何情爲入
愁人耳皆爲腸斷聲請看元侍御亦宿此
郵亭因聽思歸鳥神氣獨安寧問君何以
然道勝心自平雖爲南遷客如在長安城
云得此道來何慮復何營窮達有前定憂
喜無交爭所以事君日持憲立天庭雖有

迴天力撓之終不傾况始三十餘年少有
直名心中志氣大眼前爵祿輕君恩若雨
露君威若雷霆退不苟免難進不曲求榮
在火辨玉性經霜識松貞展禽任三黜靈
均長獨醒獲戾自東洛貶官向南荆再拜
辭闕下長揖別公卿荊州又非遠驛路半
月程漢水照天碧楚山挿雲青江陵橘似
珠宜城酒如餠誰謂譴謫去未妨遊賞行
人生百歲內天地暫寓形太倉一稊米大

海一浮萍身委逍遙篇心付頭陀經尚達
生死觀寧爲寵辱驚中懷苟有主外物安
能縈任意思歸樂聲聲啼到明

和陽城驛詩

商山陽城驛中有藁者誰云是元監察江
陵謫去時忽見此驛名良久涕欲垂何故
陽道州名姓同於斯憐君一寸心寵辱誓
不移疾惡若巷伯好賢如緇衣沉吟不能
去意者欲改爲改爲避賢驛大署於門楣

荆人愛羊祜戶曹改爲辭一字不忍道况
兼姓呼之因題八百言言直文甚奇詩成
寄與我鱗若金和綵上言陽公行友悌無
等夷骨肉同衾裯至死不相離次言陽公
迹夏邑始棲遲鄉人化其風少長皆孝慈
次言陽公道終日對酒卮兄弟笑相顧醉
貌紅怡怡次言陽公節謇謇居諫司誓心
除國蠹決死犯天威終言陽公命左遷天
一涯道州炎瘴地身不得生歸一一皆實

錄事事無子遺凡是爲善者聞之惻然悲
道州旣已矣往者不可追何世無其人來
者亦可思願以君子文告彼大樂師附於
雅歌末奏之白玉墀天子聞此章教化如
法施直諫從如流佞臣惡如疵宰相聞此
章政柄端正持進賢不知倦去邪勿復疑
憲臣聞此章不敢懷依違諫官聞此章不
忍縱詭隨然後告史氏舊史有前規若作
陽公傳欲令後世知不勞叙世家不用費

文辭但於國史上全錄元稹詩

答桐花詩

山木多翳鬱茲桐獨亭亭葉重碧雲片花
簇紫霞英是時三月天春暖山雨晴夜色
向月淺暗香隨風輕行者多商賈居者悉
黎氓無人解賞愛有客獨屏營手攀花枝
立足踏花影行生怜不得所死欲揚其聲
截爲天子琴刻作古人形云待我成器薦
之於穆清誠是君子心恐非草木情胡爲

愛其華而反傷其生老龜被剝腸不如無
神靈雄雞自斷尾不願爲犧牲況此好顏
色花紫葉青青宜遂天地性忍加刀斧刑
我思五丁力拔入九重城當君正殿栽花
葉生光晶上對月中桂下覆階前蔭泥拂
香爐烟隱暎斧藻屏爲君布綠陰當暑蔭
軒楹沈沈綠滿地桃李不敢爭爲君發清
韻風來如叩瓊泠泠聲滿耳鄭衛不足聽
受君封植力不獨吐芬馨助君行春令開

花應清明受君雨露恩不獨含芳榮戒君
無戲言剪葉封弟兄受君歲月功不獨資
生成爲君長高枝鳳凰上頭鳴一鳴君萬
歲壽如山不傾再鳴萬人泰泰階爲之平
如何有此用幽滞在巖垆歲月不爾駐孤
芳坐凋零請向桐枝上爲余題姓名待余
有勢力移爾獻丹庭

和大觜烏詩

烏者種有二名同性不同觜小者慈孝觜

大者貪庸黷大命又長生來十餘冬物老
顏色變頭毛白茸茸飛來庭樹上初但驚
兒童老巫生姦計與烏意潛通云此非凡
鳥遙見起敬恭千歲乃一出喜賀主人翁
祥瑞來白日神聖占知風陰作北斗使能
爲人吉凶此烏所止家家產日夜豐上以
致壽考下可宜田農主人富家子身老心
童蒙隨巫拜復祝婦姑亦相從殺雞薦其
肉敬若醴六宗烏喜張大觜飛接在虛空

烏既飽臙腥巫亦饗甘濃烏巫互相利不
復兩西東日日營巢窟稍稍近房櫳雖生
八九子誰辨其雌雄群雛又成長衆觜騁
殘兇探巢吞鷲卵入簇啄蠶虫豈無乘秋
隼羈絆委高墉但食烏殘肉無施搏擊功
亦有能言鸚翅碧觜距紅暫曾說烏罪囚
閉在深籠青青窻前柳鬱鬱井上桐貪烏
占栖息慈烏獨不容慈烏爾奚爲來往何
憧憧曉去先晨鼓暮歸後昏鍾辛苦塵土

間飛啄木黍藪得食將哺母飢腸不自充
主人憎慈烏命子削彈弓絃續會稽竹丸
鑄荆山銅慈烏求母食飛下爾庭中數粒
未入口一丸已中曾仰天號一聲似欲訴
蒼穹反哺日未足非是惜微躬誰能持此
冤一爲問化工胡然大觜烏竟得天年終

答四皓廟詩

天下有道見無道卷懷之此乃聖人語吾
聞諸仲尼矯矯四先生同稟希世資隨時

有顯晦秉道無磷緇秦皇肆暴虐二世遘
亂離先生相隨去商嶺采紫芝君看秦獄
中戮辱者李斯劉項爭天下謀臣競悅隨
先生如鸞鶴去入冥冥飛君看齊鼎中焦
爛者酈其子房得沛公自謂相遇遲八難
掉舌樞三略役心機辛苦十數年晝夜形
神疲竟雜霸者道徒稱帝者師子房爾則
能此非吾所宜漢高之季年嬖寵鍾所私
家嫡欲廢奪骨肉相憂疑豈無子房口口

舌無所施亦有陳平心心計將何爲儲儲
四先生高冠危映眉從容下南山願躬入
東闈前瞻惠太子左右生羽儀却顧戚夫
人楚舞無光輝心不畫一計口不吐一詞
暗定天下本遂安劉氏危子房吾則能此
非爾所知先生道旣光太子禮甚卑安車
留不住功成棄如遺如彼旱天雲一雨百
穀滋澤則在天下雲復歸希夷勿高巢與
由勿尚呂與伊巢由往不返伊呂去不歸

豈如四先生出處兩逶迤何必長隱逸何
必長濟時由來聖人道無朕不可窺卷之
不盈握舒之亘八陲先生道甚明夫子猶
或非願子辨其惑爲予吟此詩

和雉媒詩

吟君雉媒什一哂復一歎知之一何晚今
目乃成篇豈唯鳥有之抑亦人復然張陳
刎頸交竟以勢不完至今不平氣塞絕流
水源趙衰骨肉親亦以利相殘至今不善

名高於磨笄山況此籠中雉志在飲啄間
稻粱暫入口性已隨人遷身苦亦自忘同
族何足言但恨爲媒拙不足以自全勸君
今日後養鳥養青鸞青鸞一失侶至死守
孤單勸君今日後結客結任安主人賓客
去獨住在門闌

和松樹詩

亭亭山上松一一生朝陽森聳上參天柯
條百尺長漠漠塵中槐兩兩夾康莊婆娑

白集二
二十四
亘覆地枝幹亦尋常八月白露降槐葉次第黃歲暮滿山雪松色鬱青蒼彼如君子心秉操貫冰霜此如小人面變態隨炎涼共知松勝槐誠欲栽道傍糞土種瑤草瑤草終不芳尚可以斧斤伐之爲棟梁殺身獲其所爲君構明堂不然終天年老死在南岡不願亞枝葉低隨槐樹行

答箭鏃詩

夫人職司憂爲箭恐不精精在利其鏃錯

磨鋒鏑成挿以青竹籐羽之赤鴈翎勿言
分寸鐵爲用乃長兵聞有狗盜者晝伏夜
潛行摩弓拭箭鏃夜射不待明一盜旣流
血百犬同吠聲狺狺嗥不已主人爲之驚
盜心憎主人主人不知情反責鏃太利矢
人獲罪名寄言控弦者願君少留聽何不
向西射西天有狼星何不向東射東海有
長鯨不然學仁貴三矢平虜庭不然學仲
連一發下遼城胡爲射小盜此用無乃輕

徒沾一點血虛汙箭頭腥

和古杜詩

廢村多年樹生在古社隈爲作妖狐窟心
空身未摧妖狐變美女社樹成樓臺黃昏
行人過見者心徘徊飢鵬竟不捉老犬反
爲媒歲媚少年客十去九不迴昨夜雲雨
合烈風驅迅雷風拔樹根出雷霹社壇開
飛電化爲火妖狐燒作灰天明至其所清
曠無氛埃舊地舊村落新田闢荒萊始知

天降火不必常爲災勿謂神默默勿謂天
恢恢勿喜犬不補勿誇鵬不猜寄言狐媚
者天火有時來

和分水嶺詩

高嶺峻稜稜細泉流疊疊勢分合不得東
西隨所委悠悠草蔓底濺濺石罅裏分流
來幾年晝夜兩如此朝宗遠不及去海三
千里漫潤小無功山苗長旱死縈紆用無
所奔迫流不已唯作嗚咽聲夜入行人耳

有源殊不竭無坎終難至同出而異流君
看何所似有似骨肉親派別從茲始又似
勢利交波瀾相背起所以贈君詩將君何
所比不比山上泉比君井中水

有木詩八首 并序

余讀漢書列傳見佞順嬖嬰圖身忘國如
張禹輩者見惑上蠱下交亂君親如江充
輩者見暴佞跋扈壅君樹黨如梁冀輩者
見色仁行違先德後賊如王莽輩者又見

外狀恢弘中無實用者又見附麗權勢隨
之覆亡者其初皆有動人之才足以惑衆
媚主莫不合於始而敗於終也因引風人
騷人之興賦有木八章不獨諷前人欲儆
後代爾

有木名弱柳結根近清池風烟借顏色雨
露助華滋
綫綫白雪花嫋嫋青絲枝漸密
陰自庇轉高梢四垂截枝扶爲杖軟弱不
自持折條用樊圃柔脆非其宜爲樹信可

翫論材何所施可惜金堤地栽之徒爾爲
有木名櫻桃得地早滋茂葉密獨承日花
繁偏受露迎風暗搖動引鳥潛來去鳥啄
子難成風來枝莫住低軟易攀翫佳人屢
迴顧色求桃李饒心向松筠妬好是映牆
花本非當軒樹所以姓蕭人曾爲代櫻賦
有木秋不凋青青在江北謂爲洞庭橘美
人自移植上受顧眄恩下勤澆溉力實成
乃是枳臭苦不堪食物有似是者真偽何

由識美人默無言對之長歎息中含害物
意外矯凌霜色仍向枝葉間潛生刺如棘
有木名杜梨陰森覆丘壑心蠹已空朽根
深尚盤礴狐媚言語巧妖鳥聲音惡憑此
爲巢穴往來互棲託四傍五六本葉枝相
交錯借問因何生秋風吹子落爲長社壇
下無人敢芟斫幾度野火來風迴燒不著
有木香冉冉山頭生一發主人不知名移
種近軒闥愛其有芳味因以調麴蘖前後

曾飲者十人無一活豈徒悔封植兼亦誤
采掇試問識藥人始知名野葛年深已滋
蔓刀斧不可伐何時猛風來爲我連根拔
有木名水榿遠望青童童根株非勁挺柯
葉多蒙籠彩翠色如栢鱗皴皮似松爲同
松栢類得列嘉樹中枝弱不勝雪勢高常
懼風雪壓佢還舉風吹西覆東柔芳甚楊
柳早落先梧桐唯有一堪賞中心無蠹蟲
有木名凌霄擢秀非孤標偶依一株樹遂

抽百尺條託根附樹身開花寄樹梢自謂
得其勢無因有動搖一旦樹摧倒獨立暫
飄飄疾風從東起吹折不終朝朝爲拂雲
花暮爲委地樵寄言立身者勿學柔弱苗
有木名丹桂四時香馥馥花團夜雪明葉
剪春雲綠風影清似水霜枝冷如玉獨占
小山幽不容凡鳥宿匠人愛芳直裁截爲
廈屋幹細力未成用之君自速重任雖大
過直心終不曲縱非梁棟材猶勝尋常木

歎魯二首

季桓心豈忠其富過周公陽貨道豈正其
權執國命由來富與權不繫才與賢所託
得其地雖愚亦獲安彘肥因糞壤鼠穩依
社壇蟲獸尚如是豈謂無因緣

展禽胡爲者直道竟三黜顏子何如人屢
空聊過日皆懷王佐道不踐陪臣秩自古
無奈何命爲時所屈有如草木分天各與
其一荔枝非名花牡丹無甘實

反鮑明遠白頭吟

炎炎者烈火營營者小蠅火不熱真玉蠅
不點清冰此苟無所受彼莫能相仍乃知
物性中各有能不能古稱怨報死則人有
所懲懲淫或應可在道未爲弘譬如蜩鷃
徒啾啾啁龍鵬宜當委之去寥廓高飛騰
豈能泥塵下區區酬怨憎胡爲坐自苦否
悲仍撫膺

青塚

上有飢鷹號下有枯蓬走茫茫邊雪裏一
掬沙培塿傳是昭君墓埋閉蛾眉久凝脂
化爲泥鉛黛復何有唯有陰怨氣時生墳
左右鬱鬱如苦霧不隨骨銷朽婦人無他
才榮枯繫妍否何乃明妃命獨懸畫工手
丹青一註誤白黑相紛紜遂使君眼中西
施作嫫母同儕傾寵幸異類爲配偶禍福
安可知美顏不如醜何言一時事可戒千
年後特報後來姝不須倚眉首無辭揅荆


釵嫁作貧家婦不見青塚上行人爲澆酒


雜感

君子防悔尤賢人戒行藏嫌疑遠瓜李言
動慎毫芒立教固如此撫事有非常爲君
持所感仰面問蒼蒼犬齧桃樹根李樹反
見傷老龜烹不爛延禍及枯桑城門自焚
爇池魚懼其殃陽貨肆兇暴仲尼畏於匡
魯酒薄如水邯鄲開戰場伯禽鞭見血過
失由成王都尉身降虜宮刑加子長呂安

兄不道都市殺嵇康斯人死已久其事甚
昭彰是非不由己禍患安可防使我千載
後涕泗滿衣裳

白氏文集卷第二





白氏長慶集

二

LIBRARY
OF THE
UNIVERSITY OF ILLINOIS

895.108

Ss7s2

v.725

CHINA



白氏文集卷第三

諷諭三 凡二十首

新樂府 并序

序曰凡九千二百五十二言斷爲五十篇
篇無定句句無定字繫於意不繫於文首
句標其目卒章顯其志詩三百之義也其
辭質而徑欲見之者易諭也其言直而切
欲聞之者深誠也其事覈而實使采之者
傳信也其體順而肆可以播於樂章歌曲

也摠而言之爲君爲臣爲民爲物爲事而作不爲文而作也

元和四年爲左拾遺時作

七德舞美撥亂陳王業也

法曲美列聖正華聲也

二王後明祖宗之意也

海漫漫戒求仙也

立部伎刺雅樂之替也

華原磬刺樂工非其人也

上陽白髮人愍怨曠也

胡旋女戒近習也

新豐折臂翁戒邊功也

太行路借夫婦以諷君臣之不終也

司天臺引古以倣今也

捕蝗刺長吏也

昆明春水滿思王澤之廣被也

城鹽州美聖謨而謂邊將也

道州民美臣遇明主也

馴犀感爲政之難終也
五絃彈惡鄭之奪雅也

蠻子朝刺將驕而相備位也

驃國樂欲王化之先邇後遠也

縛戎人達窮民之情也

驪宮高美天子重惜人之財力也

百鍊鏡辨皇王鑑也

青石激忠烈也

兩朱閣刺佛寺濫多也

西涼伎刺封壇之臣也

八駿圖戒奇物懲佚遊也

澗底松念寒雋也

牡丹芳羨天子憂農也

紅線毯憂蠶桑之費也

杜陵叟傷農夫之困也

繚綾念女工之勞也

賣炭翁苦官市也

母別子刺新間舊也

陰山道疾貪虜也

時世粧警戒也

李夫人鑑嬖惑也

陵園妾憐幽閉也

鹽商婦惡幸人也

杏爲梁刺居處奢也

井底引銀瓶止淫奔也

官牛諷執政也

紫毫筆譏失職也

百隋堤柳憫亡國也

草茫茫懲厚葬也

古塚狐戒艷色也

黑潭龍疾貪吏也

天可度惡詐人也

秦吉了哀冤民也

鷗九劍思決壅也

採詩官鑑前王亂亡之由也

七德舞

七德舞七德歌傳自武德至元和元和小
臣白居易觀舞聽歌知樂意樂終稽首陳
其事太宗十八舉義兵白旄黃鉞定兩京
擒充戮竇四海清二十有四功業成二十
有九即帝位三十有五致太平功成理定
何神速速在推心置人腹亡卒遺骸散帛
收飢人賣子分金贖魏徵夢見天子泣張
謹哀聞辰日哭怨女三千放出宮死囚四
百來歸獄剪鬚燒藥賜功臣李勣嗚咽思

殺身舍血吮瘡撫戰士思摩奮呼乞効死
則知不獨善戰善乘時以心感人人心歸
今來一百九十載天下至今歌舞之歌七
德舞七德聖人有作垂無極豈徒耀神武
豈徒誇聖文太宗意在陳王業王業艱難
示子孫

法曲歌

法曲法曲歌大定積德重熙有餘慶永徽
之人舞而詠法曲法曲舞霓裳政和世理

音洋洋開元之人樂且康法曲法曲歌堂
堂堂堂之慶垂無疆中宗肅宗復鴻業唐
祚中興萬萬葉法曲法曲合夷歌夷聲邪
亂華聲和以亂干和天寶末明年胡塵犯
宮闕乃知法曲本華風苟能審音與政通
一從胡曲相參錯不辨興衰與哀樂願求
牙曠正華音不令夷夏相交侵

二王後

二王後彼何人介公鄴公爲國賓周武隋

文之子孫古人有言天下者非是一人之
天下周亡天下傳于隋隋人失之唐得之
唐興十葉歲二百介公鄴公世爲客明堂
大廟朝享時引居賓位備威儀備威儀助
郊祭高祖太宗之遺制不獨興滅國不獨
繼絕世欲令嗣位守文君亡國子孫取爲
戒

海漫漫

海漫漫直下無底旁無邊雲濤煙浪最深

處人傳中有三神山山上多生不死藥服
之羽化爲天仙秦皇漢武信此語方士年
年采藥去蓬萊今古但聞名烟水茫茫無
覓處海漫漫風浩浩眼穿不見蓬萊島不
見蓬萊不敢歸童男艸女舟中老徐福文
成多誑誕上元太一虛祈禱君看驪山頂
上茂陵頭畢竟悲風吹蔓草何況玄元聖
祖五千言不言藥不言仙不言白日昇青
天

立部伎

立部伎鼓笛誼舞雙劍跳七丸嫺巨索掉
長竿太常部伎有等級堂上者坐堂下立
堂上坐部笙歌清堂下立部鼓笛鳴笙歌
一聲衆側耳鼓笛萬曲無人聽立部賤坐
部貴坐部退爲立部伎擊鼓吹笙和雜戲
立部又退何所任始就樂懸操雅音雅音
替壞一至此長令爾輩調宮徵圓丘后土
郊祀時言將此樂感神祇欲望鳳來百獸

舞何異北轅將適楚工師愚賤安足云太
常三卿爾何人

華原磬

華原磬華原磬古人不聽今人聽泗濱石
泗濱石今人不擊古人擊今人古人何不
同用之捨之由樂工樂工雖在耳如壁不
分清濁即爲聾梨園弟子調律呂知有新
聲不知古古稱浮磬出泗濱立辯致死聲
感人宮懸一聽華原石君心遂忘封疆臣

果然胡寇從燕起武臣少肯封疆死始知
樂與時政通豈聽鏗鏘而已矣磬襄入海
去不歸長安市人爲樂師華原磬與泗濱
石清濁兩聲誰得知

上陽白髮人

上陽人紅顏暗老白髮新綠衣監使守宮
門一閉上陽多少春玄宗末歲初選入入
時十六今六十同時采擇百餘人零落年
深殘此身憶昔吞悲別親族扶入車中不

教哭皆云入內便承恩
臉似芙蓉曾似玉
未容君王得見面
已被楊妃遙側目
妬今
潛配上陽宮
一生遂向空房宿
秋夜長夜
長無寐
天不明
耿耿殘燈背
壁影蕭蕭暗
雨打窗聲
春日遲日遲
獨坐天難暮
宮鶯
百轉愁
狀聞梁鶯雙
栖老休妬
鶯歸鶯去
長悄然
春往秋來
不記年
唯向深宮望
明月
東西四五百
迴圓
今日宮中年
最老大
家遙賜尚書號
小頭鞋履窄
衣裳青黛點

眉眉細長外人不見見應笑天寶末年時
世粧上陽人苦最多少亦苦老亦苦少苦
老苦兩如何君不見昔時呂向美人賦又
不見今日上陽白髮歌

胡旋女 天寶末康居國獻之

胡旋女胡旋女心應絃手應鼓絃鼓一聲
雙袖舉迴雪飄飄轉蓬舞左旋右轉不知
疲千匝萬周無已時人間物類無可比奔
車輪緩旋風遲曲終再拜謝天子天子爲

之微啓齒胡旋女出康居徙勞東來萬里
餘中原自有胡旋者闢妙爭能爾不如天
寶季年時欲變臣妾人人學圓轉中有太
眞外祿山二人最道能胡旋梨花園中冊
作妃金雞障下養爲兒祿山胡旋迷君眼
兵過黃河疑未反貴妃胡旋惑君心死棄
馬嵬念更深從茲地軸天維轉五十年來
制不禁胡旋女莫空舞數唱此歌悟明主

新豐折臂翁

新豐老翁八十八頭鬢眉鬚皆似雪玄孫
扶向店前行左臂憑肩右臂折問翁臂折
來幾年兼問致折何因緣翁云貫屬新豐
縣生逢聖代無征戰慣聽梨園歌管聲不
識旗槍與弓箭無何天寶大徵兵戶有三
丁點一丁點得驅將何處去五月萬里雲
南行聞道雲南有瀘水椒花落時瘴烟起
大軍徒涉水如湯未過十人二三死村南
村北哭聲哀兒別爺孃夫別妻皆云前後

征蠻者千萬人行無一迴是時翁年二十
四兵部牒中有名字夜深不敢使人知偷
將大石鎚折臂張弓斂旗俱不堪從茲始
免征雲南骨碎筋傷非不苦且圖揀退歸
鄉土臂折來來六十年一肢雖廢一身全
至今風雨陰寒夜直到天明痛不眠痛不
眠終不悔且喜老身今獨在不然當時瀟
水頭身死魂飛骨不收應作雲南望鄉鬼
萬人塚上哭啾啾老人言君聽取君不聞

開元宰相宋開府不賞邊功防黷武又不
聞天寶宰相楊國忠欲求恩幸立邊功邊
功未立生人怨請問新豐折臂翁

太行路

太行之路能摧車若比人心是坦途巫峽
之水能覆舟若比人心是安流人心好惡
苦不常好生毛羽惡生瘡與君結髮未五
載忽從牛女爲參商古稱色衰相棄背當
時美人猶怨悔何況如今鸞鏡中妾顏未

改君心改爲君薰衣裳君聞蘭麝不馨香
爲君盛容飾君看金翠無顏色行路難難
重陳人生莫作婦人身百年苦樂由他人
行路難難於山險於水不獨人間夫與妻
近代君臣亦如此君不見左納言右納史
朝承恩暮賜死行路難不在水不在山只
在人情反覆間

司天臺

司天臺仰觀俯察天人際羲和死來職事

廢官不求賢空取藝昔聞西漢元成間上
凌下替謫見天北辰微暗少光色四星煌
煌如火赤耀芒動角射三台上台半滅中
台圯是時非無太史官眼見心知不敢言
明朝趨入明光殿唯奏慶雲壽星見天文
時變兩如斯九重天子不得知不得知安
用臺高百尺爲

捕蝗

捕蝗捕蝗誰家子天熱日長飢欲死興兀

兵火傷陰陽和氣蠱蠹化爲蝗始自兩河
及三輔荐食如蠶飛似雨雨飛蠶食千里
間不見青苗空赤土河南長吏言憂農課
人晝夜捕蝗蟲是時粟斗錢三百蝗蟲之
價與粟同捕蝗捕蝗竟何利徒使飢人重
勞費一蟲雖死百蟲來豈將人力競天災
我聞古之良吏有善政以政驅蝗蝗出境
又聞貞觀之初道欲昌文皇仰天吞一蝗
一人有慶兆民賴是歲雖蝗不爲害

昆明春水滿 貞元中始漲之

昆明春昆明春池岸古春流新影浸南山
青澗潏波沉西日紅濟淪往年因旱靈
池竭龜尾曳塗魚煦沫詔開八水注恩波
千介萬鱗同日活今來淨淥水照天游魚
鰈鰈蓮田田洲香杜若抽心短沙暖鴛鴦
鋪翅眠動植飛沈皆遂性皇澤如春無不
被漁者仍豐網畧資貧人又獲菰蒲利詔
以昆明近帝城官家不得收其征菰蒲無

租魚無稅近水之人感君惠感君惠獨何
人吾聞率土皆王民遠民何踈近何親願
推此惠及天下無遠無近同欣欣吳興山
中罷榷茗鄱陽坑裏休封銀天涯地角無
禁利熙熙同似昆明春

城鹽州

貞元壬申歲特詔城之

城鹽州城鹽州城在五原原上頭蕃東節
度鉢闡布忽見新城當要路金烏飛傳贊
普聞建牙傳箭集群臣君臣赭面有憂色

皆言勿謂唐無人自築鹽州十餘載左社
羶裘不犯塞晝牧牛羊夜捉生長去新城
百里外諸邊急警勞戍人唯此一道無煙
塵盧夏潛安誰復辨秦原暗通何處見鄜
州驛路好馬來長安藥肆黃耆賤城鹽州
鹽州未城天子憂德宗按圖自定計非關
將略與廟謀吾聞高宗中宗世北虜猖狂
最難制韓公創築受降城三城鼎峙屯漢
兵東西亘絕數千里耳冷不聞胡馬聲如

今邊將非無策心笑韓公築城壁相看養
寇爲身謀各握強兵固恩澤願分今日邊
將恩褒贈韓公封子孫誰能將此鹽州曲
翻作歌詞聞至尊

道州民

道州民多侏儒長者不過三尺餘市作矮
奴年進送號爲道州任土貢任土貢寧若
斯不聞使人生別離老翁哭孫母哭兒一
自陽城來守郡不進矮奴頻詔問城云臣

按六典書任土貢有不貢無道州水土所
生者只有矮民無矮奴吾君感悟璽書下
歲貢矮奴宜悉罷道州民老者幼者何欣
欣父兄子弟始相保從此得作良人身道
州民民到于今受其賜欲說使君先下淚
仍恐兒孫忘使君生男多以陽爲字

馴犀

馴犀馴犀通天犀軀貌駭人角駭雞海蠻
聞有明天子驅犀乘傳來萬里一朝得謁

大明宮歡呼拜舞自論功五年馴養始堪
獻六譯語言方得通上嘉人獸俱來遠蠻
館四方犀入苑餘以瑤簫鑠以金故鄉迢
遞君門深海鳥不知鍾鼓樂池魚空結江
湖心馴犀生處南方熱秋無白露冬無雪
一入上林三四年又逢今歲苦寒月飲冰
卧霰苦蹉跎角骨凍傷鱗甲縮馴犀死蠻
兒啼向闕再三顏色低奏乞生歸本國去
恐身凍死似馴犀君不見建中初馴象生

還放林邑君不見貞元末馴犀凍死蠻兒
泣所嗟建中異貞元象生犀死何足言

五絃彈

五絃彈五絃彈聽者傾耳心寥寥趙璧知
君入骨愛五絃一一爲君調第一第二絃
索索秋風拂松疎韻落第三第四絃冷冷
夜鶴憶子籠中鳴第五絃聲最掩抑隴水
凍咽流不得五絃並奏君試聽淒淒切切
復錚錚鏤擊珊瑚一兩曲冰寫玉盤千萬

聲殺聲入耳膚血寒慘氣中人肌骨酸曲
終聲盡欲半日四座相對愁無言座中有
一遠方士唧唧咨咨聲不已自歎今朝初
得聞始知孤負平生耳唯憂趙璧白髮生
老死人間無此聲遠方士爾聽五絃信爲
美吾聞正始之音不如是正始之音其若
何朱絃踈越清廟歌一彈一唱再三歎曲
淡節稀聲不多融融曳曳召元氣聽之不
覺心平和人情重今多賤古古琴有絃人

不撫更從趙璧藝成來二十五絃不如五

蠻子朝

蠻子朝汎皮船兮渡繩橋來自鄯州道路
遙入界先經蜀川過蜀將收功先表賀臣
聞雲南六詔蠻東連牂牁西連蕃六詔星
居初瑣碎合爲一詔漸強大開元皇帝雖
聖神唯蠻倔強不來賓鮮于仲通六萬卒
征蠻一陣全軍沒至今西洱河岸邊箭孔
刀痕滿枯骨誰知今日慕華風不勞一人

蠻自通誠由陛下休明德亦賴微臣誘諭
功德宗省表知如此笑令中使迎蠻子蠻
子導從者誰何摩挲俗羽雙隈伽清平官
持赤藤杖大將軍繫金呿嗟異牟尋男尋
閣勸特勅召對延英殿上心貴在懷遠蠻
引臨玉座近天顏冕旒不垂親勞徕賜衣
賜食移時對移時對不可得大臣相看有
羨色可憐宰相拖紫佩金章朝日唯聞對
一刻

驃國樂

貞元十七年來獻之

驃國樂驃國樂出自大海西南角雍羗之
子舒難陀來獻南音奉正朔德宗立仗御
紫庭鼙續不塞爲爾聽玉螺一吹推髻聳
銅鼓千擊文身踊珠纓炫轉星宿搖花鬘
斗藪龍蛇動曲終王子啓聖人臣父願爲
唐外臣左右歡呼何翕習皆尊德廣之所
及須臾百辟詣閣門俯伏拜表賀至尊伏
見驃人獻新樂請書國史傳子孫時有擊

壤老農父暗測君心閑獨語聞君政化甚
聖明欲感人心致太平感人在近不在遠
太平由實非由聲觀身理國國可濟君如
心兮民如體體生疾苦心慙悽民得和平
君愷悌貞元之民若未安驪樂雖聞君不
歡貞元之民苟無病驪樂不來君亦聖驪
樂驪樂徒喧喧不如聞此芻蕘言

縛戎人

縛戎人縛戎人耳穿面破驅入秦天子矜

憐不忍殺詔徙東南吳與越黃衣小使錄
姓名領出長安乘遽行身被金瘡面多瘡
扶病徒行日一驛朝飡飢渴費盃盤夜卧
腥臊汚床席忽逢江水憶交河垂手齊聲
嗚咽歌其中一虜語諸虜爾苦非多我苦
多同伴行人因借問欲說喉中氣憤憤自
云鄉管本涼原大曆年中沒落蕃一落蕃
中四十載遣著皮裘繫毛帶唯許正朝服
漢儀歛衣整巾潛淚垂誓心密定歸鄉計

不使蕃中妻子知暗思幸有殘筋力更恐
年衰歸不得蕃候嚴兵鳥不飛脫身冒死
奔逃歸晝伏宵行經大漠雲陰月黑風沙
惡驚藏青塚寒草疏偷渡黃河夜冰薄忽
聞漢軍鼙鼓聲路傍走出再拜迎游騎不
聽能漢語將軍遂縛作蕃生配向江南卑
濕地略無存卹空防備念此吞聲仰訴天
若爲辛苦度殘年涼原鄉井不得見胡地
妻兒虛棄捐沒蕃被囚思漢土歸漢被劫

爲蕃虜早知如此悔歸來兩地寧如一處
苦縛戎人戎人之中我苦辛自古此冤應
未有漢心漢語吐蕃身

白氏文集卷第三

自六代以來

寺皆廢二

等觀為人盡入之甲於吾年自古其觀
流雲宮卑以成山對觀東南流雲宮一

白氏文集卷第四

諷諭四 新樂府三十首

驪宮高

高高驪山上有宮
朱樓紫殿三四重
遲遲兮春日
玉甃暖兮溫泉溢
嫋嫋兮秋風山
蟬鳴兮宮樹紅
翠華不來歲月久
牆有衣兮瓦有松
吾君在位已五載
何不一幸乎
其中西去都門幾多地
吾君不遊有深意
一人出兮不容易
六宮從兮百司備八十

一車千萬騎朝有宴飲暮有賜中人之產
數百家未足充君一日費吾君修己人不
知不自逸兮不自嬉吾君愛人人不識不
傷財兮不傷力驪宮高兮高入雲君之來
兮爲一身君之不來兮爲萬人

百鍊鏡

百鍊鏡鎔範非常規日辰處所靈且祇江
心波上舟中鑄五月五日日午時瓊粉金
膏磨瑩已化爲一片秋潭水鏡成將獻蓬

萊宮揚州長史手自封人間臣妾不合照
背有九五飛天龍人人呼爲天子鏡我有
一言聞太宗太宗常以人爲鏡鑑古鑑今
不鑑容四海安危居掌內百王治亂懸心
中乃知天子別有鏡不是揚州百鍊銅

青石

青石出自藍田山兼車運載來長安工人
磨琢欲何用石不能言我代言不願作人
家墓前神道碣墳土未乾名已滅不願作

官家道傍德政碑不鐫實錄鐫虛辭願爲
顏氏段氏碑雕鏤太尉與太師刻此兩片
堅貞質狀彼二人忠烈姿義心若石屹不
轉死節名流確不移如觀奮擊朱泚目似
見叱呵希烈時各於其上題名謚一置高
山一沈水陵谷雖遷碑獨存骨化爲塵名
不死長使不忠不烈臣觀碑改節慕爲人
慕爲人勸事君

兩朱閣

兩朱閣南北相對起借問何人家貞元雙
帝子帝子吹簫雙得仙五雲飄飄飛上天
第宅亭臺不將去化爲佛寺在人間粧閣
妓樓何寂靜柳似舞腰池似鏡花落黃昏
悄悄時不聞歌吹聞鍾磬寺門勅榜金字
書尼院佛庭寬有餘青苔明月多閑地比
屋疲人無處居憶昨平陽宅初置吞併平
人幾家地仙去雙雙作梵宮漸恐人間盡
爲寺

西凉伎

西凉伎假面胡人假師子刻木爲頭絲作
尾金鑲眼睛銀帖齒奮迅毛衣擺雙耳如
從流沙來萬里紫髯深目兩胡兒鼓舞跳
梁前致辭應似凉州未陷日安西都護進
來時須臾云得新消息安西路絕歸不得
泣向師子涕雙垂凉州陷沒知不知師子
迴頭向西望哀吼一聲觀者悲貞元三年
愛此曲醉坐笑看看不足享賓犒

軍師子胡兒長在目有一征夫年七十見
弄涼州佢面泣泣罷歛手白將軍主憂臣
辱首所聞自從天寶兵戈起犬戎日夜吞
西鄙涼州陷來四十年河隴侵將七千里
平時安西萬里疆今日邊防在鳳翔緣邊
空屯十萬卒飽食溫衣閑過日遣民腸斷
在涼州將卒相看無意收天子每思常痛
惜將軍欲說合慙羞柰何仍看西涼伎取
笑資歡無所愧縱無智力未能收忍取西

涼弄爲戲

八駿圖

穆王八駿天馬駒後人愛之寫爲圖背如
龍兮頸如象骨竦筋高脂肉壯日行萬里
速如飛穆王獨乘何所之四荒八極踏欲
遍三十二蹄無歇時屬車軸折趁不及黃
屋草生棄若遺瑤池西赴王母宴七廟經
年不親薦璧臺南與盛姬遊明堂不復朝
諸侯白雲黃竹歌聲動一人荒樂萬人愁

周從后稷至文武積德累功世勤苦豈知
纔及四代孫心輕王業如灰土由來尤物
不在大能蕩君心則爲害文帝却之不肯
乘千里馬去漢道興穆王得之不爲戒八
駿駒來周室壞至今此物世稱珍不知房
星之精下爲恠八駿圖君莫愛

澗底松

有松百尺大十圍生在澗底寒且卑澗深
山險人路絕老死不逢工度之天子明堂

欠梁木此求彼有兩不知誰論蒼蒼造物
意但與之材不與地金張世祿原憲貧牛
衣寒賤貂蟬貴牛衣高下雖有殊高者未
必賢下者未必愚君不見沈沈海底生珊瑚
歷歷天上種白榆

牡丹芳

牡丹芳牡丹芳黃金葉綻紅玉房千片赤
英霞爛爛百枝絳艷燈煌煌照地初開錦
繡段當風不結蘭麝囊仙人琪樹白無色

王母桃花小不香宿露輕盈汎紫艷朝陽
照耀生紅光紅紫二色間深淺向背萬態
隨佢昂映葉多情隱羞面卧叢無力含醉
粧佢嬌笑容疑掩口疑思怨人如斷腸穠
姿貴彩信奇絕雜卉亂花無比方石竹金
錢何細碎芙蓉芍藥苦尋常遂使王公與
卿士遊花冠蓋日相望庫車軟輦貴公主
香衫細馬豪家郎衛公宅靜閉東院西明
寺深開北廊戲蝶雙舞看人久殘鶯一聲

春日長共愁日照芳難住仍張帷幕垂陰
涼花開花落二十日一城之人皆若狂三
代已還文勝質人心重華不重實重華直
至牡丹芳其來有漸非今日元和天子憂
農桑卹下動天天降祥去歲嘉禾生九穗
田中寂寞無人至今年瑞麥分兩岐君心
獨喜無人知無人知可歎息我願暫求造
化力減却牡丹妖艷色少迴卿士愛花心
同似吾君憂稼穡

紅線毯

紅線毯擇蠶繰絲清水煮揀絲練線紅藍
染染爲紅線紅於藍織作披香殿上毯披
香殿廣十丈餘紅線織成可殿鋪絲絲苴
茸香拂拂線軟花虛不勝物美人踏上歌
舞來羅襪繡鞋隨步沒大原毯澁毳縷硬
蜀都褥薄錦花冷不如此毯溫且柔年年
十月來宣州宣城太守加樣織自謂爲臣
能竭力百夫同擔進宮中線厚絲多卷不

得宣城大守知不知一丈毯千兩絲地不
知寒人要暖少奪人衣作地衣

杜陵叟

杜陵叟杜陵居歲種薄田一頃餘三月無
雨旱風起麥苗不秀多黃死九月降霜秋
早寒禾穗未熟皆青乾長吏明知不申破
急斂暴徵求考課典桑賣地納官租明年
衣食將何如剥我身上帛奪我口中粟虐
人害物即豺狼何必鉤爪鋸牙食人肉不

知何人奏皇帝帝心惻隱知人弊白麻紙
上書德音京畿盡放今年稅昨日里胥方
到門手持勅牒榜鄉村十家租稅八九畢
虛受吾君蠲免恩

繚綾

繚綾繚綾何所似不似羅綃與紈綺應似
天台山上月明前四十五尺瀑布泉中有
文章又奇絕地鋪白煙花簇雪織者何人
衣者誰越溪寒女漢宮姬去年中使宣口

勅天上取樣人間織織爲雲外秋鴈行染
作江南春草色廣裁衫袖長製裙金斗熨
波刀剪紋異綵奇文相隱映轉側看花花
不定昭陽舞人恩正深春衣一對直千金
汗沾粉污不再著曳土踏泥無惜心繚綾
織成費功績莫比尋常繒與帛綵細縠多
女手疼扎扎千聲不盈尺昭陽殿裏歌舞
人若見織時應也惜

賣炭翁

賣炭翁伐薪燒炭南山中滿面塵灰烟火
色兩鬢蒼蒼十指黑賣炭得錢何所營身
上衣裳口中食可怜身上衣正單心憂炭
賤願天寒夜來城外一尺雪曉駕炭車輾
冰轍牛困人飢日已高市南門外泥中歇
翩翩兩騎來是誰黃衣使者白衫兒手把
文書口稱勅迴車叱牛牽向北一車炭千
餘斤宮使驅將惜不得半疋紅綃一丈綾
繫向牛頭充炭直

母別子

母別子子別母白日無光哭聲苦關西驃
騎大將軍去年破虜新策勲勅賜金錢二
百萬洛陽迎得如花人新人迎來舊人棄
掌上蓮花眼中刺迎新棄舊未足悲悲在
君家留兩兒一始扶行一初坐坐啼行哭
牽人衣以汝夫婦新嬾婉使我母子生別
離不如林中鳥與鵲母不失雛雄伴雌又
似園中桃李樹花落隨風子在枝新人新

人聽我語洛陽無限紅樓女但願將軍重
立功更有新人勝於汝

陰山道

陰山道陰山道紇邏敦肥水泉好每至戌
人送馬時道傍千里無纖草草盡泉枯馬
病羸飛龍但印骨與皮五十疋縑易一疋
縑去馬來無了日養無所用土非宜每歲
死傷十六七縑絲不足女工苦踈織短截
充匹數藕絲蛛網三丈餘迴鶻訴稱無用

處咸安公主號可敦遠爲可汗頻奏論元
和二年下新勅內出金帛酬馬直仍詔江
淮馬價纔從此不令踈短織合羅將軍呼
萬歲捧授金銀與纔綵誰知黠虜啓貪心
明年馬多來一倍纔漸好馬漸多陰山虜
奈爾何

時世粧

時世粧時世粧出自城中傳四方時世流
行無遠近顯不施朱面無粉烏膏注脣脣

似泥雙眉畫作八字佯妍蚩黑白失本態
粧成盡似含悲啼圓鬟無鬢堆髻樣斜紅
不暈赭面狀昔聞被髮伊川中卒有見之
知有戎元和粧梳君記取髻堆面赭非華
風

李夫人

漢武帝初哭李夫人夫人病時不肯別死
後留得生前恩君恩不盡念未已甘泉殿
裏令寫真丹青畫出竟何益不言不笑愁

殺人已令方士合靈藥玉釜煎鍊金爐焚
九華帳中夜悄悄反魂香降夫人魂夫人
之魂在何許香烟引到焚香處既來何苦
不須史縹緲悠揚還滅去去何速兮來何
遲是耶非耶兩不知翠蛾鬢髻平生貌不
似昭陽寢疾時魂之不來君心苦魂之來
兮君亦悲背燈隔帳不得語安用暫來還
見違傷心不獨漢武帝自古及今皆若斯
君不見穆王三日哭重璧臺前傷盛姬又

不見秦陵一掬淚馬嵬路上念楊妃縱令
妍姿艷質化爲土此恨長在無銷期生亦
惑死亦惑尤物惑人忘不得人非木石皆
有情不如不遇傾城色

陵園妾

陵園妾顏色如花命如葉命如葉薄將奈
何一奉寢宮年月多年月多春愁秋思知
何限青絲髮落鬟鬢疎紅玉膚銷繫裙縵
憶昔宮中被妬猜因讒得罪配陵來老母

啼呼赴車別中宮監送鑰門迴山宮一閉
無開日未死此身不令出松門到曉月徘徊
柏城盡日風蕭瑟松門栢城幽閉深聞
蟬聽鶯感光陰眠看菊藥重陽淚手把梨
花寒食心把花掩淚無人見綠蕪牆遶青
苔院四季徒支粧粉錢三朝不識君王面
遙想六宮奉至尊宣徽雪夜浴堂春雨露
之恩不及者猶聞不啻三千人三千人我
同君恩何厚薄願今輪轉直陵園三歲一

來均苦樂

鹽商婦

鹽商婦多金帛不事田農與蠶績南北東西不失家風水爲鄉船作宅本是揚州小家女嫁得西江大商客綠鬟富去金釵多皓腕肥來銀釧窄前呼蒼頭後叱婢問爾因何得如此壻作鹽商十五年不屬州縣屬天子每年鹽利入官時少入官家多入私官家利薄私家厚鹽鐵尚書遠不知何

况江頭魚米賤紅鱸黃橙香稻飯飽食濃
粧倚施樓兩朶紅顚花欲綻鹽商婦有幸
嫁鹽商終朝羹飯食終歲好衣裳好衣羹
食有來處亦須慙愧桑弘羊桑弘羊死已
久不獨漢時今亦有

杏爲梁

杏爲梁桂爲柱何人堂室李開府碧砌紅
軒色未乾去年身歿今移主高其牆大其
門誰家第宅盧將軍素泥朱板光未滅今

歲官收別賜人開府之堂將軍宅造未成
時頭已白逆旅重居逆旅中心是主人身
是客更有愚夫念身後心雖甚長計非久
窮奢極麗越規模付子傳孫令保守莫教
門外過客聞撫掌迴頭笑殺君君不見馬
家宅尚猶存宅門題作奉誠園君不見魏
家宅屬他人詔贖賜還五代孫儉存奢失
今在目安用高牆圍大屋

井底引銀瓶

井底引銀瓶銀瓶欲上絲繩絕石上磨玉
簪玉簪欲成中央折瓶沈簪折知奈何似
妾今朝與君別憶昔在家爲女時人言舉
動有殊姿嬋娟兩鬢秋蟬翼宛轉雙蛾遠
山色笑隨戲伴後園中此時與君未相識
妾弄青梅憑短牆君騎白馬傍垂楊牆頭
馬上遙相顧一見知君即斷腸知君斷腸
共君語君指南山松柏樹感君松柏化爲
心暗合雙鬟逐君去到君家舍五六年君

家大人頻有言聘則爲妻奔是妾不堪主
祀奉蘋蘩終知君家不可住其柰出門無
去處豈無父母在高堂亦有情親滿故鄉
潛來更不通消息今日悲羞歸不得爲君
一日恩悞妾百年身寄言癡小人家女慎
勿將身輕許人

官牛

官牛官牛駕官車漣水岸邊般載沙一石
沙幾斤重朝載暮載將何用載向五門官

道西綠槐陰下鋪沙堤昨來新拜右丞相
恐怕泥塗汚馬蹄右丞相馬蹄踏沙雖淨
繫牛領牽車欲流血右丞相但能濟人治
國調陰陽官牛領穿亦無妨

紫毫筆

紫毫筆尖如錐兮利如刀江南石上有老
兔喫竹飲泉生紫毫宣城之人采爲筆千
萬毛中揀一毫毫雖輕功甚重管勒工名
充歲貢君兮臣兮勿輕用勿輕用將何如

願賜東西府御史願頒左右臺起居搢管
趨入黃金闕抽毫立在白玉除臣有奸邪
正衙奏君有動言直筆書起居郎侍御史
爾知紫毫不易致每歲宣城進筆時紫毫
之價如金貴慎勿空將彈失儀慎勿空將
錄制詞

隋堤柳

隋堤柳歲久年深盡衰朽風飄飄兮雨蕭
蕭三株兩株汴河口老枝病葉愁殺人曾

經大業年中春大業年中煬天子種柳成
行夾流水西自黃河東至淮綠影一千三
百里大業末年春暮月柳色如烟絮如雪
南幸江都恣佚遊應將此柳繫龍舟紫髯
郎將護錦纜青蛾御史直迷樓海內財力
此時竭舟中歌笑何日休上荒下困勢不
久宗社之危如綴旒煬天子自言福祚長
無窮豈知皇子封鄴公龍舟未過彭城閣
義旗已入長安宮蕭牆禍生人事變晏駕

不得歸秦中土墳數尺何處葬吳公臺下
多悲風二百年來汴河路沙草和煙朝復
暮後王何以鑒前王請看隋堤亡國樹

草茫々

草茫々土蒼々蒼々茫々在何處驪山脚
下秦皇墓墓中下涸二重泉當時自以爲
深固下流水銀象江海上綴珠光作烏兔
別爲天地於其間擬將富貴隨身去一朝
盜掘墳陵破龍椁神堂三月火可憐寶玉

歸人間暫借泉中買身禍者者狼藉儉者
安一凶一吉在眼前憑君迴首向南望漢
丈葬在灞陵原

古塚狐

古塚狐妖且老化為婦人顏色好頭覆雲
鬟面變粧火尾曳作長紅裳徐々行傍荒
村路目欲暮時人靜處或歌或舞或悲啼
翠眉不舉花顏低忽然一笑千萬態見者
十人八九迷假色迷人猶如是真色迷人

應過此彼真此假俱迷人人心惡假貴重
眞狐假女妖害猶淺一朝一夕迷人眼女
爲狐媚害即深日長月長溺人心何況褒
姒之色善蠱惑能喪人家覆人國君看爲
害淺深間豈將假色同眞色

黑潭龍

黑潭水深色如墨傳有神龍人不識潭上
架屋官立祀龍不能神人神之豐凶水旱
與疾疫鄉里皆言龍所爲家家養豚漉清

酒朝祈暮賽依巫口神之來兮風飄飄紙
錢動兮錦傘搖神之去兮風亦靜香火滅
兮盃盤冷肉堆潭岸石酒潑廟前草不知
龍神饗幾多林鼠山狐長醉飽狐何幸豚
何辜年年殺豚將餽狐狐假龍神食豚盡
九重泉底龍知無

天可度

天可度地可量唯有人心不可防但見丹
誠赤如血誰知僞言巧似簧勸君掩鼻君

莫掩使君夫婦為參商勸君掇蜂君莫掇
使君又子為豺狼海底魚兮天上鳥高可
射兮深可釣唯有人心相對時咫尺之間
不能料君不見李義府之輩笑欣欣笑中
有刀潛殺人陰陽神變皆可測不測人間
笑是瞋

秦吉了

秦吉了出南中彩毛青黑花頸紅耳聰心
慧舌端巧鳥語人言無不通昨日長爪鸞

今日大嘴烏爲捎乳燕一窠覆鳥啄好雞
雙眼枯鷄號墮地燕驚去然後拾卵攫其
雛豈無鵬與鷃喙中食飽不肯搏亦有鷺
鷥羣閑立颺高如不聞秦吉了人云爾是
能言鳥豈不見鷄燕之冤苦吾聞鳳凰百
息主爾竟不爲鳳凰之前致一言安用噪
噪間言語

鷄九劍

歐冶子死千年後精靈閣授張鷄九鷄九

鑄劍吳山中天與日時神借功金鐵騰精
火翻焰踊躍求爲鑢鄒劍劍成未試十餘
年有客持金買一觀誰知閉匣長思用三
尺青蛇不肯蟠客有心劍無目容代劍言
告鷗九君勿矜我玉可切君勿誇我鍾可
刺不如持我決浮雲無令漫漫蔽白日爲
君使無私之光及萬物蟄虫昭蘇萌草出

采詩官

采詩官采詩聽謠導人言言者無罪聞者

誠下流上通上下秦周滅秦興至隋氏十
代采詩官不置郊廟登歌讚君美樂府艷
詞悅君意若求興諭規刺言萬句千章無
一字不是章句無規刺漸及朝廷絕諷議
諍臣杜口爲冗員諫鼓高懸作虛器一人
負展常端默百辟入門兩自媚夕郎所賀
皆德音春官每奏唯祥瑞君之堂兮千里
遠君之門兮九重闕君耳唯聞堂上言君
眼不見門前事貪吏害民無所忌奸臣蔽

君無所畏君不見厲王胡亥之末年群臣
有利君無利君兮君兮願聽此欲開壅蔽
達人情先向歌詩求諷刺

白氏文集卷第四

卷之四

自友交朋亦昂

主人計我情堪

存降世無他事

霍無西界深不

白氏文集卷第五

閑適一 古調詩 凡五十三首

常樂里閑居偶題十六韻兼寄劉十
五公輿王十一起呂二炅呂四穎崔
玄亮十八元九稹劉三十三敦質張
十五仲元時爲校書郎

帝都名利場雞鳴無安居獨有懶慢者日
高頭未梳工拙性不同進退亦遂殊幸逢
太平代天子好文儒小才難大用典校在

祕書三旬兩入省因得養頑踈茅屋四五
間一馬二僕夫俸錢萬六千月給亦有餘
既無衣食牽亦少人事拘遂使少年心日
日常晏如勿言無已知躁靜各有徒蘭臺
七八人出處與之俱旬時阻談笑旦夕望
軒車誰能讎校間解帶卧吾廬窓前有竹
翫門外有酒沽何以待君子數竿對一壺
答元八宗簡同遊曲江後明日見贈
長安千萬人出門各有營唯我與夫子信

馬悠悠行行到曲江頭反照草樹明南山
好顏色病客有心情水禽翻白羽風荷嫋
翠莖何必滄浪去即此可濯纓時景不重
來賞心難再并坐愁紅塵裏夕鼓鼙鼙聲
歸來經一宿世慮稍復生賴聞瑤華唱再
得塵襟清

感時

朝見日上天暮見日入地不覺明鏡中忽
年三十四勿言身未老冉冉行將至白髮

雖未生朱顏已先悴人生詎幾何在世猶
如寄雖有七十期十人無一二今我猶未
悟往往不適意胡爲方寸間不貯浩然氣
貧賤非不惡道在何足避富貴非不愛時
來當自致所以達人心外物不能累唯當
飲美酒終日陶陶醉斯言勝金玉佩服無
失墜

首夏同諸校正遊開元觀因宿翫月
我與二三子策名在京師官小無職事閑

於爲客時沈沈道觀中心賞期在茲到門
車馬迴入院巾杖隨清和四月初樹木正
華滋風清新葉影烏戀殘花枝向夕天又
晴東南餘霞披置酒西廊下待月盃行遲
須臾金魄生若與吾徒期光華一照耀樓
殿相參差終夜清景前笑歌不知疲長安
名利地此興幾人知

求崇里觀居

季夏中氣候煩暑自此收蕭颼風雨天蟬

聲暮啾啾永崇里巷靜華陽觀院幽軒車
不到處滿地槐花秋年光忽冉冉世事本
悠悠何必待衰老然後悟浮休真隱豈長
遠至道在冥搜身雖世界住心與虛無遊
朝飢有蔬食夜寒有布裘幸免凍與餒此
外復何求寡欲雖少病樂天心不憂何以
明吾志周易在床頭

早送舉人入試

風駕送舉人東方猶未明自謂出太早已

有車馬行騎火高佗影街鼓參差聲可怜
早朝者相看意氣生日出塵埃飛群動互
營營營營各何求無非利與名而我常晏
起虛住長安城春深官又滿日有歸山情

招王質夫 自此後詩爲醵屋尉時
作

濯足雲水客折腰簪笏身誼閑迹相背十
里別經旬忽因乘逸興莫惜訪囂塵窓前
故栽竹與君爲主人

祇役駱口因與王質夫同遊秋山偶
題三韻

石擁百泉合雲破千峯開平生烟霞侶此
地重徘徊今日勤王意一半爲山來

見蕭侍御憶舊山草堂詩因以繼和
琢玉以爲架綴珠以爲籠玉架絆野鶴珠
籠鎖冥鴻鴻思雲外天鶴憶松上風珠玉
信爲羨鳥不戀其中臺中蕭侍御心與鴻
鶴同晚起慵冠豸閑行馱避驄昨見憶山

詩詩思浩無窮歸夢杳何處舊居洛水東
秋閑杉桂林春老芝朮叢自云別山後離
抱常忡忡衣繡非不榮持憲非不雄所樂
不在此悵望草堂空

病假中南亭閑望

歌枕不視事兩日門掩關始知吏役身不
病不得閑閑意不在遠小亭方丈間西簷
竹梢上坐見太白山遙愧峯上雲對此塵
中顏

仙遊寺獨宿

沙鶴上階立潭月當戶開此中留我宿兩
夜不能迴幸與靜境遇喜無歸侶催從今
獨遊後不擬共人來

前庭涼夜

露簾色似玉風幌影如波坐愁樹葉落中
庭明月多

官舍小亭閑望

風竹散清韻烟槐凝綠姿日高人吏去閑

坐在茅茨葛衣禦時暑蔬飯療朝飢持此
聊自足心力少營爲亭上獨吟罷眼前無
事時數峯太白雪一卷陶潛詩人心各自
是我是良在茲迴謝爭名客甘從君所嗤
早秋獨夜

井桐涼葉動鄰杵秋聲發獨向簷下眠覺
來半床月

聽彈古淥水

聞君古淥水使我心和平欲識慢流意爲

聽踈汎聲西窓竹陰下竟日有餘清

松齋自題 時爲翰林學士

非老亦非少年過三紀餘非賤亦非貴朝
登一命初才小分易足心寬體長舒充腸
皆美食容膝即安居況此松齋下一琴數
帙書書不求甚解琴聊以自娛夜直入君
門晚歸卧吾廬形骸委順動方寸付空虛
持此將過日自然多晏如昏昏復默默非
智亦非愚

冬夜與錢貲外同直禁中

夜深草詔罷霜月淒凜凜欲卧煖殘盃燈
前相對飲連鋪青纁被對置通中枕髣髴
百餘宵與君同此寢

和錢貲外禁中夙興見示

窻白星漢曙窻暖燈火餘坐卷朱裏幕看
封紫泥書宵宵鍾漏盡瞳瞳霞景初樓臺
紅照曜松竹青扶踈君愛此時好迴頭時
謂余不知上清界曉景復何如

夏日獨直寄蕭侍御

憲臺文法地翰林清切司鷹猜課野鶴驥
德責山麋課責雖不同同歸非所宜是以
方寸內忽忽暗相思夏日獨上直日長何
所爲澹然無他念虛靜是吾師形委有事
牽心與無事期中臆一以曠外累都若遺
地貴身不覺意閑境來隨但對松與竹如
在山中時情性聊自適吟詠偶成詩此意
非夫子餘人多不知

松聲

月好好獨坐雙松在前軒西南微風來潛
入枝葉間蕭寥發爲聲半夜明月前寒山
颼颼雨秋琴泠泠絃一聞滌炎暑再聽破
昏煩竟夕遂不寐心體俱脩然南陌車馬
動西鄰歌吹繁誰知茲簷下滿耳不爲喧

禁中

門嚴九重靜窻幽一室閑好是修心處何
必在深山

贈吳丹

巧者力苦勞智者心苦憂愛君無巧智終
歲閑悠悠嘗登御史府亦佐東諸侯手操
紕謬簡心運決勝籌宦途似風水君心如
虛舟況然而不有進退得自由今來脫易
冠時往侍龍樓官曹稱心靜居處隨迹幽
冬負南榮日支體甚溫柔夏卧北窻風枕
席如涼秋南山入舍下酒甕在床頭人間
有閑地何必隱林丘願我愚且昧勞生殊

未休一入金門直星霜三四周主恩信難
報近地徒久留終當乞閑官退與夫子遊

初除戶曹喜而言志

詔授戶曹掾捧認感君恩感恩非爲己祿
養及吾親弟兄俱簪笏新婦儼衣巾羅列
高堂下拜慶正紛紛俸錢四五萬月可奉
晨昏廩祿二百石歲可盈倉困喧喧車馬
來賀客滿我門不以我爲貪知我家內貧
置酒延賀客客容亦歡欣笑云今日後不

復憂空罇答云如君言願君小逡巡我有
平生志醉後爲君陳人生百歲期七十有
幾人浮榮及虛位皆是身之賓唯有衣與
食此事粗關身苟免飢寒外餘物盡浮雲

秋居書懷

門前少賓客階下多松竹秋景下西牆涼
風入東屋有琴慵不弄有書閑不讀盡日
方寸中澹然無所欲何須廣居處不用多
積蓄文室可容身斗儲可充腹况無治道

術坐受官家祿不種一株桑不鋤一壠穀
終朝飽飯資卒歲豐衣食持此知愧心自
然易爲足

禁中曉卧因懷王起居

遲遲禁漏盡悄悄暝鷄喧夜雨槐花落微
涼卧北軒曙燈殘未滅風簾閑自翻每一
得靜境思與故人言

養拙

鐵柔不爲劍木曲不爲輶今我亦如此愚

蒙不及門甘心謝名利滅跡歸丘園坐卧
茅茨中但對琴與鐻身去韁鎖累耳辭朝
市誼迢遙無所爲時窺五千言無憂樂性
場寡欲清心源始知不才者可以深道根

寄李十一建

外事牽我形外物誘我情李君別來久徧
懷從中生憶昨訪君時立馬扣柴荆有時
君未起稚子喜先迎連步笑出門衣翻冠
或傾掃階苔文綠拂榻藤陰清家醞及春

熟園葵乘露烹看山東亭坐待月南原行
門靜唯鳥語坊遠少鼓聲相對盡日言不
及利與名分手來幾時明月三四盈別時
殘花落及此新蟬鳴芳歲忽已晚離抱悵
未平豈不思命駕吏職坐相縈前時君有
期訪我來山城心賞久云阻言約無自輕
相去幸非遠走馬一日程

旅次華州贈袁右丞

渭水綠溶溶華山青崇崇山水一何麗君

子在其中才與世會合物隨誠感通德星
降人福時雨助歲功化行人無訟圉圉千
日空政順氣亦和黍稷三年豐客自帝城
來驅馬出關東愛此一郡人如見太古風
方今天子心憂人正忡忡安得天下守盡
得如袁公

醅楊九弘貞長安病中見寄

伏枕君寂寂折腰我營營所嗟經時別相
去一宿程攜手昨何時昆明春水平離郡

來幾日太白夏雲生之子未得意貧病客
帝城貪堅志士節病長高人情隱机自恬
淡閉門無送迎龍卧心有待鶴瘦貌彌清
清機發爲文投我如振瓊何以慰飢渴捧
之吟一聲

禁中寓直夢遊仙遊寺

西軒草詔暇松竹深寂寂月出清風來忽
似山中夕因成西南夢夢作遊仙客覺聞
宮漏聲猶謂山泉滴

贈王山人

聞君減寢食日聽神仙說暗待非常人潛
求長生訣言長本對短未離生死轍假使
得長生才能勝夭折松樹千年朽槿花一
日歇畢竟共虛空何須誇歲月彭生徒自
異生死終無別不如學無生無生即無滅

秋山

久病曠心賞今朝一登山山秋雲物冷稱
我清羸顏白石卧可枕青蘿行可攀意中

如有得盡日不欲還人生無幾何如寄天
地間心有千載憂身無一日閑何時解塵
網此地來掩關

贈能七倫

澗松高百尋四時寒森森臨風有清韻向
日無曲陰如何時俗人但賞桃李林豈不
知堅貞芳馨誘其心能生學爲文氣高功
亦深手中一百篇句句披沙金苦節二十
年無人振陸沉今我尚貧賤徒爲爾知音

題揚顓士西亭

靜得亭上境遠諧塵外蹤憑軒東望好鳥
滅山重重竹露冷煩襟杉風清病容曠然
冥真趣道與心相逢即此可遺世何必蓬
壺峯

題贈鄭祕書徵君石溝溪隱居

鄭君得自然虛白生心曾吸彼沆瀣精凝
爲冰雪容大君貞元初求賢致時邕蒲輪
入翠微迎下天台峯赤城別松喬黃閣交

夔龍俛仰受三命從容辭九重出籠鶴翩
翩歸林鳳噤噤在火辨良玉經霜識貞松
新居寄楚山山碧溪溶溶丹竈燒烟煨黃
精花半茸蕙帳夜瑟淡桂樽春酒濃時人
不到處苔石無塵蹤我今何爲者趨世身
龍鍾不向林壑訪無由朝市逢終當解纓
網卜策來相從

及第後歸覲留別諸同年

十年常苦學一上謬成名擢第未爲貴賀

親方始榮時輩六七人送我出帝城軒車
動行色絲管舉離聲得意減別恨半酣輕
遠程翩翩馬蹄疾春日歸鄉情

清夜琴興

月出烏栖盡寂然坐空林是時心境閑可
以彈素琴清冷由本性恬淡隨人心心積
和平氣本應正始音響餘群動息曲罷秋
夜深正聲感元化天地清沈沈

效陶潛體詩十六首 并序

余退居渭上杜門不出時屬多雨無以自
娛會家醞新熟雨中獨飲往往酣醉終日
不醒懶放之心彌覺自得故得於此而有
以忘於彼者因詠陶淵明詩適與意會遂
倣其體成十六篇醉中狂言醒輒自哂然
知我者亦無隱焉

不動者厚地不息者高天無窮者日月長
在者山川松栢與龜鶴其壽皆千年嗟嗟
群物中而人獨不然早出向朝市暮已歸

下泉形質及壽命危脆若浮烟堯舜與周
孔古來稱聖賢借問今何在一去亦不還
我無不死藥萬萬隨化遷所未定知者修
短遲速間幸及身健日當歌一罇前何必
待人勸念此自爲歡

翳翳踰月陰沈沈連日雨開簾望天色黃
雲暗如土行潦毀我墉疾風壞我宇蓬莠
生庭院泥塗失塲圃村深絕賓客窻晦無
儔侶盡日不下床跳鼃時入戶出門無所

往入室還獨處不以酒自娛塊然與誰語
朝飲一盃酒冥心合元化兀然無所思日
高尚閑卧暮讀一卷書會意如嘉話欣然
有所遇夜深猶獨坐又得琴上趣按絃有
餘暇復多詩中狂下筆不能罷唯茲三四
事持用度晝夜所以陰雨中經旬不出舍
始悟獨住人心安時亦過

東家采桑婦雨來苦愁悲
蔌蔌北堂前雨冷不成絲
西家荷鋤叟雨來亦怨咨
種豆

南山下雨多落爲箕而我獨何幸醞酒本
無期及此多雨日正遇新熟時開瓶瀉罇
中玉液黃金卮持翫已可悅歡嘗有餘滋
一酌發好容再酌開愁眉連延四五酌酣
暢入四肢忽然遺物我誰復分是非是時
連夕雨酩酊所無知人心苦顛倒反爲憂
者嗤

朝亦獨醉歌暮亦獨醉睡未盡一壺酒已
成三獨醉勿嫌飲太少且喜歡易致一盃

復兩盃多不過三四便得心中適盡忘身
外事更復強一盃陶然遺萬累一飲一石
者徒以多爲貴及其酩酊時與我亦無異
笑謝多飲者酒錢徒自費

天秋無片雲地靜無纖塵團團新晴月林
外生白輪憶昨陰霖天連連三四旬賴逢
家醞熟不覺過朝昏私言雨霽後可以罷
餘罇及對新月色不醉亦愁人床頭殘酒
盞欲盡味彌淳携置南簷下舉酌自殷勤

清光入盃杓白露生衣巾乃知陰與晴安
可無此君我有樂府詩成來人未聞今宵
醉有興狂詠驚四鄰獨賞猶復爾何況有
交親

中秋三五夜明月在前軒臨觴忽不飲憶
我平生歡我有同心人邈邈崔與錢我有
忘形友迢迢李與元或飛青雲上或落江
湖間與我不相見于今四五年我無縮地
術君非馭風仙安得明月下四人來晤言

良夜信難得佳期杳無緣明月又不駐漸
下西南天豈無他時會惜此清景前

家醞飲已盡村中無酒賒坐愁今夜醒其
柰秋懷何有客忽叩門言語一何佳云是
南村叟挈榼來相過且喜罇不燥安問少
與多重陽雖已過籬菊有殘花歡來苦晝
短不覺夕陽斜老人勿遽起且待新月華
客去有餘趣竟夕獨酣歌

原生衣百結顏子食一簞歡然樂其志有

以忘飢寒今我何人哉德不及先賢衣食
幸相屬胡爲不自安况茲清渭曲居處安
且閑榆柳百餘樹茅茨十數間寒負簷下
日熱濯澗底泉日出猶未起日入已復眠
西風滿村巷清涼八月天但有雞犬聲不
聞車馬喧時傾一罇酒坐望東南山稚姪
初學步牽衣戲我前即此自可樂庶幾顏
與原

湛湛罇中酒有功不自伐不伐人不知我

今代其說良將臨大敵前驅千萬卒一輩
投河飲赴死心如一壯士磨七首勇憤氣
咆嘯一酣忘報讎四體如無骨東海殺孝
婦天旱踰年月一酌酬其魂通宵雨不歇
咸陽秦獄氣冤痛結爲物千歲不肯散一
沃亦銷失况茲兒女恨及彼幽憂疾快飲
無不消如霜得春力方知麴蘖靈萬物無
與疋

烟雲隔玄甫風波限瀛洲我豈不欲往大

海路阻脩神仙但聞說靈藥不可求長生
無得者舉世如蜉蝣逝者不重迴存者難
久留踟躕未死間何苦懷百憂念此忽內
熱生看成白頭舉盃還獨飲顧影自獻酬
心與口相約未醉勿言休今朝不盡醉知
有明朝不見郭門外纍纍墳與丘月明
愁殺人黃蒿風颼颼死者若有知悔不秉
燭遊

吾聞潯陽郡昔有陶徵君愛酒不愛名憂

醒不憂貪嘗爲彭澤令在官纔八旬愀然
忽不樂挂印著公門口吟歸去來頭戴漉
酒巾人吏留不得直入故山雲歸來五柳
下還以酒養真人間榮與利擺落如泥塵
先生去已久紙墨有遺文篇篇勸我飲此
外無所云我從老大來竊慕其爲人其他
不可及且倣醉昏昏

楚王疑忠臣江南放屈平晉朝輕高士林
下棄劉伶一人常獨醉一人常獨醒醒者

多苦志醉者多歡情歡情信獨善苦志竟
何成兀傲甕間卧憔悴澤畔行彼憂而此
樂道理甚分明願君且飲酒勿思身後名
有一燕趙士言貌甚奇瓌日自酒家去脫
衣典數盃問君何落拓云僕生草萊地寒
命且薄徒抱王佐才豈無濟時榮君門乏
良媒三獻寢不報遲遲空手迴亦有同門
生先升青雲梯貴賤交道絕朱門叩不開
及歸種禾黍三歲旱爲災入山燒黃白一

旦化爲灰蹉跎五十餘生世苦不諧處處
去不得却歸酒中來


南巷有貴人高蓋駟馬車我門何所苦四
十垂白鬚答云君不知位重多憂虞北里
有寒士甕牖繩爲樞出扶桑藜杖入卧蝸
牛廬散賤無憂患心安體亦舒東鄰有富
翁藏貨徧五都東京收粟帛西市鬻金珠
朝營暮計筭晝夜不安居西舍有貧者疋
婦配疋夫布裙行賃舂短褐坐傭書以此


求口食一飽欣有餘貴賤與貧富高下雖
有殊憂樂與利害彼此不相踰是以達人
觀萬化同一途但未知生死勝負兩何如
遲疑未知間且以酒爲娛


濟水澄而絜河水渾而黃交流列四瀆清
濁不相傷太公戰牧野伯夷餓首陽同時
號賢聖進退不相妨謂天不愛民胡爲生
稻粱謂天果愛民胡爲生豺狼謂神福善
人孔聖竟栖遑謂神禍淫人暴秦終霸王

顏回與黃憲何辜早夭亡
蝮蛇與鵩鳥何得壽延長
物理不可測神道亦難量
舉頭仰問天天色但蒼蒼
唯當多種黍日醉手中觴

白氏文集卷第五







白氏長慶集


三

LIBRARY
OF THE
UNIVERSITY OF ILLINOIS

885.108
Ss7s2

v. 726

CHINA



白氏文集卷第六

閑適二 古調詩 五言 自兩韻至

一百三十韻 凡四十八首

自題寫真 時爲翰林學士

我貌不自識李放寫我真靜觀神與骨合
是山中人蒲柳質易朽麋鹿心難馴何事
赤墀上五年爲侍臣況多剛狷性難與世
同塵不惟非貴相但恐生禍因宜當早罷
去收取雲泉身

遣懷 自此後詩在渭村作

寓心身體中寓性方寸內此身是外物何
足苦憂愛况有假飾者華簪及高蓋此又
踈於身復在外物外操之多惴慄失之又
悲悔乃知名與器得喪俱爲害頽然環堵
客蘿蔥爲巾帶自得此道來身窮心甚泰

渭上偶釣

渭水如鏡色中有鯉與魴偶持一竿竹懸
釣至其傍微風吹釣絲嫋嫋十尺長誰知

對魚坐心在無何鄉肯有白頭人亦釣此
渭陽釣人不釣魚七十得文王況我垂釣
意人魚又兼亡無機兩不得但弄秋水光
興盡釣亦罷歸來飲我觴

隱几

身適忘四支心適忘是非既適又忘適不
知吾是誰百體如槁木兀然無所知方寸
如死灰寂然無所思今日復明日身心忽
兩遺行年三十九歲暮日斜時四十心不

動吾今其庶幾

春眠

新浴支體暢獨寢神魄安况因夜深坐遂
成日高眠春被薄亦暖朝窻深更閑却忘
人間事似得枕上仙至適無夢想大和難
名言全勝彭澤醉欲敵曹溪禪何物呼我
覺伯勞聲闐闐起來妻子笑生計春茫然

閑居

空腹一盞粥飢食有餘味南簷半床日暖

卧因成睡髴袍擁兩膝竹几支雙臂從旦
直至昏身心一無事心足即爲富身閑乃
當貴富貴在此中何必居高位君看裴相
國金紫光照地心苦頭盡白纔年四十四
乃知高蓋車乘者多憂畏

夏日

東窓晚無熱北戶涼有風盡日坐復卧不
離一室中中心本無繫亦與出門同

適意二首

十年爲旅客常有飢寒愁三年作諫官復
多尺素羞有酒不暇飲有山不得遊豈無
平生志拘牽不自由一朝歸渭上泛如不
繫舟置心世事外無喜亦無憂終日一蔬
食終年一布裘寒來彌懶放數日一梳頭
朝睡足始起夜酌醉即休人心不過適適
外復何求

早歲從旅遊頗諳時俗意中年忝班列備
見朝廷事作客誠已難爲臣尤不易況予

方且介舉動多忤累直道速我尤詭遇非
吾志胷中十年內消盡浩然氣自從返田
畝頓覺無憂愧蟠木用難施浮雲心易遂
悠悠身與世從此兩相棄

首夏病間

我生來幾時萬有四千日自省於其間非
憂即有疾老去慮漸息年來病初愈忽喜
身與心泰然兩無苦况茲孟夏月清和好
時節微風吹袂衣不寒復不熱移榻樹陰

下竟日何所爲或飲一甌茗或吟兩句詩
內無憂患迫外無職役羈此日不自適何
時是適時

晚春沽酒

百花落如雪兩鬢垂作絲春去有來日我
老無少時人生待富貴爲樂常苦遲不如
貧賤日隨分開愁眉賣我所乘馬典我舊
朝衣盡將沽酒飲酩酊步行歸名姓日隱
晦形骸日變衰醉卧黃公肆人知我是誰

蘭若寓居

名宦老慵求退身安草野家園病懶歸寄
居在蘭若薜衣換簪組藜杖代車馬行止
輒自由甚覺身蕭灑晨遊南塢上夜息東
菴下人間千萬事無有關心者

麴生訪宿

西齋寂已暮叩門聲摘摘知是君宿來自
拂塵埃席村家何所有茶果迎來客貧靜
似僧居竹林依四壁厨燈斜影出簷雨餘

聲滴不是愛閑人肯來同此夕

聞庾七左降因詠所懷

我病卧渭北君老謫巴東相悲一長歎薄
命與君同既歎還自哂哂歎兩未終後心
謂前意所見何迷蒙人生大塊間如鴻毛
在風或飄青雲上或落泥塗中袞服相天
下儻來非我通布衣委草莽偶去非吾窮
外物不可必中懷須自空無令怏怏氣留
滯在心胃

答卜者

病眼昏似夜衰鬢颺如秋除却須衣食平生百事休知君善易者問我決疑不卜非他故人間無所求

歸田三首

人生何所欲所欲唯兩端中人愛富貴高士慕神仙神仙須有籍富貴亦在天莫戀長安道莫尋方丈山西京塵浩浩東海浪漫漫金門不可入琪樹何由攀不如歸山

下如法種春田

種田計已決決意復何如賣馬買犢使徒
步歸田廬迎春治耒耜候雨闢菑畲策杖
田頭立躬親課僕夫吾聞老農言爲稼慎
在初所施不鹵莽其報必有餘上求奉王
稅下望備家儲安得放慵墮拱手而曳裾
學農未爲鄙親友勿笑余更待明年後自
擬執犂鋤

三十爲近臣腰間鳴珮玉四十爲野夫田

中學鋤穀何言十年內變化如此速此理
固是常窮通相倚伏爲魚有深水爲鳥有
高木何必守一方窘然自牽束化吾足爲
馬吾因以行陸化吾手爲彈吾因以求肉
形骸爲異物委順心猶足幸得且歸農安
知不爲福况吾行欲老瞥若風前燭孰能
俄頃間將心繫榮辱

秋遊原上

七月行已半早涼天氣清清晨起巾櫛徐

步出柴荆露杖筇竹冷風襟越蕉輕閑携
弟姪輩同上秋原行新棗未全赤晚瓜有
餘馨依依田家叟設此相逢迎自我到此
村往來白髮生村中相識久老幼皆有情
留連向暮歸樹樹風蟬聲是時新雨足禾
黍夾道青見此令人飽何必待西成

九日登西原宴望

病愛枕席涼日高眠未輟弟兄呼我起今
日重陽節起登西原望懷抱同一豁移座

就菊叢饒酒前羅列雖無絲與管歌笑隨
情發白日未及傾顏酡耳已熱酒酣四向
望六合何空闊天地自久長斯人幾時活
請看原下村村人死不歇一村四十家哭
葬無虛月指此各相勉良辰且歡悅

寄同病者

三十生二毛早衰爲沈疴四十官七品拙
宦非由他年顏日枯槁時命日蹉跎豈獨
我如此聖賢無奈何迴觀親舊中舉目尤

可嗟或有終老者沉賤如泥沙或有始壯者飄忽如風花窮餓與夭促不如我者多以此反自慰常得心平和寄言同病者迴歎且爲歌

遊藍田山卜居

脫置腰下組擺落心中塵行歌望山去意似歸鄉人朝蹋玉峯下暮尋藍水濱擬求幽僻地安置疎慵身本性便山寺應須旁悟真

村雪夜坐

南窗背燈坐風霰暗紛紛
寂寞深村夜殘鴈雪中聞

東園翫菊

少年昨已去芳歲今又闌
如何寂寞意復此荒涼園
園中獨立久日淡風露寒
秋蔬盡蕪沒好樹亦凋殘
唯有數叢菊新開籬落間
携觴聊就酌爲爾一留連
憶我少小日易爲興所牽
見酒無時節未飲已欣然

近從年長來漸覺取樂難常恐更衰老強
飲亦無歡顧謂爾菊花後時何獨鮮誠知
不爲我借爾暫開顏

觀稼

世役不我牽身心常自若晚出看田畝閑
行旁村落纍纍繞塲稼嘖嘖群飛雀年豐
豈獨人禽鳥聲亦樂田翁逢我喜默起具
樽杓歛手笑相延社酒有殘酌愧茲勤且
敬藜杖爲淹泊言動任天真未覺農人惡

停盃問生事夫種妻兒獲筋力苦疲勞衣
食長單薄自慙祿仕者曾不營農作飽食
無所勞何殊衛人鶴

聞哭者

昨日南鄰哭哭聲一何苦云是妻哭夫夫
年二十五今朝北里哭哭聲又何切云是
母哭兒兒年十七八四鄰尚如此天下多
夭折乃知浮世人少得垂白髮余今過四
十念彼聊自悅從此明鏡中不嫌頭似雪

新構亭臺示諸弟姪

平臺高數尺臺上結茅茨東西䟽二牖南
北開兩扉蘆簾前後卷竹簾當中施清冷
白石枕踈涼黃葛衣開衿向風坐夏日如
秋時嘯傲頗有趣窺臨不知疲東窓對華
山三峯碧參差南簷當渭水卧見雲帆飛
仰摘枝上果俯折畦中葵足以充飢渴何
必慕甘肥況有好群從旦夕相追隨

自吟拙什因有所懷

懶病每多暇暇來何所爲未能拋筆硯時
作一篇詩詩成淡無味多被衆人嗤上恠
落聲韻下嫌拙言詞時時自吟詠吟罷有
所思蘇州及彭澤與我不同時此外復誰
愛唯有元微之趨向江陵府三年作判司
相去二千里詩成遠不知

東陂秋意寄元八

寥落野陂畔獨行思有餘秋荷病葉上白
露大如珠忽憶同賞地曲江東北隅秋池

少遊客唯我與君俱
啼蛩隱紅蓼瘦馬蹋
青蕪當時與今日俱
是暮秋初節物苦相
似時景亦無餘唯有人
分散經年不得書

閑居

深閉竹間扉靜掃松下地
獨嘯晚風前何人知此意
看山盡日坐枕帙移時睡
誰能從我遊使君心無事

詠拙

所稟有巧拙不可改者性
所賦有厚薄不

可移者命我性拙且蠢我命薄且屯問我
何以知所知良有因亦曾舉兩足學人踏
紅塵從茲知性拙不解轉如輪亦曾奮六
翮高飛到青雲從茲知命薄摧落不逡巡
慕貴而厭賤樂富而惡貧同出天地間我
豈異於人性命苟如此反則成苦辛以此
自安分雖窮每欣欣菁茅爲我廬編蓬爲
我門縫布作袍被種穀充盤飧靜讀古人
書閑釣清渭濱優哉復遊哉聊以終吾身

詠慵

有官慵不選有田慵不農
屋穿慵不葺衣裂慵不縫
有酒慵不酌無異樽長空有琴
慵不彈亦與無絃同家人告飯
盡欲炊慵不舂親朋寄書至欲
讀慵開封常聞秘叔夜一生在
慵中彈琴復鍛鐵比我未爲慵

冬夜

家貧親愛散身病交遊罷
眼前無一人獨掩村齋卧
冷落燈火暗離披簾幕破
策策

窻戶前又聞新雪下長年漸省睡夜半起
端坐不學生忘心寂寞安可過兀然身寄
世浩然心委化如此來四年一十三百夜

村中留李三宿

平生早遊宦不道無親故如我與君心相
知應有數春明門前別金氏陂中遇村酒
兩三盃相留寒日暮勿嫌村酒薄聊酌論
心素請君少踟躕繫馬門前樹明年身若
健便擬江湖去他日縱相思知君無覓處

後會既茫茫今宵君且住

友人夜訪

簷間清風簾松下明月盃幽意正如此況
乃故人來

遊悟真寺詩 一百三十韻

元和九年秋八月月上弦我遊悟真寺寺
在王順山去山四五里先聞水潺潺潏自茲
捨車馬始涉藍溪灣手拄青竹杖足蹋白石
灘漸恠耳目曠不聞人世誼山下望山

上初疑不可攀誰知中有路盤折通巖巔
一息幡竿下再休石龕邊龕間長丈餘門
戶無扃關俯窺不見人石髮垂若鬢驚出
白蝙蝠雙飛如雪翻回首寺門望青崖夾
朱軒如擘山腹開置寺於其間入門無平
地地窅虛空寬房廊與臺殿高下隨峯巒
巖壑無撮土樹木多瘦堅根株抱石長屈
曲蟲蛇蟠松桂亂無行四時鬱芊芊枝梢
嫋清吹韻若風中絃日月光不透綠陰相

交延幽鳥時一聲聞之似寒蟬首憇賓位
亭就坐未及安須臾開北戶萬里明豁然
拂簷虹霏微遶棟雲廻旋赤日間白雨陰
晴同一川野綠簇草樹眼界吞秦原渭水
細不見漢陵小於拳却顧來時路縈紆映
朱欄歷歷上山人一遙可觀前對多寶
塔風鐸鳴四端藥櫺與戶牖恰恰金碧繁
云背迦葉佛此地坐涅槃至今鐵鉢在當
底手跡穿西開玉像殿白佛森比肩抖擻

塵埃衣禮拜冰雪顏疊霜爲袈裟貫電爲
華鬘逼觀疑鬼功其跡非雕鐫次登觀音
堂未到聞栴檀上階脫雙履歛足升淨筵
六楹挑玉鏡四座敷金鈿黑夜自光明不
待燈燭燃衆寶互佉昂碧珮珊瑚蟠風來
似天樂相觸聲珊珊白珠垂露凝赤珠滴
血殷點綴佛髻上合爲七寶冠雙瓶白瑠
璃色若秋水寒隔瓶見舍利圓轉如金丹
玉笛何代物天人施祇園吹如秋鶴聲可

以降靈仙是時秋方中三五月正圓寶堂
豁三門金魄當其前月與寶相射晶光爭
鮮妍照人心骨冷竟夕不欲眠曉尋南塔
路亂竹低嬋娟林幽不逢人寒蝶飛翩翩
山果不識名離離夾道蕃足以療飢乏摘
嘗味甘酸道南藍谷神紫傘白紙錢若歲
有水旱詔使修巔繫以地清淨故獻典無
葷膾危石疊四五蟲鬼歆且刳造物者何
意堆在巖東偏冷滑無人迹苔點如花牋

我來登上頭下臨不測淵目眩手足掉不
敢低頭看風從石下生薄人而上搏衣服
似羽翻開張欲飛騫巉巉三面峯峯尖刀
劒攢往往白雲過決開露青天西北日落
時夕暉紅團團千里翠屏外走下丹砂丸
東南月上時夜氣青漫漫百丈碧潭底寫
出黃金盤藍水色似藍日夜長潺潺周迴
繞山轉下視如青環或鋪爲慢流或激爲
奔湍泓澄最深處浮出蛟龍涎側身入其

中懸磴尤險難捫蘿踏樛木下逐飲澗猿
雪迸起白鷺錦跳驚紅鱸歇定方盥漱濯
去支體煩淺深皆洞澈可照腦與肝但愛
清見底欲尋不知源東崖饒恠石積甃蒼
琅玕溫潤發於外其間韞璵璫卞和死已
久良玉多棄捐或時洩光彩夜與星月連
中頂最高峯柱天青玉竿颯齡上不得豈
我能攀援上有白蓮池素葩覆清瀾聞名
不可到處所非人寰又有一片石大如方

尺輒挿在半壁上其下萬仞懸云有過去
師坐得無生禪號爲定心石長老世相傳
却上謁仙祠蔓草生繇繇昔聞王氏子羽
化升上玄其西瞰藥臺猶對芝朮田時復
明月夜上聞黃鶴言迴尋畫龍堂二叟鬢
髮斑想見聽法時歡喜禮印壇復歸泉窟
下化作龍蜿蜒階前石孔在欲雨生白烟
往有寫經僧身靜心精專感彼雲外鵠群
飛千翩翩來添硯中水去吸巖底泉一日

三往復時節長不憊經成號聖僧弟子名
揚難誦此蓮花偈數滿百億千身壞口不
壞舌根如紅蓮顚骨今不見石函尚存焉
粉壁有吳畫筆彩依舊鮮素屏有楷書墨
色如新乾靈境與異跡周覽無不殫一遊
五晝夜欲返仍盤桓我本山人誤爲時
網牽牽率使讀書推挽令効官旣登文字
科又忝諫諍負拙直不合時無益同素餐
以此自慙惕戚戚常寡歡無成心力盡未

老形骸殘今來脫簪組始覺離憂患及爲
山水遊彌得縱疎頑野麋斷羈絆行走無
拘攣池魚放入海一往何時還身著居士
衣手把南華篇終來此山住求謝區中緣
我今四十餘從此終身閑若以七十期猶
得三十年

酬張十八訪宿見贈 自此後詩爲

贊善大夫時所作

昔我爲近臣君常稀到門今我官職冷唯

君來往頻我受狷介性立爲頑拙身平生
雖寡合合即無緇磷况君秉高義富貴視
如雲五侯三相家眼冷不見君問其所與
游獨言韓舍人其次即及我我愧非其倫
胡爲謬相愛歲晚逾勤勤落然頽簷下一
話夜達晨床單食味薄亦不嫌我貧日高
上馬去相顧猶逡巡長安久無雨日赤風
昏昏怜君將病眼爲我犯埃塵遠從延康
里來訪曲江濱所重君子道不獨愧相親

朝歸書寄元八

進入閣前拜退就廊下餐歸來昭國里人
卧馬歇鞍却睡至日午起坐心浩然况當
好時節雨後清和天柿樹綠陰合王家庭
院寬瓶中鄆縣酒牆上終南山獨眠仍獨
坐開衿當風前禪僧與詩客次第來相看
要語連夜語須眠終日眠除非奉朝謁此
外無別牽年長身且健官貧心甚安幸無
急病痛不至苦飢寒自此聊以適外緣不

能干唯應靜者信難爲動者言臺中元侍
御早晚作郎官未作郎官際無人相伴閑

酬吳七見寄

曲江有病客尋常多掩關又聞馬死來不
出身更閑聞有送書者自起出門看素緘
署丹字中有瓊瑤篇口吟耳自聽當暑忽
脩然似漱寒玉水如聞商風絃首章歎時
節末句思笑言懶慢不相訪隔街如隔山
常聞陶潛語心遠地自偏君住安邑里左

右車徒喧竹藥閑深院琴罇開小軒誰知
市南地轉作壺中天君本上清人名在石
堂間不知有何過謫作人間仙常恐歲月
滿飄然歸紫烟莫忘蜉蝣內進士有同年

昭國閑居

貧閑日高起門巷晝寂寂時暑放朝叅天
陰少人客槐花滿田地僅絕人行跡獨在
一床眠清涼風雨夕勿嫌坊曲遠近即多
牽役勿嫌祿俸薄厚即多憂責平生尚恬

曠老大宜安適何以養吾真官閑居處僻
喜陳兄至

黃鳥啼欲歇青梅結半成坐怜春物盡起
入東園行攜觴懶獨酌忽聞叩門聲閑人
猶喜至何況是陳兄從容盡日語稠疊長
年情勿輕一盞酒可以話平生

贈杓直

世路重祿位恹恹者孔宣人情愛年壽天
死者顏淵二人如何人不奈命與天我今

信多幸撫已愧前賢已年四十四又爲五
品官況茲知足外別有所安焉早年以身
代直赴道遙篇近歲將心地廻向南宗禪
外順世間法內脫區中緣進不厭朝市退
不戀人寰自吾得此心投足無不安體非
道引適意無江湖閑有興或飲酒無事多
掩關寂靜夜深坐安穩日高眠秋不苦長
夜春不惜流年委形老小外忘懷生死間
昨日共君語與余心膺然此道不可道因

君聊強言

寄張十八

飢止一簞食渴止一壺漿出入止一馬寢
興止一牀此外無長物於我有若亡胡然
不知足名利心遑遑念茲彌懶放積習遂
爲常經旬不出門竟日不下堂同病者張
生貧僻住延康慵中每相憶此意未能忘
迢迢青槐街相去八九坊秋來未相見應
有新詩章早晚來同宿天氣轉清涼

題玉泉寺

湛湛玉泉色悠悠浮雲身
閑心對定水清淨兩無塵
手把青筇杖頭戴白綸巾
興盡下山去知我是誰人

朝回遊城南

朝退馬未困秋初日猶長
迴轡城南去郊野正清涼
水竹夾小徑縈迴繞川岡
仰看晚山色俯弄秋泉光
青松繫我馬白石爲我牀
常時簪組累此日和身忘
且隨鷓鴣鷺

未暮遊鷗鶴傍機心一以盡兩處不亂行
誰辨心與跡非行亦非藏

舟行

帆影日漸高閑眠猶未起起問鼓柁人已
行三十里船頭有行竈炊稻烹紅鯉飽食
起婆娑盥漱秋江水平生滄浪意一旦來
遊此何況不失家舟中載妻子

湓浦早冬

潯陽孟冬月草木未全衰祇抵長安陌涼

風八月時日西湓水曲獨行吟舊詩蓼花
始零落蒲葉稍離披但作城中想何異曲
江池

江州雪

新雪滿前山初晴好天氣日西騎馬出忽
有京都意城柳方綴花簷冰才結穗須臾
風日暖處處皆飄墜行吟賞未足坐歎消
何易猶勝嶺南看霧霧不到地

白氏文集卷第六

白氏文集卷第七

閑適三 古調 五言 五十八首

題潯陽樓 自此後詩江州司馬時

作

常愛陶彭澤文思何高玄又恠韋江州詩
情亦清閑今朝登此樓有以知其然大江
寒見底匡山青倚天深夜湓浦月平且鑪
峯烟清輝與靈氣日夕供文篇我無二人
才孰爲來其間因高偶成句俯仰愧江山

訪陶公舊宅 并序

予夙慕陶淵明爲人往歲渭川閑居嘗有
倣陶體詩十六首今遊廬山經柴桑過栗
里思其人訪其宅不能默默又題此詩云
垢塵不污玉靈鳳不啄羶嗚呼陶靖節生
彼晉宋間心實有所守口終不能言永惟
孤竹子拂衣首陽山夷齊各一身窮餓未
爲難先生有五男與之同飢寒腸中食不
充身上衣不完連徵竟不起斯可謂真賢

我生君之後相去五百年每讀五柳傳目
想心拳拳昔常詠遺風著爲十六篇今來
訪故宅森若君在前不慕樽有酒不慕琴
無絃慕君遺榮利老死此丘園柴桑古村
落栗里舊山川不見籬下菊但餘墟中烟
子孫雖無聞族氏猶未遷每逢姓陶人使
我心依然

北亭

廬宮山下州湓浦沙邊宅宅北倚高岡迢

迢數千尺上有青青竹竹間多白石茅亭
居上頭豁達門四闢前楹卷簾箔北牖施
床席江風萬里來吹我涼淅淅日高公府
歸巾笏隨手擲脫衣恣搔首坐卧任所適
時傾一盃酒曠望湖天夕口詠獨酌謠目
送歸飛翮慙無出塵操未免折腰役偶獲
此閑居謬似高人跡

遊湓水

四月未全熟麥涼江氣秋湖山處處好最

愛湔水頭湔水從東來一派入江流可
似縈帶中有隨風舟命酒一臨汎捨鞍揚
棹謳放迴岸傍馬去逐波間鷗烟浪始渺
渺風襟亦悠悠初疑上河漢中若尋瀛洲
汀樹綠拂地沙草芳未休青蘿與紫葛枝
蔓垂相樛繫纜步平岸迴頭望江州城雉
映水見隱隱如蜃樓日入意未盡將歸復
少留到官行半歲今日方一遊此地來何
暮可以寫吾憂

答故人

故人對酒歎歎我在天涯見我肯榮遇念
我今蹉跎問我爲司馬官意復如何答云
且勿歎聽我爲君歌我本蓬華人鄙賤劇
泥沙讀書未百卷信口嘲風花自從筮仕
來六命三登科願慙虛劣姿所得亦已多
散負足庇身薄俸可資家省分輒自愧豈
爲不遇耶煩君對盃酒爲我一咨嗟

官舍內新鑿小池

簾下開小池盈盈水方積中底鋪白沙四
隅甃青石勿言不深廣但取幽人適泛灩
微雨朝泓澄明月夕豈無大江波浪連
天白未如床席前方丈深盈尺清淺可狎
弄昏煩聊漱滌最愛曉暝時一片秋天碧
宿簡寂觀

巖白雲尚屯林紅葉初隕秋光引閑步不
知身遠近夕投靈洞宿卧覺塵機泯名利
心既忘市朝夢亦盡暫來尚如此况乃終

身隱何以療夜飢一匙雲母粉

讀謝靈運詩

吾聞達士道窮通順冥數通乃朝廷來窮
則江湖去謝公才廓落與世不相遇壯志
鬱不用須有所洩處洩爲山水詩逸韻諧
奇趣大必籠天海細不遺草樹豈唯翫景
物亦欲攄心素往往即事中未能忘興諭
因知康樂作不獨在章句

北亭獨宿

悄悄壁下床紗籠耿殘燭夜半獨眠覺疑
在僧房宿

約心

黑鬢絲雪侵青袍塵土浣兀兀復騰騰江
城一爲佐朝就高齋上薰然負暄卧晚下
小池前澹然臨水坐已約終身心長如今
日過

晚望

江城寒角動沙洲夕鳥還獨在高亭上西

南望遠山

早春

雪消冰又釋景和風復暄滿庭田地濕
薺生牆根官舍悄無事日西斜掩門不開
莊老卷欲與何人言

春寢

何處春暄來微和生血氣氣薰肌骨暢
東窗一昏睡是時正月晦假日無公事爛熳
不能休自午將及未緬思少健日甘寢常

自恣一從衰疾來枕上無此味

睡起晏坐

後亭晝眠足起坐春景暮新覺眼猶昏無
思心正住淡寂歸一性虛閑遣萬慮了然
此時心無物可譬喻本是無有鄉亦名不
用處行禪與坐忘同歸無異路

詠懷

盡日松下坐有時池畔行行立與坐卧中
懷澹無營不覺流年過亦任白髮生不爲

世所薄安得遂閑情

春遊西林寺

下馬西林寺脩然進輕策朝爲公府吏暮
是靈山客二月匡廬北冰雪始消釋陽藪
抽茗牙陰竇洩泉脉熙熙風土暖藹藹雲
嵐積散作萬壑春疑爲一氣碧身閑居澹
泊官散無牽迫緬彼十八人古今同此適
是年淮寇起處處興兵革智士勞思謀戎
臣苦征役獨有不才者山中弄泉石

出山吟

朝詠遊仙詩暮歌采薇曲卧雲坐白石山
中十五宿行隨出洞水廻別緣巖竹早晚
重來遊心期瑤草綠

歲暮

已任時命去亦從歲月除中心一調伏外
累盡空虛名宦意已矣林泉計何如擬近
東林寺溪邊結一廬

聞早鶯

日出眠未起屋頭聞早鶯忽如上林曉萬
年枝上鳴憶爲近臣時秉筆直承明春深
視草暇旦暮聞此聲今聞在何處寂寞潯
陽城鳥聲信如一分別在人情不作天涯
意豈殊禁中聽

栽杉

勁葉森利劒孤莖挺端標纔高四五尺勢
若干青霄移栽東窻前愛爾寒不凋病夫
卧相對日夕閑蕭蕭昨爲山中樹今爲簷

下條雖然遇賞翫無乃近塵囂猶勝澗谷底埋沒隨衆樵不見鬱鬱松委質山上苗

過李生

蘋小蒲葉短南湖春水生予近湖邊住靜境稱高情我爲郡司馬散拙無所營使君知性野衙退任閑行行携小榼出逢花輒獨傾半酣到子舍下馬扣柴荆何以引我步繞籬竹萬莖何以醒我酒吳音吟一聲須臾進野飯飯稻茹芥英白甌青竹筍儉

縈無羶腥欲去復徘徊夕鷗已飛鳴何當
重遊此待君湖水平

詠意

常聞南華經巧勞智憂愁不如無能者飽
食但遨遊平生愛慕道今日近此流自來
潯陽郡四序忽已周不分物黑白但與時
沉浮朝飡夕安寢用是爲身謀此外即閑
放時尋山水幽春遊慧遠寺秋上庾公樓
或吟詩一章或飲茶一甌身心一無繫浩

浩如虛舟富貴亦有苦苦在心危憂貧賤
亦有樂樂在身自由

食笋

此州乃竹鄉春笋滿山谷山夫折盈抱抱
來早市鬻物以多爲賤雙錢易一束置之
炊甑中與飯同時熟紫籩圻故錦素肌擘
新玉每日遂加飡經時不思肉久爲京洛
客此味常不足且食勿踟躕南風吹作竹

遊石門澗

石門無舊徑披榛訪遺跡時逢山水秋清
輝如古昔常聞慧遠輩題詩此巖壁雲覆
莓苔封蒼然無處覓蕭疎野生竹崩剝多
年石自從東晉後無復人遊歷獨有秋澗
聲潺湲空旦夕

招東鄰

小榼二升酒新簾六尺床能來夜話否池
畔欲秋涼

題元十八溪亭

恠君不喜仕又不遊州里今日到幽居了
然知所以宿君石溪亭潺湲聲滿耳飲君
螺盃酒醉卧不能起見君五老峯益悔居
城市愛君三男兒始歎身無子余方鑪峯
下結室爲居士山北與山東往來從此始
香鑪峯下新置草堂即事詠懷題於

石上

香鑪峯北面遺愛寺西偏白石何鑿鑿清
流亦潺潺有松數十株有竹千餘竿松張

翠繖蓋竹倚青琅玕其下無人居惜哉多
歲年有時聚猿鳥終日空風烟時有沉冥
子姓白字樂天平生無所好見此心依然
如獲終老地忽乎不知還架巖結茅宇斲
壑開茶園何以洗我耳屋頭落飛泉何以
淨我眼砌下生白蓮左手携一壺右手挈
五絃傲然意自足箕踞於其間興酣仰天
歌歌中聊寄言言我本野夫誤爲世網牽
時來肯捧日老去今歸山倦鳥得茂樹涸

魚反清源捨此欲焉往人間多險艱

草堂前新開一池養魚種荷日有幽趣

淙淙氷峽水浩浩萬頃陂未如新塘上微風動漣漪小萍加泛泛初蒲正離離紅鯉二三寸白蓮八九枝遶水欲成徑護堤方挿籬已被山中客呼作白家池

白雲期

三十氣太壯胷中多是非六十身太老四

體不支持四十至五十正是退閑時年長
識命分心慵少營爲見酒興猶在登山力
未衰吾年幸當此且與白雲期

登香鑪峯頂

迢迢香鑪峯心存耳目想終年牽物役今
日方一往攀蘿蹋危石手足勞俯仰同遊
三四人兩人不取上上到峯之頂目眩神
恍恍高低有萬尋闊狹無數丈不窮視聽
界焉識宇宙廣江水細如繩湓城小於掌

紛吾何屑屑未能脫塵鞅歸去思自嗟低
頭入蟻壤

荅崔侍郎錢舍人書問因繼以詩

旦暮兩蔬食日中一閑眠便是了一日如
此已三年心不擇時適足不揀地安窮通
與遠近一貫無兩端常見今之人其心或
不然在勞則念息處靜已思喧如是用身
心無乃自傷殘坐輪憂惱便況得形神全
吾有二道友藹藹崔與錢同飛青雲路獨

墮黃泥泉歲暮物萬變故情何不遷應爲
平生心與我同一源帝鄉遠於日美人高
在天誰謂萬里別常若在目前泥泉樂者
魚雲路遊者鸞勿言雲泥異同在逍遙間
因君問心地書後偶成篇慎勿說向人人
多笑此言

烹葵

昨卧不夕食今起乃朝飢貪厨何所有炊
稻烹秋葵紅粒香復軟綠英滑且肥飢來

止於飽飽後復何思思憶榮遇日迄今窮
退時今亦不凍餒昔亦無餘資口既不減
食身又不減衣撫心私自問何者是榮衰
勿學常人意其間分是非

小池二首

晝倦前齋熱晚愛小池清映林餘景沒近
水微涼生坐把蒲葵扇閑吟三兩聲
有意不在大湛湛方丈餘荷側瀉清露萍
開見游魚每一臨此坐憶歸青溪居

閉關

我心忘世久世亦不我干遂成一無事因
得常掩關掩關來幾時髣髴二三年著書
已盈帙生子欲能言始悟身向老復悲世
多艱迴顧趨時者役役塵壤間歲暮竟何
得不如且安閑

弄龜羅

有姪始六歲字之爲阿龜有女生三年其
名曰羅兒一始學笑語一能誦歌詩朝戲

抱我足夜眠枕我衣汝生何其晚我年行
已衰物情少可念人意老多憇酒美竟須
壞月圓終有虧亦如恩愛緣乃是憂惱資
舉世同此累吾安能去之

截樹

種樹當前軒樹高柯葉繁惜哉遠山色隱
此蒙籠間一朝持斧斤手自截其端萬葉
落頭上千峯來面前忽似決雲霧豁達覩
青天又如所念人久別一欸顏始有清風

至稍見飛鳥還開懷東南望目遠心遼然
人各有偏好物莫能兩全豈不愛柔條不
如見青山

望江樓上作

江畔百尺樓樓前千里道憑高望平遠亦
足舒懷抱驛路使憧憧關防兵草草及茲
多事日尤覺閑人好我年過不惑休退誠
非早從此拂塵衣歸山未爲老

題座隅

手不任執爿肩不能荷鋤量力揆所用曾
不敵一夫幸因筆硯功得升仕進途歷官
凡五六祿俸及妻奴左右有兼僕出入有
單車自奉雖不厚亦不至飢劬若有人及
此傍觀爲何如雖賢亦爲幸況我鄙且愚
伯夷古賢人魯山亦其徒時哉無奈何俱
化爲餓殍念彼益自愧不敢忘斯須平生
榮利心破滅無遺餘猶恐塵妄起題此於

座隅

昔與微之在朝日同蓄休退之心迨
今十年淪落老大追尋前約且結後
期

往子爲御史伊余忝拾遺皆逢盛明代俱
登清近司予繫玉爲佩子曳繡爲衣從容
香烟下同侍白玉墀朝見寵者辱暮見安
者危紛紛無退者相顧令人悲宦情君早
厭世事我深知常於榮顯日已約林泉期
况今各流落身病齒髮衰不作卧雲計攜

手欲何之待君女嫁後及我官滿時稍無
骨肉累粗有漁樵資歲晚青山路白首期
同歸

垂釣

臨水一長嘯忽思十年初三登甲乙第一
入承明廬浮生多變化外事有盈虛今來
伴江叟沙頭坐釣魚

晚鶯

百鳥乳雛畢秋鶯獨蹉跎去社日已近嚙

泥意如何不悟時節晚
枝施功用多人間
事亦爾不獨鶯營窠

贖雞

清晨臨江望水禽
正誼繁鳬鴈與鷗鷺游
颺戲朝暎適有鶯雞者
挈之來遠村飛鳴
彼何樂窘束此何冤
喔喔十四鷄罩縛同
一樊足傷金距縮頭
搶花冠翻經宿廢飲
啄日高詣屠門遲迴
未死間飢渴欲相吞
常慕古人道仁信及
魚豚見茲生惻隱贖

放雙林園開籠解索時雞雞聽我言購爾
鎗三百小惠何足論莫學街環雀崎嶇謾
報恩

秋日懷杓直

晚來天色好獨出江邊步憶與李舍人曲
江相近住常云遇清景必約同幽趣若不
訪我來還須覓君去開眉笑相見把手期
何處西寺老胡僧南園亂松樹携持小酒
榼吟詠新詩句同出復同歸從朝直至暮

風雨忽消散江山眇迴互潯陽與潯陽相望空雲霧心期自乖曠時景還如故今日郡齋中秋光誰共度

食後

食罷一覺睡起來兩甌茶舉頭看日影已復西南斜樂人惜日促憂人厭年賒無憂無樂者長短任生涯

齊物二首

青松高百丈綠蕙佷數寸同生大塊間長

短各有分長者不可退短者不可進若用此理推窮通兩無悶

椿壽八千春槿花不經宿中間復何有冉冉孤生竹竹身三年老竹色四時綠雖謝椿有餘猶勝槿不足

山下宿

獨到山下宿靜向月中行何處水邊碓夜春雲母聲

題舊寫真圖

我昔三十六寫貌在丹青我今四十六衰
頽卧江城豈止十年老曾與衆苦并一照
舊圖畫無復昔儀形形影默相顧如弟對
老兄况使他人見能不昧平生義和鞭日
走不爲我少停形骸屬日月老去何足驚
所恨凌烟閣不得畫功名

閑居

肺病不飲酒眼昏不讀書端然無所作身
意閑有餘雞栖籬落晚雪映林木踈幽獨

已云極何必山中居

對酒示行簡

今旦一樽酒歡暢何怡怡此樂從中來他
人安得知兄弟唯二人遠別恒苦悲今春
自巴峽萬里平安歸復有雙幼妹并年未
結褵昨日嫁娶畢良人皆可依憂念兩消
釋如刀斷羈縻身輕心無繫忽欲凌空飛
人生苟有累食肉常如飢我心既無苦飲
水亦可肥行簡勸爾酒停盃聽我辭不歎

鄉國遠不嫌官祿微但願我與爾終老不相離

詠懷

冉求與顏淵卞和與馬遷或罹天六極或被
人刑殘顧我信爲幸百骸且完全五十不爲
夭吾今欠數年知分心自足委順身常安故
雖窮退日而無戚戚顏昔有榮先生從事於
其間今我不量力舉心欲攀援窮通不由已
歡戚不由天命即無奈何心

可使泰然且務由己者省躬諒非難勿問
由天者天高難與言

夜琴

蜀桐木性實楚絲音韻清調慢彈且緩夜
深十數聲入耳淡無味愜心潛有情自弄
還自罷亦不要人聽

山中獨吟

人各有一癖我癖在章句萬緣皆已銷此
病獨未去每逢莢風景或對好親故高聲

詠一篇恍若與神遇自爲江上客半在山
中住有時新詩成獨上東巖路身依白石
崖手攀青桂樹狂吟驚林壑猿鳥皆窺覷
恐爲世所嗤故就無人處

達理二首

何物壯不老何時窮不通如彼音與律宛
轉旋爲宮我命獨何薄多悴而少豐當壯
已先衰暫泰還長窮我無奈命何委順以
待終命無奈我何方寸如虛空溘然與化

俱混然與俗同誰能坐自若齟齬於其中
舒姑化爲泉牛哀病作虎或柳生肘間或
男變爲女鳥獸及水木本不與民伍胡然
生變遷不待死歸土百骸是已物尚不能
爲主况彼時命間倚伏何足數時來不可
遏命去焉能取唯當養浩然吾聞達人語
湖亭晚望殘水

湖上秋沈寥湖邊晚蕭瑟登亭望湖水水
縮湖底出清渟得早霜明滅浮殘日流注

隨地勢窪坳無定質泓澄白龍卧宛轉青
蛇屈破鏡折劍頭光芒又非一久爲山水
客見盡幽奇物及來湖亭望此狀難談悉
乃知天地間勝事殊未畢

郭虛舟相訪

朝暖就南軒暮寒歸後屋晚酒一兩杯夜
碁三數局寒灰埋暗火曉焰凝殘燭不嫌
貧冷人時來同一宿

白氏文集卷第七

白氏文集卷第八

閑適四 古調詩五言 凡五十七首

長慶二年七月自中書舍人出守杭

州路次藍溪作

大原一男子自顧庸且鄙老逢不次恩洗
拔出泥滓旣居可言地願助朝庭理伏閣
三上章慙愚不稱旨聖人存大體優貸容
不死鳳詔停舍人魚書除刺史寬懷齊寵
辱委順隨行止我自得此心于茲十年矣

餘杭乃名郡郭臨江汜已想海門山潮
聲來入耳昔予貞元末羈旅曾遊此甚覺
太守尊亦諳魚酒美因生江海興每羨滄
浪水尚擬拂衣行況今兼祿仕青山峯巒
接白日烟塵起東道旣不通改轍遂南指
自秦窮楚越浩蕩五千里聞有賢主人而
多好山水是行頗爲愜所歷良可紀策馬
度藍溪勝遊從此始

初出城留別

朝從紫禁歸暮出青門去勿言城東陌便是江南路揚鞭簇車馬揮手辭親故我生本無鄉心安是歸處

過駱山人野居小池
駱生棄官居
此二十餘年

茅覆環堵亭泉添方丈沼紅芳照水荷白頸觀魚鳥拳石苔蒼翠尺波烟杳眇但問有意無勿論池大小門前車馬路奔走無昏曉名利驅人心賢愚同擾擾善哉駱處

士安置身心了何乃獨多君立園居者少

宿清源寺

往謫潯陽去夜憇輞溪曲今爲錢塘行重
經茲寺宿爾來幾何歲溪草八九綠不見
舊房僧蒼然新樹木虛空走日月世界遷
陵谷我生寄其間孰能逃倚伏隨緣又南
去好住東廊竹

宿藍橋對月

昨夜鳳池頭今夜藍溪口明月本無心行

人自迴首新秋松影下半夜鐘聲後清影
不宜昏聊將茶代酒

自望秦赴五松驛馬上偶睡睡覺成

吟

長途發已久前館行未至體倦目已昏瞋
然遂成睡右袂尚垂鞭左手暫委轡忽覺
問僕夫纔行百步地形神分處所遲速相
乖異馬上幾多時夢中無限事誠哉達人
語百齡同一寐

鄧州路中作

蕭蕭誰家林秋梨葉半圻漠漠誰家園秋
韭花初白路逢故里物使我嗟行役不歸
渭北村又作江南客去鄉徒自苦濟世終
無益自問波上萍何如澗中石

朱藤杖紫驄吟

拄上山之上騎下山之下江州去日朱藤
杖忠州歸時紫驄馬天生二物濟我窮我
生合是栖栖者

桐樹館重題

堦前下馬時梁上題詩處慘澹病使君蕭
疎老松樹自嗟還自哂又向杭州去

過紫霞蘭若

我愛此山頭及此三登歷紫霞舊精舍寥
落空泉石朝市日喧隘雲林長悄寂猶存
住寺僧肯有歸山客

感舊紗帽 帽即故李侍郎所贈

昔君烏紗帽贈我白頭翁帽今在頂上君

已歸泉中物故猶堪用人亡不可逢岐上
今夜月墳樹正秋風

思竹窻

不憶西省松不憶南宮菊唯憶新昌堂蕭
蕭北窻竹窻閒枕簟在來後何人宿

馬上作

處世非不遇榮身頗有餘勲爲上柱國爵
乃朝大夫自問有何才兩入承明廬又問
有何政再駕朱輪車矧予東山人自惟朴

且踈彈琴復有酒但慕嵇阮徒聞被鄉里
薦誤上賢能書一列朝士籍遂爲世網拘
高有曾繳憂下有陷穽虞每覺宇宙窄未
嘗心體舒蹉跎二十年頷下生白鬚何言
左遷去尚獲專城居杭州五千里往若投
淵魚雖未脫簪組且來汎江湖吳中多詩
人亦不少酒酤高聲詠篇什大笑飛盃盃
五十未全老尚可且歡娛用茲送日月君
以爲何如秋風起江上白日落路隅迴首

語五馬去矣勿踟躕

秋蝶

秋花紫蒙蒙秋蝶黃茸茸花低蝶新小飛
戲叢西東日暮涼風來紛紛花落藂夜深
白露冷蝶已死藂中朝生夕俱死氣類各
相從不見千年鶴多栖百丈松

登商山最高頂

高高此山頂四望唯烟雲下有一條路通
達楚與秦或名誘其心或利牽其身乘者

及負者來去何云云我亦斯人徒未能出
囂塵七年三往復何得笑他人

枯桑

道傍老枯樹枯來非一朝皮黃外尚活心
黑中先焦有似多憂者非因外火燒

山路偶興

筋力未全衰僕馬不至弱又多山水趣心
賞非寂寞捫蘿上烟嶺躡石穿雲壑谷鳥
晚仍啼洞花秋不落提籠復携榼遇勝時

停泊泉懃茶數甌嵐行酒一酌獨吟還獨
嘯此興殊未惡假使在城時終年有何樂

山雉

五步一啄草十步一飲水適性遂其生時
哉山梁雉梁上無罾繳梁下無鷹鷂雌雄
與群雛皆得終天年嗟嗟籠下雞及彼池
中鴈既有稻梁恩必有犧牲患

初下漢江舟中作寄兩省給舍

秋水浙紅粒朝烟烹白鱗一食飽至夜一

卧安達晨晨無朝謁勞夜無直宿勤不知
兩掖客何似扁舟人尚想到郡日且稱守
土臣猶須副憂寄恤隱安疲民期年底報
政三年當退身終使滄浪水濯吾纓上塵
自蜀江至洞庭湖口有感而作

江從西南來浩浩無旦夕長波逐若瀉連
山鑿如劈千年不擁潰萬姓無墊溺不爾
民爲魚大哉禹之績導岷旣艱遠距海無
咫尺胡爲不訖功餘水斯委積洞庭與青

草大小兩相敵混合萬丈深森茫千里白
每歲秋夏時浩大吞七澤水族窟穴多農
人土地窄我今尚嗟嘆禹豈不愛惜邈未
究其由想古觀遺跡疑此苗人頑恃險不
終役帝亦無奈何留患與今昔水流天地
內如身有血脉滯則爲疽疣治之在鍼石
安得禹復生爲唐水官伯手提倚天劍重
來親指畫䟽流似剪紙決壅同裂帛滲作
膏腴田踏平魚鱉宅龍宮變閭里水府生

禾麥坐添百萬戶書我司徒籍

初領郡政衙退登東樓作 自此後

詩到杭州後作

鰥惇心所念簡牘手自操何言符竹貴未
免州縣勞賴是餘杭郡臺榭遶官曹凌晨
親政事向晚恣遊遨山冷微有雪波平未
生濤水心如鏡面千里無纖毫直下江最
闊近東樓更高煩襟與滯念一望皆遁逃

清調吟

索索風戒寒沉沉日藏耀勸君飲濁醪聽
我吟清調芳節變窮陰朝光成夕照與君
生此世不合長年少今晨從此過明日安
能料若不結跏禪即須開口笑

狂歌詞

明月照君席白露霑我衣勸君酒盃滿聽
我狂歌詞五十已後衰二十已前癡晝夜
又分半其間幾何時生前不歡樂死後有
餘貲焉用黃墟下珠衾玉匣爲

郡亭

平旦起視事亭午卧掩關除親簿領外多在琴書前况有虛白亭坐見海門山潮來一凭檻賓至一開筵終朝對雲水有時聽管絃持此聊過日非忙亦非閑山林太寂寞朝闕空喧煩唯茲郡閣內囂靜得中間

詠懷

昔爲鳳閣郎今爲二千石自覺不如今人言不如昔昔雖居近密終日多憂惕有詩

不敢吟有酒不敢喫今雖在踈遠竟歲無
牽役飽食坐終朝長歌醉通夕人生百年
內疾速如過隙先務身安閑次要心歡適
事有得而失物有損而益所以見道人觀
心不觀跡

立春後五日

立春後五日春態紛婀娜白日斜漸長碧
雲低欲墮殘冰坼玉片新萼排紅顆遇物
盡欣欣愛春非獨我迎芳後園立就暖前

簷坐還有惆悵心欲別紅爐火

郡中即事

漫漫潮初平熙熙春日空闊遠江山晴
明好天氣外有適意物中無繫心事數篇
對竹吟一盃望雲醉行携杖扶力卧讀書
取睡久養病形骸深諳閑氣味遙思九城
陌擾擾趨名利今朝是直日朝謁多軒騎
寵者防悔尤權者懷憂畏爲報高車蓋恐
非真富貴

郡齋暇日辱常州陳郎中使君早春
晚坐水西館書事詩十六韻見寄亦
以十六韻酬之

新年多暇日晏起褰簾坐睡足心更慵日
高頭未裹徐傾下藥酒稍藝煎茶火誰伴
寂寥身無絃琴在左遙思毗陵館春深物
嫋娜波拂黃柳梢風搖白梅朶衙門排曉
戟鈴閣開朝鎖太守水西來朱衣乘素舸
良晨不易得佳會無由果五馬正相望雙

魚忽前墮魚中獲瑰寶持翫何磊砢一百
六十言字字靈珠顙上申心欵曲下叙時
輒軻才富不如君道孤還似我敢辭官遠
慢且貴身安妥勿復問榮枯冥心無不可

官舍

高樹換新葉陰陰覆地隅何言太守宅有
似幽人居太守卧其下閑慵兩有餘起嘗
一甌茗行讀一卷書早梅結青實殘櫻落
紅珠稚女弄庭果嬉戲牽人裾是日晚彌

靜巢禽下相呼嘖嘖護兒鵲啞啞母子烏
豈唯云鳥爾吾亦引吾雛

吾雛

吾雛字阿羅阿羅纔七齡嗟吾不才子怜
汝無弟兄撫養雖驕騃性識頗聰明學母
畫眉樣効吾詠詩聲我齒今欲墮汝齒昨
始生我頭髮盡落汝頂髻初成老幼不相
待父衰汝孩嬰緬想古人心茲愛亦不輕
蔡邕念文姬于公歎緹縈敢求得汝力但

未忘父情

題小橋前新竹招客

鴈齒小虹橋垂簷低白屋橋前何所有
萼新生竹皮開拆褐錦節露抽青玉筠翠
如可飡粉霜不忍觸閑吟聲未已幽翫心
難足管領好風烟輕欺凡草木誰能有月
夜伴我林中宿爲君傾一盃狂歌竹枝曲
病中逢秋招客夜酌

不見詩酒客卧來半月餘合和新藥草尋

檢舊方書晚霽烟景度早涼
窻戶虛雪坐
衰鬢从秋入病心初卧簟
蘄竹冷風襟
叩
葛踈夜來身校健小飲復何如

食飽

食飽拂枕卧睡足起閑吟
淺酌一盃酒
緩彈數弄琴
既可暢情性亦足傲光陰
誰知利名盡無復長安心

嚴十八郎中在郡日改制東南樓因
名清輝未立標榜徵歸郎署予既到

郡性愛樓居宴遊其間頗有幽致聊
成十韻兼戲寄嚴

嚴郎制茲樓立名曰清輝未及署花榜遽
徵還粉闥去來三四年塵土登者稀今春
新太守掃灑施簾幃院柳烟婀娜簷花雪
霏微看山倚前戶待月闌東扉碧窻憂瑤
瑟朱欄飄舞衣燒香卷幕坐風鷺雙雙飛
君作不得住我來幸因依始知天地間靈
境有所歸

南亭對酒送春

碧桃實已落紅薇花尚熏冉冉三月盡晚
鶯城上聞獨持一盃酒南亭送殘春半酣
忽長歌歌中何所云云我五十餘未是苦
老人刺史二千石亦不爲賤貧天下三品
官多老於我身同年登第者零落無一分
親故半爲鬼僮僕多見孫念此聊自解逢
酒且歡欣

翫新庭樹因詠所懷

靄靄四月初新樹葉成陰動搖風景麗蓋
覆庭院深下有無事人竟日此幽尋豈唯
翫時物亦可開煩襟時與道人語或聽詩
客吟度春足芳色入夜多鳴禽偶得幽閑
境遂忘塵俗心始知真隱者不必在山林

仲夏齋戒月

仲夏齋戒月三旬斷腥羶自覺心骨爽行
起身翩翩始知絕粒人四體更輕便初能
脫病患久必成神仙禦寇馭冷風赤松遊

紫烟常疑此說謬今乃知其然我年過半
百氣衰神不全已垂兩鬢絲難補三丹田
但減葷血味稍結清淨緣脫巾且修養聊
以終天年

除官去未間

除官去未間半月恣游討朝尋霞外寺暮
宿波上島新樹少於松平湖半連草躋攀
有次第賞翫無昏早有時騎馬醉兀兀冥
天造窮通與生死其奈吾懷抱江山信爲

莢齒髮行將老在郡誠未厭歸鄉去亦好
三年爲刺史二首

三年爲刺史無政在人口唯向郡城中題
詩十餘首慙非甘棠詠豈有思人不
三年爲刺史飲水復食蘖唯向天竺山取
得兩片石此抵有千金無乃傷清白

別萱桂

使君竟不住萱桂徒栽種桂有留人名萱
無忘憂用不如江畔月步步來相送

自餘杭歸宿淮口作

爲郡已多暇猶少勒吏職罷郡更安閑無
所勞心力舟行明月下夜泊清淮北豈止
吾一身舉家同燕息三年請祿俸頗有餘
衣食乃至僮僕間皆無凍餒色行行弄雲
水步步近鄉國妻子在我前琴書在我側
此外吾不知於焉心自得

舟中李山人訪宿

日暮舟悄悄烟生水沉沉何以延宿客夜

酒與秋琴來客道門呂來自嵩高岑軒軒
舉雲貌豁豁開清襟得意言語斷入玄滋
味深默然相顧哂心適而忘心

洛下卜居

三年典郡歸所得非金帛天竺石兩片華
亭鶴一隻飲啄供稻粱苞裹用茵蓆誠知
是勞費其奈心愛惜遠從餘杭郭同到洛
陽陌下檐拂雲根開籠展霜翮貞姿不可
雜高性宜其適遂就無塵坊仍求有水宅

東南得幽境樹老寒泉碧池畔多竹陰門
前少人跡未請中庶祿且脫雙轡易豈獨
爲身謀安吾鶴與石

洛中偶作 自此後在東都作

五年職翰林四年蒞潯陽一年巴郡守半
年南宮郎二年直綸閣三年刺史堂凡此
十五載有詩千餘章境興周萬象土風備
四方獨無洛中作能不心悵悵今爲春官
長始來遊此鄉徘徊伊澗上睥睨嵩山傍

遇物輒一詠一詠傾一觴筆下成釋憾卷
中同補亡往往願自哂眼昏鬚鬢蒼不知
老將至獨自放詩狂

贈蘇少府

籍甚二十年今日方款顏相送嵩洛下論
心盃酒間河亞懶出入府寮多閑闕蒼髮
彼此老白日尋常閑朝欲攜手出暮思聯
騎還何當挈一榼同宿龍門山

移家入新宅

移家入新宅罷郡有餘資既可避燥濕復
免憂寒飢疾平未還假官閑得分司幸有
祿俸在而無職役羈清旦與漱畢開軒卷
簾幃家人及雞犬隨我亦熙熙取興或寄
酒放情不過詩何必苦修道此即是無爲
外累信已遣中懷時有思有思一何遠默
坐亘雙眉十載囚竄客萬里征戍兒春朝
鎖籠鳥冬夜支床龜驛馬走四蹄痛酸無
歇期磴牛封兩目閤閑何人知誰能脫放

去四散任所之各得適其性如吾今日時

琴

置琴曲机上慵坐但含情何煩故揮弄風
絃自有聲

鶴

人各有所好物固無常宜誰謂爾能舞不
如閑立時

自詠

夜鏡隱白髮朝酒發紅顏可怜假年少自

笑須臾間朱砂賤如土不解燒爲丹玄鬢
化爲雪未聞休得官咄哉箇丈夫心性何
墮頑但遇詩與酒便忘寢與食高聲發一
吟似得詩中仙引滿飲一盞盡忘身外緣
昔有醉先生席地而幕天于今居處在許
我當中眠眠罷又一酌酌罷又一篇迴面
顧妻子生計方落然誠知此事非又過知
非年豈不欲自改改即心不安且向安處
去其餘皆老閑

林下閑步寄皇甫庶子

扶杖起病初策馬立未任旣懶出門去亦
無客來尋以此遂成閑閑步遶園林天曉
烟景淡樹寒鳥雀深一酌池上酒數聲竹
間吟寄言東曹長當知幽獨心

晏起

鳥鳴庭樹上日照屋簷時老去慵轉極寒
來起尤遲厚薄被適性高亍枕得宜神安
體穩暖此味何人知睡足仰頭坐兀然無

所思如未鑿七竅若都遺四肢緬想長安
客早朝霜滿衣彼此各自適不知誰是非

池畔二首

結構池西廊疏理池東樹此意人不知欲
爲待月處

持刀間密竹竹少風來多此意人不會欲
令池有波

春菴新居

江州司馬日忠州刺史時栽松滿後院種

柳陰前墀彼皆非吾土栽種尚忘疲况茲
是我宅膏藝固其宜平旦領僕使乘春親
指揮移花夾暖室洗竹覆寒池池水變淥
色池芳動清輝尋芳弄水坐盡日心熙熙
一物苟可適萬緣都若遺設如宅門外有
事吾不知

贈言

捧籛獻千金彼金何足道臨觴贈一言此
言真可寶流光我已晚適意君不早况君


春風面柔促如芳草二十方長成三十向
衰老鏡中桃李色不得十年好胡爲坐脉
脉不肯傾懷抱

泛春池

白蘋湘渚曲綠篠剡溪口各在天一涯信
美非吾有何如此庭內水竹交左右霜竹
百千竿烟波六七畝泓澄動階砌淡泞映
戶牖蛇皮細有文鏡面清無垢主人過橋
來雙童扶一叟恐污清冷波塵纓先抖擻

波上一葉舟舟中一樽酒酒開舟不繫去
去隨所偶或遶蒲浦前或泊桃島後未撥
落盃花佢衝拂面柳半酣迷所在倚榜兀
廻首不知此何處復是人寰否誰知始疏
鑿幾主相傳受楊家去云遠田氏將非父
天與愛水人終焉落吾手

白氏文集卷第八





白氏長慶集

四


LIBRARY
OF THE
UNIVERSITY OF ILLINOIS

895.108

Ss7s2

v.727

CHINA



白氏文集卷第九

感傷一 古調詩 五言 五十五首

西明寺牡丹花時憶元九

前年題名處今日看花來一作芸香吏三
見牡丹開豈獨花堪惜方知老暗催何況
尋花伴東都去未廻詎知紅芳側春盡思
悠哉

傷楊弘貞

顏子昔知命仲尼惜其賢楊生亦好學不

幸今復然誰識天地意獨與龜鶴年

權攝昭應早秋書事寄元拾遺兼呈

李司錄

夏閏秋候早七月風騷騷渭川烟景晚驪
山宮殿高丹殿子司諫赤縣我徒勞相去
半日程不得同遊遨到官來十日覽鏡生
二毛可怜趨走吏塵土滿青袍郵亭擁兩
驛簿書堆六曹爲問綱紀掾何必使鉛刀

新栽竹

佐邑意不適閉門秋草生何以娛野性種
竹百餘莖見此階上色憶得山中情有時
公事暇盡日繞欄行勿言根未固勿言陰
未成已覺庭宇內稍稍有餘清最愛近窻
卧秋風枝有聲

秋霖中遇尹縱之仙遊山居

慘慘八月暮連連三日霖邑居尚愁寂况
乃在山林林下有志士苦學惜光陰歲晚
千萬慮併入方寸心巖鳥共旅宿草蟲伴

愁吟秋天床席冷雨夜燈火深
怜君寂寞意携酒一相尋

寄江南兄弟

分散骨肉戀趨馳名利牽一奔塵埃馬一
汎風波船忽憶分首時憫默秋風前別來
朝復夕積日成七年花落城中地春深江
上天登樓東南望鳥滅烟蒼然相去復幾
許道里近三千平地猶難見况乃隔山川

曲江早秋

秋波紅蓼水夕照青蕪岸獨信馬蹄行曲
江池四畔早涼晴後至殘暑暝來散方喜
炎燠銷復嗟時節換我年三十六冉冉昏
復旦人壽七十稀七十新過半且當對酒
笑勿起臨風歎

寄題塾屋廳前雙松

憶昨爲吏日折腰多苦辛歸家不自適無
計慰心神手栽兩樹松聊以當嘉賓乘春
日一往生意漸欣欣清韻度秋在綠茸隨

日新始憐澗底色不憶城中春有時晝掩
關雙影對一身盡日不寂寞意中如三人
忽奉宣室詔徵爲文苑臣閑來一惆悵長
似別交親早知烟翠前攀翫不逡巡悔從
白雲裏移爾落囂塵

翰林院中感秋懷王質夫

何處感時節新蟬禁中聞宮槐有秋意風
夕花紛紛寄跡鴛鴦行歸心鷗鶴群唯有
王居士知予憶白雲何日仙遊寺潭前秋

見君

禁中月

海上明月出禁中
清夜長東南樓殿白
稍上宮牆淨落金塘
水明浮玉砌霜不比
人間見塵土汚清光

贈賣松者

一東蒼蒼色知從澗底來
斲掘經幾日枝葉滿
塵埃不買非他意城中
無地栽

初見白髮

白髮生一莖朝來明鏡裏勿言一莖少滿
頭從此始青山方遠別黃綬初從仕未料
容鬢間蹉跎忽如此

別元九後詠所懷

零落桐葉雨蕭條槿花風悠悠早秋意生
此幽閑中况與故人別中懷正無悰勿云
不相送心到青門東相知豈在多但問同
不同同心一人去坐覺長安空

禁中秋宿

風翻朱裏幕雨冷通中枕耿耿背斜燈秋
床一人寢

早秋曲江感懷

離離暑雲散嫋嫋涼風起池上秋又來荷
花半成子朱顏自銷歇白日無窮已人壽
不如山年光忽於水青蕪與紅蓼歲歲秋
相似去歲此悲秋今秋復來此

寄元九

身爲近密拘心爲名檢縛月夜與花時少

逢盃酒樂唯有元夫子閑來同一酌把手
或酣歌展眉時笑謔今春除御史前月之
東洛別來未開顏塵埃滿樽杓蕙風晚香
盡槐雨餘花落秋意一蕭條離容兩寂寞
况隨白日老共負青山約誰識相念心
鴈與籠鵲

春暮寄元九

梨花結成實鶯卵化爲雛時物又若此道
情復何如但覺日月促不嗟年歲徂浮生

都是夢老少亦何殊唯與故人別江陵初
謫居時時一相見此意未全除

早梳頭

夜沐早梳頭窻明秋鏡曉颯然握中髮一
沐知一少年事漸蹉跎世緣方繳繞不學
空門法老病何由了未得無生心白頭亦
爲天

出關路

山川函谷路塵土游子顏蕭條去國意秋

風生故關

別舍弟後月夜

悄悄初別夜，去住兩盤桓。
行子孤燈宿，居人明月軒。
平生共貧苦，未必日成歡。
及此暫爲別，懷抱已憂煩。
況是庭葉盡，復思山路寒。
如何爲不念，馬瘦衣裳單。

新豐路逢故人

塵土長路晚，風烟廢宮秋。
相逢立馬語，盡日此橋頭。
知君不得意，鬱鬱來西游。
惆悵

新豐店何人識馬周

金鑾子晬日

行年欲四十有女曰金鑾生來始周歲學
坐未能言慙非達者懷未免俗情怜從此
累身外徒云慰目前若無夭折患則有婚
嫁牽使我歸山計應遲十五年

青龍寺早夏

塵埃經小雨地高倚長坡日西寺門外景
氣含清和閑有老僧立靜無凡客過殘鶯

意思盡新葉陰涼多春去未幾日夏雲忽
差我朝朝感時節年鬢暗蹉跎胡爲戀朝
市不去歸烟蘿青山寸步地自問心如何

秋題牡丹藂

晚藂白露夕衰葉涼風朝紅艷久已歇碧
芳今亦銷幽人坐相對心事共蕭條

勸酒寄元九

薤葉有朝露槿枝無宿花君今亦如此促
促生有涯旣不逐禪僧林下學楞伽又不

隨道士山中煉丹砂百年夜分半一歲春
無多何不飲美酒胡然自悲嗟俗號銷憂
藥神速無以加一盃驅世慮兩盃反天和
三盃即酩酊或笑任狂歌陶陶復兀兀吾
孰知其他況在名利途平生有風波深心
藏陷穽巧言織網羅舉目非不見不醉欲
如何

曲江感秋

沙草新雨地岸柳涼風枝三年感秋意併

在曲江池早蟬已嘹唳晚荷復離披前秋
去秋思——一生此時昔人三十二秋興已
云悲我今欲四十秋懷亦可知歲月不虛
設此身隨日衰暗老不自覺直到鬢成絲

酬張太祝晚秋卧病見寄

高才淹禮寺短羽翔禁林西街居處遠北
闕官曹深君病不來訪我忙難往尋差池
終日別寥落經年心露濕綠蕪地月寒紅
樹陰况茲獨愁夕聞彼相思吟上歎言笑

阻下嗟時歲侵容衰曉窻鏡思苦秋絃琴
一章錦繡段八韻瓊瑤音何以報珍重慙
無雙南金

立秋日曲江憶元九

下馬柳陰下獨上堤上行故人千萬里新
蟬三兩聲城中曲江上江陵城兩地
新秋思應同此日情

早朝賀雪寄陳山人

長安盈尺雪早朝賀君喜將赴銀臺門始

出新昌里上堤馬蹄滑中路蠟燭死十里
向北行寒風吹破耳待漏五門外候對三
殿裏鬚鬢凍生水衣裳冷如水忽思仙游
谷暗謝陳居士暖覆褐裘眠日高應未起
初與元九別後忽夢見之及寤而書
適至兼寄桐花詩悵然感懷因以此
寄

永壽寺中語新昌坊北分歸來數行淚悲
事不悲君悠悠藍田路自云無消息計君

食宿程已過商山北昨夜雲四散千里同
月色曉來夢見君應是君相憶夢中握君
手問君意何如君言苦相憶無人可寄書
覺來未及說叩門聲冬冬言是商州使送
君書一封枕上忽驚起顛倒著衣裳開緘
見手扎一紙十三行上論遷謫心下說離
別腸心腸都未盡不暇叙炎涼云作此書
夜夜宿商州東獨對孤燈坐陽城山館中
夜深作書畢山月向西斜月前何所有一

樹紫桐花桐花半落時復道正相思殷勤
書背後兼寄桐花詩桐花詩八韻思緒一
何深以我今朝意憶君此夜心一章三遍
讀一句十迴吟珍重八十字字字化爲金
和元九悼往

美人別君去自去無處尋舊物零落盡此
情安可任唯有纈紗幌塵埃日夜侵馨香
與顏色不似舊時深透影燈耿耿籠光月
沉沉中有孤眠客秋涼生夜衾舊宅牡丹

院新墳松栢林夢中咸陽淚覺後江陵心
含此隔年恨發爲中夜吟無論君自感聞
者欲沾襟

重到渭上舊居

舊居清渭曲開門當蔡渡十年方一還幾
欲迷歸路追思昔日行感傷故游處挿柳
作高林種桃成老樹因驚成人者盡是舊
童孺試問舊老人半爲繞村墓浮生同過
客前後遞來去白日如弄珠出沒光不住

人物日改變舉目悲所遇
廼念念我身安
得不衰暮朱顏銷不歇
白髮生無數唯有
山門外三峯色如故

白髮

白髮知時節暗與我有期
今朝日陽裏梳
落數莖絲家人不慣見
憫默爲我悲我云
何足恠此意爾不知
凡人年三十外壯中
已衰但思寢食味已減
二十時况我今四
十本來形貌羸書魔昏
兩眼酒病况四肢

親愛日零落在者仍別離身心久如此白
髮生已遲由來生老死三病長相隨除却
無生念人間無藥治

秋日

池殘寥落水窓下悠揚日嫋嫋秋風多槐
花半成實下有獨立人年來四十一

將之饒州江浦夜泊

明月滿深浦愁人卧孤舟煩寃寢不得夏
夜長於秋苦乏衣食資遠爲江海游光陰

坐遲暮鄉國行阻脩身病向鄱陽家貧寄
徐州前事與後事豈堪心併憂憂來起長
望但見江水流雲樹鵲蒼蒼烟波淡悠悠
故園迷處所一念堪白頭

思歸

養無晨昏膳隱無伏臘資遂求及親祿僂
俛來京師薄俸未及親別家已經時冬積
溫席戀春違採蘭期夏至一陰生稍稍夕
漏遲塊然抱愁者夜長獨先知悠悠鄉關

路夢去身不隨坐惜時節變蟬鳴槐花枝

冀城北原作

野色何莽蒼秋聲亦蕭疎風吹黃埃起落
日驅征車何代此開國封疆百里餘古今
不相待朝市無常居昔人城邑中今變爲
丘墟昔人墓田中今化爲里閭廢興相催
迫日月互居諸世變無遺風焉能知其初
行人千載後懷古空躊躇

客路感秋寄明準上人

日暮天地冷雨霽山河清長風從西來草木凝秋聲已感歲倏忽復傷物凋零孰能不慙悽天時牽人情借問空門子何法易修行使我忘得心不教煩惱生

遊襄陽懷孟浩然

楚山碧巖巖漢水碧湯湯秀氣結成象孟氏之文章今我諷遺文思人至其鄉清風無人繼日暮空襄陽南望鹿門山藹若有餘芳舊隱不知處雲深樹蒼蒼

秋暮西歸途中書情

耿耿旅燈下愁多常少眠思鄉貴早發發
在雞鳴前九月草木落平蕪連遠山秋陰
和曙色萬木蒼蒼然去秋偶東遊今秋始
西旋馬瘦衣裳破別家來二年憶歸復愁
歸歸無一囊錢心雖非蘭膏安得不自然

秋懷

月出照北堂光華滿階墀涼風從西至草
木日夜衰桐柳減綠陰蕙蘭銷碧滋感物

私自念我心亦如之安得長少壯盛衰迫
天時人生如石火爲樂常苦遲

別楊頴士盧克柔殷堯藩

倦鳥暮歸林浮雲晴歸山獨有行路子悠
悠不知還人生苦營營終日群動間所務
雖不同同歸於不閑扁舟來楚鄉疋馬往
秦關離憂繞心曲宛轉如循環且持一盃
酒聊以開離顏

題贈定光上人

二十身出家四十心離塵得徑入大道乘
此不退輪一坐十五年林下秋復春春花
與秋氣不感無情人我來如有悟潛以心
照身誤落聞見中憂喜傷形神安得遺耳
目冥然反天真

祇役駱口驛喜蕭侍御書至兼覩新
詩吟諷通宵因寄八韻

日暮心無憖吏役正營營忽驚芳信至復
與新詩并是時天無雲山館有月明月下

讀數遍風前吟一聲一吟三四歎聲盡有
餘清雅哉君子文詠性不詠情使我靈府
中鄙悵不得生始知聽韶濩可使心和平

酬李少府曹長官舍見贈

佢腰復斂手心體不遑安一落風塵下方
知爲吏難公事與日長宦情隨歲闌惆悵
青袍袖芸香無半殘賴有李夫子此懷聊
自寬兩心如止水彼此無波瀾往往簿書
暇相勸強爲歡白馬曉蹋雪淥觴春暖寒

戀月夜同宿愛山晴共看野性自相近不
是爲同官

留別

秋涼卷朝簾春暖撤夜衾雖是無情物欲
別尚沈吟況與有情別別隨情淺深二年
歡笑意一旦東西心獨留誠可念同行力
不任前事詎能料後期諒難尋唯有潺湲
淚不惜共沾衿

曉別

曉鼓聲已半離筵坐難久請君斷腸歌送
我和淚酒月落欲明前馬嘶初別後浩浩
暗塵中何由見迴首

北園

北園東風起雜花次第開心知須臾落一
日三四來花下豈無酒欲酌復遲迴所思
眇千里誰勸我一盃

惜梢李花

樹小花鮮妍香繁條軟弱高仞二三尺重

疊千萬萼朝艷藹霏霏夕凋紛漠漠辭枝
朱粉細覆地紅綃薄由來好顏色嘗苦易
銷燦不見葭蕩花狂風吹不落

照鏡

皎皎青銅鏡斑斑白絲鬢豈復更藏年實
年君不信

新秋

西風飄一葉庭前颯已涼風池明月水衰
蓮白露房其奈江南夜繚繚自此長

夜雨

早蛩啼復歇殘燈滅又明
隔窗知夜雨芭蕉先有聲

秋江送客

秋鴻次第過哀猿朝夕聞
是日孤舟客此地亦離群
濛濛潤衣雨漠漠冒帆雲
不醉潯陽酒烟波愁殺人

感逝寄遠

昨日聞甲死今朝聞乙死
知識三分中二

分化爲鬼逝者不復見悲哉長已矣存者
今如何去我皆萬里平生知心者屈指能
有幾通果澧鳳州眇然四君子相思俱老
大浮世如流水應歎舊交遊凋零一如此
何當一杯酒開眼笑相視

秋月

夜初色蒼然夜深光浩然稍轉西廊下漸
滿南窓前况是綠蕪地復茲清露天落葉
聲策策驚鳥影翩翩棲禽尚不穩愁人安

可眠

白氏文集卷第九

白氏文集卷第十

感傷二 古調 五言 七十八首

朱陳村詩

徐州古豐縣有村曰朱陳去縣百餘里桑
麻青氤氲機梭聲扎扎牛驢走紛紛女汲
澗中水男採山上薪縣遠官事少山深入
俗淳有財不行商有丁不入軍家家守村
業頭白不出門生爲陳村民死爲陳村塵
田中老與幼相見何欣欣一村唯兩姓世

世爲婚姻親疎居有族少長游有群黃雞
與白酒歡會不隔旬生者不遠別嫁娶先
近鄰死者不遠葬墳墓多遶村旣安生與
死不苦形與神所以多壽考往往見玄孫
我生禮義鄉少小苦且貪伎學辯是非祇
自取辛勤世法貴名教士人重官婚以此
自桎梏信爲大謬人十歲解讀書十五能
屬文二十舉秀才三十爲諫臣下有妻子
累上有君親恩承家與事國望此不肖身

憶昨旅遊初，迄今十五春。
孤舟三適楚，羸馬四經秦。
晝行有飢色，夜寢無安魂。
東西不暫住，來往若浮雲。
離亂失故鄉，骨肉多散分。
江南與江北，各有平生親。
平生終日別，逝者隔年聞。
朝憂卧至暮，夕哭坐達晨。
悲火燒心曲，愁霜侵鬢根。
一生苦如此，長羨陳村民。

讀鄧魴詩

塵架多文集，偶取一卷披。
未及看姓名，疑

是陶潛詩看名知是君惻惻令我悲詩人
多蹇厄近日誠有之京兆杜子美猶得一
拾遺襄陽孟浩然亦聞鬢成絲嗟君兩不
如三十在布衣擢第祿不及新婚妻未歸
少年無疾患溘死於路岐天不與爵壽唯
與好文詞此理勿復道巧曆不能推

寄元九 自此後在渭村作

晨雞纔發聲夕雀俄歛翼晝夜往復來疾
如出入息非徒改年貌漸覺無心力自念

因念君俱爲老所逼君年雖校少顛顚適
南國三年不放歸炎瘴銷顏色山無殺草
雪水有含沙蜮健否遠不知書多隔年得
願君少愁苦我亦加飡食各保金石軀以
慰長相憶

秋夕

葉聲落如雨月色白似霜夜深方獨卧誰
爲拂塵牀

夜雨

白集十
三
我有所念人隔在遠遠鄉我有所感事結
在深深腸鄉遠去不得無日不瞻望腸深
解不得無夕不思量况此殘燈夜獨宿在
空堂秋天殊未曉風雨正蒼蒼不學頭陀
法前心安可忘

秋霽

金火不相待炎涼雨中變林晴有殘蟬巢
冷無留鶯沉吟卷長簾惻愴收團扇向夕
稍無泥閑步青苔院月出砧杵動家家擣

秋練獨對多病妻不能理針線冬衣殊未
製夏服行將綻何以迎早秋一盃聊自勸

歎老三首

晨興照清鏡形影兩寂寞少年辭我去白
髮隨梳落萬化成於漸漸衰看不覺但恐
鏡中顏今朝老於昨人生少滿百不得長
歡樂誰會天地心千齡與龜鶴吾聞善醫
者今古稱扁鵲萬病皆可治唯無治老藥
我有一握髮梳理何稠直昔似玄雲光如

今素絲色匣中有舊鏡欲照先歎息自從
頭白來不欲明磨拭鵝頭與鶴頸至老長
如墨獨有人鬢毛不得終身黑

前年種桃核今歲成花樹去歲新嬰兒今
年已學步但驚物成長不覺身衰暮去矣
欲何如少年留不住因書今日意徧寄諸
親故壯歲不歡娛長年當悔悟

送兄弟迴雪夜

日晦雲氣黃東北風切切時從村南還新

與兄弟別離襟淚猶濕迴馬嘶未歇欲歸
一室坐天陰多無月夜長火消盡歲暮雨
凝結寂寞滿爐灰飄冷上階雪對雪畫寒
灰殘燈明復滅灰死如我心雪白如我髮
所遇皆如此頃刻堪愁絕迴念入坐忘轉
憂作禪悅平生洗心法正爲今宵設

溪中早春

南山雪未盡陰嶺留殘白西澗冰已銷春
溜含新碧東風來幾日蟄動萌草拆潛知

陽和功一日不虛擲愛此天氣暖來拂溪
邊石一坐欲忘歸暮禽聲嘖嘖蓬蒿隔桑
棗隱映烟火夕歸來問夜飡家人烹薺麥
同友人尋澗花

聞有澗底花貫得村中酒與君來校遲已
逢搖落後臨觴有遺恨悵望空溪口記取
花發時期君重攜手我生日日老春色年
年有且作來歲期不知身健否

登村東古塚

高仞古時塚上有牛羊道獨立最高頭悠
哉此懷抱迴頭向村望但見荒田草村人
不愛花多種栗與棗自來此村住不覺風
光好花少鶯亦稀年年春暗老

夢裴相公

五年生死隔一夕夢魂通夢中如往日同
直金鑾宮髣髴金紫色分明冰玉容勤勤
相眷意亦與平生同既寤知是夢憫然情
未終追想當時事何殊昨夜中自我學心

法萬緣成一空今朝爲君子流涕一霑骨

晝寢

坐整白單衣起穿黃草屨朝飧盥漱畢徐
下堦前步暑風微變候晝刻漸加數院靜
地陰陰鳥鳴新葉樹獨行還獨卧夏景殊
未暮不作午時眠日長安可度

別行簡

漠漠病眼花星星愁鬢雪筋骸已衰憊形
影仍分訣梓州二千里劔門五六月豈是

遠行時火雲燒棧熱何言巾上淚乃是腸
中血念此早歸來莫作經年別

觀兒戲

齟齬七八歲綺紈三四兒弄塵復鬪草盡
日樂嬉嬉堂上長年客鬢閒新有絲一看
竹馬戲每憶童騃時童騃饒戲樂老大多
憂悲靜念彼與此不知誰是癡

歎常生

西村常氏子卧疾不須臾前旬猶訪我今

日忽云殂時我病多暇與之同野居園林
青藹藹相去數里餘村鄰無好客所遇唯
農夫之子何如者往還猶勝無于今亦已
矣可爲一長吁

寄元九

一病經四年親朋書信斷窮通合易交自
笑知何晚元君在荊楚去日唯云遠彼獨
是何人心如石不轉憂我貧病身書來唯
勸勉上言少愁苦下道加餐飯憐君爲謫

吏窮薄家貧福三寄衣食資數盈二十萬
豈是貪衣食感君心繾綣念我口中食分
君身上暖不因身病久不因命多蹇平生
親友心豈得知深淺

以鏡贈別

人言似明月我道勝明月明月非不明一
年十二缺豈如玉匣裏如水長澄澈月破
天暗時圓明獨不歇我慙貌醜老繞鬢斑
斑雪不如贈少年迴照青絲髮因君千里

去持此將爲別

城上對月期友人不至

古人惜晝短勸令秉燭遊況此迢迢夜明月滿西樓復有盈樽酒置在城上頭期君君不至人月兩悠悠照水烟波白照人肌髮秋清光正如此不醉即須愁

念金鑾子二首

衰病四十身嬌癡三歲女非男猶勝無慰情時一撫一朝捨我去魂影無處所況念

夫化時嘔啞初學語始知骨肉愛乃是憂
悲聚唯思未有前以理遣傷苦忘懷日已
久三度移寒暑今日一傷心因逢舊乳母
又一首

與爾爲父子八十有六旬忽然又不見邇
來三四春形質本非實氣聚偶成身恩愛
元是妄緣合暫爲親念茲庶有悟聊用遣
悲辛慙將理自奪不是忘情人

對酒

人生一百歲通計三萬日何況百歲人
間百無一賢愚共零落貴賤同埋沒東
前後魂北邙新舊骨復聞藥誤者爲愛
延年術又有憂死者爲貪政事筆藥誤
不得老憂死非因疾誰人言最靈知得
不知失何如會親友飲此盃中物能沃
煩慮銷能陶真性出所以劉阮輩終年
醉兀兀

渭村雨歸

渭水寒漸落離離蒲稗苗閑旁沙邊立看

人刈葦苔近水風景冷晴明猶寂寥復茲
夕陰起野思重蕭條蕭條獨歸路暮雨濕
村橋

諭懷

黑頭日已白白面目已黑人生未死間變
化何終極常言在已者莫若形與色一朝
改變來止遏不能得况彼身外事悠悠通
與塞

喜友至留宿

村中少賓客柴門多不開忽聞車馬至云
是故人來况值風雨夕愁心正悠哉願君
且同宿盡此手中杯人生開口笑百年都
幾迴

西原晚望

花菊引閑行行上西原路原上晚無人因
高聊四顧南阡有烟火北陌連墟墓村鄰
何蕭疎近者猶百步吾廬在其下寂寞風
日暮門外轉枯蓬籬根伏寒兔故園汴水

上離亂不堪去近歲始移家飄然此村住
新屋五六間古槐八九樹便是衰病身此
生終老處

感鏡

美人與我別留鏡在匣中自從花顏去秋
水無芙蓉經年不開匣紅埃覆青銅今朝
一拂拭自照顚顚容照罷重惆悵背有雙
盤龍

村居卧病三首

戚戚抱羸病悠悠度朝暮夏木纔結陰秋
蘭已含露前日巢中卵化作雛飛去昨日
穴中蟲蛻爲蟬上樹四時未常歇一物不
暫住唯有病客心沉然獨如故

又一首

新秋久病客起步村南道盡日不逢人蟲
聲徧荒草西風吹白露野綠秋仍早草木
猶未傷先傷我懷抱朱顏與玄鬢強健幾
時好況爲憂病侵不得依年老

又一首

種黍三十畝雨來苗漸大種韭二十畦秋
來欲堪刈望黍作冬酒留韭爲春菜荒村
百物無待此養衰瘵膏廬備陰雨補褐防
寒歲病身知幾時且作明年計

沐浴

經年不沐浴塵垢滿肌膚今朝一澡濯衰
瘦頗有餘老色頭鬢白病形支體虛衣寬
有贖帶髮少不勝梳自問今年幾春秋四

白集十
十一
十初四十已如此七十復何如

栽松二首

小松未盈尺心愛手自移
蒼然澗底色雲濕烟霏霏
栽植我年晚長成君性遲
如何過四十種此數寸枝
得見成陰否人生七十稀

愛君抱晚節憐君含直文
欲得朝朝見堦前故種君
知君死則已不死會凌雲

病中友人相訪

卧久不記日南窓昏復昏蕭條草簷下寒
雀朝夕聞強扶牀前杖起向庭中行偶逢
故人至便當一逢迎移榻就斜日披裘倚
前楹閑談勝服藥稍覺有心情

自覺二首

四十未爲老憂傷早衰惡前歲二毛生今
年一齒落形骸日損耗心事同蕭索夜寢
與朝飧其間味亦薄同歲崔舍人容光方
灼灼始知年與貌衰盛隨憂樂畏老老轉

迫憂病病彌縛不畏復不憂是除老病藥

又一首

朝哭心所愛暮哭心所親親愛零落盡安
用身獨存幾許平生歡無限骨肉恩結爲
腸間痛聚作鼻頭辛悲來四支緩泣盡雙
眸昏所以年四十心如七十人我聞浮圖
教中有解脫門置心爲止水視身如浮雲
斗數垢穢衣度脫生死輪胡爲戀此苦不
去猶逡巡迴念發弘願願此見在身但受

過去報不結將來因誓以智惠水求洗煩
惱塵不將恩愛子更種憂悲根

雨夜有念

以道治心氣終歲得晏然何乃戚戚意忽
來風雨天旣非慕榮顯又不恤飢寒胡爲
悄不樂抱膝殘燈前形影暗相問心默對
以言骨肉能幾人各在天一端吾兄寄宿
州吾弟客東川南北五千里我身在中間
欲去病未能欲住心不安有如波上舟此

縛而彼牽自我向道來于今六七年鍊成
不二性銷盡千萬緣唯有恩愛火往往猶
熬煎豈是藥無効病多難盡蠲

寄楊六

青宮官冷靜赤縣事繁劇一閑復一忙動
作經時隔清觴久廢酌白日頓虛擲念此
忽踟躕悄然心不適豈無舊交結久別成
遷易亦有新往還相見多形迹唯君於我
分堅久如金石何況老大來人情重姻戚

會稀歲月急此事真可惜幾迴開口笑便
到髭鬚白公門苦鞅掌晝日無閑隙猶冀
乘暝來靜言同一夕

送春

三月三十日春歸日復暮惆悵問春風明
朝應不住送春曲江上眷眷東西顧但見
撲水花紛紛不知數人生似行客兩足無
停步日日進前程前程幾多路兵刃與水
火盡可違之去唯有老到來人間無避處

感時良爲已獨倚池南樹今日送春心心
如別親故

哭李三

去年渭水曲秋時訪我來今年常樂里春
日哭君迴哭君仰問天天意安在哉若必
奪其壽何如不與才落然身後事妻病女
嬰孩

別李十一後重寄
自此後江州路
上作

秋日正蕭條驅車出蓬葦迴望青門道目
極心鬱鬱豈獨戀鄉土非關慕簪紱所愴
別李君平生同道術俱承金馬詔聯秉諫
臣筆共上青雲梯中途一相失江湖我方
往朝廷君不出蕙帶與華簪相逢是何日

初出藍田路作

停驂問前路路在秋雲裏蒼蒼縣南道去
途從此始絕頂忽盤上衆山皆下視下視
千萬峯峯頭如浪起朝經韓公坂夕次藍

橋水潯陽僅四千始行七十里人煩馬蹄
跼勞苦已如此

仙娥峯下作

我爲東南行始登商山道商山無數峯最
愛仙娥好參差樹若栴匝雲如抱渴望
寒玉泉香聞紫芝草青崖屏削碧白石牀
鋪縞向無如此物安足留四皓感彼私自
問歸山何不早可能塵土中還隨衆人老

微雨夜行

漠漠秋雲起稍稍夜寒生但覺衣裳濕無
點亦無聲

再到襄陽訪問舊居

昔到襄陽日髯髯初有髭今過襄陽日髭
鬢半成絲舊遊都似夢乍到忽如歸東郭
蓬蒿宅荒涼今屬誰故知多零落閭井亦
遷移獨有秋江水烟波似舊時

寄微之三首

江州望通州天涯與地末有山萬丈高有

江千里闊間之以雲霧飛鳥不可越誰知
千古險爲我二人設通州君初到鬱鬱愁
如結江州我方去迢迢行未歇道路日乖
隔音信日斷絕因風欲寄語地遠聲不徹
生當復相逢死當從此別

又一首

君遊襄陽日我在長安住今君在通州我
過襄陽去襄陽九里郭樓雉連雲樹顧此
稍依依是君舊遊處蒼茫蒹葭水中有渚

陽路此去更相思江西少親故

又一首

去國日已遠喜逢物似人如何含此意江
上坐思君有如河嶽氣相合方氛氲狂風
吹中絕兩處成孤雲風迴終有時雲合豈
無因努力各自愛窮通我爾身

舟中雨夜

江雲暗悠悠江風冷脩脩夜雨滴船背夜
浪打船頭船中有病客左降向江州

夜聞歌者

夜泊鸚鵡洲秋江月澄澈鄰船有歌者發
調堪愁絕歌罷繼以泣泣聲通復咽尋聲
見其人有婦顏如雪獨倚帆檣立娉婷十
七八夜淚似真珠雙雙墮明月借問誰家
婦歌泣何淒切一問一露襟低眉終不說

江樓聞砧

江人授衣晚十月始聞砧一夕高樓月萬
里故園心

宿東林寺

經窻燈焰短僧爐火氣深
索落廬山夜風雪宿東林

憶洛下故園

潯陽遷謫地洛陽離亂年
烟塵三川上炎瘴九江邊
鄉心坐如此秋風仍颯然

贈別崔五

朝送南去客暮迎北來賓
孰云當大路少遇心所親
勞者念息肩熱者思濯身
何如

愁獨日忽見平生人平生已不淺是日重
殷勤問君何處來及此江亭春江天春多
陰夜月隔重雲移樽樹間飲燈照花紛紛
一會不易得餘事何足云明朝又分手今
夕且懽忻

春晚寄微之

三月江水闊悠悠桃花波年芳與心事此
地共蹉跎南國方譴謫中原正兵戈眼前
故人少頭上白髮多通州更迢遞春盡復

如何

漸老

今朝復明日不覺年齒暮白髮逐梳落朱
顏辭鏡去當春頗愁寂對酒寡歡趣遇境
多愴辛逢人少舊故形質屬天地推遷從
不住所恠少年心銷磨落何處

送幼史

淮右寇未散江西歲再徂故里干戈地行
人風雪途此時與爾別江畔立踟躕

夜雪

已訝衾枕冷復見窻戶明
夜深知雪重時聞折竹聲

寄行簡

鬱鬱眉多歛默默口寡言
豈是願如此舉目誰與歡
去春爾西征從事巴蜀間
今春我南謫抱疾江海壖
相去六千里地絕天邈然
十書九不達何以開憂顏
渴人多夢飲饑人多夢食
春來夢何處合眼到東川

首夏

孟夏百物滋動植一時好麋鹿樂深林蟲
蛇喜豐草翔禽愛密葉游鱗悅新藻天和
遺漏處而我獨枯槁一身在天末骨肉皆
遠道舊國無來人寇戎塵浩浩沉憂竟何
益祇自勞懷抱不如放身心冥然任天造
潯陽多美酒可使杯不燥湔魚賤如泥烹
炙無昏早朝飯山下寺暮醉湖中島何必
歸故鄉茲焉可終老

孟夏思渭村舊居寄舍弟

嘖嘖雀引雛稍稍笋成竹時物感人情憶
我故鄉曲故園渭水上十載事樵牧手種
榆柳成陰陰覆墻屋兔隱豆苗大鳥鳴桑
椹熟前年當此時與爾同遊矚詩書課弟
姪農圃資僮僕日暮麥登場天晴蠶拆簇
弄泉南澗坐待月東亭宿興發飲數盃悶
來碁一局一朝忽分散萬里仍羈束并鮒
思返泉籠鶯悔出谷九江地卑濕四月天

炎燠苦雨初入梅
瘴雲稍含毒
泥秧水畦稻
灰種畬田粟
已訝殊歲時
仍嗟異風俗
閑登郡樓望
日落江山綠
歸鴈拂鄉心
平湖斷人目
殊方我漂泊
舊里君幽獨
何時同一瓢
飲水心亦足

早蟬

六月初七日江頭蟬始鳴
石楠深葉裏薄暮兩三聲
一催衰鬢色再動故園情
西風殊未起秋思先秋生
憶昔在東掖宮槐花

下聽今朝無恨思雲樹遶淦城

感情

中庭睽服玩忽見故鄉履昔贈我者誰東
鄰嬋娟子因思贈時語特用結終始永願
如履綦雙行復雙止自吾謫江郡漂蕩三
千里爲感長情人提携同到此今朝一惆
悵反覆看未已人隻履猶雙何曾得相似
可嗟復可惜錦表繡爲裏況經梅雨來色
黯花草死

南湖晚秋

八月白露降湖中水芳老旦夕秋風多衰
荷半傾倒手攀青楓樹足蹋黃蘆草慘淡
老容顏冷落秋懷抱有兄在淮楚有弟在
蜀道萬里何時來烟波白浩浩

郡廳有樹晚榮早凋人不識名因題
其上

潯陽郡廳後有樹不知名秋先梧桐落春
後桃李榮五月始萌動八月已凋零左右

皆松桂四時鬱青青豈量雨露恩霑濡不
均平榮枯各有分天地本無情顧我本相
類早衰向晚成形骸少多病三十不豐盈
毛鬢早改變四十白髭生誰教兩蕭索相
對此江城

感秋懷微之

葉下湖又波秋風此時至誰知瀟落心先
納蕭條氣推遷感流歲漂泊思同志昔爲
烟霄侶今作泥塗吏白鷗毛羽弱青鳳文

章異各閉一籠中歲晚同顛顚

因沐感髮寄朗上人二首

年長身轉慵百年無所欲乃至頭上髮經
年方一沐沐稀髮苦落一沐仍半禿短鬢
經霜蓬老面辭春木強年過猶近衰相來
何速應是煩惱多心焦血不足

又一首

漸少不滿把漸短不盈尺况茲短少中日
夜落復白既無神仙術何除老死籍祇有

解脫門能度衰苦厄掩鏡望東寺降心謝
禪客衰白何足言剝落猶不惜

早蟬

月出先照山風生先動水亦如早蟬聲先
入閑人耳一聞愁意結再聽鄉心起渭上
村蟬聲先聽渾相似衡門有誰聽日暮槐
花裏

苦熱喜涼

經時苦炎暑心體但煩倦白日一何長清

秋不可見歲功成者去天數極則變潛知
寒燠間遷次如乘傳火雲忽朝歛金風俄
夕扇枕簟遂清涼筋骸稍輕健因思望月
侶好卜迎秋宴經夜無客來引杯還自勸

早秋晚望兼呈韋侍郎

九派繞孤城城高生遠思人烟半在船野
水多於地穿霞日脚直驅鴈風頭利去國
來幾時江上秋三至夫君亦淪落此地同
飄寄憫默向隅心摧頽觸籠翅且謀眼前

計莫問宵中事潯陽酒甚濃相勸時時醉

司馬宅

雨徑綠蕪合霜園紅葉多蕭條司馬宅門
巷無人過唯對大江秋水秋風朝夕波

司馬廳獨宿

荒涼滿庭草偃亞侵簷竹府吏下廳簾家
僮開被幙數聲城上漏一點窻間燭官曹
冷似冰誰肯來同宿

夢與李七庾三十三同訪元九

夜夢歸長安見我故親友損之在我左順
之在我右云是二月天春風出携手同過
靖安里下馬尋元九元九正獨坐見我笑
開口還指西院花仍開北亭酒如言各有
故似惜歡難久神合俄頃間神離欠伸後
覺來疑在側求索無所有殘燈影閃牆斜
月光穿牖天明西北望萬里君知否老去
無見期踟躕搔白首

秋槿

風露颯已冷天色亦黃昏中庭有槿花榮
落同一晨秋開已寂寞夕殞何紛紛正怜
少顏色復歎不逡巡感此因念彼懷哉聊
一陳男兒老富貴女子晚婚姻頭白始得
志色衰方事人後時不獲已安得如青春

答元郎中楊負外喜烏見寄

南宮鴛鴦地何忽烏來止故人錦帳郎聞
烏笑相視疑烏報消息望我歸鄉里我歸
應待烏頭白慙愧元郎誤歡喜

十終

白氏文集卷第十一

感傷三

古體

五言

凡五十三首

初入峽有感

上有萬仞山下有千丈水蒼蒼兩崖間闊
狹容一輦瞿唐呀直瀉灩澦屹中峙未夜
黑巖昏無風白浪起大石如刀劒小石如
牙齒一步不可行况千三百里苒弱竹篾
簷欹危檝師趾一跌無完舟吾生繫於此
常聞仗忠信蠻貊可行矣自古漂沉人豈

盡非君子况吾時與命蹇舛不足恃常恐
不才身復作無名死

過昭君村

靈珠產無種彩雲出無根亦如彼姝子生
此遐陋村至麗物難掩遽選入君門獨美
衆所嫉終棄於塞垣唯此希代色豈無一
顧恩事排勢須去不得由至尊白黑既可
變丹青何足論竟埋岱北骨不返巴東魂
慘澹晚雲水依倚舊鄉園妍姿化已久但

有村名存村中有遺老指點爲我言不取
往者戒恐貽來者冤至今村女面燒灼成
癍痕

自江州至忠州

前在潯陽日已歎賓朋寡忽忽抱憂懷出
門無處寫今來轉深僻窮峽巔山下五月
斷行舟灩堆正如馬巴人類猿狖矍爍滿
山野敢望見交親喜逢似人者

初到忠州登東樓寄萬州楊八使君

山東邑居窄峽中氣候偏林巒少平地霧
雨多陰天隱隱煮鹽火漠漠燒畚烟賴此
東樓夕風月時脩然憑軒望所思目斷心
悄悄背春有去鴈上水無來船我懷巴東
守本是關西賢平生已不淺流落重相怜
水梗漂萬里籠禽囚五年新恩同雨露遠
郡鄰山川書信雖往復封疆徒接連其如
羨人面欲見杳無緣

郡中

鄉路音信斷山城日月遲欲知州近遠階
前摘荔枝

西樓夜

悄悄復悄悄城隅隱林杪山郭燈火稀峽
天星漢少年光東流水生計南枝鳥月沒
江沉沉西樓殊未曉

東樓

脉脉復脉脉東樓無宿客城暗雲霧多峽
深田地窄宵燈尚留焰晨禽初展翮欲知

山高低不見東方白

寄王質夫

憶始識君時愛君世緣薄我亦吏王畿不
爲名利著春尋仙遊洞秋上雲居閣樓觀
水潺潺龍潭花漠漠吟詩石上坐引酒泉
邊酌因話出處心心期老巖壑忽從風雨
別遂被簪纓縛君作出山雲我爲入籠鶴
籠深鶴殘賴山遠雲飄泊去處雖不同同
負平生約今來各何在老去隨所託我守

巴南城君佐征西幕年顏漸衰颯生計仍
蕭索方舍去國愁且羨從軍樂舊遊疑是
夢往事思如昨相憶春又深故山花正落

南賓郡齋即事寄楊萬州

山上巴子城山下巴江水中窮獨人強
名爲刺史時時竊自哂刺史豈如是倉粟
餒家人黃絲褰妻子莓苔翳冠帶霧雨霾
樓雉衙鼓暮復朝郡齋卧還起迴頭望南
浦亦在烟波裏而我復何嗟夫君猶滯此

招蕭處士

峽內豈無人相逢非所思
門前亦有客相對不相知
仰望但雲樹俯顧惟妻兒
寢食起居外端然無所爲
東郊蕭處士聊可與開眉
能飲滿盃酒善吟長句詩
庭前吏散後江畔路乾時
請君携竹杖一赴郡齋期

庭槐

南方饒竹樹唯有青槐稀
十種七八死縱活亦支離
何此郡庭下一樹獨華滋
蒙蒙

碧烟葉嫋嫋黃花枝我家渭水上此樹蔭
前墀忽向天涯見憶在故園時人生有情
感遇物牽所思樹木猶復爾况見舊親知
送客回晚興

城上雲霧開沙頭風浪定參差亂山出澹
汀平江淨行客舟已遠居人酒初醒嫋嫋
秋竹梢巴蟬聲似磬

東樓竹

蕭灑城東樓遶樓多脩竹森然一萬竿白

粉封青玉捲簾睡初覺欹枕看未足影轉
色入樓牀席生浮綠空城絕賓客向夕彌
幽獨樓上夜不歸此君留我宿

九日登巴臺

黍香酒初熟菊暖花未開閑聽竹枝曲淺
酌茱萸杯去年重陽日漂泊湓城隈今歲
重陽日蕭條巴子臺旅鬢尋已白鄉書久
不來臨觴一搔首坐客亦徘徊

東城尋春

老色日上面歡情日去心今既不如昔後
當不如今今猶未甚衰每事力可任花時
仍愛出酒後尚能吟但恐如此興亦隨日
銷沉東城春欲老勉強一來尋

江上送客

江花已萎絕江草已銷歇遠客何處歸孤
舟今日發杜鵑聲似哭湘竹班如血共是
多感人仍爲此中別

桐花

春今有常候清明桐始發何此巴峽中桐
花開十月豈伊物理變信是土宜別地氣
反寒暄天時倒生殺草木堅強物所稟固
難奪風候一參差榮枯遂乖劣况吾北人
情不耐南方熱強羸壽夭間安得依時節

早祭風伯因懷李十一舍人

遠郡雖褊陋時祀奉朝經夙興祭風伯天
氣曉冥冥導騎與從吏引我出東垆水霧
重如雨山火高於星忽憶早朝日與君趨

紫庭步登龍尾道却望終南青一別身向
老所思心未寧至今想在耳玉音尚玲玲
花下對酒二首

藹藹江氣春南賓閏正月梅櫻與桃杏次
第城上發紅芳爛簇火素豔紛圍雪香惜
委風飄愁牽歷枝折樓中老太守頭上新
白髮冷澹痛心情暄和好時節故園音信
斷遠郡親賓絕欲問花前樽依然爲誰設

又一首

引手攀紅櫻紅櫻落似霞仰首看白日白
日走如箭年芳與時景頃刻猶衰變況是
血肉身安能長強健人心苦迷執慕貴憂
貧賤愁色常在眉歡容不上面況吾頭半
白把鏡非不見何必花下杯更待他人勸

不二門

兩眼日將闔四支漸衰瘦束帶臃背圍穿
衣妨寬袖流年似江水奔注無昏晝志氣
與形骸安能長依舊亦曾登玉陛舉措多

紕繆至今金闕籍名姓獨遺漏亦曾燒大
藥消息乖火候至今殘丹砂燒乾不成就
行藏事兩失憂惱心交闔化作顛顚翁拋
身在荒陋坐看老病逼須得醫王救唯有
不二門其間無夭壽

我身

我身何所似似彼孤生蓬秋霜翦根斷浩
浩隨長風昔遊秦雍間今落巴蠻中昔爲
意氣郎今作寂寥翁外貌雖寂寞中懷頗

冲融賦命有厚薄委心任窮通通當爲大
鵬舉翅摩蒼穹窮則爲鷦鷯一枝足自容
苟知此道者身窮心不窮

哭王質夫

仙遊寺前別別來十年餘生別猶怏怏死
別復何如客從梓潼來道君死不虛驚疑
心未信欲哭復踟躕踟躕寢門側聲發涕
亦俱衣上今日淚篋中前月書憐君古人
風重有君子儒篇詠陶謝輩風襟袂阮徒

出身既蹇連生世仍須臾誠知天至高安
得不一呼江南有毒蟒江北有妖狐皆享
千年壽多於王質夫不知彼何德不識此
何辜

東坡種花二首

持錢買花樹城東坡上栽但購有花者不
限桃杏梅百果參雜種千枝次第開天時
有早晚地力無高低紅者霞豔豔白者雪
皚皚遊蜂遂不去好鳥亦棲來前有長流

水下有小平臺時拂臺上石一舉風前盃
花枝蔭我頭花藥落我懷獨酌復獨詠不
覺月平階巴俗不愛花竟春無人來唯此
醉太守盡日不能迴

又一首

東坡春向暮樹木今何如漠漠花落盡翳
翳葉生初每日領僮僕荷鋤仍決渠剗土
壅其本引泉溉其枯小樹低數尺大樹長
丈餘封植來幾時高下齊扶踈養樹旣如

此養民亦何殊將欲茂枝葉必先救根株
云何救根株勸農均賦租云何茂枝葉省
事寬刑書移此爲郡政庶幾毗俗蘇

登城東古臺

迢迢東郊上有土青崔嵬不知何代物疑
是巴王臺巴歌久無聲巴宮沒黃埃靡靡
春草合牛羊緣四隈我來一登眺目極心
悠哉始見江山勢峯疊水環迴憑高視聽
曠向遠曾襟開唯有故園念時從東北來

哭諸故人因寄元八

昨日哭寢門今日哭寢門
借問所哭誰無非故交
親偉卿既長往質夫亦幽
淪屈指數年世收涕自思
身彼皆少於我先爲臬下
人我今頭半白焉得身久
存好在元郎中相識二十
春昔見君生子今聞君抱
孫存者盡老大逝者已成
塵早晚升平宅開眉一見
君

郡中春宴因贈諸客

僕本儒家子待詔金馬門塵忝親近地孤
負聖明恩一旦奉優詔萬里牧遠人可憐
島夷師自稱爲使君身騎牂牁馬口食塗
江鱗闇淡緋衫故爛斑白髮新是時歲二
月玉曆布春分頒條示皇澤命宴及良辰
冉冉趨府吏蚩蚩聚州民有如蟄蟲鳥亦
應天地春薰草席鋪座藤枝酒注樽中庭
無平地高下隨所陳蠻鼓聲坎坎巴女舞
蹲蹲使君居上頭掩口語衆賓勿笑風俗

陋勿欺官府貧蜂巢與蟻穴隨分有君臣
開元寺東池早春

池水暖溫暎水清波潋灩蒹葭青泥中新
蒲葉如劍梅房小白褱柳彩輕黃染順氣
草薰薰適情鷗汎汎舊遊成夢寐往事隨
陽焱芳物感幽懷一動平生念

東澗種柳

野性愛栽植植柳水中坵乘春持斧斫栽
截而樹之長短旣不一高下隨所宜倚岸

埋大幹臨流挿小枝松栢不可待梗枿固
難移不如種此樹此樹易榮滋無根亦可
活成陰況非遲三年未離郡可以見依依
種罷水邊憇仰頭閑自思富貴本非望功
名須待時不種東溪柳端坐欲何爲

卧小齋

朝起視事畢晏坐飽食終散步長廊下退
卧小齋中拙政自多暇幽情誰與同孰云
二千石心如田野翁

步東坡

朝上東坡步夕上東坡步東坡何所愛愛
此新成樹種植當歲初滋榮及春暮信意
取次栽無行亦無數綠陰斜景轉芳氣微
風度新葉鳥下來萎花蝶飛去閑携斑竹
杖徐曳黃麻屨欲識往來頻青蕪成白路

徵秋稅畢題郡南亭

高城直下視蠢蠢見巴蠻安可施政教尚
不通語言且喜賦歛畢幸聞閭井安豈伊

循良化賴此豐登年按牘既簡少池館亦
清閑秋雨簷果落夕鐘林鳥還南亭日蕭
灑偃卧恣踈頑

蚊蠶

巴徼炎毒早三月蚊蠶生呬膚拂不去遶
耳薨薨聲斯物頗微細中人初甚輕如有
膚受譖久則瘡疔成疔成無柰何所要防
其萌麼蟲何足道潛喻倣人情

登龍昌上寺望江南山懷錢舍人

騎馬出西郭悠悠欲何之獨上高寺去一
與白雲期虛檻晚蕭灑前山碧參差忽似
青龍閣同望玉峯時因詠松雪句永懷鸞
鶴姿六年不相見况乃隔榮衰

郊下

西日照高樹樹頭子規鳴東風吹野水水
畔江蘼生盡日看山立有時尋澗行兀兀
長如此何許似專城

遣懷

樂往必悲生泰來猶否極誰言此數然吾
道何終塞嘗求詹尹卜拂龜竟默默亦曾
仰問天天但蒼蒼色自茲唯委命名利心
雙息近日轉閑安鄉國亦休憶迴看世間
苦苦在求不得我今無所求庶離憂悲域

歲晚

霜降水返壑風落木歸山冉冉歲將晏物
皆復本源何此南遷客五年獨未還命途
分已定日久心彌安亦嘗心與口靜念私

自言去國固非樂歸鄉未必歡何須自生
苦捨易求其難

負冬日

杲杲冬日出照我屋南隅負暄閉目坐和
氣生肌膚初似飲醇醪又如蟄者蘇外融
百骸暢中適一念無曠然忘所在心與虛
空俱

委順

山城雖荒蕪竹樹有嘉色郡俸誠不多亦

足充衣食外累由心起心寧累自息尚欲
忘家鄉誰能筭官職宜懷齊遠近委順隨
南北歸去誠可憐天涯住亦得

宿溪翁

衆心愛金玉衆口貪酒肉何此溪上翁飲
瓢亦自足溪南刈薪草溪北修牆屋歲種
一頃田春驅兩黃犢於中甚安適此外無
營欲溪畔偶相逢庵中遂同宿辭翁向朝
市問我何官祿虛言笑殺翁郎官應列宿

重過壽泉憶與楊九別時因題店壁
商州南十里有水名壽泉湧出石崖下流
經山店前憶昔相送日我去君言還寒波
與老淚此地共潺湲一去歷萬里再來經
六年形容已變改處所猶依然他日君過
此殷勤吟此篇

西掖早秋直夜書意
自此後中書
舍人時作

涼風起禁掖新月生宮沼夜半秋暗來萬

年枝嫋嫋炎涼遞時節鍾鼓交昏曉遇聖
惜年衰報恩愁力小素餐無補益朱綬虛
纏繞冠蓋栖野雲稻粱養山鳥量力私自
省所得已非少五品不爲賤五十不爲夭
若無知足心貪求何日了

庭松

堂下何所有十松當我階亂立無行次高
下亦不齊高者三文長下者十尺低有如
野生物不知何人栽接以青瓦屋承之白

沙臺朝昏有風月燥濕無塵泥疏韻秋撼
撼涼陰夏淒淒春深微雨夕滿葉珠濯濯
歲暮大雪天歷枝玉皚皚四時各有趣萬
木非其儕去年買此宅多爲人所哈一家
二十口移轉就松來移來有何得但得煩
襟開即此是益友豈必交賢才顧我唯俗
士冠帶走塵埃未稱爲松主時時一愧懷

竹窻

嘗愛輞川寺竹窻東北廊一別十餘載見

竹未曾忘今春二月初卜居在新昌未暇
作厩庫且先營一堂開窓不糊紙種竹不
依行意取北簷下窓與竹相當遶屋聲淅
淅逼人色蒼蒼烟通杳藹氣月透玲瓏光
是時三伏天天氣熱如湯獨此竹窓下朝
迴解衣裳輕紗一幅巾小簟六尺牀無客
盡日靜有風終夜涼乃知前古人言事頗
諳詳清風北窓卧可以傲羲皇

同韓侍郎遊鄭家池吟詩小飲

野艇容三人晚池流浼浼悠然倚棹坐水
思如江海宿雨洗沙塵晴風蕩烟靄殘陽
上竹樹枝葉生光彩我本偶然來景物如
相待白鷗驚不起綠芡行堪採齒髮雖已
衰性靈未云改逢詩遇盃酒尚有心情在

晚歸有感

朝弔李家孤暮問崔家疾迴馬獨歸來佢
眉心鬱鬱平生所善者多不過六七如何
十年間零落三無一劉曾夢中見元向花

前失漸老與誰遊春城好風日

曲江感秋二首 并序

元和二年三年四年予每歲有曲江感秋詩凡三篇編在第七集卷是時予爲左拾遺翰林學士無何貶江州司馬忠州刺史前年遷主客郎中知制誥未周歲授中書舍人今遊曲江又值秋日風物不改人事屢變况予中否後遇昔壯今衰慨然感懷復有此作噫人生多故不知明年秋又何

許也時二年七月十日云耳

元和二年秋我年三十七長慶二年秋我
年五十一中間十四年六年居譴黜窮通
與榮悴委運隨外物遂師廬山遠重弔湘
江屈夜聽竹枝愁秋看灩堆沒近辭巴郡
印又秉綸闡筆晚遇何足言白髮映朱紱
銷沈昔意氣改換舊容質獨有曲江秋風
炯如往日

又一首

踈蕪南岸草蕭颯西風樹秋到來幾時蟬
聲又無數莎平綠茸合蓮落青房露今日
臨望時往年感秋處池中水依舊城上山
如故獨我鬢間毛昔黑今垂素榮名與壯
齒相避如朝暮時命始欲來年顏已先去
當春不歡樂臨老徒驚悞故作詠懷詩題
於曲江路

翫松竹二首

龍蛇隱大澤麋鹿遊豐草栖鳳安於梧潛

魚樂於藻吾亦愛吾廬廬中樂吾道前松
後脩竹偃卧可終老各附其所安不知他
物好

坐愛前簷前卧愛北窓北窓竹多好風簷
松有嘉色幽懷一以合俗念隨緣息在爾
雖無情於予即有得乃知性相近不必動
與植

衰病無趣因吟所懷


朝食多不飽夜卧常少睡自覺寢食間都

無少年味平生好詩酒今亦將捨棄酒唯
下藥飲無復曾歡醉詩多聽人吟自不題
一字病姿引衰相日夜相繼至況當尚少
朝彌慙居近侍終當求一郡聚少漁樵費
合口便歸山不問人間事

逍遙詠

亦莫戀此身亦莫厭此身此身何足戀萬
劫煩惱根此身何足厭一聚虛空塵無戀
亦無厭始是逍遙人

白氏文集卷第十一



白氏文集卷第十一

